

ଅନ୍ତଃଶିଳା

କ୍ରିଷ୍ଣଜିତିପ୍ରସାଦ ମୁଖୋପାଧ୍ୟାୟ

ଦୁଇ ଟାକା

প্রকাশক—
শ্রীকৃষ্ণভূষণ ভাদুরী
৯, রক্তমঞ্জী ষ্ট্রীট, বালীগঞ্জ,
কলিকাতা।

সরস্বতী লাইব্রেরী
৯, রমানাথ মজুমদার ষ্ট্রীট
ভারতী ভবন
২৪।৫এ, কলেজ ষ্ট্রীট,
কলিকাতা।

মুদ্রাকর—শ্রী শৈলেন্দ্রনাথ গুহ রায়, বি এ

• শ্রীসরস্বতী প্রেস লিঃ,

১নং রমানাথ মজুমদার ষ্ট্রীট, কলিকাতা।

মা

তোমার কাছে আমি কত ঋণী তা আমিই
জানি। সে ঋণের পরিশোধ হয় না।
তাই উৎসর্গকে স্বীকারোক্তি ভেবে।

১লা আষাঢ়, }
১৩৩২ }

—ধুবু—

যখন করোনার সাহেব গম্ভীরকণ্ঠে রায় দিলেন, ‘সাবিত্রী দেবী, খগেন্দ্রনাথ রায়ের স্ত্রী, ক্ষণিক উন্মাদনার বশে আত্মহত্যা করেছেন,’ তখন খগেন বাবু সব কথা স্থপটভাবে শুনতে পেয়েছেন বলে মনে হল না। সাহেব চেয়ার ছেঁড়ে গুঁঠবার সময় সকলে দাঁড়িয়ে উঠলেন ; কিন্তু খগেন বাবু/চেয়ারে বসেই রয়েছেন এদিকে উকীল বাবু তাঁর জামা ধরে টানলেন, খগেন বাবুর মুখ থেকে অশ্রুটস্বরে বেরিয়ে এল, ‘মহাশয়, ধন্যবাদ’। সাহেব হুঃখ জানিয়ে চলে যাবার পর উকীল মহাশয় তাঁকে বাইরে এনে টাক্সীতে তুলে দিলেন। গাড়ি ছাড়বার পূর্বে তিনি খগেন বাবুকে তাঁর একটি ছোট্ট প্রাপ্যের কথা লজ্জার সহিত স্মরণ করতে বাধ্য হলেন। পকেট থেকে একখানি নোট বার করে উকীল বাবুকে দেওয়াতে তিনি বল্লেন, ‘ধন্যবাদ, চিরকাল আদর্শ নিয়ে থাকলে চলেনা, খগেন বাবু, আমরাও যুবাবয়সে ঐ রকম ছিলাম ; কি আর বলব, তবে যদি কখনও উপকারে আসি সত্যি কৃতজ্ঞ হব ; ভুলবেন না, আমি ঐ কোনের চেয়ারেই বসি ; লোকে যে ঘাই বলুক্কে, আপনি তোয়াক্কা করবেন না ; আমি অন্ততঃ আপনাকে বুঝেছি, আমি উকীল, পুলিশকোটে দশ বৎসর ঘুরছি, মানুষ চিনতে আর বাকী নেই ; মেয়ে মানুষ হিংসেতে সব করতে পারে কিন্তু স্ফুল্লের মা হতে পারে না, এই দেখুন না, পাঁচ পাঁচটি মেয়ে ; হা, এই নিন, রায়টা, নচেৎ মড়া ছাড়বে না’। গাড়ি ছুটল মেডিক্যাল কলেজের দিকে।

অন্তঃশীল।

বৌবাজার ও চিত্তরঞ্জন অ্যাভিনিউএর কোনে ট্রাফিক পুলিশ গাড়ি থানিয়ে দিলে। এঞ্জিনের ধক্ ধক্ শব্দ হতে লাগল। পাশে একটি রিকশ'র ওন্দর একজন স্থূলকায় ভদ্রলোক বসে ছিলেন। পায়ের কাছে একটা মল্ল মোট, খুব বড় সতরঞ্চি হবে। রিকশওয়ালা হাফাচ্ছে, সারবন্দী গাড়ি, গড়ের মাঠের দিকে ছুটছে। তোরী দেখে রিকশ'র ভদ্রলোক আলাপ জমাতে গেলেন, 'এই যে, খগেন বাবু! আজ খেলা দেখতে যাবেন না? আমি যাই না, কেবল ভিড় খাও আর পয়সা খরচ কর! ট্যাকসীতে বসে সিগারেট খাবেন না।' খগেন বাবু সিগারেট উল্টে পাঁচ আঙ্গুল দিয়ে ঢেকে রাখলেন। ফাঁক দিয়ে গরম ধোঁয়া বেরুচ্ছিল, হাতটা ট্যাকসীর বাইরে রাখলেন। কোথায় যেন একে দেখেছেন মনে হল, হাঁ, হাঁ মনে পড়েছে—ভদ্রলোক বিবাহাদি শুভ কার্যে বার্ডি সাজান; তাঁর শ্বশুর বাড়ির পরিচিত, তাঁরই বিবাহে প্যাণ্ডাল সাজিয়েছিলেন, বিবাহের পূর্বরাত্রে সানিয়ানা পুড়ে যায়, পরের দিন নতুন আসরের কোনে গোটাকয়েক পোড়া বাঁশ জড় করা ছিল মনে আছে। ভদ্রলোকের অত লোকসান হওয়াতে পরে মাথা খারাপ হয়ে যায়, বিকারের খেয়ালে 'আগুন, আগুন, সিগারেট' বলে চৈচাতেন না কি! সামান্য সিগারেটে অত ক্ষতি। পুলিশম্যান বাঁশ বাজালে, ট্যাকসীর মটারে এর মধ্যে বার আনা উঠেছে। গাড়ি বৈকে চিত্তরঞ্জন অ্যাভিনিউতে এল। তাঁরও মাথা খারাপ হবে না কি! না, তাঁর কেন হবে? তিনি তিল মাত্র দোষ করেন নি।

সাবিত্রীর স্বভাবই ছিল তাই, সন্দেহ আর সন্দেহ এদারে ভাল মানুষ ছিল, বিবাহের কয়েক বৎসর পর পর্যন্ত কোন গোলমাল হয়নি, তারপর, তারপর কোথা থেকে তার দল জুটল, একেবারে গলাগলি ভাব। মাসীমা প্রথম প্রথম আপত্তি করতেন, খগেন বাবুই বাক্য বলতেন, 'কেন মাসীমা, রমলা দেবী রীতিমত শিক্ষিতা, তার মতো স্বাবলম্বী পুরুষ যদি হতে পারত!' মাসীমা বলতেন, 'শিক্ষার মুখে ছাই, শিক্ষার দ্বারা ভাল বাসতে শেখে না, পরকে ভাল বাসতে শেখায়। মেয়েদের আবার স্বাবলম্বন! দেখিস্ তুই!' মাসীমা অল্প কথার মধ্যেই জ্ঞানের সঙ্গে ভবিষ্যদবাণী মিশিয়ে দিতেন। সেই মাসীমারও অপবাদ! তিনি কিনা তাঁর বোনপোর সব দোষ ঢাকতেন, আর তাঁর কিনা নিজের বাড়ির বৌএর ওপর জাত ক্রোধ। কারণ কি? বোনপোর সঙ্গে দেওরাঝির বিষয়ে দিতে পারলে ছুদিক থেকেই সুবিধা হত, রাজত্ব করতে পারতেন, সেটা হয় নি! ছি, ছি,—মাসীমার দোষ ছিল কেবল ছেলেকে পুত্র মতন ভালবাসা, তাঁর স্নেহ ছিল অন্ধ। তাঁর সাবিত্রীর বন্ধুদেব মতো উচ্চশিক্ষা ছিল না, ছিল হৃদয়। হৃদয়ের শিক্ষা তাঁর হয়েছিল, স্বাবলম্বী হওয়ার অবকাশ না পেয়েও, পরকে ভালবাসে তিনি ছিলেন সম্পূর্ণ। তিনি কেবল ভালবাসতেই জানতেন, প্রথমে ছেলেকে, ছেলে বই খেঁকনো কখনও ভাবেন নি, তারপর ছেলের বৌকে। তবে ছেলের বৌএর সে ভালবাসা পছন্দ হতো না, তাই মাসীমা চুপ করেই ভালবাসতেন, সাবিত্রীর কোন কাজে

অন্তঃশীলা

বাধা দিতেন না, বৌএর সংক্রান্ত সব ব্যাপার থেকে নিজেকে সরিয়ে রাখতেন, বিশেষ কৌশলের সঙ্গে। সেই মাসিমাকে শেষে কাশীবাসী হতে হল! ও ধরণের স্ত্রীলোক লোপ পাচ্ছে, আজকাল সকলে স্বাধিকারপ্রমত্ত, অথচ ক্ষমতা নেই। অন্ততঃ সাবিত্রীর ছিলনা, রমলা দেবী না হইল তার এক পা চলত না! যার ধর্ম তারে সাজে অত্রে লেগে বাজে। মাসীমার মতো স্ত্রীলোক সম্বন্ধে, স্ব-মত্রে, নিজেকে ভালবাসার সামগ্রী করে তোলে না, নানাপ্রকার মনোহারী সাজসজ্জার দ্বারা। আর সাবিত্রী ও তার বন্ধুরা, রমলা দেবীও! দামী সাড়ী, সঁটে পরা, হাতকাটা ব্লাউস, টিলে থোঁপা, চোখে সূর্য্য, পায়ে নাগ্‌রা, তাদের হৃদয় কোথায়? হৃদয় হয়ত আছে, তবে হিংসায় পোরা, মাংসঘো ভর্তি। এ শিক্ষার মুখে ছাই!

রমলা দেবী ছিলেন আধুনিক মহিলা। মাসিক-পত্রিকার মহিলা-প্রশস্তিতে বোধ হয় তাঁর ফোটোও বেরিয়েছিল। এক কাপি ছিল সাবিত্রীর কাছে, কোনে বাঁকা করে গোটা অক্ষরে লেখা ছিল, 'রমা'। ফোটো তোলবার সময় কায়দা করে দাঁড়ালে বিত্রী দেখায় সকলকে, স্ত্রী-পুরুষনির্বিশেষে। ছবিটাতে রমলা দেবীকে খুব বিত্রী দেখায় নি—তবে, সাবিত্রীর জন্ম বলতে হ'ত খুব ভাল হয় নি। অবশ্য মতগোপনের বিশেষ কোন প্রয়োজন ছিল না। সাবিত্রী চাইত পগেন বাবু তাঁর বন্ধুর সঙ্গে মেশেন, ঠিক মেশেন না, অল্প মিশেই স্বখ্যাতি ও তারিফ করেন, সাবিত্রীকে আরো বেশী করে মিশতে দেন। কিন্তু রমলা

দেবীকে তাঁর বিশেষ ভাল লাগত না খগেন বাবু নরবারই বলে এসেছেন। পুরুষ ও দম্ভের মধ্যে কোন পার্থক্য নেই, তাই মনেই হত না যে রমলা দেবী স্ত্রীজাতি, সাবিত্রী-জাতির অন্তর্ভুক্ত কোন বিশেষ জীব। রমলা দেবীর বিপক্ষে এক আকৃতি ছাড়া বোধ হয় অল্প আপত্তি তাঁর বিশেষ ছিল না। তাঁকে দেখলেই খগেন বাবুর বুদ্ধি জাগ্রত হত, কদমফুলের রোঁয়ার মতো, কিন্তু সাজসজ্জা দেখে সে প্রবৃত্তি আবার নিবৃত্ত হত, মন তাঁর কুকড়ে যেতো। সাবিত্রী জিজ্ঞাসা করত, ‘রমাদিকে দেখিতে পার না কেন তুমি? আমার বন্ধু বলে, আমাকে ভালবাসে বলে?’ খগেন বাবু উত্তর দিতেন, ‘তোমার রমাদি স্ত্রীলোক নন পুরুষ, তাঁর দেহ ও মন বিপরীতধর্মী, ওঁর দেহগত কোন আকর্ষণ নেই আমার কাছে, ওঁর সঙ্গে বন্ধুত্ব চলে, প্রেম চলে না, ওঁকে শ্রদ্ধা করা যায় দূরে থেকে, ওঁর জন্যে পাগল হওয়া যায় না।’ ‘তবু ভাল, শ্রদ্ধা করা যায় বলছ!’ ‘হয়ত যায়। ওঁর আত্মপ্রতিষ্ঠা ভাবটা মন্দ নাগে না, কিন্তু আধারের সঙ্গে আধেয়ের সম্বন্ধ নেই, সামঞ্জস্য নেই। ভগবান কি ভুলই করেছেন!’ ‘তোমার কাছে সবই ভুল, সবই উলটে! পালটা’ ‘আমার কাছে কেন? কাকে ওলট পালট বল? যেটা তোমার তৈরী, তোমারই বাস্তব রীতি, তারই বিপরীত কাজকে কোন অধিকারে ওলট পালট বল? শারীরিক চিহ্নের জন্য মেয়েদের মেয়ে মানুষ স্বলতে হবে? আমি পুরুষ ও স্ত্রীর দেহগত প্রভেদকে প্রধান করি না, চরিত্রগত প্রভেদকেই স্বীকার করি, কেউ বহিমুখী, কেউ অন্তর্মুখী, কেউ কড়ি, কেউ কোমল, পুরুষ-

অন্তঃশীলা

স্ত্রীর গঠননির্বিশেষে । রমলা দেবীর চরিত্রে যে বস্তুটি পাই সেটি পুরুষের সহজ শক্তি, স্ত্রীমূলক খামখেয়াল নয়, যেটি তোমাকে অত লোভনীয় করে তুলেছে । সাবিত্রী হেঁসেছিল, কি বুঝে কে জানে ! হয়ত সাবিত্রী বুঝতেই পারেনি যে খগেন বাবুর নিজের চরিত্রগত কোন অভাব রমলা দেবীর চরিত্রে পূরণ হয়েছিল সন্দেহ করেই তিনি রমলা দেবীকে পছন্দ করছেন না, রমলা দেবীর উপর রাগতেন । রমা দেবী খগেন বাবুকে তাঁর অসম্পূর্ণতার কথা স্মরণ করিয়ে দিত, সাবিত্রী দিত দুর্বলতার কথা, সামাজিক কর্তব্যের কথা । আজ—আজ একটি স্মারক-লিপি ধুয়ে পুঁছে গেল । রইল বাকি নিজের অসম্পূর্ণতা, আর আফশোষ, বনাম ঘণার জের, সম্পূর্ণতার আকাঙ্ক্ষা । Ambivalence ভেঙ্গে যায় নাকি ? পরমাণু বিভক্ত হলে যে শক্তি নির্গত হয় তাতে বিশ্বত্রস্তাও চৌচির হয়ে যেতে পারে । ভাবতে ভয় হয় । পরিষ্কার ভাবে দেখাই অন্যায় ; ঘোলাটে অবস্থাতেই সোয়াস্তি । ঘৃণা বরং ভাল, চিন্তার চেয়ে, ঘৃণা করা সহজ, সত্যকে স্পষ্টভাবে দেখা শক্ত ।

ট্যাকসী মর্গের সামনে এল । ভাড়া চুকিয়ে খগেন বাবু নেমে পড়লেন । অঙ্গনে দুটি পাহারাওয়াল, আর অনেকগুলি মোটর রয়েছে । সকলেরই কি এক দশা, এক ভাগ্যা ? গাড়ি নিশ্চয়ই ডাক্তারদের । একটা তার মধ্যে পরিচিত । কিছুদিন পূর্বে ঐ ধরণের গাড়ি কিনলেন রমলা দেবী । সাবিত্রী নতুন গাড়ি চড়ে বেড়াতে গেল । বেড়িয়ে ফেরবার পর খগেন বাবু লক্ষ্য করেছিলেন তাঁর স্ত্রীর চোখে স্বর্ষ্য, গালে ও ঠোঁটে রঙ, পরণে

লাল ডগ্‌ডগে সাড়ি, সাড়িটা নিশ্চয়ই রমলা দেবীর। একবার রমলা দেবী ঐ সাড়ি পরে কোলকাতা সহরে আগুণ লাগাতে সাক্ষাভ্রমণে বেরিয়েছিলেন। সে রং ঢাক ফুলের রংয়ের মতো তীব্র; রমলা দেবীকে মন্দ দেখাচ্ছিল না। শীতের পর নিজের দেশের দিগন্তব্যাপী মাঠে-খড়ের গাদায় আগুণ লেগেছে, তারই একটি লেলিহান শিখা দেন মৃতি নিয়েছে, সহরের নাস্তা, এই টুকুই অশোভনতা। খগেন বাবু ঘোর রং পছন্দ করতেন না, এবং সাবিত্রীর ঐ রকম সাজসজ্জার উগ্রতা তাঁকে পীড়া দিত। অথবা অনুরোধে সাবিত্রীর রুচিবিকার ঘটছে দেখে তিনি ববাবরই প্রতিবাদ করতেন। কল হত না। এবার প্রতিবাদ করেছিলেন, রমলা দেবীর সম্মুখেই। সাবিত্রীর কাছে উত্তর পান, ‘তোমরা যখন মাছরাঙ্গা পার্থী সেজে টেনিস খেলতে যাও, তার বেলা?’ খগেন বাবু উত্তর করেন, ‘কৈ আমার ব্লেজার নেই ত?’ জবাব পান, ‘তোমার নেই বটে, কিন্তু তোমাদের থাকে, বিজনের দুটো তিনটে আছে। তুমি মিশুক নও, নিজের খেয়াল নিয়েই থাক, আপনভোলা গিব-ঠাকুর। যারা লোকজনের সঙ্গে মেশে তাদের ব্লেজার থাকে। তুমি নিজের সম্বন্ধে কেয়ারলেশ বলে আমিও তাই হব?’ রমলা এতক্ষণ চুপ করেছিলেন, বাকা হাঁসি হেসে বলেন, ‘আপনি সত্যি সাবিত্রীকে ভালবাসেন, নিজের মতো করে গড়তে চান।’ রমলা দেবীর হাঁসিমুখের মন্তব্যকে শ্লেষ ভেবে খগেন বাবু চুপ করে যান, সাবিত্রীর ইঙ্গিতে রমলা দেবীকে বাড়িতে পদার্পন করতে

অন্তঃশীলা

অত্মরোধ করেন, রমলা দেবী ন'মেননি। সে রাত্রি কত মান অভিমানের পালা হল! আজ রমলা দেবী মোটর চড়ে এসেছেন তাঁর মৃত বন্ধুর দেহের প্রতি সম্মানজ্ঞাপন করতে, খুঁটান হলে যেমন মালা নিয়ে যেতেন গোরস্থানে। পরনে সাদা সাড়ি, কাল ফিতে পরলেই মানাত। এ দুদিন খুঁটই করেছেন অবশ্য, কিন্তু আজ এখান পর্য্যন্ত ধাওয়া করা উচিত হয়নি নিশ্চয়ই। আজ সাবিত্রীর সঙ্গে খগেন বাবুর অনেক কথা কইবার প্রয়োজন ছিল। আজ ভেবেছিলেন তিনি অনেক প্রাণের কথা কইবেন, মনে মনে তার সঙ্গে, কিন্তু গাড়িটা দেখেই তাঁর মন কেমন আপনা থেকেই বিমর্ষ হয়ে গেল। আজ গুঁর আসবার দরকার ছিল না, আসাটা তাঁর অন্যায় হয়েছে। সাবিত্রীর বন্ধু স্বামীজীর মধ্যে যে ব্যবধান সৃষ্টি করেছিলেন আজও কি তাকে অপমৃত করার সুযোগ মিলবে না! ব্যবধান! ব্যবধান আবার কি? সবই একটানা স্রোত। কার মধ্যে ব্যবধান? কে সরায়? রমলা দেবী ব্যবধান এনেছিলেন, না, সাবিত্রী আত্মহত্যা করে খগেন বাবু ও তাঁর জগতের মধ্যের ব্যবধানটি সরিয়ে দিলে? এইবার তিনি পরিষ্কার দৃষ্টিতে সব বুঝতে পারবেন।

মর্গের মধ্যে কন্ কনে হাওয়া। চারধারে কাচের আলমারী, সর্বত্র সাদা পাথরের টেবিল, পায়ালগুলো পর্য্যন্ত সাদা; একটার চারপাশে ডাক্তার ও ছাত্রের দল, সাদা 'ওভার অল' পরা, ডাক্তারের হাতে সাদা রবারের দস্তানা, ছাত্রদের মুখে একত্রে ব্যস্ততা ও অতিরিক্ত গাম্ভীর্য্য; সব মুখ বুজে কাজ করছে।

ডাক্তার সাহেব খগেন বাবুকে দেখতে পেয়ে এগিয়ে এলেন। করোনাব্যবস্থার রায় দেখে ডাক্তার সাহেব আসিসিষ্ট্যান্টকে বললেন, 'মল্লিক, পাঁচ নম্বরের লাস খালাস হল, ছেলেদের তাহলে ছুটি, আবার এলে দেখা যাবে।' হাতঘড়ির দিকে চেয়ে সাহেব দ্রুতপদে বেরিয়ে গেলেন। পাশের একটা গা-আলমারী থেকে ডালা বেরিয়ে এল, পা দুটো হলদে, বাকী অঙ্গ নাদা কাপড়ে ঢাকা, পায়ে সেই ছেলে বয়সে গরম ছুধ পড়ে যাওয়ার দাগ। একজন সিনীয়ার ছাত্র এগিয়ে এসে বললেন, 'লোকজন এনেছেন, না আমাদের সমিতির খবর দেবো? পাঁচ-টা কাটা দিলেই হবে।' পিছন থেকে একজন মহিলা—রমলা দেবী, সাবিত্রীর বন্ধু, এগিয়ে এসে বললেন, 'না, প্রয়োজন নেই, আপনি গাড়িটা নিয়ে আত্মীয়স্বজনকে ডেকে আনুন। চলুন, আমিই না হয় যাচ্ছি আপনার সঙ্গে।' 'না আপনাকে কষ্ট করতে হবে না, আমি একলাই নিয়ে আসছি।' খগেন বাবুর সঙ্গে রমলা দেবী বাইরে এলেন। 'লোকজন কোথায় পাবেন?' 'লোকজন, আচ্ছা, ক'জন চাই? আমায় সব বন্ধুরা আছেন, কিন্তু—' 'তাদের খবর পরে দিলেই হবে, পরে তাঁরা খবর পেলেই চলবে, আমার সঙ্গে আসুন।' রমলা দেবীর মুখের দিকে চেয়ে খগেন বাবু আপত্তি করলেন না; লোকই বা তিনি কোথায় পাবেন? বাইরে এসে খগেন বাবু গাড়িতে উঠলেন, সামনের সীটে নয়, রমলা দেবীর পাশে।

কি রকম অস্বস্তি হচ্ছিল, অথচ মজার, পরিহাসের। তিনি

অন্তঃশীলা

একবার সাবিত্রীর অপরিচিতা এক বন্ধুপত্নীকে বায়স্কোপ দেখাতে নিয়ে যান, ট্যাক্সীতে যখন তাঁকে নিয়ে ফিরছেন তখন সাবিত্রীর একজন বন্ধুর সঙ্গে তাঁর দেখা হয়। সেই সামান্য ঘটনা থেকে কত না গুণগোল হল : সাবিত্রী বলেছিল, 'ঠেক, কোন্ সমাজে কোন্ পুরুষ অন্যের স্ত্রীকে স্বামীর অবর্তমানে থিয়েটার বায়স্কোপ পাশে বসিয়ে দেখাতে নিয়ে যায়?' সাবিত্রীর ভিন্ন-সমাজ সম্বন্ধে গভীর জ্ঞান দেখে খগেন বাবু চমৎকৃত হন, চুপ করেই থাকেন। খগেন বাবু বিলেত ফেরৎ ছিলেন না, বিদেশী-সমাজ সম্বন্ধে তাঁর পরোক্ষ অভিজ্ঞতা নভেল নাটক থেকেই আহৃত। হয়ত সাবিত্রী রমলা দেবীর কাছ থেকেই শিখেছিল। রমলা দেবী উচ্চ শিক্ষিতা, বিলেত ফেরৎ সমাজে তাঁর অবাধ গতিবিধি, ক্রচিও তাঁর মাঙ্কিত হয়েছিল, বোধ হয় জেন অষ্টেন পড়ে। আজ সেই রমলা দেবীর পাশে বসে চলেছেন, তবে বায়স্কোপ দেখতে নয়, শবযাত্রার যোগাড় করতে। আনন্দ উপভোগের নিয়ম ও উপকরণ থেকে নিরানন্দ উৎসবের রীতি ও উপকরণ একটু ভিন্ন হবে বৈ কি !

গাড়ির এক কোণে খগেন বাবু যেন আলগোছে বসে রইলেন, দৃষ্টি তাঁর রাস্তার দিকে। পূর্ববঙ্গীয়দের জামা কাপড়ের দোকান অতিক্রম করে গাড়ি মির্জাপুরের এক গলিতে প্রবেশ করল। মোড়ের মাথায় একটি গন্ধীটুপীপরা ছেলে আনন্দবাজার বিক্রী করছিল। সকালের কাগজ পড়া হয় নি। কেনবার ইচ্ছা থাকলেও তাঁর সাহস হল না, পাছে নিজের খবর নিজেকে পড়তে হয়। রমলা দেবী নিজের বার্ডির মধ্যে প্রবেশ করলেন, খগেন

বাবু নামলেন না। খানিক পর, রমলা দেবীর ফিকতে দেবী হবে ভেবে, তিনি মোড়ের ওপর এক চায়ের দোকানে এক কাপ চা তাড়াতাড়ি তৈরী করতে অর্ডার দেবার জন্ত নামলেন। পাছে চায়ের নেশা রমলা দেবীর কাছে এই সমস্ত-বিসদৃশ স্বেচ্ছা এই লজ্জায় ডিশে ঢেলে অল্প সময়ের মধ্যেই চা'র বাটি নিঃশেষ কবলেন; একটা সিগারেট ধরিয়ে গাড়ীর দিকে অগ্রসর হতেই দেখলেন জন কয়েক স্তূপদর্শন যুবক নেটের গেঞ্জী পরে, কাঁধে টার্কিশ তোয়ালে ফেলে বাড়ির দরজায় দাঁড়িয়ে আছে; নিমন্ত্রণ বাড়ির মেয়ে খাওয়ানর দিন তেতলায় ছাদের কোণে কক্ষের অপেক্ষায় যেমন তারা দাঁড়িয়ে থাকে। বেচারিরা ম্যাচ দেখতে যেতে পায় নি! রমলা দেবী একজনকে সম্বোধন করে বলেন, 'বিজন, স্তূপদর্শন কোথায় গেল?' 'স্তূপদর্শন খাট নিয়ে আসছে।' রমলা দেবী ভেতর থেকে একটা ফরসা তোয়ালে জড়ান ধুতি এনে বিজনের হাতে দিলেন। একটি ছেলে, স্তূপদর্শন, মুঠের মাথায় করে একটা খাট নিয়ে এল। হাল্কা জারুল কাঠ, দড়িগুলোর মধ্যে বড় ফাঁক ফাঁক। রমলা দেবী বলেন, 'আচ্ছা, স্তূপদর্শন, আর দেবী কোরো না, খগেন বাবুর শরীর ভাল নয়। ওঁকে এখানেই নিয়ে এস।' 'বিজন তুমি বাড়ি যাও', 'যাচ্ছি, স্তূপদর্শন। তোমার কাছে থাকি, রমাদি' 'থাক' 'বিমল, তুমি গাড়িতে ওঠ।' 'গাড়িতে চারজন যুবক উঠলেন। ছাড়বার সময় রমলা দেবী বিমলের হাতে কি একটা দিলেন। স্তূপদর্শন ও অজ্ঞাত তিন জন খাট নিয়ে হেঁটে চলল। অল্পক্ষণের মধ্যেই গাড়ি মর্গের দরজায় উপস্থিত

অন্তঃশীল।

হল। বিমল গাড়ি থেকে লাফিয়ে পড়ল, শেষে খগেন বাবু নামলেন। ক্ষীণকণ্ঠে বল্লেন, ‘করোনারের ছাড়পত্র পাওয়া গিয়েছে, আপনাই বাঁচ করুন না?’ ‘আগে খাট আস্বক’ ‘ততক্ষণ?’ ‘এখন এসে পড়বে’; ‘ততক্ষণ আর কি করা যায়, কলেজের রেস্টুরাঁতে কিছু খেয়ে নেওয়া যাক, আপনিও আসুন, কিছু খেয়ে নিন, ভাল খাবার দেয়, ভেজাল দেবার জো নেই; এটা বেল-গেছেও নয়, বাজারও নয়।’ খগেন বাবু ব্যস্তসমস্ত হয়ে বললেন, ‘বেশ বেশ তো, চলুন না’। নিজের অজানিতে পকেটে হাত দিচ্ছেন দেখে একজন যুবক বল্লেন, ‘আপনি থাকুন, আপনার শরীর খারাপ, আমরা এখনি আসছি।’ ‘ছেড়ে যাওয়াও উচিত হবে না বোধ হয়’—বলে খগেন বাবু সোয়াস্তির নিশ্বাস ফেললেন।

যুবকবৃন্দ চলে গেলে খগেন বাবু আজ এই প্রথম একলা হলেন। একলা তিনি মনে মনে বহুদিনই হয়েছিলেন। হয়ত, জন্মেছিলেন ভীষণ একলা হয়, যমজ আত্মার একটি হয়ে নয়। মনে কেউ যমজ হয় না, দেহেই হয়। কবির। কি ভীষণ মিথ্যাকথাই না লিখতে পারেন! সেই মিথ্যাকথার জগৎ কত লোকের সর্বনাশ হয়েছে যদি তাঁরা জানতেন, তা হলে তাঁরা ...কি লেখা ছেড়ে দিতেন? কখনই নয়। তাঁরা নিতান্ত অ-সামাজিক, সমাজের কল্যাণ-কামনায় তাঁরা ব্যস্ত নন। কেবল সমাজের কাছে স্বখ্যাতি প্রশংসা করেন এই টুকু তাঁদের দোষ। মানুষ হল একলা, সজাকর মতো সে থাকে গর্বের মধ্যে; গর্বের মুখে কত পাতা কত কুটো দিয়ে সে নানা রকমের বাধা সৃষ্টি করছে, শত্রুর কবল থেকে

আত্মরক্ষা করতে। গর্তের মধ্যে সজারু থাকে শক্তিত চিত্তে, বাইরের হাওয়া প্রবেশ করল, ভেতরে সে ভয়ে কাঁপতে লগল, ঐ বুঝি এল ! এক নিঝুম গোধূলিতে সে বেরিয়ে পড়ল খাত্তের অতঃস্থানে, বাইরে এসে তার পা আর চলে না, গর্তের মুখের কাছে এসে আর এগোতে চায় না, ছুটোছুটি করে ; কোথা থেকে ঝমঝম শব্দ আসছে ! আবার ভিতরে ছুটে যাওয়া, আবার— আবার ভয়ে বাইরে আসা, ক্ষুধার তাড়নায়। সেই বাইরে আসতেই হয়, সেই ঝমঝম শব্দ সারাদেহ বেটন করে বাজতে থাকে, বাগানের কাঁটাবেড়ার কোন্ এক ফাঁক দিয়ে প্রবেশ করতে হয়, মূল উপড়ে খেতেই হয়। কপালগুণে ফিরে আসে নিজ আবাসে, সেখানে সেই অন্ধকারের মধ্যে অন্তঃরীণ-বাস ; কপালদোষে আর ফিরে আসতে হয় না, বাগানের মালী কলাগাছের তেড়্ ছুড়ে তাকে মারে, কাঁটা গুটিয়ে নেবার পূর্বেই আটকে যায়, পালান তখন অসম্ভব, তখন আবার সেই অন্ধকার ! এই-ত প্রকৃতির নিয়ম, এই বোধ হয় জীবন ! মানুষের, বুদ্ধিমান মানুষের প্রকৃতিও এই নিয়মে আবদ্ধ, পার্থক্য শুধু মালীর সঙ্গে বন্ধুত্ব-স্থাপনের আত্ম-প্রবন্ধনায়, পার্থক্য কেবল কাঁটার ওপর সামাজিকতার নরম আভরণে। মাতৃগর্ভে অন্ধকার, কবরের মধ্যে অন্ধকার ; মানুষ সীতার সন্তান, সীতাই হলেন আদিম মানব-মাতা। অথচ, এই অন্ধকারের মধ্যে এক সহযাত্রী জুটল। নিজেই পথ পায় না আবার পথ দেখাতে হবে অন্ধকে ; সে আবার অন্য পথ খুঁজতে বাগ্র নয়, মাত্র, কেবল, নিছক নির্ভরশীল,

অন্তঃশীলা

অথাৎ পথের ফটক । নিজেই এই গুহার মধ্যে ভয়েতে কাঁপছে, প্রাণ রাখতে প্রাণান্ত হচ্ছে, তার উপর এই গুহাবাসিনী, অন্ধকার-ধর্ম্মিনীর দেহ, মন ও আত্মার কল্যাণ-কামনা করা ! তাও যদি মন কিংবা আত্মা রয়েইছে প্রমত্ত পাওয়া যেত ! আপনি খেতে ঠাই পায় না শঙ্করারে ডাক ! তাও ডাকা যেত যদি তার অস্তিত্বেই শঙ্করীর ভয় দূর হত । কেবল অস্তিত্বে হবে না, উপস্থিতি, হাজরী, চাই, তারও বেশী, সান্নিধ্য । মানুষ নিজেকে নিয়েই ব্যস্ত, সে আবার পরের ভাবনা ভাববে ! কী ভীষণভাবে মানুষ ব্যস্ত ! সঙ্গিনীর পরিতোষবিধানের জন্ত নয়, কামের কোন অবিরত তাড়নার জন্ত নয়, আরো আদিম, আরো ছুনিবার যে প্রবৃত্তি সেই ভীতি দূর করতেই সে গুহার গায়ে ছবি আঁকছে, সেই দ্রুত প্রকৃতির পরিতোষবিধান করতে তার সমগ্র শক্তি নিয়োজিত করছে ; সে আবার পরের তৃপ্তিসাধন করবে কখন ও কতটুকু ? পারে না, শক্তির সীমা আছে সেইজন্তই পারে না, আর নিন্দে হয়, নিন্দে হয় জনসাধারণের কাছে । তাঁরা থাকেন হয়ত গুহার বাইরে, গাছের ডালপালায়, অগ্ন্যাগ্ন সামাজিক জীব-জন্তুর মতন ; কিংবা থাকেন ফলের রসশোষণ করবার জন্ত, ভেতরটা ভূয়ো, অন্তঃসারশূন্য করে দেবার জন্ত ; কিংবা তাঁরা পরাগ ছড়াবার জন্ত ফুলে ফুলে মধু খেতেই ব্যস্ত । এঁদের উপদেশেই সাবিত্রী গুটি কেটে প্রজাপতি হয়েছিল । তাইত এই অঘটন ঘটল । সাবিত্রী স্বধর্ম্মেই যদি আত্মনিধন করত তা হলে কোন আপত্তি ছিল নী । পিন-এ আটকান মরা

প্রজাপতি হওয়ার চেয়ে মরা গুটি হয়ে রেশমের যোগেন দেওয়া ঢের বেশী সামাজিক কাজ ।

খাট এল, শব নামান হল, খগেন বাবুকে শবের কপালে সিঁদুর পরাতে হল, সুরু করে পঁরাতে পারলেন না । মুখটা নীল, পা হলদে, পায়ের শিরগুলো নীল হয়ে ফুটে বেরিয়েছে । কী ঠাণ্ডা ! এক বিগৎ ওপর থেকেই ঠাণ্ডা বোধ হচ্ছে । সূজন নিজেই পায়ে আলতা পরিয়ে দিলে । এরা সব শিখলে কোথা থেকে ? উল্টো মুখ করে খাটে চড়ান হল । পরনে রঙ্গীন সাড়ি, সূজন গায়ের ওপর একটি খদ্দেরের চাদর বিছিয়ে দিলে । ভৌতিক ক্রীড়ার মতন যেন সব আপনা থেকেই হয়ে যাচ্ছিল । রমলা দেবীর আত্মীয়স্বজন সব তাঁরই মত কক্ষতংপর । খাটটা কাঁধে তোলবার সময় মুণ্ডটা নড়্ নড়্ করে উঠল । একজন বাহক বলে উঠলেন, ‘দোহাই মা জেগে উঠবেন না ।’ অগ্রবর্তী বাহকদের মধ্যে একজন ধমক দিলেন, ‘কি ইয়ারকি কর্ছিস্ ! সিগারেট নে—হরিবোল বলতে নেই জানিস্ ত ?’ খগেন বাবু কাঁধ দেন নি, তাই তাড়াতাড়ি দোকান থেকে একটিন সিগারেট কিনতে গেলেন । সূজন সঙ্গে গেল, নিজেই টিন কিনলে । কি রকম অদ্ভুত মনে হচ্ছিল, যেন গলাটা বন্ধ হয়ে আসছে । রসিকতা না করলেই চলত ! হরিবোলে আপত্তি কি ? হরিবোলের আওয়াজটা খে মধুর তাও নয়, শুনলে ছেলেবেলা লেপমুড়ি দিতেন, বড় হবার সঙ্গে সে ভয়টা যায় নি, মনে হত নাচু জাতেই হরিনাম নেয়, নাথকান্তন করে, ভদ্রলোক হয় শান্ত,

না হয় বৈদান্তিক, হয় ব্রাহ্ম, না হয় অবিশ্বাসী। কিন্তু হরিবোল বলতে নেই—এ যেন মানুষের অধিকার থেকে মানুষকে বঞ্চিত করা হচ্ছে! যারা আত্মহত্যা করে তারা ঈশ্বরে বিশ্বাস করে না, সেই জন্য বোধ হয় ঈশ্বর-বিশ্বাসী শববার্হারা তাদের আত্মার সদগতি কামনা করেন না। বিশ্বাসীদের ঈশ্বর বড়ই ছোট, প্রতিহিংসা-পরায়ণ। নেটের গেক্সী কাঁধের তোয়ালে কেশের পশ্চাদভিমুখিতা লক্ষ্য করলে মনেও হয় না যে এরা সকলেই বিশ্বাসী। এ যুগে কেই বা বিশ্বাসী? বিশ্বাসী কেউ হতে পারে না, বিশ্বাস বড় বোঝা। কাঁধ কি তাঁকে দিতেই হবে? না দিলে বড়ই খারাপ দেখায়। দায় তাঁর, এদের নয়। না দিলে অশোভন দেখায়, রমলা দেবীর কাণে উঠবে, নিশ্চয়ই বিক্রপ করবেন তাঁকে নিয়ে, গোপনে এঁদের কাছে। জীবিত অবস্থায় জীবন, আবার মৃতদেহের শববহন, দুই কাজই কি রমলা দেবীর ইচ্ছায় করতে হবে না কি? সৃজনের হাত থেকে টিনটা নিয়ে, খুলে, দ্রুতপায়ে, এক রকম ছুটেতে ছুটেতেই খগেন বাবু শবযাত্রীদের নাগাল ধরলেন। কর্তব্য বোধে তাঁদের সাহায্য করতে গেলেন, কাঁধ দিলেন, কিন্তু পাঁচ মিনিটের মধ্যেই গা দিয়ে ঘাম ঝরতে লাগল, কাঁধে ব্যাথা উঠল; খাটটা কাঁচকাঁচ করছিল, ভয় হল এই বুঝি তাঁরই দোষে ভেঙ্গে পড়বে রাস্তার ওপর। কাতরভাবে চাইতেই সৃজন এগিয়ে এল, ‘আপনার কষ্ট হচ্ছে?’ ‘না, কুট আর কি?’ ‘আপনি ছেড়ে দিন’। খগেন বাবু যেন হাফ ছেড়ে বাঁচলেন। সৃজনের মুখের হাসিটা বিক্রপের? না, স্নানার্হক। পা-এর তলা জ্বালা

করছিল, রাস্তার কলে হাত পা ও মুখ ধুয়ে নিলেন। বীড্‌ন ষ্টিট দিয়ে চিংপুর পার হয়ে নিমতলায় পড়লেন। এই রাস্তাটুকুর মধ্যে কি একটা রহস্য আছে, ডাক্তারের বাড়ী থেকে গারম্ভ কবে কাঠের দোকান, মালসার দোকান পর্যন্ত সবই আছে এখানে, প্রত্যেক জিনিষটাই যেন শেষ মুহূর্ত্তকে এগিয়ে আনছে। এ রাস্তায় বুড়োবুড়ি ভিন্ন অন্যলোক সহজে চোখে পড়ে না। বাকী সব হিন্দুস্থানী, মুস্কো মুস্কো ছুষ্মনের মতো চেহারা, বোধ হয় চারণের বংশধর মাঝিমালা না হয়ে চিতের চালাকাঠ কাটে। নিমতলার ঘাটের এক অদ্ভুত ব্যস্ততা। আলো সতেজে জ্বলছে, কিন্তু গঙ্গাবক্ষের অন্ধকারে যেন আঘাত পেয়ে ফিরে আসছে। লোকজন প্রমাবসানের আগেই প্রান্তির আশায় যেন ব্যগ্র হয়ে উঠছে, কিন্তু প্রান্তির সম্মুখিন হয়ে ক্লান্ত হয়ে পড়েছে। এই প্রত্যখ্যানের খবর কেউ পায় না—না পাওয়ার নামই আশা। মুটে মজুর ছুটির আধঘন্টা পূর্বে ভূতের মতো খাটে, ক্ষিপ্ত হয়, তার পর বাঁশি বাজল, আর মোড়ে মোড়ে তাড়ির দোকানে প্রবেশ! চমৎকার! তাড়ি না হলে চলেই না তাদের। কিন্তু জীবনটাকে যারা কলে পরিণত করে না, যাদের শক্তির অবশিষ্ট কিছু থাকে, তারা বরাবর বাড়ি চলে যায়, স্ত্রীপুত্রের কাছে। সেখানে শক্তি নিঃসাড়ে নিঃশেষিত হয়……স্বজন ছেলেটি হাঁকাচ্ছে না।…… ছুটছে……মুড়ছে……ঘাট এসেছে। খাট নামিয়ে স্বজন কনেষ্টবলের সঙ্গে আফিসের দিকে গেল, থগেন বাবুর কাছে করোনারের রায়টি চেয়ে নিয়ে। অন্যান্য যুবকেরা খাট ছুঁয়ে বসে

অন্তঃশীলা

থাকতে তাঁকে অনুরোধ করে একে একে অদৃশ্য হলেন। খগেন বাবু গোটাকয়েক সিগারেট রেখে টিনটা তাঁদের হাতে দিলেন।

শবের মুখে পাংশুতা ভেদ করে কমনীয়তা ফুটে উঠেছে। মুখের এই কমনীয়তা ছিল সাবিত্রীর প্রধান আকর্ষণ। এই শান্ত ও গভীর মাধুরিমায় সকলে মুগ্ধ হ'তেন। ব্রাহ্মরা বলতেন, 'কি মিষ্টি', গিন্নীরা বলতেন 'কচি-কচি', পুরুষেরা বলতেন 'লাবণ্য'। খগেন বাবুর খরদৃষ্টিতে সাবিত্রীর যে প্রকৃতিটা ধরা পড়েছিল সেটি রূপে বিশুদ্ধ লাবণ্যময়ী 'ছিল না; তার ধাতু ছিল খানিকটা লোহা, খানিকটা সর্বসাধারণের সন্তোষবিধানের জন্ত প্রচেষ্টার খাদ। এবং সে রূপের ওপর পড়েছিল অন্যের প্রকৃতির ছাপ, অর্থাৎ অনুকরণ মুখের ওপর, বিশেষতঃ চোখে, একটা ভয়ের চিহ্ন থাকত, সেটা লক্ষ্য করে সাবিত্রীকে কবে কে একবার 'বনের হরিণ' বলেছিল, সাবিত্রীরই মুখেই শুনেছিলেন। আজ সেটা পরিস্ফুট হয়েছে, ঠিক যেন মরা হরিণ। কিসের ভয়? হরিণের, আত্মরে পোষা খরগোসের সন্ধিচ্ছাচিন্তার, না মৃত্যুর মতন সত্যের সামনা-সামনি দাঁড়াবার? ভয়ে যেন সব ঢিলে হয়ে গিয়েছে। হাতের চুড়িটা ঢলঢলে হয়েছে, গলার হারটা উলটে গিয়েছে। একদিন না খেলেই রোগা হয়ে যেত, বেচারি দুদিন খায়নি। খগেন বাবু ধীরে ধীরে হারটা গুছিয়ে সোজা করে দিলেন। এই হার নিয়ে একবার কত দীর্ঘ অভিমানের পালা হয় তাঁদের মধ্যে! সাবিত্রী বলেছিল, 'আমি হারটা পরলে সকলে

বলে 'সুন্দর দেখাচ্ছে, তুমিত' মুখ ফুটে একবারও ভাল দেখাচ্ছে বল না', খগেন বাবু উত্তর করেন, 'তোমাকে না পরেই ভাল দেখায় কিনা, তাই বলিনা।' সাবিত্রী হঠাৎ রাগ ক'রে হারটা গলা থেকে টেনে খুলে ফেলে, আটকাবার পিন্টা খারাপ হয়ে যায়, খগেন বাবু সারিয়ে দেবার জন্য পরের দিন স্যাকরা ডাকেন। বাড়িতে স্যাকরা এলে শোশন, গহনাটা রমলা দেবী নিজের পরিচিত ও আশ্রিত অণু এক দোকানে ইতিমধ্যে নিজেই দিয়ে এসেছেন। খগেন বাবু অভিমানের ভান করেন; উত্তরে সাবিত্রীর মুখ থেকে এক অদ্ভুত জবাব পান, 'পরের বৌএর গহনা ভেঙ্গে গেলে সারিয়ে দাওগে যাও, নতুন গয়না গড়িয়ে দাওগে, আমার জন্য কোন কষ্ট করতে হবেনা।' খগেন বাবুর এক বন্ধুপত্নীর কোন এক গহনা খারাপ হয়ে যায়, পথে স্যাকরা-বাড়ি পড়ে, তাই গহনাটা স্যাকরা-বাড়ি পৌছে দেন, স্যাকরাটা রমলা দেবীরই আশ্রিত লোক। কথা বেশ হেঁটে বেড়ায়। ঘটনাটি মনে পড়তেই খগেন বাবু উঠে পড়লেন। পাশে একটি লোক দাঁড়িয়ে দাঁড়িয়ে কি দেখছে। সৃজন বাবু কোথায় গেলেন? খগেন বাবু সাবিত্রীর মুখ আড়াল করে দাঁড়ালেন। আচ্ছা ভদ্রলোক ত'! এই সমাজে মেয়েদের মুখ খুলে নিমন্তলাতেও নিয়ে যাবার উপায় নেই... লোকটার ঠোঁট ভীষণ পুরু, হাতে পানের বোঁটায় চুন, চোখের কোল মিশ্র কালো, খুব লম্বা কাল চুলের গোছা একটি চোখের ওপর এসে পড়েছে, বাক

চোখে জ্যোতি নেই। সব যেন তার ঘুমন্ত। কী দেখছে? অসভ্য ছোকরা। খগেন বাবু তার চোখের দিকে একদৃষ্টে চাইতে সে মুখ ফিরিয়ে নিলে। খগেন বাবু আবার বসলেন, খাটের ওপর এক কোণে, সাবিত্রীও মুখ আড়াল করে। ভয় হল খাট ভেঙ্গে যাবে, নেমে উবু হয়ে মাটিতে বসলেন, খাট ছুঁতে ভুলে গেলেন। মনে হল লোকটি আর নেই সেখানে, দেখার প্রবৃত্তি ছিল না। নিশ্চয়ই কোকেন খাদ, ভদ্রলোকের ছেলে, তাই অত শঙ্কিত দৃষ্টি, অশানচারীর মত খরদৃষ্টি নয়। সাবিত্রীরও ঐ রকম শঙ্কিত দৃষ্টি কখনও কখনও তিনি লক্ষ্য করেছেন—কেন কে জানে? তাকে যেন কে জ্বাচ্ করেছিল। পাড়ারগেয়ে মেয়েরা কত বশীকরণ মন্ততন্ত্র জানে, কিন্তু সেত' পাড়ারগেয়ে মেয়ে ছিল না, পাড়ারগেয়ে মেয়েদের ঘৃণাই করত, তার বন্ধুদের মধ্যে সকলেই প্রায় সহরে, হাল ফ্যাসানের ও এদেশের পক্ষে উচ্চশিক্ষিতা, অর্থাৎ অধীশিক্ষিতা। কী আশ্চর্য্য! সাবিত্রী বেশীদূর পর্য্যন্ত স্কুলে পড়েনি, তবু সে সকলের প্রিয়পাত্রী ছিল। একজন খগেন বাবুকে মুখের ওপরই বলেছিলেন, ‘আপনি পাসেরই কদর করেন, কিন্তু দেখুন দেখি সাবিত্রীকে, কলেজে পড়েনি দেখলে বোঝা যায়?’ খগেন বাবু উত্তর দেন, ‘সবই আপনাদের আশীর্বাদে।’ সাবিত্রীর বন্ধুরা বুঝতেই পারতেন না কখন খগেন বাবু কি ভাবে কথা বলছেন, সেই জন্য তাঁরা খগেন বাবুকে সাবিত্রীর সামনে ‘বিদ্বান, অতিশয় বুদ্ধিমান, আদর্শবাদী’ বলে স্তুতি

করতেন, এবং দূরে সরে যেতেন। সেই রাত্রে খগেন বাবু সাবিত্রীকে বলেন, ‘তোমাকে ওঁরা অমন পেট্রনাইজ করেন মদ্য কর কেমন করে? নিজেরা বেশ পাস্টাস করে কাজ গুঁড়িয়ে নিয়ে, অন্যের প্রতি, যারা পাস করেনি তাদের ওপর অত্যাচার সকলেই দেখাতে পারে। নিজেদের জন্য পয়সা প্রতিপত্তি, অধিকার, আর গরীব মজুরদের জগ্না গির্জা ও ধর্মের সাক্ষ্য, সত্য সাবিত্রীর তুলনা, আমার ভারী বাগ হয়।’ সাবিত্রী বাগটাকে হিংসাই বলেছিল। দরদ হল হিংসা! খগেন বাবু নামে আপত্তি জানান, সে আপত্তি নামজুর হয়। পূর্বে হতেই তিনি অন্য দু’একটি ঐ রকম গুণের অধিকারী বলে স্তন্যম অর্জন করেছিলেন, তাই বোঝার ওপর শাকের আঁটি তাঁর লঘুভার মনে হয়েছিল। মুহূর্ত্তের কেবল বলেছিলেন, ‘হিংসে কার আছে আর নেই ভগবানই জানেন!’

এই সাবিত্রী আজ হৃদে হয়ে খাটের ওপর শুয়ে নিমন্তলার খাটে পড়ে রয়েছে তার কারণও হিংসে। ব্যাপার কি? সামান্য, অন্ততঃ সামান্য করে নেওয়া চলত। খগেন বাবু এক বোন বেড়াতে এল কোলকাতায়, সাবিত্রীরই সগী, সেই তাকে নিমন্তণ ক’রে এনেছিল। নিজের পায়ে নিজেই কুড়ল মেরেছে বলে সেই শেষে আফশোষ করেছে। খগেন বাবু গান ভালবাসতেন, মেয়েটির গলা ছিল ভারী মিষ্টি, যদিও গান শেখেনি, পাড়ারগেয়ে বাংলা গান গাইত, অল্পদিনের মধ্যে সাবিত্রীর বন্ধুদের কাছে নতুন নতুন বাংলা গজল ও

ঠংরী শিখে^১ তাদের চাইতে ভাল গাইত। সাবিত্রী নিজে গান^২ গাইতে জানত না, তার দলেব কেউই জানত না, চেষ্টা করতেন সফলে। রমলা দেবীর বিফল প্রয়াসকে সাবিত্রী চরম সার্থকতা বিবেচনা করত, খগেন বাবু করতেন না। রমলা দেবী তাঁর সামনে গাইতে চাইতেন না, কলে তাঁর বোনের আওয়াজ হয়ে উঠেছিল ভীষণ নাকি, আর তাল ছন্নছাড়া। সকলেই সমজদার, নির্মম সমালোচক! সে সব কথা স্মরণ না করাই ভাল। স্বীর সামনে গান সম্বন্ধে যথার্থ সমালোচনা অসম্ভব, দলের স্বার্থে, ভেস্টেড ইন্টারেস্টে যা লাগে, আর না হয় অল্প ব্যাখ্যা হয়। উবু হয়ে বসে বসে খগেন বাবুর পা টুন, টুন, শিরদাঁড়া ব্যথা করছিল; কাঁধ আড়ষ্ট, সমগ্র দেহ ক্লান্ত, উঠে দাঁড়িয়ে নিজের হাতেই কাঁধ টিপতে আরম্ভ করলেন। কোলকাতা সহরেও কাঠ, দি, পুরুত যোগাড় করতে এত দেরী কেন? সহর হলেও এই দেশের সহর, সব গজ-গমনে চলে। প্রায়শ্চিত্ত করলে পুনর্জন্ম হয় না, সাবিত্রী যেন বাঙ্গালী হিন্দু পরিবারে না জন্মায় আর। তাঁকে বোধ হয় প্রায়শ্চিত্ত করতে হবে। মেটা শ্রাদ্ধের সময় করলেই হবে। নাঃ, তিনি করবেন না। শ্রাদ্ধ তিনি করবেন না, শ্রাদ্ধ নেই তার আর শ্রাদ্ধ কি? এ দেশে এ সমাজে, এ যুগে শ্রাদ্ধ অচল, চল হওয়া উচিত প্রায়শ্চিত্তের, জন্ম থেকে মৃত্যু পর্য্যন্ত প্রায়শ্চিত্ত, অপঘাত মৃত্যু কি দোষ করেছে! ধরা পড়েছে বিষ! যথেষ্ট প্রায়শ্চিত্ত হয়ে গিয়েছে, আদালতে, লোক-

সমক্ষে, রমলা দেবীর কাছে সাহায্য নিয়ে। না নিলে কিন্তু চলত না, কোথায় কাকে পেতেন ?

কাঠের যোগাড়-যন্ত্র শেষ হল। সাবিত্রীকে ঘি মার্গে স্নান করানো হল। বড় বড় কাঠ সাজিয়ে চিতা তৈরী করে তার ওপর শব তোলা হল। দেহটা কী শক্ত! তার মনের মতন। নিজীব বলেই কঠিন। এবার মুখে আগুন দেবার পালা। ঐ মুখের সঙ্গে এককালে, সে আজ থেকে বহু পক্ষে, অগ্নি জীবনে, তাঁর সম্পর্ক বনিষ্ঠ ছিল, আজ গত কয়েক বৎসর ধরে ঐ মুখ থেকে নানা কথাই শুনে এসেছেন, সবগুলি মিষ্টি নয়, তবে সবই ভদ্রভাষায়। মার্জিতকণ্ঠি ঐ ঠোঁট দুটো থেকে যেন ক্ষরত। গলার আগুয়াজ্জ্বলী ছুরকমের! বন্ধুদের সঙ্গে কথাবার্তায় নরম, স্বামীর বেলা ঈশ্বর ও দৃঢ়তাব্যঞ্জক, একটা আদরের ও আদর খাবার, অগ্নি আদর প্রত্যাখ্যানের; যেন আদর না পেয়ে পেয়ে অভিমানিণীর হৃদয় ও মন শুথিয়ে গেছে। হাতে ঝড়ো জ্বলছে, ওপর হাতে তাত লাগল, ঝড়োটা উচু করে ধরলেন। পুরুতঠাকুর বলেন, 'এইবার দিন, আর মস্তুর বলুন, ঐ দেখুন না আমার আরো তিনটে কাজ পড়ে রয়েছে।' খগেনবাবু মন্তোচ্ছারণ করে চুলীতে আগুন ধরালেন। মুখে আগুনটা স্পর্শ করল না বোধ হয়। কাঠ ক্রমে ধরে উঠল, প্রথমে ধীরে ধীরে, খানিক পরে জোরে, অতি শীঘ্র দাউ দাউ করে। মাথার এক বাশ চুল গেল পুড়ে, কি দুর্গন্ধ! যেন উলুনে ফেন পড়েছে :

অন্তঃশীলা

সাবিত্রী একবার রাঁধতে গিয়ে উঠনের ওপর ভাতের হাঁড়ি ফাঁসিয়ে ফেলে। তখন তার চুল আঁধখানা বাঁধা ছিল, তাই দেখে খগেনবাবু বলেছিলেন, ‘যে রাঁধে সে বুঝি চুল বাঁধে না।’ সাবিত্রী ভীষণ রেগে উত্তর দেয়, ‘এখান থেকে চলে যাও’। চলে আসেন নাকে কাপড় দিয়ে।.....প্রত্যেক অঙ্ক গেল ঝলসে, পুট পুট করে শব্দ হতে লাগল, গা ফেটে জল বেরোচ্ছে, কি রকম হলদে রংএর রস, বার হওয়া মাত্রই উবে যাচ্ছিল। বিত্রী ধোঁয়া, চাওয়া যায় না, চোখ জ্বালা করে, করু করু করে। হঠাৎ দড়াম করে একটা কাঠ ফাটল। চমকে উঠে খগেনবাবু একটা সিগারেট ধরালেন। একজন লোক লাঠি দিয়ে নিবস্ত কাঠ উলটে দিলে, আগুন আবার উঠল জ্বলে। খগেনবাবু মুখ ফিরিয়ে নিলেন।

এই রকম কতবার হয়েছে! নানা রকমে বুঝিয়ে স্বুঝিয়ে সাবিত্রীর মনে হয়ত সন্দেহ কমান গেল, সাবিত্রী নিজে ননদকে ডেকে তার গান শুনলে, সে-গানের প্রশংসা করলে, দিন কয়েকের জন্তু সংসার স্বুথের হয়ে উঠল। তারপর, তারপর হঠাৎ একদিন চা-পার্টি থেকে এসে সে কী কাণ্ড! সাবিত্রী ঘরে প্রবেশ করা মাত্রই খগেনবাবু একটু চমকিত হয়েই বলেন, ‘তোমাকে ভারী সুন্দর দেখাচ্ছে।’ সাবিত্রী উত্তর দিলে, ‘বল কি? তোমার আদরের বোনের চেয়ে? হঠাৎ চমকে উঠলে কেন? আর কেউ আসবে ভেবেছিলে বুঝি?’ খগেনবাবুর মন মুসড়ে গেলেও হাঁসিমুখে জবাব দিলেন, ‘তুমি

সুন্দর। এত সুন্দর কখনও ভাবিনি, তাই হঠাৎ আবিষ্কারের আনন্দে চমকে উঠলাম।’ ‘কখনও ভাবিনি? অথচ, সের্গেন রমলাদি বলছিলেন...’ ‘দ্যাখ, নজীরের প্রয়োজন নেই, আমার চোখ আছে। ঐ রমলাদিই তোমার মাথা খাবেন—তোমার সর্বনাশ করবেন।’ ‘তোমার আবার চোখ নেই। চোখ আছে, তবে পরজীকে দেখবার জ্ঞান, তাও যদি সম্পর্ক না হত! রমাদি যদি আমাকে একটু স্নেহ করেন তা হলে তোমার অত ঈর্ষা হয় কেন বলত? আমার মাথা ত’ গেছেই! আমার সর্বনাশ যদি যোগ্যপাত্রীর দ্বারা হত তবু ছিল ভাল। তুমি খুঁকোর মধ্যে কি পাও বলত?’ ‘ও সব কথা ছাড় লম্বাটি’ ‘আদর করতে হবেনা আমাকে, তোমাঞ্চে বলতেই হবে আজ। না বলত’ মাথা খুঁড়ে এইখানে মরব। বল।’ ‘ওর মধ্যে ভদ্রতা আছে, স্নেহমমতা আছে, ভাল জিনিষকে ভাল বলতে জানে, সহজ মানুষটি, অনেকটা মাসীমার মত মনে হয়—এর বেশী বলতে পারি না।’ ‘মাসীমার মতন! তাঁর নাম আর করতে হবে না, তোমার সঙ্গে তাঁর দেওরঝির বিয়ে দিয়ে রাজরাণীগিরি করতে পারলেন না, তাই মনের দুঃখে কাশীবাসী হলেন। তাঁর কথা আর বোলো না। প্রাণের বোন ভাল বলতে জানে। জানে ও ছলাকলা। আমার আর জানতে বাকী নেই। কী রকম ব্যবহার করে পুঁড়ার ছেলেদের সঙ্গে, স্বামীর সঙ্গে, আমার জানা আছে—ওর ননদের বাড়ী রমলাদির বোনের বাড়ীর পাশেই—তুমি যদি ওর নাম আবার কর, তা হলে আমি আর

অন্তঃশীলা

ভদ্রতা রাখতে পারব না, বিষ খেয়ে মরব।’ এই বলে সে কামের ছল খুলে ছুড়ে ফেলে দেয়। আবার আগুন জ্বলে ওঠে। বিষ তখন খায়নি, তবে ঐ রকম তুচ্ছ ব্যাপারেই বিষ খাব ভয় দেখাত, ওর চেয়ে তুচ্ছতর ব্যাপারে বিষ খেয়েছিল।

আগুন প্রায় নিবে এল। রমলা দেবীর আত্মীয়েরা একটু বাস্তব হয়ে উঠেছেন। পুরোহিত হঠাৎ আবির্ভূত হয়ে বলেন, ‘এইবার শেষ কাষটি করতে হবে, নাভিকুণ্ডলটি বার করুন, আত্মঘাতিনীর কাষে দক্ষিণা আমরা বেশী নিয়ে থাকি’। সূজন তাড়াতাড়ি উত্তর দিলেন, ‘সে হবে’খন, বিমল বার করত ভাই।’ পুরোহিত ঠাকুর তখন অল্প একটু নবাগত শবের দিকে চেয়ে আছেন। হঠাৎ চোখ ফিরিয়ে বলেন, ‘দেবী করবেন না।’ বিমল ইতস্ততঃ করছিল, পুরোহিত জিজ্ঞাসা করলেন, ‘স্ত্রীর বুঝি সম্ভান-সম্ভাবনা? তা হলে এলেন কেন? আপনার দ্বারা হবেও না, এটা স্বামীর কর্তব্য; সহধর্মিণীত?’ খগেন বাবু তখন বাঁশের ডগা দিয়ে ছাই ঘেঁটে একটা পোড়া মাংস-পিণ্ড বার করলেন। সাবিত্রীর শেষ চিহ্ন! ছুটো মালসার মদ্যো নাভিটা চাপা দিয়ে গন্ধার ধারে অগ্রসর হলেন, সূজন সঙ্গে এল। মন্তোচ্চারণ করে মালসা ছুটো যত দূরে পারেন জ্বলে ছুড়ে ফেলে দিলেন। মনে মনে খগেন বাবু বলেন, ‘তোমার আত্মা যদি থাকে, তবে তার তৃপ্তি হোক।’ মেয়েদের থাকে ভাব-গ্রন্থি। তাদের হিংসাঘেষও এই নাভিকুণ্ডল থেকেই ওঠে। এইটাই যোগসূত্র, বংশপরম্পরার। সবই এদের নাড়ির

টানে। কে জানে! পরজন্ম যদি থাকে তা হলে সাবিত্রী মেনে মেয়ে মানুষ না হয়ে জন্মায়, বাঙ্গালী হিন্দু পরিবারের মেয়ে হওয়ার চেয়ে পশুজন্মও বোধ হয় ভাল। ছিঃ ছিঃ ছিঃ! অস্বাভাবিকতার মানবজন্মও হয় না। মেয়েদের আত্মা! হিন্দুশাস্ত্রেই আছে—কি আছে খগেনবাবুর ঠিক মনে পড়লনা, তবে নিশ্চই আছে ঐ ধরনের কথা। তারপর কলসী করে জল এনে চুলী নেবাবার পালা, পুরোহিত বিদায়, বিছানা ভাগ, পেডা গহনা খোঁজা, শ্মশানবন্ধু ও কনষ্টেবলকে বখশিসদান, তারপর স্নান। স্বজন একটা ফুরসা তোয়ালে ও ধুতী দিলেন খগেন বাবুকে। বেশ গন্ধ—কার তোয়ালে?

খগেন বাবুর শরীর ভেঙ্গে পড়ছিল—কাঁধে ভীষণ ব্যথা, কলসী বয়ে বয়ে হাত টন্ টন্ করছে, খাটের সিঁড়ি ভেঙ্গে গোচ ফলে উঠেছে, পায়ের তলায় পাকা ফোড়ার মতো ব্যথা, আগুনের তাপে মাথা ছিঁড়ে যাচ্ছে, চোখ জলছে, করু করু করুচ্ছ ধোঁয়া লেগে। ছু'খানা ট্যাকসী আনতে বলে খগেন বাবু সিগারেট ধরালেন, জিব শুখনো, ভাল লাগেনা, একটা মিস দোনা খেলে হয়, এখন এখানে থাওয়া যায় না, সিগারেটটা ফেলে দিলেন। একটা ট্যাকসী এল, আর সেই নতুন মডেলের শেভলেট, বনেটের সাদা ক্রোমিয়াম প্লেটগুলো গ্যাসের আলোয় ঝক ঝক করে উঠল। খগেন বাবু ট্যাকসীতে উঠতে যাচ্ছিলেন স্বজন বলে, 'না, এই গাড়িতে উঠুন'। খগেন বাবু মস্তমস্তের মত শেভলেটেই চড়লেন, স্বজন বাবুও এলেন। ছড় টাকাই ছিল।

অল্পক্ষণের মধ্যেই গাড়ি বিড়ন্ স্ট্রিটে এসে পড়ল। দুধারের বাড়ীর দোতালার বারাণ্ডায় দু'একজন মহিলা দাঁড়িয়ে আছেন, ভেতরে গান চলছে, হুল্ হুল্ টুল্ টুল্, ভরা যৌবন—ব্যথার ব্যথী—সব বাংলা—সব গজলের চাল। একটা ঘরের ভেতরকার বড় আলোকচিত্র চোখে পড়ল—মাথার পাগড়ী বাঁধা কোন শিক্ষিত সাধুর। গাড়ি জোরে ছুটছে—রাস্তায় আলো এক একবার যাত্রীর মুখের উপর পড়ছে, কয়েক সেকেন্ডের জগ্ম, আবার অন্ধকার। চিত্তরঞ্জণ অ্যাভিনিউএর দক্ষিণে হাওয়া, শোভাবাজার, বাগবাজার অঞ্চলের বনেদী বাড়ীর বড় বড় গাড়ি পাল তোলা নৌকার মতন মন্থরগতিতে বাড়ী ফিরছে, এঞ্জিনের আওয়াজ নেই; সাহেবদের গাড়ী তাদের অতিক্রম করে ব্যারাকপুরের দিকে ছুটছে। সঞ্জের ট্যাক্সীটা এগিয়ে চলল। ট্যাক্সীর নম্বর একটু অগ্নি ধরণের বুঝি? সব I দেওয়া। খগেন বাবু গাড়ীতে ঠেস দিয়ে বসলেন, চোখ বুজতে পারছিলেন না, আগুন ও আলোর শিখা চোখ বুজলেই নেচে উঠছিল। চিরকালই জ্বলবে নাকি? একটু জ্বালা কমলে শান্তি পাওয়া যায়। কবে চোখ স্নিগ্ধ হবে?

গাড়ি সেই মিজাপুরের গলির মধ্যে এসে বাড়ীর সামনে দাঁড়িয়েছে। আগের গাড়িতে যারা এসেছিলেন তাঁরা নেমে দরজার সামনে এক মালসা আগুনের উধার হাত তাতাচ্ছেন। গাড়ি থেকে নেমে খগেন বাবু আগুনের দিকে গেলেন না। সকলে নিমপাতা ও মটর ডাল চিবুলেন, খগেন বাবু পিছনেই

দাঁড়িয়ে রইলেন, চাকরে জল ও তোয়ালে নিয়ে দাঁড়িয়েছিল, স্বজন ইঙ্গিত করতে চাকর খগেন বাবুর কাছে এগিয়ে এল। খগেন বাবু হাত পা ধুয়ে তোয়ালে দিয়ে মুছলেন—তোয়ালেটা বেশ গন্ধ। রমলা দেবী 'দরজার পাশে দাঁড়িয়ে। তাঁকে নমস্কার করে যুবকেরা চলে গেল।' রমলা দেবী স্বজনকে বলেন, 'স্বজন, কাল সকালে জিরিয়ে একটু আসতে পারবে?' একটু আমতা আমতা করে স্বজন উত্তর দিলে, 'কাল সকালে...একটু কাজ ছিল' যখন সুবিধে হয় এস।' স্বজন সব শেষে চলে গেল।

এক গেলাস সরবৎ নিয়ে রমলা দেবী যখন এলেন তখন খগেন বাবু নীচের ঘরে তঁক্তপোনের ওপর শুয়ে। লাফিয়ে উঠে তিনি এক চুমুকে পুরো গেলাসটা নিঃশেষ করলেন। 'আর এক গেলাস এনে দিই?' 'না' বুকটা তবু ঠাণ্ডা হচ্ছিল না, চোখে বড় কষ্ট হচ্ছিল, হাত দিয়ে ঢেকে বসলেন। 'গোলাপ জল এনে দিই?' 'বড় ভাল হয়'। রমলা দেবী গোলাপ জলের শিশি আনলেন, খগেন বাবু হাতের কোষে গোলাপজল নিয়ে চোখ ধুলেন। খানিকক্ষণের জন্য চোখ ঠাণ্ডা হল, খগেন বাবু চোখ বুজে শুয়ে রইলেন। আবার জলতে লাগল, চোখ খুলে দেখেন রমলা দেবী হাতে শিশিটা নিয়ে দাঁড়িয়ে আছেন। 'এখনও কষ্ট হচ্ছে? একটু মাথায় দিন' খগেন বাবু খানিকটা ঢেলে মাথায় দিলেন। 'চোখের ভিতর এমন জলছে!' 'চোখ বুজে শুয়ে থাকুন, এখনি আসছি, আলো নিবিয়ে দেবো?' 'না' রমলা দেবী ওপর থেকে ড্রপার নিয়ে এলেন—খগেন বাবু উঠে বসতে

চাইছিলেন। ‘উঠে বসলে দেওয়া যাবে না, শুয়ে থাকুন।’ হাতের ওপর মাথা রেখে শুয়ে পড়লেন, আঙ্গুল দিয়ে নিজের চোখের পাতা ফাঁক করলেন, রমলা দেবী ডুপার দিয়ে ডান চোখে দু'ফোঁটা গোলাপজল ফেললেন। মাথার ওপর পাখাটা জোরে ঘুরছিল, বাঁ চোখে ফেলবার সময় মাথার ওপর শাড়ির অংশটা উড়ে কাঁধের ওপর নেমে গেল, সামলাতে গিয়ে বাঁ চোখের ওপর দশ-বার ফোঁটা গোলাপজল পড়ে গেল। গড়িয়ে মুখের মধ্যে যাচ্ছিল। হাতের কাছে তোয়ালে না থাকার দরুন রমলা দেবী ‘আমি একটা অপদার্থ’ বলে তাড়াতাড়ি শাড়ির ঝাঁচলের কোণ দিয়ে মুছিয়ে দিলেন। খানিকপরে বল্লেন, ‘আবার ডান চোখটা খুলুন, ভাল পড়েনি’ ‘পড়েছে’ ‘না, মাত্র দু'এক ফোঁটা পড়েছে, লাগবে না, আরাম হবে, খুলুন’ বাঁ চোখটায় আরাম হচ্ছিল, ডান চোখে অস্বস্তি কমেনি। ডান চোখটা আবার আঙ্গুল দিয়ে ফাঁক করলেন... ফোঁটা ফেলবার সময় রমলা দেবীর হাত কাঁপছিল। বেশ ফর্সা দেখাচ্ছিল হাতটা, চুড়ির রংএর সঙ্গে হাতের রং বেশ মিশে গিয়েছিল, মনঃসংযোগের একাগ্রতায় মুখে যেন দিব্যভাব এসেছে। চার পাঁচ ফোঁটা পড়বার পর খগেন বাবু বল্লেন, ‘আর না।’ তার পর চোখ বুজে ও হাত ঢাকা দিয়ে শুয়ে রইলেন।

খগেন বাবুর রান্তিরে ভাল ঘুম হল না। সর্কান্ধ ব্যাথা, বিশেষত ডান কাঁধটা। পা'র তলা ও চোখ ভারী জালা করছিল। যে ক্লান্তিতে স্বপ্নবিহীন ঘুম আসে তার সীমা অতিক্রম করাতে দেহটা তাঁকে ব্যতিব্যস্ত করে তুলেছিল। সিগারেটের পর সিগারেট ধ্বংস করতে করতে কখন যে তিনি ঘুমিয়ে পড়েছিলেন তাঁর মনে নেই। যখন ঘুম ভাঙল তখনও ভোর। মিউনিসিপালিটির ময়লা গাড়ীর শব্দে তাঁর বিরক্তি আসছিল। পূর্বে কতবার তিনি ভোরে শয্যাভ্যাগ করেছেন, কিন্তু কৈ সহরের আওয়াজ ত' এমন কর্কশ মনে হয় নি! স্বরাজ-পাটির দোষ, না তাঁর দৈহিক অবস্থার দোষ? এ রকম কত কর্কশ আওয়াজ সহরের বাসিন্দারা নীরবে সহ্য করছে, কেউ ত' আপত্তি করে না! বোধ হয় তাদের স্নায়ুমণ্ডলী আরো শক্ত, কিংবা তাদের

অন্তঃশীল।

সহ হ'য়ে গিয়েছে। সহ হয়েছে না ছাই হয়েছে! লোকগুলো বোকা ভাল-মালুম, আপত্তি করতে জানে না, অথচ আসে পাড়া গাঁ থেকে; ট্রাম, মোটর, বাস, লরির শব্দ, তাদের অজানিতে, দেহের প্রত্যেক স্নায়ুকে আক্রমণ করে, বিধ্বস্ত করে, তাই গলির মোড়ে মোড়ে চাএর দোকান, নচেং সভাতার সঙ্গে লড়বে কি খেয়ে? বিবাহিত জীবনেও তাই। এই যে গলিতে গলিতে কন্সার্ট-পার্টি, রাস্তায় রাস্তায় থিয়েটার পার্টি, কিসের জন্ত চলছে? বাড়ি থেকে পালিয়ে প্রাণ বাঁচানর তাড়ায়, আত্মরক্ষার তাগিদে প্রাণের মায়া ভীষণ মায়া, যুবক-বৃন্দ ক্লাব করছেন, ছাত্রসভ্য তৈরী করছেন, মাসিক সাহিত্যের ত্রি-দ্বি-সম্পাদন করছেন, একই কারণে, বাড়ি থেকে, বাপ-মা এর নীচ কলহ-বিবাদের হাত থেকে পরিত্রাণ পেতে। সব পালচ্ছে, যা চায় না তার থেকে। যদি সমগ্র বাঙ্গালী জাতটা একটা মাইক্রোফোনের সামনে কথা কয়, তা হলে লাউড স্পীকারের সাহায্য ব্যতীত পরিত্রাহি ডাকটামারা বিশ্বে শোন! যাবে।

খগেন বাবুর গলা শুকিয়ে আসছিল, কাঁধের ব্যথা, চোখ ও পায়ের জ্বালা যেন তাঁর শাস্তির বিপক্ষে ষড়যন্ত্র করেছে। সারিষী পরিত্রাণ পেলো। তার প্রাণের মায়া বড় ছিল না—কি থেকে পালিয়ে গেল? বলত' সে, স্বামীর অবহেলা থেকে। তা নয়, নিজের থেকে। কোথায় পালাল? কিসের ডাকে? কিছুই জানা নেই। না ভীকুণ্ডলটাও জলে ফেলা হল, পুড়ে ছাই হল, রইল কি? তাকে কে ডেকেছিল? মরণ, বড় কিছু নয়।

ডাক শোনবার কানই তার ছিল না। কান ছিল রং বেরংএর
 ছল পরবার। কান দুটো তার দেখাই যেত না, চুলের খাটক
 ঢাকা পড়ত, দেখা যেত লম্বা ছল। লম্বা ছল তাকে মানাত না,
 মুখ ছিল তার লম্বা। একবার ছোট্ট একজোড়া পুরাণে ছল
 খগেন বাবু কোথা থেকে যোগাড় করেন, সাবিত্রী অনেক ধন্যবাদ
 জানিয়ে গ্রহণ করে, একবেলা পরেছিল, তার পর আর পরেনি,
 খগেন বাবুর ভাগ্যীর বিবাহে তাকে পালিশ করে ঘোতুক দেয়,
 গিল্লীপনার স্মৃতি ট্যাক্সি আদায় করে। নিশ্চয়ই সাবিত্রীর
 বন্ধুরা তাকে এ পরামর্শ দেন; নিশ্চয়ই রমলা দেবীই দিয়েছিলেন,
 তাঁর নিজের মুখটা লম্বা ধরনের; পছন্দটাও সেকেলে নয়।
 কিন্তু সৌন্দর্যটাও নিজস্ব বস্তু, রমলা দেবীকে যা মানায় সাবিত্রীকে
 তা মানায় না। রমলাদেবী কি করে পুরাতন গহনার স্বাদ
 বুঝবেন? তিনি জানেন বস্বেওয়ালার দোকান। তাঁর রুচি
 বিদেশী; তাও বিদেশের মার্জিত রুচি নয়, যে রুচি কয়েক বৎসর
 পরে জাহাজের খোলের বন্ধ হাওয়ায় ভেপ্সে উঠে পচা অবস্থায়
 ভারতবর্ষে হাজির হয়, তারপর অন্দর মহলের খিড়কী দরজা
 দিয়ে প্রবেশ করে বৈঠকখানার হাওয়া কলুষিত করে। বিলেতী
 সাজসজ্জা না পরলেই স্বদেশী হয় না, অথচ লোকে বলে মেয়েদের
 জগুই হিন্দুস্থানের সভ্যতা অটুট রয়েছে! কারা জর্জেট কেনে,
 কারা পাউডার সেন্ট্রামাথে, কারা চা চপ্ কাট্লেট তৈরী করে
 পুরুষের মনোহরণ করে? এই রমলারা। ক'টা মেয়ে চন্দ্রকোণার
 সাড়ির নাম জানে, ক'টা মেয়ে পুলিপিঠে মোচার ঘণ্ট রাধতে

পারে! নিশ্চয় রমলারা নন। ধনে-পুলতী-সেদ্ধ জলের বদলে, চুণের জল, তুলসী পাতার বদলে, কার দামী বিলেতী পেটেন্ট ওষুধ খাওয়ায়? খাওয়াবে কাকে? ছেলেমেয়েই হয় না এদের, অবস্থা না হওয়াই ভাল। রমলাদেবীরও হয়নি, সাবিত্রীরও না। পুরুষ মানুষদের চা-এর কথা স্বতন্ত্র, হাঁকো কল্কেও সর্বত্র পাওয়া যায় না। চা-টা স্বদেশী, মাত্র। তা' ছাড়া, ঘুম না হলে কি করা যায়? চা সিগারেট খেতেই হয়। সাবিত্রীও আপত্তি করত না, খগেন বাবুকে সিগার ও কফি খেতে বলত। কিন্তু করে কে? রমলা দেবীর কাছে কফি তৈরী করার কৌশলটা শিখে নিলেই হত, তা নয়, শেখা হত যত সব বদ্ অভ্যাস। আর যেটা ভাল সেটা নিলেই তা' হোত।

কফির কথা মনে উঠতে খগেন বাবুর তৃষ্ণা তীব্রতর হয়ে উঠল। এতক্ষণ নিশ্চয় কলেজ স্কোয়ারের পাশের দোকানগুলো খুলেছে। খগেন বাবু উঠে পড়লেন, বাথরুমের মগটা ধড়াস্ করে পড়ে গেল, কলের জল তখন আসেনি, কোণের বাল্‌তীর বাসি জল দিয়ে হাতমুখ ধুলেন, আরশীতে ছায়া পড়তে কামাবার ইচ্ছে হল। কামাতেই হবে তাঁকে, কিন্তু সরঞ্জাম কোথায়? চা খেয়ে কামালেই হবে। দাড়িটা এত বড় হল কি করে? একেবারে করুকরু করেছে যে! সেইজন্তু গা গরম? এই রকম তাঁর বহুবার হয়েছে। জ্যাঠাইমা মারা যাবার জন্তু তাঁর অশৌচ হয়, দুদিন কামান নি, বিকেলে মনে হয়েছিল জ্বর আসছে, কামিয়ে স্বস্থ হন। কামালে দু' চারটে সাদা

চুল খুঁতখুঁতে দেখা যেত, অথচ অণু কোথাও পাকা চুল নেই। কামাতেই হবে তাঁকে, তারপর চা। কখন রমলা দেবী এসে পড়বেন কে জানে? যা শব্দ হল! হয়ত তাঁর ঘুম ভেঙ্গে গিয়েছে ঐ শব্দে। খুঁট খুঁট করে বেন জুতোর শব্দ হল না! রমলা দেবী কি বাড়ীতেও জুতো পরেন না কি? চাপ্লী পরেন নিশ্চয়ই, চাপ্লীর শব্দ অণু ধরণের। খগেন বাবু তাড়াতাড়ি ঘর থেকে বেরিয়ে পড়লেন। দরজার ছড়কোটা ভারী কড়া, দরজা খুলে রাখলে যদি চোর আসে। সকাল হয়ে গিয়েছে, এখন চোর আসবে না। এ বাড়ীতে বাসন মাজার ঝি আসেনা না কি? এলে ভাল হত, নচেৎ বাসনকোশন চুরী হতে পারে। না, কলতলায় বাসন নেই ত'। বাঁচা গেল! খগেন বাবু বড় রাস্তায় এসে পড়লেন। বেশ ঠাণ্ডা—কিন্তু হাওয়া নেই।

রাস্তায় তোলা উত্তনে আগুন ধরান হয়েছে, ধোঁয়ার গুস্ত সোজা উঠছে। চাএর দোকানের বারান্ডায় উত্তন, মুখ তার ফুটপাথের ওপর, ছাই পড়ে আছে রাস্তায়। একজন লোক পেয়ালা ধুচ্ছে, বড় সাদা পেয়ালা, কিনারা গোলাপী। এর মধ্যে কখন লোকটা স্নান করে চুলা জ্বাচেছে, দাড়ি কামিয়েছে। খগেন বাবু ধোঁয়া ভেদ করে দোকানে প্রবেশ করলেন, জারুল কাঠের টেবিল, কাল অয়েল-কুখে মোড়া, ভেনেটার চেয়ার, কোনে তেকোনা পাথরের টেবিল রয়েছে, ঐ টেবিলে চা খেলে নিশ্চয়ই তিন পয়সা দিতে হয়। উত্তন

অন্তঃশীলা

ধরাতে আর দেবী নেই, এই দশ মিনিটেই ধরে যাবে শুনে
খগেন বাবু লোকটিকে জিজ্ঞাসা করলেন, ‘আচ্ছা এখানে
সেলুন নেই?’ ‘আছে, একটু আগে, কিন্তু এখনও খোলে নি।
একটু পরেই রাস্তার মোড়ে হিন্দুস্থানী নাপিত বসবে—এখান
থেকে দেখতে পাবেন’। ‘আচ্ছা, ততক্ষণ এক কেংলী চা
তৈরী করুন, কিছু কেক আছে?’ ‘ভাল ডেভিল্ আছে মশাই,
গরম করে রাখব?’ ‘না থাক, কেক হলেই চলবে, এলাম
বলে।’ খগেন বাবু রাস্তা ঘুরে এখন ফিরে এলেন, তখন
ধোঁয়া নেই, উত্তনে কেংলী বসান হয়েছে। শীঘ্রই জল
তৈরী হল, লোহার চাটুর উপর একটু ঘি ছাড়া হল, লোকটি
একটা বড় ডিসের মতন লেচি ছেড়ে দিলে। চা এল,
ডেভিল্ ভাজা হল, খগেন বাবু লোকটির ব্যস্ততা দেখে
আপত্তি করতে পারলেন না। ডিসের উপর দুটো ডেভিল্,
খানিকটা রাই ও একটি কেক, গরম চা থেকে ধোঁয়া বেরুচ্ছে।
ডেভিলের চেহারা দেখে খগেন বাবুর গা ঘিন্ ঘিন্ করে
উঠল, একটা কামড় দিতেই কিস্মিস মুখে এল! মন্দ নয়
মোটের ওপর, কেকটা বাসি, চা-টা ভাল নয়, বাসি দুধের ও
ধোঁয়ার গন্ধে বিশ্বাস দিচ্ছিল। আর এক কাপ চা দেবার
সময় লোকটি বলল, ‘ঐ নাপিত এল, ডেকে দেব? এই
পরামণিক, ইধার আও।’ লোকটির কবরী কাটা চুল, গায়ে
ফতুয়া, কানের পাশে লোহার কাটিতে তুলো, সযত্নে রক্ষিত
গোঁফ, হাতে ন্যাকড়ার মোড়ক, তার ভেতর কত রকমের

খলী। তার মুখে দারিদ্র্যের চিহ্ন নেই, বাঙ্গালী গরীব
কেরানীদের যেমন থাকে। তার পেতলের বাটিতে চাশের
দোকানের লোকটি থানিকটা গরম জল ঢেলে দিলে। খগেন
বাবু ক্ষুরটাকে গরম জলে ধুয়ে নিতে বসেন, সাবান ব্যবহার
করতে দিলেন না। ক্ষুরের ঝাঁট কাঠের, দেশী দেহাতী
জিনিষ। নাপিত খগেন বাবুর জামা ঢাকার জুতা একটা
কাপড় বার করলে, খগেন বাবু পরলেন না। নাপিত ভাঁজ
করে রেখে দিলে। তার হাত চল্ল গরম জল দিয়ে ধোয়া
দাড়ির ওপর। সাবানের চেয়ে ঢের ভাল। সেই পনের
বছর বয়সে লুকিয়ে দাড়ি কামিয়েছিলেন; আর বিবাহের
দিন বিকেল পাঁচটায় একেবারে ধরমতলায় ছুট, বাড়ির লোক
ভেবেই অস্থির, বর কোথায় পালিয়ে গেল বুঝি। ‘পালাবে
কোথায়?’ বড় ভগ্নীপতি ঠাট্টা করেছিল, ‘পালাবার জো আছে।
পরেও নেই, আগেও নেই।’ ছোট ভগ্নীপতি বলেছিল,
‘পালিয়েই যদি থাকেন ত’ শস্তুর বাড়িতেই, দাদার আর তবু
সইছে না।’ বাস্তবিকই তার তবু সইছিল না। ব্যাপারটা
তাড়াতাড়ি শেষ হলেই সে বাচে। প্রতীক্ষা করা তার ধাতে
ছিলনা, যা হবার এম্পার ওম্পার একটা হলেই হল। ঠিক
হলেই হোলো তা নয়, কেননা সে নিজে কনে দেখেছিল,
পছন্দই হয়েছিল—অশ্রু মেয়েও তার পছন্দ হয়েছিল, একে
যে বেশী তাও নয়, তবে বেশ কবিতা-কবিতা গোছের এই
মেয়েটি। বিবাহ ক’রে রোম্যান্স করবে, নতুন জীবন যাপন

করবে এ' ধারণা ছিল বলে মনে পড়ে না, মনে পড়ে এইটুকু যে সে শুধু অপেক্ষা করতে পারছিল না, মনে পড়ে যে সকলে তাকে নিয়ে মাতামাতি করছে, ঠাট্টা করছে, তার মন্দ লাগছিল না। হাঁ, এই ত তার মনোভাব ছিল; ত ছাড়া আর কিছু ছিল না? কই, মনে আসছে না ত'! হয়ত, আরো কিছু ছিল। সব মনে থাকে না, হয়ত, আরো কিছু ছিল। সব মনে থাকে না, পরে তৈরী করে মানুষে, আর স্মৃতিধা বুঝে পূর্বতনের স্বপ্নে চাপায়।

দাড়ি গৌফ কামান হল; নাপিত ক্ষুর ধুয়ে এক টুকরো শক্ত চামড়ায় শান দিয়ে ও হাতে পালিশ করে থলীতে রাখলে। খগেনবাবু গরম জলে মুখ ধুয়ে, একটা ছ-আনী দিলেন নাপিতকে। লোকটি কোন কথা না বলে ছয়ানীটা মাথায় ঠেকিয়ে কতুয়ার পকেটে রাখলে। কাজের লোক, নাপিত জাতের মত' বাজে কথা কয় না ত' ? কেমন তাড়াতাড়ি নীরবে কাজ সারলে!

ভারি আরাম বোধ হতে লাগল, যেন ঝরঝরে; মন খারাপ হলে লোকে দাড়ি কামায় না কেন? বিধবা হবার পর যদি মেয়েরা একটু সাজতে পারত, তা হলে দুঃখবিলাস ও নিজের প্রতি অন্তরঙ্গ্য বিধবারা অমন অস্বাভাবিক হতেন না, আত্মীয়ারাও কেবল মুখে সহৃদয়তা ও সমবেদনা প্রকাশের স্ববিধায় আত্মতৃপ্ত এবং মনে মনে বিরক্ত হতে পারতেন না, আর, আর, একনিষ্ঠতার আদর্শে দেশের আবাল-বৃদ্ধ-বনিতা নপুংসক হয়ে উঠত না। অবশ্য, পুনর্বিবাহটাও ভাল নয়; মুণ্ডিতমস্তকের পক্ষে বারবার বেলতলায় গমনাগমন মর্যতাবই পৰিচায়ক / কিন্তু কি করা যায়?

দু'ধারেই বিপদ। আদর্শেরও দরকার আছে, স্বাভাবিকতারও প্রয়োজন রয়েছে, না হলে সংসার চলে না। দুই অনন্তমুহুর প্রয়োজনের বিরোধ মেটে না, তাই মিথ্যারও প্রয়োজন। কল চলছে না, তাই তেল চাই। সাবিত্রীর কাছে দাম্পত্যজীবনের কাহিনী শুনে বুঝেছিলেন যে বিবাহিত জীবনেও মিথ্যার একটি বিশেষ স্থান আছে; আদর্শ-স্বামীরা স্ত্রীদের ঠকান, নচেৎ ভদ্রতা রক্ষা হয় না। ভদ্রতারক্ষা সত্য আচরণের চেয়ে অনেক মূল্যবান এই সমাজে, এই নতুন সমাজে। ভদ্রতা ও মিথ্যার মধ্যে একটা ভীষণ মিথ্যা থাকে, থাকতে বাধ্য। সব সভ্যতার মূলেই তাই, ইগডুয়াসিলের তলায় কাঠবিড়ানীর বাসা; সত্য হল সহজ ও স্বাভাবিক, ভদ্রতা হল অস্বাভাবিক ও কৃত্রিম। তবে গোড়ার দিকে, সভ্যতার একটা তেজ থাকে, তখন দোষ অর্ধায় না, পরে তেজ কমে আসে। প্রথম প্রথম সাবিত্রীর সঙ্গে ব্যবহারের মধ্যে একটা সহজ স্ফূর্তির বিকাশ পেত, পরে এল কুণ্ঠা। পরে তেজ কমে আসে সভ্যতার, তখন অন্তরের সত্য প্রিয়মাণ হয়; তার চার পাশে মিথ্যার অঙ্ককার, বনের মাঝে গোধূলির মতন ঘিরে আসে গোপন-সঞ্চারে, চারধার থেকে নেমে আসে গাছের পাতা থেকে ধীরে, অজানিতে, মুমূর্ষুপ্রশ্বাসে। তখনও সভ্যতা ঘনতমসায় আবৃত হয় না, তখনও দীপ্তি থাকে। তাই বলে baroque, rococo, নিবে যাবার পূর্বে ঐশ্বর্যের স্নান হাসি। রমলা দেবী সভ্য মানুষ, তাই হাঁপিয়ে পড়েছেন মিথ্যার অদৃশ্য বোঝাব'য়ে ব'য়ে—তীর নাকি হাঁপানি!

অন্তঃশীল।

ইপানি না ছাই! অপরিণত হৃদয়স্তর ধুকধুকনি, স্পিরিটের
ঝেঁতলে সযত্নে রক্ষিত। সাবিত্রীর মতো প্রথমে মিথ্যা ছিল না,
পরে এসেছিল—সত্য মিথ্যার দ্বন্দ্ব, সভ্যতা ও স্বাভাবিকতার
বিরোধ, সে ধারণা করতে পারলেন না নিজের মধ্যে, করোনার-
সাহেব বুঝতেই পারেননি ব্যাপারটা কি। সাবিত্রীর না মরে
উপায় ছিল না। অতবড় বিরোধ হজম করে নতুন সমন্বয়ে
উপস্থিত হওয়া কি চারটিখানি কথা! অধিকার-ভেদ রয়েছে যে—
সব আধার সমান নয়। সাবিত্রী ছিল ভিক্ষে তুবড়ী—তাই ফস্
করে জলেই নিবে গেল। কিন্তু ভিক্ষে হলে চলবে না। রমলা
দেবীর মধ্যে সত্য ও মিথ্যা নতুন ধরণের ফ্ল্যাটের বাসিন্দার মত
ভদ্রভাবে, আলগোছে দিন কাটাচ্ছে। অগ্নে কাটাচ্ছে কাটাক্
গে! তার কি! কিন্তু পরে টের পাবেন জীবনটা ফ্ল্যাট নয়।
আর খগেন বাবু, নিজে? নিজে সে মিথ্যা আচরণ করতেই পারে
না। বরঞ্চ সে পালাবে। তবে সাবিত্রীর উপায়ে নয়। ভিন্দেশে
সে চলে যাবে, না হয় সন্ন্যাসী হয়ে দিব্যি খাবে দাবে, মোটা হবে,
রং তামাটে হয়ে যাবে, পরকে উপদেশ দিয়ে চরিতার্থ হবে।
লোক গুলো যা মূর্থ! উপদেশ, বিশেষতঃ ধর্মোপদেশ যেন তাদের
খাও, না হলে চলে না। যত শিক্ষা ততই বুজবুজী প্রয়োজন।
ছিঃ, ছ্যাঃ। সর্বদাই বিরোধ, না হয় মিথ্যা। আর ভাল লাগে
না। তার চেয়ে, হাওড়া স্টেশন, একটি সেকেণ্ড ক্লাস বার্থ,
একটি ভাল পাহাড়ি চাকর, একটা ভদ্র-হোটেল, 'ভদ্রলোকের
জন্ত' নয়, বাস্! মশুরী ভাল না লাগলে উটি, উটি না লাগলে

এটি। নিজের রসিকতায় খগেন বাবুর মুখে স্থিতহাস্য ফুটে উঠল।

বাড়ীতে প্রবেশ করেই খগেন বাবু রমলা দেবীকে দেখতে পেলেন। গরদের সাড়ী, লাল পাড়, ধোপ্‌দোরস্ত, খস্‌খসে নদ, নরম, আঁচলটি গলায় জড়ান, নজর করলে ব্লাউসের লাল পাড়টি নজরে পড়ে, নচেৎ সাড়ীর পাড়ের সঙ্গে মিশে থাকে, সবুজ ঘাসের মধ্যে ফড়িংএর মতন। একটু উচু করে সাড়ী পরা, পায়ের গাঁট থেকে নীল শিরগুলো নেমে আঙ্গুলে প্রসারিত হয়েছে। যেন পূজারিণীর ছবি, ভবানী, লাহার, হেমেন মজুমদারের নয়। চোখা-চোখি হতে খগেন বাবু চোখ নাগিয়ে নিলেন, মনে হল যেন তাঁর প্রতি অবিচার করেছেন, যিনি অত করেছেন তাঁর বিরুদ্ধে ভেবে, তাঁর ক্রটির সমালোচনা করে। অত সকালে লুকিয়ে চা না পেয়ে এলেই হত, কিন্তু দেহের একটা ভদ্রতা আছে, নচেৎ দাড়ি কামান হতই না, অসভ্যের মুখ নিয়ে চায়ের টেবিলে বসতে হত। রমলা দেবী জিজ্ঞাসা করলেন, ‘সারা রাত ঘুম হয়নি বুঝি?’

‘ঘুম? ঘুম একরকম হয়েছে। এই একটু বাইরে গেছলাম’— ‘চা আনি?’ ‘এরি মধ্যে চা তৈরী? আপনি ত’ খুব সকালে ওঠেন!’ ‘ওপরের ঘরে আসুন’। খগেনবাবু ওপরের ঘরে গেলেন। ছিটের পর্দা টাঙ্গান, দরজায় তারের পা-পোস্‌, সতরঞ্চি মোড়। মেজে, তার ওপর দুটি ছোট রঙীন কার্পেট, গদিঅলা চেয়ার, তেকোনা টেবিলের উপর ফুলদানী, ফুল নেই, চেয়ারের পিঠে লেসের কুমাল, দেওয়ালে বিলিঙ্গী ছবি, জানালায় পর্দা দেওয়া।

অন্তঃশীলা

ঘরটি ছোট, আসবাবপত্র বর্তমান লেখকদের লেখার মধ্যে মতামত-গুলির মত' ভিড় করে রয়েছে, অবকাশ নেই, যেন হিংসেতে নিজের অধিকার বিস্তার করতেই বাগ্ন। খগেন বাবু একটি মোটা চেয়ারে বসলেন, সামনের টেবিলে চায়ের বাসন সাজান। রমলা দেবী এক কাপ খগেন বাবুকে দিলেন, এক কাপ নিজের জুগু তৈরী করলেন। খগেন বাবু এক টুকরো চিনি নিলেন, চা-পানের পূর্বে একটি টোট্ট তাঁকে খেতে হল, পাংলা, মুড়মুড়ে, ফিকে হলুদে টোট্ট, খালি পেটে চা খেয়ে খেয়ে নাকি তাঁর স্বাস্থ্যের ক্ষতি হচ্ছে।

‘এবার দেখুন নিজেকে বত্ব কর্তেই হবে’

‘আমার শরীর মোটেই খারাপ নয়’

‘নাঃ, মোটেই খারাপ হবে কেন? তবে ঐ যা, রাতে ঘুম হয় না, খেলে হজম হয় না, তাই কেবল মাছের বোল পথা, আর ওজনে একটু হাল্কা!’

‘তাতে দেখুন কিছুই আসে যায় না। আপনিও ত’ হাল্কা’

‘আমাদের কথা ছেড়ে দিন। আমাদের আবার স্বাস্থ্যের প্রয়োজন কি?’

‘সে কথা বলবেন না। আপনাদের স্বাস্থ্যের ওপরই আমাদের সুখশান্তি নির্ভর করছে। আপনাদের মাথাটি ধরলে আমাদেরই ভুগতে হয়।’

‘সকলের নয়। আর একটু চা নিন। একি, গাল কাটলেন কি কি করে!’ ‘না, কৈ? কাটিনিও?’ গালের ওপর হাত দিতেই

আঙ্গুলে রক্তের দাগ লাগল! ‘তাইত! নাপিতদের বিশ্বাস করতে নেই, তাইত!’ রমলা দেবী ঘর থেকে বেরিয়ে গেলেন। এক মিনিটের মধ্যে একটা সলুলয়েডের বাক্স ও একটি শিশি নিয়ে এলেন—‘এই নিন্, আগে আওডিন দিন, একটু জলবে। তারপর পাউডার দিন, ভারি হল্‌দে দাগ হয়!’ খগেন বাধা আওডিন ও পাউডার লাগালেন। চা’পান শেষ হবার পর রমলা দেবী তাঁকে বল্লেন, ‘এখন এই ঘরেই বিশ্রাম করুন, না বলে যেন কোথাও চলে যাবেন না। ভাঁড়ার বার করে আস্‌ছি, ততক্ষণ কাগজটা পড়ুন না। কোন সঙ্কোচ বোধ করবেন না! অনুগ্রহ করে।’ পিছনের আঁচলটা টেনে তিনি সিঁড়ি দিয়ে নেবে গেলেন।

কাগজ পড়তে ভাল লাগছিল না, সঙ্কোচ হচ্ছিল। ‘সঙ্কোচ করবেন না’—না, সঙ্কোচ আর কি? হাজার হোক পূর্ব-পরিচিতা, সাবিত্রীর বন্ধু, সেই সূত্রে আলাপ। বন্ধু ব’লে বন্ধু! একেবারে হর-গৌরী! কে গৌরী, কে হর? রমলা দেবীই হর, তাঁর মধ্যে পুরুষের উপযুক্ত একটা সংহতি ছিল, আর সাবিত্রীর মধ্যে ছিল গৌরীর বাপের বাড়ি যাবার আকাংক্ষা, গৌরীর অল্প কিছু থাক্ আর না থাক্। আচ্ছা, সতীর যদি মানসিক বিশ্লেষণ করা যায় তা হলে তাঁর চরিত্রে পিতৃপ্রীতির আতিশয্য এবং স্বামীর অবস্থায় অসন্তোষ পাওয়া যায় না কি? বিশ্লেষণে যা চাই তাই মেলে। কিন্তু হর ঠাকুরটি বড় ভাল। তাঁর মধ্যে আছে শান্তি ও আঁতুসমাহিত ভাব, তাঁর মধ্যে নেই

অন্তঃশীল।

ভাবের উত্তাপ, চিন্তের বৈকল্য, চিন্তার বিক্ষেপ ; অথচ রাগ রহিত, এমন কি কামও আছে—বিস্মৃতি কি জন্মটাই করেছিলেন মোহিনীমুগ্ধি ধারণ করে ! ভার্কি সবল, সহজ পুরুষ, যেমন সতী নিতান্তই সাধারণ মেয়ে। তাঁর দুই-ই চাই, বাপের বাড়ি পাওয়া চাই স্বামীকে আঁচলে বেঁধে, আবার সেখানে স্বামীর অপমান হলে রাগও হবে ; তপস্শ্রদ্ধ করা চাই ঐ স্বামী পাবার জন্য, আবার পেয়ে ঝগড়া করাও চাই। এই বোধ হয় জীবন, কেননা এই স্বাভাবিক। এই ভাল বোধ হয় ! হরগৌরীর জীবনে কোন কৃত্রিমতার সন্কেচ ছিল না, লজ্জা, ঘৃণা, ভয় কিছুই ছিল না, প্রত্যেকেই সহজ ও সাধারণ ছিলেন, তাই হরগৌরীর মিলন আদর্শ বিবাহিতজীবনের প্রতীক। কিন্তু দুই মেয়েতে ভাব হয় কি ? কেন হবে না ? পুরুষদের মধ্যে ত' হয়, তবে খারাপ নাম না দিলেই হল। বন্ধুত্বের মধ্যে সন্কেচ থাকে না। কিন্তু মেয়েরা সর্বদাই সঙ্কুচিত। কিসের সন্কেচ ? সনাজ্ ভয় দেখায়, সেইজন্য, না দেহের জঘন্য দুর্বলতার জন্য ? পুরুষেরা ত' তার ক্ষতিপূরণ করেছে, সুন্দর বলে, ছবি এঁকে, মূর্তি গড়ে, কবিতা লিখে, মিথ্যাভাণ করে ! তবু কেন ? তাঁরা মিথ্যার চেয়ে আরো বেশী কি চান ? ভেবে কোন কুল কিনারা পাওয়া যায় না। কেবল, কেবল সন্কেচ না থাকলেই হ'ল, তা যে উপায়েই সন্কেচ দূর করা হোব না কেন ! সন্কেচের জগ্নাই সাবিত্রী আত্মঘাতিনী হল, পোড়বার সময় দেহটা সঙ্কুচিত হচ্ছিল বলে দুঃখ হল কেন ? তার পূর্বে, বহুপূর্বে, মন তার

সঙ্কুচিত হয়েছিল। আজ রমলা দেবী সঙ্কোচশূন্য হতে আত্মহীন
করছেন। এ আত্মহীন সত্য নয়—নিশি-তে ডাকার মন্তন,
'থগেনবাবু আছেন, থগেনবাবু আছেন, থগেনবাবু আছেন।
আপনি আছেন, তুমি আছ, ওগো—' প্রথম ডাকে উত্তর নেই,
দ্বিতীয় ডাকেও নেই, কেবল উঠে বসতে হয়, তৃতীয় ডাকের পর
উত্তর দিতে হয়; নচেৎ, স্বপাটিন অবস্থায় শয্যাভ্যাগ করে
অন্ধকারে অদৃশ্যশক্তির পশ্চাদ্ধাবন, তারপর খালিবিলে ডুবে মরণ।
পরের দিন সকালে মাঠের চাষী বলে অমুক লোক আত্মহত্যা
করেছে—তারা বোঝে না, করোণার সাহেবও বোঝেন নি।
তিন বারের পর চার বারের ডাকে উত্তর দিলে মোহ থাকে না,
কেটে যায়—তখন উত্তর না দেওয়া বোধ হয় একটু অভদ্রতা।
সঙ্কোচ এখন কাটবে না, উত্তর এখন দেওয়া হবে না।

গদির চেয়ারে বসে থগেনবাবুর ঘুম আসছিল, উঠে বসে
জোর করে ঘুম ভাঙালেন। খবরের কাগজে বড় বড় অক্ষরে
লেখা রয়েছে দেশবন্ধু সপ্তাহ—অর্থাৎ টাকা চাই। আজকাল
পাঁজি পুঁথি সব উন্টে গিয়েছে, এখন স্মৃতি-সপ্তাহ দিয়ে বৎসরের
হিসেব হয়। কতদিন স্মৃতির পুঁজি নিয়ে চলবে? কলসীর জল
গড়াতে গড়াতে খালি হয়, শ্রোতের জল খালি হয় না, জোর, আসে
ভাঁটা। গচ্ছতি ইতি জগৎ। এই দু'দিন আগে সাবিত্রী ছিল,
আজ নেই, কিন্তু সূর্য্য বেশ উঠছে, সেই সূর্য্য থেকে আহত
জীবনও রুদ্ধ হয় নি, যেমন ভূমিকম্পে ঘড়ি বন্ধ হয়ে যায়।
জীবনটা ঘড়ি নয়। জীবন-প্রবাহকে স্বীকার করতেই হয়।

রমলা দেবী জীবনের প্রতীক না কি? প্রতীক ভাবতে হচ্ছে হয় না, ব্যক্তিত্বকে অপমান করা হয়। বরঞ্চ তাঁর সঙ্গে সম্বন্ধটি জীবন-শ্রোতের ছোট্ট উন্মি, কলধ্বনির রেশ মাত্র। তাঁর জীবন তাঁরই। প্রত্যেকেই পৃথক। 'কিন্তু পৃথক থাকা যায় কি? নিশ্চয়ই যায়, না গেলেও থাকতে হবে, তবেই ব্যক্তিত্ব পূর্ণ হবে। সে জন্ত প্রত্যাহার-সাধন, শম, দম অভ্যাস করতে হবে। না করলে প্রকৃতি পুরুষকে গ্রাস করে ফেলবে। প্রকৃতিগ্রস্ত পুরুষের কোন সার্থকতা নেই। সার্থকতার অর্থ কি? কে জানে? আজ না হয় সে-অর্থ নাই আবিস্কৃত হল। আজ নিদ্রাতুর অবস্থাতেই কাটান যাক—নিদ্রা, ঘুম, সুষুপ্তি, শাস্ত্রে কতই আছে! বর্তমান মনোবিজ্ঞানে স্বপ্ন নিয়ে মাতামাতি চলছে, নিদ্রা নিয়ে আলোচনা হচ্ছে কৈ? স্বপ্ন নাকি নিদ্রার সহায়তা করে? স্বপ্ন যদি দেখতেই হয় তা হলে যেন মর্গের সাবিত্রীর ঐ ককণরূপ না ভেসে ওঠে। তার চেয়ে ভেসে উঠুক সাবিত্রীর বিবাহের রাতের কিশোরী-শ্রী—‘তার জলচুড়ীটির স্বপ্ন দেখে, শিউলী ঝরে লাখে লাখে’.....

ঘুম ভেঙ্গে ওঠবার সঙ্গে সঙ্গে ঘড়িতে আট-টা বাজল—চোখে দেখলেন এগারটা—খড়মড়িয়ে খগেনবাবু উঠে বসলেন—চোখে পড়ল, কোণের চেয়ারে রমলা দেবী বসে আছেন, স্নানের পর শুভ্র দেখাচ্ছে, চুল ভিজ্জে, নিশ্চয়ই খোলা।, ‘এইবার উঠুন, স্নান করে নিন।’ ‘শরীরটা বেশ ঝরঝরে হয়েছে; বসুন না, এই একটু দেরীতে নাইলে কি কষ্ট হবে আপনার?’

‘আমার হবে না, আপনার হবে ; খাবার জুড়িয়ে যাবে।’

‘তা হোক’ ‘এখনি আসছি’ বলে রমলা দেবী নীচে চলে গেলেন।

খগেনবাবু খবরের কাগজের পাতা সাজাতে না সাজাতেই রমলা দেবী প্রবেশ করলেন। ‘কিন্তু বারটার মধ্যেই থেয়ে নিতে হবে!’

‘সে হবে’খন। বসুন না!’

‘এই ত’ বসে আছি’

‘কাজকর্ম শেষ হয়েছে?’

‘অনেকক্ষণ। আমাকে বেশী কাজকর্ম করতে হয় না, চাকর-বাকর সবই পুরাণো।’

‘আমি শুনেছি যে আপনি সর্বদাই কাজে ব্যস্ত থাকেন?’

‘না, কাজ আর কৈ? একলার আবার কি কাজ? আমার হাতে বিস্তর অবসর!’

‘অবসরে নিজেকে ব্যস্ত রাখা ভারী কঠিন। এবার থেকে আমার অবসর খুব বেশী হবে.....তাই ভাবছি শীঘ্র কোথাও বেরিয়ে পড়ব!’

‘শীঘ্র যেতে পারছেন কি করে? কাজ রয়েছে।’

‘কাজ আমার আর, কি?’

‘কাজ রয়েছে বৈ কি’

‘ও’—খগেন বাবু খানিকক্ষণের জন্য চুপ করে রইলেন :

অন্তঃশীলা

রমলা দেবীর কাছে কোন সাড়া না পেয়ে নিজেই জিজ্ঞাসা
কুরলেন, ‘আমাকেই করতে হবে?’

‘না হলে কে করবে বলুন?’

‘কেন, পুরুতে? তাঁদের টাকা দিলে ত’ সব কাজই হয়
শুনেছি?’

‘হঁয়, পূজা হয়, কিন্তু এ কাজ হয় না।’

‘ও আমি পারব না’

‘জানি কত অপ্রিয়’

‘বেশ.....আমি অপ্রিয় কাজ করতে কখনও দ্বিধা করিনি,
নচেৎ এমন হয়!’

‘তাকে অপ্রিয় কাজ বলে না। তাকে আপনার মনোমত
করে গড়ে তোলা আপনার নিতান্তই প্রিয় কাজ ছিল।’

‘তবু আপনি গড়ার কথা তুললেন। সাবিত্রী বলত তাকে
অযথা বক্তৃতেই আমার ভাল লাগে।’

‘আমি তা কখনও বলিনি!’

‘ঐ দেখুন! নানা মূনির নানা মত! আপনি বলতেন
বলছি না, সেই নিজে বলত।’

‘কেন—আপনার কি ধারণা নয় যে আমিই তাকে সব
শেখাতাম?’

‘আপনি শেখাতেন বলতাম না; সেই শিখত, তার স্বভাবটা
একটু দুর্বল ছিল কিনা, তাই! আপনার দোষ আমি কখনও
দেখাই নি।’

‘ও সব আলোচনা পরে হবে ; এইবার উঠুন, দেবী হবে ।’

‘এই উঠছি.....একটু বসুন না...আমার খিদেই নেই ।’

‘খিদে আপনি বুঝতে পারেন না । ভাতের কাছে একবার বসুন ত, সেই সকালে একটুকরো টোষ্ট্ খেয়েছেন ।’

‘খাবই না ভাবছি ; একটু চা হলে মন্দ হয় না, কি রকম জড়তা আসছে ।’

‘এখন চা খায় না । এই করেই শরীর মাটি করেছেন ! চলুন, উঠুন, তার পর বিশ্রাম করবেন ’খন ।’

‘আচ্ছা, চলুন, কিন্তু তার পরে বাড়ী যাব । চাকর-বাকর গুলো ভাবছে ।’

‘খবর পাঠিয়েছি ।’

‘পাঠিয়েছেন এরি মধ্যে ! আপনি খুব.....’

রমলা দেবী গম্ভীরমুখে উঠে দাঁড়ালেন । খগেনবাবুকেও উঠতে হল । পাশেই স্নানের ঘর । কোলকাতা সহরের বাড়িতে ঐ রকম বড় স্নানের ঘর পাওয়াই যায় না । বেশ বড়, পরিষ্কার-পরিচ্ছন্ন, শুকনো, মেঝে বিলেতী টাইলের, স্নানের সব সরঞ্জামই রয়েছে, সল্টস্, স্পঞ্জ, শাওয়ার, আরশী, কেমন একটা গন্ধ ভরপুর করছে...একটু উগ্র, তাও ভাল । উঃ কালকের গন্ধটা কি বিদকুটে ! উন্নতের ওপর ফ্যান পড়ার মত ! খগেনবাবু কল খুলে দিলেন—জল পড়লো না, দেবী হয়ে গিয়েছে । নাইবার টবে জল ভর্তি । মাথায় একটু সুগন্ধি তেল ঘসে টবের মধ্যে নেমে পড়লেন, ছায়া করে মেজের ওপর জল উপছে পড়ল, এই বা :

অন্তঃশীলা

মেজেটা ভিজে গেল! বেশ ঠাণ্ডা জল, নিশ্চয়ই সল্ট্‌স্ দেওয়া হয়েছে, বরফ বোধ হয়, না হলে অত ঠাণ্ডা! আঃ, শরীর জুড়িয়ে গেল। লাল এনামেলের ঘটি দিয়ে মাথায় জল ঢাললেন—সেই কাল রাত্রে গঙ্গার জল মাথায় ছেটান! ভাল করে সাবান মাখলেন। সাবিত্রী কখনও স্নানের ঘরে গান গেয়ে ওঠেনি, খগেনবাবু গাইতেন, সাবিত্রী বলত দেবী হচ্ছে, বেরিয়ে এস, বাইরে এসে তিনি বলতেন ‘তোমার বন্ধু গান না?’ ‘তোমরা ভাইবোনে গাওগে না, আমার কি?’ কথা বন্ধ হয়ে যেত। নাঃ আর দেবী করা চলে না, মেমসাহেবের দেবী হবে খানা খেতে। এমন বাথরুম না হলে স্নান করে স্থগ নেই। দেশী হোটেলে নাইবার বন্দোবস্ত নেই, বিদেশী হোটেলেই উঠতে হবে। পাড়াগায়েই অবগাহন শোভা পায়। ছ’দিন পরে—কতদিন পরে রমলা দেবী ও পুরুত ঠাকুরই জানেন—কিছুকালের জন্ত তিনি দূরদেশে চলে যাবেন। সাহেবী হোটেলে ঘণ্টা বাজলে খেতে হয়, খিদে পাক আর নাই পাক! সর্বক্ষণ আড়ষ্ট হয়ে থাকতে হবে—স্ববিধার চেয়ে অস্ববিধাই বেশী। তার চেয়ে চলে যাবেন, গ্রামে, নদীর ধারে, যেখানে অবগাহন করে শুদ্ধ হবেন, মুক্ত হবেন। ছোট্ট নদীর ওপাশে আকাশ ভেঙ্গে পড়েছে, যে আকাশের দিকে বলাকার দল ছুটলে ভয় হয় ধাক্কা খাবে, সে ধাক্কা খেয়ে হয়ত আবার তাদের ফিরে আসতে হবে—কোথায় আসবে? নীড়ে! নাঃ কোলকাতায় থাকা তার পরে অসম্ভব!

খগেনবাবু চুল আঁচড়ে, টার্কিস তোয়ালে গায়ে জড়িয়ে, ফরসা

ধুতি পরে বাইরে এলেন। দল্লুজার গোড়ায় রবারের পা-পোশের ওপর একজোড়া রঙীন স্যাণ্ডাল। রমলা দেবী বারাণ্ডায় দাঁড়িয়ে আছেন একটা নেটের গেঞ্জি নিয়ে। কার গেঞ্জি? কিস্তি খালি গায়ে কি করে খেতে বসবেন? গেঞ্জিটা স্নানের ঘরে গিয়ে পরলেন, টাবের প্লাগ্‌টা খুলে দিলেন—হুড়্‌হুড়্‌ করে জল বেরিয়ে গেল, মেজেতে জল থই থই করছে, পা দিয়ে বার করতে চেষ্টা করলেন, থাক্‌গে দেবী হচ্ছে। খগেনবাবু বাইরে এলেন, রমলা দেবী তাঁকে অণ্ড একটা ঘরে নিয়ে গেলেন। টেবিলে গেতে হবে, পাশের টেবিলে কাচের বাসনে খাবার ঢাকা রয়েছে। রমলা দেবী বড় চামচে দিয়ে পরিবেশন করলেন—সরু চালের ভাত, গুঁতো, মোচার ঘণ্ট, বিউলির ডাল, পুরের ভাজা, দই। পাতে ঘি, বেশ গন্ধ, বিউলির ডালে আদা ও জিরে ভাজার গন্ধ। মাছ নেই। রমলা দেবী তা হলে দেশী রান্নাও জানেন! মাঝিরা তাই বলত, পুডিং শিখেছিল তাঁর কাছে। খগেনবাবুর খিদে পেয়েছিল, অভ্যাসও তাঁর তাড়াতাড়ি খাওয়া। রমলা দেবী তাঁকে তাড়াতাড়ি খেতে বারণ করলেন, শরীর খারাপ হবে। মুখে যাপতি জানিয়ে ধীরে ধীরেই খেতে লাগলেন—‘আমার চির-জালের অভ্যাস!’

‘সেই জগুই শরীর খারাপ।’

‘সেজগু নয়। খাওয়া ব্যাপারটা যত শীঘ্র সমাপ্ত হয় ততই ভাল।’

‘কেন?’

অন্তঃশীলা

‘ভারি ভাল্গার ! লুকিয়ে লুকিয়ে খাওয়া উচিত, যেমন গিন্নীরা খেতেন, রান্না ঘরে বসে, ভাল জিনিষও পেতেন । খাওয়া-দাওয়া অস্বচ্ছন্দ হওয়াই উচিত । মাপ করবেন, আমি ভারি সেকেলে । সকলের সামনে স্নান করা যায় কি ? অথচ স্নান ত’ একপ্রকারের শুদ্ধি ! কিছু মনে করবেন না ।’

‘মনে করছি না, কিন্তু ওটা আপনার খেয়াল । আর খেয়ালটা হয়েছে কেন তাও বলতে পারি !’

‘বলুন না !’

‘বুদ্ধির জ্ঞান । বুদ্ধির চাষ করলে দেহকে ঘৃণা করতে শেখে ।’

‘ঠিক বলতে পারলেন না । ছেলেবেলায় উঠতে দেবী হত, পড়াশুনা শেষ করে খাবার সময় থাকত না, ছুটে স্কুলে-কলেজে যেতাম ।’

‘বেশী রাত জাগতেন বুঝি ?’

‘জাগতেই হত । রাত দশটা পর্য্যন্ত আড্ডাই দিতাম, কলেজে স্নানাম বজায় রাখতে হবে ত !’

‘সেই একই কথা ! আচ্ছা, ছেলেবেলা থেকেই খুব পড়াশুনা করতেন বুঝি ?’

‘করতাম, স্কুলে মন্দ ছেলে ছিলাম না, কলেজে হলাম দুর্দান্ত, পাঠ্যপুস্তক ভাল লাগত না, পড়তাম বাজে বই, যা পেতাম তাই ।’

‘দুর্দান্ত ! আপনি আবার দুর্দান্ত !’

‘সত্যি, কি রকম হয়ে যাই ঐ সময়টায় । ঠিক খারাপ হওয়া

যাকে বলে তা হই নি, তবু একটু বুনো হয়ে যাই—ওয়াইল্ড গোছের।’

‘বুনো? বলুন না, আপনার ছেলেবেলার কথা শুনে আমার বড় ভাল লাগে’

‘বলবার এমন কিছু নেই, তবে……’

‘তা আবার নেই! আপনি ত কলেজের কীর্তিমান ছেলে!’

‘পরীক্ষায় নয়। তেমন কীর্তি কিছু রেখে আসি নি—এক ম্যাগাজিন বার করা, থিয়েটার করা, ডিবেটিং ক্লাব প্রতিষ্ঠা করা ছাড়া; আমাদের সময় ধর্মঘট ছিল না। লেকচার শুনতাম নির্বাচন করে। বাকি সময়টা আড্ডা আর আড্ডা, তারপর গভীর রাতে পড়া, পাগলের মতন পড়তাম, বই কিনতাম আর পড়তাম, বইএর সঙ্গে ফাঁকি দিই নি। মধ্যে মধ্যে থিয়েটার দেখতাম ও করতাম।’

‘আবার থিয়েটার করাও হত? কিসের পাট করতেন? বলব? মেয়েদের, নিশ্চয়……বেশ মানাত!’

‘তা বুঝি মানায় কখনো! তবে দিত জোর করে, ছোট ছিলাম, তাই। মেয়ের পাটও করেছি, ভাল লাগত না, লজ্জা করত, আপনাদের পাট আমি বুঝি না। একবার অমৃতলাল শেখাবার জন্ত এসেছিলেন, তিনি অবশ্য ভাল বলেছিলেন—কিন্তু ও সূখ্যাতির মানে নেই!’

‘তার সূখ্যাতির মানে নেই তঁর থাকবে বুঝি আ-মাদের!’

অন্তঃশীলা

‘সেবার চন্দ্রগুপ্তে অ্যাটিগোনাসের পাট করি, মন্দ হয় নি, কিন্তু সে-কি বিপদ!’

‘হেলেন ও ছায়া সেজেছিলেন কঁার?’

‘কলেজেরই ছেলে। সেই ত’ বিপদ! সে ভারি মজা হয়েছিল—সে সব কথা আপনি বুঝবেন না, পুরুষদের ছেলেমানুষী কথা শুনে লজ্জা পাবেন!’

‘আপনিই দেখছি লজ্জা পাচ্ছেন। বলুন না, যদি অগ্গায় না করে থাকেন!’

‘না আমি আর অস্ত্রার করলাম কোথায়? আচ্ছা, বলছি। আমি ত’ অ্যাটিগোনাস, একজন ছাত্র, আর একজন হেলেন, দুজনে কিন্তু চন্দ্রগুপ্তকে ভাল না বেসে আমাকেই ভালবেসে ফেলে। ভারি বিরক্ত করত! ষ্টেজে নয়, বাইরে। শেষে চিঠি পর্যাস্ত! হোটেলে যেতে হবে, সিনেম: যেতে হবে, অথচ তারা নীচের ক্লাসে পড়ত। ছেলেরা ঠাট্টা শুরু করলে। পড়া বলে দিন, বই ও নোট ধার দিন, এই ক’রে সূত্রপাত। বন্ধুরাও মজা পেলে। আমার সঙ্গে তাদের আলাপ গাঢ়তর করবার দোহাইএ দুচারজন চালাক ছোকরা তাদের ঘাড় ভেঙ্গে খেতে লাগল। ভারি দুঃখ হত, কিন্তু তখন তাদের বারণ করে কে? শেষে দুজনের মধ্যে ভীষণ ঝগড়া, প্রাণ আমার যায় আর কি?’

‘কি করলেন?’

‘দুজনের মধ্যে ভাব করাতে গেলাম, ফল হল না, আলাদা ডেকে প্রত্যেককে বোঝালাম, ফল হল না, একজনকে ডেকে এনে

নিজের ছবি দিলাম, বললে তা হবে না, এক সঙ্গে ছবি তুলিয়ে তবে ঠাণ্ডা। অত্যাটিকে আর সন্তুষ্ট ক'রতে পারলাম না; নয় দেখাত, নিজের জীবন নিয়ে ছিনিমিনি খেলবে, উচ্ছন্ন যাবে চোখের সামনে। ছোকরা গেলও তাই, আমার সামনে নয়, আমি তখন পশ্চিমে বেড়াতে যাই, আমার দোষেও নয়, নিজের দোষে। সে দিন দেখা হয়েছিল, চেহারা খারাপ হয়ে গেছে, চেনাই যায় না, কিন্তু চোখ তেমনি ঢুলু-ঢুলুই আছে। এমনি ক'রে চাইলে যে আমি কেমন আছে হে' জিজ্ঞাসা করেই দেখুট।'

‘আপনার ভারি অসুস্থ!’

‘নিশ্চয়ই নয়, অমন ভাব প্রবণ, না, না, আমাকে আর দেবেন না, দই খাব না, আচ্ছা—তাই দেবেন দুপুরে ঘোল করে—চিনি দেবেন না...কোথায় অত্যা বলুন? মাতুষ্য নাকি ঐ কারণে আবার উচ্ছন্ন যায়! ও সব মেয়ে মাতুষ্যে, I mean অশিক্ষিত মেয়েরাই করে, পুরুষ আর মেয়েতে তফাৎ কি তা হলে? আপনি বুঝি তফাৎ আছে মানেন না?’

‘জানি না.....আর নেবেন না? পাখীর আহার...এইবার চলুন একটু জিরুবেন। ত্রায় অত্যা নিয়ে তর্ক করিতে আপনার সঙ্গে পারব না, তবু কেমন ইচ্ছে হয় শুনতে। চলুন আপনার বন্ধুদের গল্পশোনা যাক, যদি একান্ত অসুস্থ পাত্রী না মনে করেন।’

খগেন বাবু উঠে পড়লেন। মুখ ধুয়ে ডিশ থেকে শুপারি এলাচ তুলে নিলেন, পান খেতে নেই বুঝি, মুখশুদ্ধি বলে না?

অন্তঃশীলা

একজনের মৃত্যু, অথের শুদ্ধি ; ভাল ব্যবস্থা । ওপরেরই বসবার ঘরে এসে বসতে না বসতেই রমলা দেবী এসে পড়লেন ।

‘রোদ্দুরের ঝাঁজ আসবে, পশ্চিমের জানলা বন্ধ করে দিই ?’
‘কিন্তু একটু পরেই আমি যাব’ ‘বেশত ! রোদ্দুর একটু ঢলুক, ততক্ষণ বিশ্রাম করুণ, তারপর যা হুকু...’

‘যা হয় নয়, আমাকে যেতেই হবে.....আমাকে ছেড়ে দিন... এবার যাই ?’

‘ছেড়ে দিন মানে ?’

‘না, না, আমি তা বলছি না, মাপ করুণ আমাকে...মানে— আমার কাজ আছে তাই বলছি । অনেক ধন্যবাদ.....এখনি যাচ্ছি না ত’, আপনি ঘুমবেন না ?...এখন একটু বিশ্রাম করুণ গে.....বিকলে আবার হয়ত দেখা হবে...কোথায় বা যাব ?’

‘যাবার পূর্বে চা খেয়ে যাবেন, না সরবৎ ? বাড়ীতে থবর দিয়েছি’ । ‘চা—আপনি একটু জিরিয়ে নিন গে’.....

রমলা দেবী চলে যাবার পর থগেন বাবু বিশ্রাম করবার জন্ত প্রস্তুত হচ্ছেন এমন সময় স্ত্রজন ধীরে ধীরে দরজা খুলে ঘরের মধ্যে এলেন । ‘বড্ডদেবী হয়ে গেল আসতে, আপনি বুঝি...’
‘না, আমি বেশ ঘুমিয়েছি, আমার ঘুম পাবে না, আপনি বসুন না, উনি এই মাত্র শুতে গেলেন’ ‘না, না, জাকবেন না, এখন না হয় যাই’ ‘বসুনই না’ স্ত্রজন এসে চুপ করে বসে রইলেন । অপরিচয়ের শূন্য ব্যবধানে থগেন বাবু আড়ষ্ট বোধ করছিলেন, স্ত্রজনের মুখে ও চোখে সহজভাবেই লক্ষ্য করে আশ্বস্ত হলেন...

‘আপনি সিগারেট খান ?’ ‘সচরাচর খাই না, এখন খাব না’
 ‘এক গelas জল দেবো ? বাইরে বড় রোদ র, তাই গelas
 না’ ‘এই মাত্র খেয়ে আসছি’ ‘তা হলে কি দেবো ?’ স্বজন একটু
 হেসে উত্তর দিলেন, ‘এ বাড়ীর সঙ্গে, রমলাদির সঙ্গে আমার
 অনেক দিনের আলাপ।’ তাওত’ বটে ! ইচ্ছা, হচ্ছিল কতদিনের
 আলাপ জিজ্ঞাসা করতে, কিন্তু ঐ ধরণের প্রশ্ন করাটা অসভ্যতা
 মনে হল। পরিচয়ের আবার ক্রমিক ইতিহাস কি ? দুজনে
 চিরদিন একত্র বসবাস করলেও পরিচয় হয় না, আবার এক
 মুহূর্তেই ব্যবধান অপসৃত হয়, সম্বন্ধ ঘনিষ্ঠ হয়, ইচ্ছা যেন চোখ
 খোলে, ছানি খসে যায়। ছানি কাটাতে হয়, অস্ত্রের সাহায্যে,
 অতি ধারালো ও সূক্ষ্ম অস্ত্র, কয়েক সেকেন্ডের অস্ত্রোপচার,
 তার পর চোখ বেঁধে কয়েক দিনের জ্ঞান শুয়ে থাকতে হয়, শবের
 মতন, সে সময় কাসতে পর্য্যন্ত মানা। পরিচয়ের জ্ঞান ধীর, শাস্ত
 ও মৌন প্রতীক্ষার প্রয়োজন, চারপাশের ভিড় সরান দরকার,
 গোধূলির নীরব অবসরে একটি তারা ফোটার মতন। সাবিত্রীর
 সঙ্গে পরিচয় ঝড়ের মধ্যে—ভাবপ্রবণতার আবর্তে, তাই আলাপ
 জমল না। রমলা দেবীর সঙ্গে পরিচয় ঝড়ের পরে, ভাব যখন
 নিঃশেষিত হয়েছে, তখনও ঝড়ের স্মৃতি রেশ টানছে। স্বজনের
 সঙ্গে কখন পরিচয় ঘটবে ? ধরিত্রী যখন শীতল হয়েছে, ঝড়ের
 চিহ্ন যখন লোপ পেয়েছে, বিশ্বামের পর যখন প্রাণটা, চোখটা
 জুড়িয়েছে। স্বজনের মধ্যে একটা শীতলতা রয়েছে, বর্ষাস্নানের
 শীতলতা, বরফের কঠিন শৈত্য নয়। স্বজন বলেন,

অন্তঃশীলা

‘আপনার খুবই কষ্ট হয়েছিল কাল !’

• ‘কষ্ট একটু হয়েছিল বৈকি !’

‘চোখের জালা কমেছে ?’

‘অনেকটা। আপনার বুঝি চোখ খারাপ ?’

‘বিশেষ নয়’

‘জল পড়ে, মাথা ধরে ?’

‘পড়তো, চশমা পরে সেরে গেছে, তাই এখন আর বেশী
পরি না’ ‘অস্বস্তি হত না ?’

‘খুব, পরে অভ্যাস হয়ে যায়। কৃত্রিম, তাই কষ্টকর’

থগেন বাবু হেসে বলেন, ‘কৃত্রিমতাকে বাদ দেওয়াও চলে
না’

‘তা বটে, তবু...’ ‘তবু কি ?’

‘অভ্যাস হয়ে গেলেই সহজ’

‘অভ্যাসের মধ্যেও জোর জবরদস্তি রয়েছে। জোর করেই
অভ্যাস করতে হবেত ! আজকের জোর, পরশুর অভ্যাস’

‘সহজ প্রবৃত্তির মধ্যে জবরদস্তী কোথায় ?’

‘সহজ প্রবৃত্তি, instinct টাই তাগিদ। তার চেয়ে অত্যাচারী
জবরদস্তি কে আছে ? জোরকে সভ্যতা থেকে বাদ দেওয়া যায়
না কিছুতেই’

‘রূপান্তরিত করাও যায় না ?’

‘তাও বল প্রয়োগে’

‘একটা কোথায় যেন পার্থক্য’ আছে মনে হয়’

খানিক চুপ করে থেকে খগেন বাবু বল্লেন, ‘তফাৎ ভেতরের জোরে আর বাইরের জোরে। ‘তাও এমন বেশী কি?’

‘নিজের বেলায় সংযম, পরের বেলা অত্যাচার’ ..

‘দুইই এক। দুইই উদ্দেশ্যচালিত।’

‘উদ্দেশ্য স্বীকার করেন না?’

‘স্বীকার করাটি’ কি অর্থে প্রয়োগ ক’রছেন? অস্তিত্ব মানা আর সহজে আপনা হতে ভাল লাগা এক বস্তু নয়। যে ব্যক্তি সংযমী সেও একটা সত্য কিংবা মিথ্যা আদর্শ খাড়া করে, যাব তাগিদে সে সাধনা করে’.

‘যদি আদর্শটা সত্য হয় তা হলে ক্ষতি কি?’

খগেন বাবু একটু জোরে হেসে উঠলেন, ‘তা হলে আপনার মতে আদর্শের শ্রেণীভেদ আছে। কিন্তু সত্য বাচবেন কি ক’রে? লোকের ব্যবহার দেখে মনে হয় মানুষের গায়ের ঘামেই মিথ্যা আদর্শও সত্যে পরিণত হয়—সফলকাম হবার জ্ঞান যে আদর্শ মানুষকে যত বেশী খাটিয়ে নিতে পারে, সেই আদর্শই ততখানি বেশী সত্য। তা ছাড়া, সকলেই ভাবে নিজের আদর্শের জ্ঞান খুবই খাটছে, অতএব নিজের আদর্শই সত্য, এক মাত্র সত্য। আমারও তাই ধারণা, আমার সঙ্গে অগ্নোর তফাৎ হল এই যে, আমার বেলাই ঐ ব্যক্তিগত ধারণাটা সত্য, অগ্নোর বেলা যাচাই দরকার।’ স্বজনের মুখে স্মিতহাস্য দেখে খগেন বাবু একটু অস্বাভাবিক রকমের গম্ভীর হয়ে বল্লেন, ‘আদর্শের অত্যাচার আপনি মাথাপেতে নিতে পারেন? নিজের আদর্শই বলছি’

অন্তঃশীলা

‘পারতে হয়’

• ‘অতশীঘ্র দুহাত তুলে পরাজয় স্বীকার করতে শিখলেন কি করে?’ কথাবার্তায় একটা ছেদ্ পড়ে গেল। খগেন বাবু স্জজনকে একটা সিগারেট দিলেন, স্জজন নিলেন না, কেসে সেটা রেখে আর একটা বার ক’রে ধরালেন। ‘আচ্ছা স্জজন বাবু?’

‘স্জজন বলুন’

‘আচ্ছা, স্জজন, আদর্শ বৃকের মধ্যে নিতে এত কষ্ট হয় কেন?’

‘ছেনে শুনে নিলে কষ্ট হয় না বোধ হয়’

‘ঠিক বলেছ। জানলেই কষ্ট থাকে না। যারা বলেন ভগবানকে না মেনে উপায় নেই তাই মানতে বাধ্য হয়েছি তাঁরা ভগবান কে ত অপমান করেনই, ভালবাসা ও শ্রদ্ধার মত অমন একটি নিষ্কাম জিনিষকে দৈহিক অভাবের সঙ্গে যুক্ত করে নিজের শুদ্ধ অংশকেও আপমান করেন। আমি অবশ্য কোন নিষ্কাম ভাবের ওপর আদর্শকে প্রতিষ্ঠিত করতে চাই না। আদর্শকে গ্রহন করলেই সেটা নিয়তি হল, কিন্তু নিয়তির নিয়ম জানাই স্বাধীনত।। কিন্তু সকলে নিয়ম না জানতে চেয়ে আদর্শকে অন্ধভাবেই গ্রহণ করেন, জানেন ত?—তাঁদের বেলা?’

‘তাঁদেরই কষ্ট’

‘কষ্ট নয় কেবল, মৃত্যু, অপমৃত্যু, ‘ধান্মিকসমাজ আবার তাঁদেরকে martyr বলে! যে বিষ খায় সেই কি কেবল আত্মঘাতী? আশ্রমে আশ্রমে যাদের অপমৃত্যু হচ্ছে তাদের

হিসেব কে রাখে ? কোন আদর্শের এমন ক্ষমতা নেই যে পরকে গড়ে তোলে ! গড়ে তোলা যা'য় না, যদি পর নির্যোয হয়'

‘এখানে বুদ্ধির প্রয়োজন কি ?’

‘প্রয়োজন, নিয়তির নিয়ম জানতে। আপনার রমলাদিকে জিজ্ঞাসা করবেন।’

‘আপনিই বলুন না’

‘তাঁকেই জিজ্ঞাসা করবেন, তিনি বুদ্ধিমতী’

‘জানি ; আপনি বলুন’

‘আমি কিছুই ভেবে ঠিক করতে পারিনি। বোধ হয়, আপনিই ঠিক বলেছেন। রমলা দেবী থাকলে এই কথাই বেশী ভাল ভাবে গুছিয়ে বলতেন, ডাকুন না। তিনি অত্যন্ত বুদ্ধিমতী’

‘তার চেয়েও বেশী’

‘আর বেশী কি হতে পারে ?’

‘হৃদয় আছে’

‘নিজের হৃদয়েরই পরিচয় দিচ্ছেন’

‘আলাপ করলেই টের পাবেন’

‘পূর্ব হতেই সাহায্য করুন’

‘বন্ধুত্ব করাতে আমি খুবই তৎপর। আজ কিন্তু নয়, রমাদি আসবার আগেই যাই, কাজ আছে’

‘আপনার সকালে আসবার কথা ছিল না ? আবার না দেখা করেই পালাচ্ছেন ?’

অন্তঃশীল।

‘কাজ ছিল বল্লই তিঁনি বুঝবেন’

‘আপনিও দেখছি খুব কাজের লোক !’

‘কাজেরও নেশা আছে স্বীকার করি’

‘সত্যি ! ঐ নেশাই বোধ হয় সব চেয়ে ভয়ঙ্কর ! বোধ হয়, জীবনে কখনও কাজকে ছুঁইনি সেইজন্য। কাজের নেশায় ভয়ে চিন্তাশীল হয়েছি।’

‘চিন্তার পিছনে ভাষা আছে এবং ভাষার আদিতো ও অন্তে কাজ আছে এই শুনেছি, আপনি কি মনে করেন ?’

‘ঐ ধরনের ব্যবহারিক মনোবিজ্ঞানে বিস্তর গলদ আছে। এই ধরন, একজনকে আমার অন্তের চেয়ে বেশী ভাল লাগছে। এই আপেক্ষিকতার অন্তরে কাজের কোন বালাই নেই। বেহাগ বাঁচিয়ে শঙ্করা গাওয়া হচ্ছে, তুটো রাগিণীর মধ্যে পার্থক্য বেশ বুঝলাম, এই পার্থক্যভূতির মধ্যে কাজের তাগিদ কোথায় ?’

‘তৃপ্তিসাধনের ফলে দৈহিক সামঞ্জস্যবিধান’

খগেন বাবু একটু বিস্মিত নেত্রে স্বজনের দিকে চাইলেন বেশ শাস্ত্যভাবটি, স্বজন চোখ নাগিয়ে নিলে—তারপর আশ্বে আস্তে বল্ল, ‘অবশ্য, একে কাজ নাও বলা চলে’

‘সামঞ্জস্যবিধানও কাজ বটে। বোধ হয় সব চেয়ে বড় কাজ।’

‘আচ্ছা এখন আদি ঘাট, রমাদি উঠে পড়লে আমার যাওয়া হবে না’

‘চলুন আমিও ঘাট’

‘এই রোদ্দুরে ! সে হতেই পারে না’

‘রমাদি বুঝি আটক করবেন ? এলে যাওয়া হবে না কেন ?
‘নিজেই আটক হব’

স্বজন আস্তে আস্তে দরজা খুলে চলে গেল। থগেন বাবু
চুপ করে শোফায় শুয়ে রইলেন। খানিকপরেই রমলা দেবী
এলেন, পর্দা সরাতেই চোখোচোখি হয়েছিল। উঠে বসতে
বসতে থগেন বাবু ধুতিটা পায়ের আঙ্গুল পধ্যন্ত টেনে দিলেন,
‘বসুন’

‘ঘুমিয়েছিলেন ?’

‘না, সকালে যা ঘুমিয়েছি, আপনি ঘুমাননি ?’

‘দুপুরে ঘুমুই না’

‘মেয়েদের মধ্যে যারা দুপুরে ঘুমান না, তারা সন্ধ্যাবেলাতেই
চুলতে থাকেন। অবশ্য ঐ সময় আপনাদের পাটি থাকে’

রমলা দেবী একটু হাসলেন। থগেন বাবু বল্লেন, ‘অবশ্য
আপনার কথা নয়, আপনি স্বগৃহিনী, নচেৎ এই শ্রী আসে কোথা
থেকে ?’

‘চা এখনি দেবো ? চলুন ঐ ঘরে’

‘এই ঘরেই আনুন—চাএর সময় অ-সময় নেই, বোধ হয়
স্থান অস্থানও নেই, পারছি না উঠতে’

রমলা দেবী নিজ হাতে ট্রে সাজিয়ে আনলেন, কাচের টপ্
দেওয়া একটি ছোট টেবিলের ওপর ট্রে, আর একটির ওপর কিছু
ফল রেখে চা ঢাললেন।

‘স্বজন এসেছিল’

না; চেঁচা করবে ভ্রু কুঁচকে, গাঙ্গে হাত দিয়ে, ছোট্ট ফাউন্টেনপেন্
 ঠেকিয়ে, কিন্তু উদ্দেশ্য ভাবা নয়, উদ্দেশ্য, আমি ভাবছি, ভেবে
 তোমাকে কৃতার্থ করছি, আর ভাবতে ভাবতে কেমন সুন্দর
 দেখাচ্ছে দেখ, বল—উদ্দেশ্যটি এরি আমন্ত্রণ, এরই পাল্টা
 অন্তরোধ। রমণী দেবীও নিশ্চয়ই ঐ প্রকৃতির, গান্ধী এসে
 ভাবিয়ে তুলেছেন বলেই তাঁর খন্দর পরা হল না, জর্জেটে কোন
 ভাবনার খোঁচা নেই, বেশ মিহি। তাই, উল্টে, খন্দর পরার
 ক্যাসানের নিন্দে, তার বিপক্ষে বিদ্রোহ, যার যেটি ভাল বেছে
 নেবার অজুহাতে আত্মপ্রবঞ্চনা। এদের সঙ্গে কথা কওয়া
 চলে না, চলে খোসামোদ, তাও চেহারার। কী অদ্ভুত ধারণা
 ছিল সাবিত্রীর! কুরুপাই পড়াশুনা করে, বড় বড় কথা কয়,
 মেয়েদের অল্পযুক্ত ও অনাবশ্যক বিষয় নিয়ে গুরুগম্ভীর
 আলোচনা করে, পাশ করলে চেহারা খ্যাংরাকাটির মত হয়, মুখ
 আম্‌সি হয়, চোখ কোটরে ঢোকে, চোখের কালি ঢাকতে চশমা
 পরতে হয়, হাতে চুড়ি ঢল্‌ ঢল্‌ করে, গড়ন খারাপ হয়, মেজাজ
 রুক্ষ হয়, মেয়েলী মিষ্টত্ব লোপ পায়, স্থখী হয় না……আরে
 কত কি? একলা সাবিত্রীদের দোষ কি? বিহুযীর
 সাজগোজ করেন না ঐ একই কারণে, সুন্দরী নন, জেনে ও
 রেগে। সমাজের ওপর তাঁদের কি ভীষণ অভিমান! আচ্ছ
 যদি হেদোতে ডুব দিলে কুরুপা সুরূপা হতেন, তা হলে হেদোর
 পশ্চিম দিকের প্রতিষ্ঠানটি অনেক পূর্বে উঠে যেত! মন্দ
 হত না, পৃথিবী সুন্দর হত। হেদোর পূর্বদিক আনন্দময় হয়ে

উঠত। তখনই পড়াশুনার দ্ব্যর্থ কদর হত, তখন খন্দর ও জর্জেটের পার্থক্য ধরা পড়ত। ইতিপূর্বে মুড়ি ও মিছরীর দরের তফাৎ দাস্তিকতায়, সৌন্দর্যের আভিজাত্য-বোধে। -মেয়েদের দাস্তিকতা সহ্য হয় না; মানলে বেড়ে যায়, অথচ অভদ্রতা করা যায় না, মাত্র শ্লেষই চলে।

‘আপনাকে কিন্তু খন্দর পরলে মানাবে ভাল’

‘আমাকে মানাবার জন্ত ব্যস্ত কেন?’

‘আরো সুন্দর ভালবাসি বলে’

‘ওটা অভ্যাস-মাত্র’

‘অভ্যাস নয়, অভাব’

‘ফল খান’

‘ফল খাই না, দেখি; দেখতেই ভাল লাগে, খেতে ভাল লাগে না। চোখেরও ভোগ আছে।’

‘ফল খাওয়া ভাল’

‘ভিটামিনের উল্লেখ করবেন না জোড় হাত করছি। চাএর সঙ্গে ফল অচল। তা ছাড়া মনে হয় রোগী। সাবুর সঙ্গেই ফল, চাএর সঙ্গে ভালমুট’

‘থাবেন? আনাব?’

‘এখন থাক, অস্থ হুবে বলেন না!’

‘ভুল হয়েছে। অভাব কেন? সাবিত্রীত’ দেখতে খুব.....

‘সুন্দর ছিল। বলতে খটকা বাধে, নয়? কতশীঘ্র সময় কাটে! ঘণ্টায় ৩৬০০ সেকেন্ড বেগে। অতীত অকস্মাৎ হাজির

অন্তঃশীল।

হয়, যেন রবাহুতের মত', আগন্তকের মত', বাড়ির এক পাগল
'খুড়োর মত, অসময়ে—নয়?'

‘হাজির হয়, না চলে যায়? ভবিষ্যতেই আসে...’

‘আর বর্তমান?’

‘এই মুহূর্তটুকু, ভারি পিচ্ছিল। নেই।’

খগেন বাবুর হাতে জলন্ত দেশলাই কাটিটা নিবে গেল—
চাএর ডিশে ফেলে দিলেন...

‘দেখুন, আমার সব গুলিয়ে যায় সময় সম্বন্ধে ভাবতে গেলেই।
পিচ্ছিলে যায়ই বটে। কোনটাকে আঁকড়ে ধরব? এক অতীতকেই
ধরা যায়, কিন্তু তার জ্ঞান চোখ দুটো সামনে থেকে টেনে উপড়ে
মাথার পিছনে বসাতে হয়, পা দুটোকে পিছনমুখো করতে হয়
ভূত হতে রাজি নই। অথচ, কি বিপদ! ভবিষ্যৎকে করায়ত্ত
করতে পারি না, তার গায়ে আংটা নেই, টাকারই মতন। কি
আর করি?...দিন এক কাপ চা’

রমলা দেবী ডিসটা বদলে দিলেন। ফিকে হল্‌দে চায়ে
আপত্তি জানাতে রমলা দেবী পটে একটু চিনি ও ছচামচ্ পাত
দিলেন। লাল্‌চে লিকার শীষ্রই তৈরী হল। পেয়ালা হাতে নিয়ে
খগেন বাবু প্রশ্ন করলেন, ‘বর্তমানটা কি?’

‘জানি না। আপনিই বলুন না?’

‘বর্তমান দেখছি আপনি—অর্থাৎ আপনার সেবা যত্ন থাওয়া’

‘সেবায়ত্ত নিতে জানা চাই’

‘আমি খুব নিতে ভালবাসি, আদর খেয়েই মাহুষ’

‘ভুনেছি সব । আপনার মাসীমা আপনাকে বহু করতেন খুব ।’

‘খুব ছেলে বেলার কথা মনে নেই । তার পর মাসীমা—
মাসীমা আমার বড় ভাল ছিলেন । তার পর সাবিত্রী এল, সেও
করতে যেতো’

‘যেতো !’

‘পারত না, আমার ভাল লাগত না’

‘কি রকম ভাল লাগে ?’

খগেন বাবু মুখ নীচু করে হেঁসে বলেন, ‘এই যেমন আপনি
করেন । অর্থাৎ নীরবে, দাবী না করে ; প্রতিদানের প্রত্যাশা
না করে যে আদর করে তাকেই ভাল লাগে, আমি বলছি, সেই
আদরই ভাল লাগে । ঠাট্টা করছি না । দেহি দেহি করলে
দিতে ইচ্ছা হয় না, প্রাণটা কুপণ হয়ে যায় ।’ রমলা দেবী একটু
চুপ করে থেকে বলেন, ‘একমাত্র স্বজনই দেহি দেহি করে না, সে
কবল দিতেই জানে, তাই সে যা পায়...’

‘ও বুঝি খুব পায় ? আপনি ত’ বলেন স্বজন সর্বদাই ব্যস্ত ।
এ লোক পরের জন্ত জীবনধারণ করে তার নিজের অবশিষ্ট থাকে
তটুকু ? ঐপ্রকার চরিত্র ঠিক বুঝতে পারি না’

‘স্বজনের নিজের জীবনও আছে, বড় চাপা, আপনি নিজেই
দিন পরে বুঝবেন’

‘গভীর ছেলে বলুন !’

‘মোটেই না, অতি সরল’

‘পরমহংস দেব ! মাপ করবেন, ঠাট্টা করছি না । কি

অন্তঃশীলা

বলছেন বোধ হয় বুঝতে পেরেছি। গিরীশ ঘোষের কালাপাহাড় পড়েছেন নিশ্চয়? গিরীশ ঘোষের নটক পড়া কি দেখা ফ্যাশান নয় জানি, তবু যদি কখনও হঠাৎ হাতে এসে পড়ে থাকে তাই উল্লেখ করছি। কালাপাহাড়ে চিন্তামণি নামে একটি চরিত্র আছে, সে নিজেকে কিছুই করেছে না, অথচ কেন্দ্রের চারধারে বৃত্ত যেমন ঘোরে তেমনি সব চরিত্রই তার চারধারে ঘুরছে, এবং সেই কেন্দ্র-চরিত্রের সম্পর্কে এসেই তারা সার্থক হয়ে উঠছে, ঘরে-বাইরের মাষ্টারমশাই, ক্যারামজন্ড, ব্রাদার্সের আলিয়শা ঐ ধরনেরই চরিত্র; বাকি চরিত্রের অভিব্যক্তি আছে, তাঁদের ক্রমাগত কাশ নেই, গোড়া থেকেই স্বয়ংসিদ্ধ, স্বয়ম্ভূ। ওঁরাই স্থির ও শাস্ত, কারণ ওঁরাই আছেন, বাকি সকলে অস্থির, কেননা তাঁরা তৈরী হচ্ছেন।

‘আমি সৃজন কে শ্রদ্ধা করি’ রমণী দেবীর সুরে অপ্রত্যাশিত গান্ধীর্ষ্য লক্ষ্য করে খগেন বাবু একটি অপ্রস্তুতে পড়লেন। একখানা বিস্কুট চাইলেন, ‘খালি পেটে চা-পান না অস্বাস্থ্যকর?’

‘যার যা ধাত!’

‘স্বাস্থ্যের উন্নতিকল্পে চাইনি, যত্ন পেতে চাই’

‘তা হলে যাই যাই করাছিলেন কেন?’

‘বাড়ি খালি পড়ে আছে। তা ছাড়া যোগাড়বস্ত্র করতে হবে, ঐ সব কাজের জন্ত। বাড়িটা রাখব না ছেড়ে দেবো? চাবিপত্র সব কোথায় কে জানে? সব লগুভগু হয়ে রয়েছে’ ‘বাড়ি যেমন ছিল তেমনি আছে। ও সব কাজ বোধ হয় করতে নেই। সে চাবিপত্র কোথায় রাখত আমি জানি’

‘জানেন ? তা হলে বাঁচা গেল। আপনি যদি—একবার কিছু যদি না মনে করেন, একবার যদি গোছান যায় আমার সুবিধায় তা হলে আর গেল থাকে না। একবার চলুন না ?’

‘নিজে পারবেন না ?’

‘জানি না যে ! গেলে খুব ভালই হোত’! আচ্ছা, নিজে গিয়েই দেখি, তার পর না পারি আপনাকে একবার, ও স্বজনকে নিয়ে যেতেই হবে। ভাবছি, বাড়িটা ছেড়ে দেবো। যেতে ভাল লাগছে না, থাকতেও ভাল লাগবে না, অথচ অমন সুবিধা। বাড়িটায় অভাস্ত হয়ে গেছি। বইগুলো রাখবার জগ্গ গা আলমারি করিয়ে নিলাম এই সে দিন ! তাই নিয়েই বা কত আপত্তি ! বলেছিল, প্রয়োজন নেই অত খরচ করে ছোট বাড়িতে, অথচ না হলে চলছিল না, শোবার ঘরে বইএর জগ্গ তার দম্ আটকাত। বইএর জগ্গ কারুর দম্ আটকায় ? আপনিই বলুন না ? দম্ বন্ধ হয়, টেবিল চেয়ারে।’

‘মেয়েরা অগোছ রাখতে ভালবাসে না’

‘মোটাই নাঃ, এমন অগোছাল মেয়ে দেখেছি যে কী বলব ! তার আপত্তি ছিল অগোছে নয়, বইএতে। আর, আমি বই গুছিয়েই রাখি’

‘তা বোঝা গেছে, চু থাওয়া দেখে’

‘সে এখানে ; একটু হাত পা ছেড়ে বিশ্রাম করব না ? মাঝে মাঝে বিশৃঙ্খল না হলে চলে না’

অন্তঃশীলা

‘আমিও তাই বলি, হতে পারি না। নিজেকে মধ্যে মধ্যে ছেড়ে দিতে হয়, নয়ত’ প্রাণ হারিয়ে ওঠে’

‘আমিও ঠিক ঐ কথা বলি, সাবিত্রী তা মানত’না। তার ধারণা ছিল সর্বদাই মুখোমুখি ক’রে বৃষ্টি স্বামী স্ত্রীতে বসে থাকতে হয়।’ ‘না, বুঝে করত’

‘সে জন্ত ক্ষমা করা যায় না, ব্যেসও হয়েছিল। যাক, গতশ্রু শোচনা নাস্তি—তার সমালোচনা করে কোন লাভ নেই—এখন সে অতীত। ভাল লাগছে না ভাবতে……এখনি বাড়ি যাই, কাজ রয়েছে। আমার আরাম করা সাজে না। এইবার যাই? একবার স্বজনকে নিয়ে, যদি ফুরসৎ পান……’

‘এখনই?’

‘না, না এখন না, যখন সুবিধা হয়, তাড়াতাড়ি কি? নিজেই পারব বোধ হয়, যদি না পারি তখন না হয় দেখা যাবে। আপনি আমার জন্তে এত কষ্ট করলেন, কিন্তু ধন্যবাদ দেবার প্রয়োজন মাত্র অনুভব করছি না!’

থগেন বাবু বাথরুমে গিয়ে মুগ্ধুয়ে চুল আঁচড়ে বেরিয়ে পড়লেন। নীচে দরজা পর্যন্ত রমলা দেবী নেমে এলেন। ‘একটা অনুরোধ’

‘কি?’

‘এখানেই সন্ধ্যাবেলা থাকেন’

‘দেখি, যদি খাবার না জোটে আসতেই হবে। মুকুন্দের রুপা!’

খগেনবাবু কলেজ স্কোয়ারে এলেন। যুবকবৃন্দ দল বেঁধে ঘুরছে, ঘাসের ওপর ছেলে মেয়েরা খেলা করছে। কৈ একটার-ও চেহারা সুন্দর নয় ত! রং বেরংএর ফ্রক্ আর ফিতে! একটি যুবকের সঙ্গে ধাক্কা লাগল, খগেন বাবু নিজেকে সামলে নিলেন, যুবকটি জ্রঞ্জেপ না করে চলে গেল, পৃথিবীতে ছোকরা নাম রেখে যাবে। এই সেই তাল গাছ যার তলায় আড্ডা বসত, নাম ছিল পান্ লীগ্। সকলেই ইন্সটিটিউটের সভ্য, কিন্তু সেখানকার সংঘত আনন্দে প্রাণ ভরত না, তাই সাড়ে আট-টার পর ইন্সটিটিউট বন্ধ হলে সকলে এই তালগাছ তলায় আড্ডা জমাতেন। গান, আলোচনা, খোস্ গল্প, সঁকই হত'। সেই দলের মধ্যে আবার ছোট্ট গণ্ডী ছিল, যার সঙ্গে যার ভাব বেশী তাদের নাম জুড়ে দেওয়া হত, একজন না এলে অগ্ৰ্যকে নিয়ে তামাসা চলত, তারপর

অন্তঃশীল।

পর রাত ন'টা দশটায় চা খাওয়া, থিয়েটারের আখড়া দেওয়া, বড়ি ফেরবার পথে বই ও নোট-সংগ্রহ করা.....তারপর চুপি চুপি বাড়ির মধ্যে প্রবেশ, মাসীমা ঘুমিয়ে পড়তেন, তারপর পড়া শুরু হত, রাত দুটো পর্যন্ত—সূর্য উঠত চাটায়, এগারটায় কলেজ, আবার আবার আড্ডা, আবার কলেজ স্কোয়ার, কি না হত সেখানে ! দিনগুলো সব উড়ে যেত, বন্ধুরা ছিল সব মজার ! প্রত্যেকেরই জীবনে এসেছিল এক একটি অনন্ত মুহূর্ত, প্রত্যেকেরই সেই মুহূর্তটি ফসকে গিয়েছিল, তাই প্রাণে ছিল সকলেরই ব্যথা ! প্রত্যেকেরই ঠিক নয়, এমন দু'একজন ছিল যাদের জীবন সার্থক, যারা না পড়ে পরীক্ষায় পাস করত, যাদের দেখেই বোদির বাপের বাড়ীর, বোনের শশুর বাড়ীর, মেয়ে-কলেজের বাসগাডির সব অনুচ্চ কথা ও কিশোরী প্রেমে পড়ত, আত্ম-নিবেদন করতে প্রস্তুত থাকত, চিঠিতেই তার প্রমাণ, হাতের লেখা গোল-ধরণের.....কিন্তু তারা 'ও-ধরণের' নয় বলেই কোন ব্যাপার ঘটেনি.....বরঞ্চ তারা যতদূর জানিতে পেরেছে তাতে তাদের প্রতিটি জন্মেছে যে সেই সব মেয়েদেরই জীবনে দাগ পড়েছে, বিবাহের দিন কেঁদে ভাসিয়েছে, কেউ বিবাহ না করে মাষ্টারি নিয়েছে, কেউ বা সম্ভানের মা হয়েও বুকে আগুন পুষে রেখেছে, তিব্বতী লামার মত'। ভাগ্যবানের সংখ্যা কমই ছিল। খুব কম বন্ধুদের ভাগ্যে মেয়ে জুটত, জুটত যারা তারা ভিন্ন জাতির। সব গল্পই প্রায় মিথ্যা, নিছক মিথ্যা, তবে আত্মবিশ্বাসের জোরে মিথ্যাও সত্য হয়ে উঠত, তাই মজা লাগত ! মেয়ে পাওয়া যেত

না, তাই ছেলের সঙ্গে প্রেমে পড়তে হত, আজকালকার কত সুবিধা ! সত্যের সন্ধান মেলেনা, তাই মিথ্যা রচনা করতে হয়, মিথ্যায় সন্তুষ্ট থাকতে হয়। তখন পারা যেত, অল্পে সন্তুষ্ট থাকা যৌবনের ধর্ম ! সাপের খোলশের মত' মিথ্যা পরে খসে যায়, পুরাতন সবেই মত, মাসীমার স্নেহের মত, সেগুলো সে-সময়কারেরই উপযুক্ত। সত্য চিরন্তন নয়, কালোপযোগিতার খাদে অন্তর্ভুক্ত। আজকার সত্য, আসছেকালের মিথ্যে, ইতিমধ্যে জীবন চলেইছে। বেঙ্গলী ব্যাটালিয়নের স্মৃতিস্তম্ভে যাদের নাম খোদাই করা আছে তাঁদের মধ্যে দু'একজনকে খগেন বাবু চিনতেন। করাচী যাবার আগের দিনের কথাও মনে পড়ে, কি কৃতি, অগ্নোর, যারা যাচ্ছে না। তারা চলে গেলে, পরের দিন সেই আড্ডা বসল, দু'একজন কেবল আসেনি ! যে কে সেই ! অথচ দুঃখ যে হয়নি কে বলবে !

খগেন বাবুর বন্ধু না হলে পড়া হত না, বন্ধু না হলে খেলা দেখা, ছবি দেখা হত না। চা-এর দোকানে তাঁর বিল্ই লম্বা হত, মাসীমা বিনা আপত্তিতে টাকা দিতেন। মির্জাপুর ষ্ট্রীট দিয়ে একটি ছোট্ট স্কন্ডর ছেলে যেত, তাকে এক শিশি ল্যাভেণ্ডার দেবার জন্তু কি বোকা মিটাই না করা গিয়েছে। খগেন বাবু আবার একটি ছেলের সঙ্গে ধাক্কা খেলেন, ছেলেটি সাঁতারের পোষাক পরে বেড়া ডিঙ্গিয়ে ক্লাব রুমে ছুটে যাচ্ছিল, হটাৎ খগেন বাবুর গায়ে এসে পড়ল। বেশ, বলিষ্ঠ গঠন, কিন্তু লাজুক, না হলে ছুটে যাচ্ছিল কেন ? কলেজ স্কোয়ারে বড় ভিড়, হাঁটা

যায় না, কোথা থেকে এত ছেলে এল ? অথচ টাকা বিশ্ববিদ্যালয় খুলেছে। কোলকাতা সহরে ভিড় থেকে পরিজ্ঞান নেই। বাড়ি পৌছিয়ে সদর দরজায় থিলু দেবেন, তারপর নিজের ঘরে শুয়ে ইফ ছেড়ে বাঁচা যাবে।

কলেজ স্কোয়ার থেকে বেরিয়ে দেখেন ইন্সটিটিউটে এক সভা বসেছে, মোটরের গাঁদি লেগেছে। এঁদের সব সার্থক জীবন, কেউ স্নাইলস সাহেবের বই থেকে বেরিয়ে এসেছেন, কেউ বা উত্তরাধিকারসূত্রে সার্থকতা ভোগদখল করিতেছেন। এঁদের বাড়ীতে সব বড় বড় শোবার ঘর আছে, সেখানে বড় বড় খাট পালঙ্ক, নেটের মশারি ঘেরা, তার মধ্যে ট্রাজেডী। কাকর ছেলে মাতাল, মা লুকিয়ে মদের টাকা জোগান, পিতা আপত্তি করেন, কাকর স্ত্রী চিরকুলা, কেউ বা অভিযোগই শুনে আসছেন, এত রাস্তিরে বাড়ী এলে কেন ? সকলের ব্যাঙ্কে টাকা থাকুক আর নাই থাকুক, সকলেই পরস্পরের মূল্য নিরূপণ করেন টাকা দিয়ে। এঁরাই কোলকাতার বড় লোক, সভাসমিতির প্যাণ্ডাল অলঙ্কৃত করেন ! খগেন বাবুর গা গুলিয়ে উঠল, ভারতবর্ষের আদর্শ কোথায় গেল ? এই দেশেই না মানুষকে মানুষ ব'লে গ্রহণ করতে উপদেশ দেয় ? রমলা দেবী ত' তাই বলছিলেন, ঠিকই বলেছেন, নিষ্কাম ধর্মের মর্ম্মই তাই। কিন্তু পারা যায় না, দোষগুলিই প্রথমে চোখে পড়ে। সাবিত্রীর দোষ ছিল, হয়ত, হয়ত কেন, নিশ্চয়ই, গুণও যথেষ্ট ছিল। নিষ্কামভাবে দেখার অর্থই হ'ল গোটাভাবে দেখা, অংশ দেখে

বিচার করা নয়। তারি শক্ত কাজ, সাধনার প্রয়োজন। নিষ্কাম-
কর্ম কি উদ্দেশ্যবিরহিত? স্বজনের সঙ্গে বৃথা তর্ক করলে,
অন্তে তার মনের কথা বলছে শুনে, তাঁর মনের গোপন কন্দরের
সমর্থন করেছে দেখে তাঁর বিশ্লেষণ-প্রবৃত্তি নেচে উঠছিল। আদর্শ
মানতেই হয়, সেই আদর্শের মাপকাটিতে হবে নিষ্কামকর্মের
সাধনার বিচার। নচেৎ নিষ্কামকর্ম ভয়ঙ্কর জিনিষ। মধ্য-যুগের
শেষে মার্টিন লুথার ও ক্যালভিনের আশীর্বাদে নিষ্কাম কর্ম-প্রবৃত্তি
ধর্ম থেকে বিচ্যুত হয়ে টাকা রোজগারে নিযুক্ত হল, সেই থেকে
ধনিক-তন্ত্র, তাই ইন্সটিটিউটের সামনে মোটরের ভিড়, যার জন্ত
পথচলা যায় না। টাকা রোজগার করতে গেলে সন্ন্যাসী হতে হয়,
সংসারের অগ্র কর্ম থেকে বিরক্ত হতে হয়...বড় চাকরে হতে
গেলেও তাই, লজ্জা, ঘৃণা, ভয়, আত্মসম্মান, সংসার, সব জলাঞ্জলি
দিতে হয়।

এ-যুগের সার্থকজীবন এক প্রকার বৈরাগ্য সাধন, তার মূলে
থাকা চাই একরোখামী, গোঁড়ামি, পিউরিট্যানিজম্। সেই মূলের
অগ্র কাণ্ড হল বিশেষজ্ঞের মূর্থ অর্থহীন অত্যাচার। আগে ছিল
জ্ঞান, সর্বতোমুখী জ্ঞান, তত্ত্ব-জ্ঞানে-নিবদ্ধ জ্ঞান, এখন আর বিজ্ঞান
বিশদ জ্ঞান নয়, বিশেষজ্ঞের ষড়যন্ত্র। তাই বৈদগ্ধ্য গেছে লোপ
পেয়ে, তার আসনে বসেছে দম্ভ। তাই বলে এ-যুগে কোনপ্রকার
ধর্মের সঙ্গে পুনরায় যুক্ত হওয়া যায় না। পূর্বকার নিষ্কাম ধর্মও
ছিল ভয়ঙ্কর, ব্রাহ্মণেরা ছিলেন নিষ্কাম ভাবে ধার্মিক, এখনকার
বিশেষজ্ঞেরা যেমন নিষ্কামভাবে বুদ্ধিমান ও বৈজ্ঞানিক; দুই-ই

অত্যাচারের নামান্তর ! আজকালকার ধনীরা নিষ্কামভাবে পরের উপকার করছেন, সেবাশ্রমে উপকারের বগা ছোট্টাচ্ছেন, কিন্তু কি হচ্ছে ? চালি চ্যাম্পলিনের কিড্‌ ছবিখানায় তার মুখের মত' জবাব আছে । এই ধরনের নিষ্কামহিতসাধনের উত্তর দিয়েছিলেন এক ভদ্র মহিলা । কলেজে পড়বার সময় দামোদরের বাঁধ ভাঙ্গে, কত গ্রাম যায় ভেসে, বগাপ্রপীড়িতের সেবার জন্ত ছাত্রবৃন্দ টারমিন্যাল পরীক্ষার এক সপ্তাহ পূর্বে স্বেচ্ছাসেবকের দল তৈরী করে, খগেন বাবুও যোগ দেন । সারাদিন নৌকা ঠেলে, চা সিগারেট খেয়ে, খিদের চোটে, মাথার ব্যথায় সন্ধ্যাবেলা এক ভদ্র গৃহস্থের বাড়ী উপস্থিত হন । 'সেখানে তখনি সাহায্য-প্রার্থী গরীব চাষাভুষো এসে হাজির হল । খগেন বাবুর বন্ধুরা চটে যান তাঁদের দেখেই ; দলের নেতা বলে ওঠেন—'ব্যাটারা আব্দার পেয়েছ, গঞ্জে গঞ্জে এসে হাজির, এখানে পেট বাপাস্ত করছে...' বাড়ির অধিকারিণী ছিলেন একজন প্রোঢ়া, বিধবা, তাঁর কাছে মাছের ঝোল আর ভাত, লেবু আর দই খেয়ে কি ভূপ্তি হয় ! ঠিক মাসীনার মতন দেখতে । সকালে না খাইয়ে ছাড়লেন না, নমস্কার করে নৌকায় ওঠবার সময় মহিলাটির মুখ থেকে একটি বাক্য নিঃসৃত হয়, 'বাবা, তোমার যদি এদের মানুষ না ভাব, তা হলে এদের উপকার করতে এলে কেন ?' নৌকাতে উঠে সন্ধ্যার বলেছিল, 'এমন ভাবপ্রবণ হ'লে চলে না, নিষ্কামভাবে কাজ করে যাব, যা হয় হবে ।' মন্তব্যটি খগেন বাবুর খারাপ ঠেকেছিল । সেই মহিলাই ঠিক বুঝেছিলেন,

দললা দেবীও তাই বল্লেন। পুরকে গড়তে যাওয়াও অন্তায়, অধিকার ত' নেইই, আত্মাভিমান আছে, তবে নিকাম ধর্মের রূপ নিয়ে। আদং কথা, একজন অন্যের ব্যবহারের দ্রামগ্রী নয়, উপকারের বিষয় নয়, উপকরণ নয়, প্রত্যেকেই শেষ, কেউ কারুর নিমিত্তমাত্র নয়। এ-ভিন্ন নিকাম-ধর্ম কথার কথা। . সৃজন বোধ হয় ঐ ইঙ্গিতই ক'রছিল। আদর্শ না মানা গেলেও values নানতেই হয়, মানুষ ছাড়া নিকামধর্মও নিরর্থক—এই হল সৃজনের মত। সৃজনেরও মত, রমলা দেবীরও মত। তাঁর নিজের কি মত? মত এখনও তৈরী হয়নি, তবে তৈরী হচ্ছে, হবার সুযোগও হয়েছে, সাবিত্রী থাকতে সুযোগ মেলেনি। সাবিত্রী তাঁকে ভেবেছে তার সুখের উপাদান হিসেবে, ভর্তা হিসেবে, সামাজিক স্থানের আসন হিসেবে, মোটরের পাদানি হিসেবে। এতদিন একত্র বাস করা গেল, কৈ সাবিত্রী ত তাঁকে একান্ত ক'রে দেখেনি, মানুষ মনে করেনি! স্বামী কি কেবল সম্পত্তি, ভোগ্য-মাত্র? অবশ্য দেখা শক্ত; তিনিও দেখেননি, তবে শিক্ষাদীক্ষার জ্ঞা মেয়েদের পক্ষে ঐ ভাবে দেখা অপেক্ষাকৃত সহজ। কি করেই বা দেখা সম্ভব! খগেন বাবুর বীজ অণু, সে-বীজের ব্যবস্থা ও বিকাশ ভিন্ন, তাঁর ইতিহাস পৃথক, তাঁর শিক্ষা, তাঁর রুচি, তাঁর আশা ভরসা সবই তাঁর নিজের, অতএব আলাদা; অথচ প্রকৃতির নিয়ম, ঈশ্বরের হুকুম হ'ল স্বাতন্ত্র্য ঘুচিয়ে দিতে হবে আদর্শ, স্নেহশীল এবং কর্তব্যপরায়ণ স্বামী হ'বার জ্ঞা। এ কি জুলুম! চাপ পড়ে তারই ওপর যার পার্থক্যভূতি বেশী,

অন্তঃশীলা

এখানে জীপুরুষের কোন কথাই ওঠে না। রমলা দেবী আ-
সাবিত্রী সমশ্রেণীর নয়। সাবিত্রী ছিল ঐ প্রাকৃতিক ও সামাজিক
জুলুমের যন্ত্র মাত্র, অতি সূক্ষ্ম, অতি সুন্দর, অতি লোভনীয় যন্ত্র
তার মধ্যে দিয়ে জুলুম করত সমাজ, সে ছিল অচেতন রাজ্যে
রাজ্ঞী, তাই তার চোখেমুখে ছিল একটা নির্জীবতার আভাস-
যন্ত্রেরই জীবন নেই, জীবন না থাকলেই চোখ হয় নিষ্শ্রভ, কবির
বাকে ঢুলু ঢুলু, মদির-নয়ন বলেন। কিন্তু প্রথম প্রথম মন্দ লাগে
না, ভালই লাগত। কে বলে সমাজ-ধর্মের সৌন্দর্য-জ্ঞান নেই
খুব আছে, অন্তরের নিছক, নিষ্কান, ব্যবহারিক-বুদ্ধিকে গোপ-
রাখবার জন্য সমাজ-ধর্ম সুন্দরকে ব্যবহার করে, মোহন করে তোলে
আকাশ থেকে ভগবানের আশীর্বাদ কেড়ে আনে, প্রেতলোক
থেকে পিতৃপুরুষের আত্মা টেনে আনে, আর বাজে রোসন-চৌকি
শঙ্খ, উলুধ্বনি! কী ভীষণ এই জ্যাচুরী! যেই সপ্তপদী শেষ
হল, অমনি সমাজ-ধর্ম জীবনের সব অর্থ, সব মূল্য, সব তাৎপর্যকে
চিরকালের জন্য স্থিরীকৃত করে দিলে, সেই মূল্যই হ'ল শেষ
মানুষের সঙ্গে সোজাসুজি, প্রত্যক্ষভাবে, সমাজ-ব্যতিরেকে
সমাজের অতিরিক্ত অন্য কিছুই সঙ্গে যোগ নেই কি? যে যোগ
সাধনের ফলে জীবনের প্রতি কর্মের অর্থ সূচিত হতে পারে
কে জানে?

গগেন বাবু যখন হ্যারিসন রোডে এসে পড়লেন তখন একদল
বৈষ্ণব কীর্তন গাইতে গাইতে চলেছেন। গান নয় ঠিক, নাম
কীর্তন, নামের আবৃত্তি, সমস্বরে নয়, যতলোক ততস্বরে; ধীরে

মধুরে নয়, তারস্বরে। খোল, করতাল, শিঙার কলরোলের ভিতর থেকে একটা মোটা রকমের আওয়াজ তৈরী হচ্ছিল। সামুদ্রিক বহুপাদ জন্তুর মতনই ভিড়ের আক্লিতি, এলোমেলো ও রূপহীন। যেখানে দেহের একটা ইঙ্গিত পাওয়া যায় সেখানে রংবেরং এর একটা ঝালর দেওয়া ছাতা, তার তলায় একজন নগ্নকায় কৃষ্ণবর্ণের পুরুষপিণ্ড, মুখে খোঁচা খোঁচা ও মাথায় লম্বা চুল, বাকি অঙ্গ চুলে ভর্তি, পরণে সবুজ চেলী, হাতে সোনার ছোট সিংহাসন। পাশের লোকে চামর দোলাচ্ছে; জনকয়েক আধাবয়সী লোক তাকে ঘিরে হাত তুলে লাফাচ্ছে, সর্বাঙ্গে ঘাম ঝরছে; আর যারা করতাল বাজাচ্ছে তারা নাচছে না, হাঁ করে নাখ নিচ্ছে—কোন আওয়াজটা কার, টের পাওয়াই যায় না। একটা লোকেরও দাড়ি কামান নয়, খোঁচা খোঁচা দাড়ি বেরিয়েছে সকলের, প্রত্যেকেরই অশৌচ? এক যারা শ্রীখোল বাজাচ্ছে তাদেরই গতি চোখে পড়ে, সেটা কিন্তু উর্দ্ধদিকে, মাধ্যাকর্ষণশক্তির বিপক্ষে। ভিড়ের কোন গতি লক্ষ্য করা যায় না, কেন্দ্রস্থ ব্যক্তিগুচ্ছ একই স্থলে স্থিত রয়েছেন। ওপরদিকে চাইতেই ভিড়ের স্থিতিশীলতার কারণ খগেনবাবু বুঝতে পারলেন। সব ভিড়েরই সৌন্দর্য্যাহুভূতি আছে, সে ভিড় যদি আবার ধর্ম্ম-ভিড় হয় তা' হলে কথাই নেই—এই খানেই সুন্দরের সঙ্গে সত্যের ও ধর্ম্মের সম্বন্ধ! খগেন বাবু অগ্রমনস্কভাবে কখন ভিড়ের মধ্যে এসে পড়েছেন বুঝতে পারেন নি। হঠাৎ দেখলেন একজন লোক তার গায়ে ঠেস দিয়েছে। প্রায় পড় পড়,

চোখ আধ-বোজা, প্রায় জ্ঞানশূন্য, গায়ে ভীষণ দুর্গন্ধ। একটা গোঁড়ানি কানে এল, 'হরে রাম' হরে হরে।' খগেনবাবু সরে যেতে পারলেন না, পাছে লোকটা পড়ে যায়। কৃষ্ণের নাম পর্য্যন্ত উচ্চারণ করতে পারে না, নামের গুণে জ্ঞাণ পাবেন ! শুদ্ধ মস্তোচ্চারণের ফলে মস্তদ্রষ্টা হওয়া সম্ভব, তারই জন্ত হিন্দু সভ্যতা এতদিন মুখে মুখে টিকে আছে, বেদমন্ত্র অশুদ্ধভাবে উচ্চারণ করলে মহাপাতকী হ'তে হয়। এ নামকীর্তনের সাধকতা কি ? একই কথা, একশ'বার একইভাবে, একই সুরে, একই মাত্রার বিরামের পর পর উচ্চারিত হলে ঘুম আসে—তাও আবার একশ' জন মিলে। ভেড়ার দল চলেছে, বৃষ্টিপাত হচ্ছে ভাবলে কবিরও ঘুম আসে। হয়ত অর্থহীন আবৃত্তির ফলে দৈনন্দিন কষ্ট থেকে নিবৃত্ত হলে মন পরিস্কৃত হয়, তার আদিম পরিচ্ছন্নতায় ফিরে আসে, তখনই প্রেম হৃদয়ে আশ্রয় করতে পারে ! কিন্তু আদিম মন কি শুভ্র ? তার ওপরও পূর্বপুরুষদের আঁচড়কাটা নেই কি ? দেহের প্রয়োজন অভ্যাসে পরিণত হলে মনও অভ্যাসের দাস হয়ে পড়ে, তখন মন তার স্বধর্ম হারায়। দেহ থেকে মন বিচ্ছিন্ন নয়। বৈষ্ণবেরা হয়ত মনকেই শ্রদ্ধা করেন না, প্রেমকেই বড় করেন। বড় করুন আপত্তি নেই, কিন্তু বুদ্ধিকে নাকোচ করলেই মৃত্যু আসবে, ঘুম আসবে ; স্বধু তাই বা কেন ? চীনেরা সব চেয়ে বড় পাষাণকে হাত পা বেঁধে দাঁড় করিয়ে রাখত, তারপর তার ব্রহ্মতালুতে একমাত্রায় একলয়ে ফোঁটা ফোঁটা করে জল ফেলত, ব্যস, দু'মিনিটেই লোকটা পাগল হয়ে যেত। খগেন বাবুর কষ্ট

হাতে লাগল। তাইত, এই ধরনের নামকীর্তন শুনতে শুনতে তিনিও পাগল হ'য়ে যাবেন। তাঁকে পালাতেই হবে এই জনতার নাগপাশ থেকে, এই নামকীর্তনের একটানা বারিপাত থেকে, এই গড্ড-দিকা প্রবাহের একটানা শ্রোত থেকে, নচেৎ ঘুম আসবে, পাগল হয়ে যাবেন। লোকটা মাটিতে শুয়ে পড়েছে, লোকজন ঘিরে নৃত্য করছে, এই ফাঁকে তিনি একটু সরে দাঁড়ালেন। 'হরে কেউ হরে নাম হরে নাম হরে হরে'। লোকটি মূর্ছা গিয়েছে, তার চৈতন্য খুইয়েছে, কিন্তু মুচ্ছিতের এক অর্থ হল প্রতিকলিত; কি প্রতিকলিত হচ্ছে তার মুখে? খগেন বাবু নিরীক্ষণ করে বিহ্বলতা ভিন্ন কিছুই পেলেন না। 'সাবিত্রীর মুখের' এই ছিল! না, ভাব! যায় না, কেবল অন্তর্ভব হয়। যেন তাঁরই চারধারে উদ্দাম নৃত্য ও কীর্তন হচ্ছে। খগেন বাবু হঠাৎ আবিষ্কার করলেন যে তাঁর চোঁট কাঁপছে, হাঁটু কাঁপছে, অথচ হাত নুড়িবদ্ধ। দড়কা দেখে, না নামকীর্তনের মোহাচ্ছন্নতায়? মনে হল একটা নেশায় তার দেহ অবশ এবং চিত্ত নিরুদ্ধ, তালের সম-সাম্যেতে জ্ঞান স্তম্ভিত হয়েছে, লোপ পেয়েছে। শিশুকালের কথা মনে হয়, পাঁচ ছয় বছর বয়সে একবার একটা ছন্দোময় বাক্য তাঁকে পেয়ে বসেছিল, দু'বছর পরে কবিতায় পরিণত করিবার পর তিনি রেহাই পান। কচ্ছপের কামড়! এই কি কবিতার উৎপত্তি? সব কবিতার আদিতেই কি ঐ প্রকার কোন অর্থহীন আন্দোলন নেশাচ্ছন্ন ক'রে মনকে সংবিশ্ট করে? অসম্ভব জাতির যাদুকর কি ঐই যুগের কবি হয়ে উঠেছেন?

অন্তঃশীলা

সর্বপ্রকার আহতধ্বনিই কি ঐ প্রকার একটানা সুরের পুনরাবৃত্তি? ভুটিয়া মন্দিরের দামামা বাজছে, সৈন্তের দল সারবন্দী হয়ে চলেছে, প্রত্যেক সৈনিক তার ব্যক্তিত্ব হারিয়েছে, চেতনা খুইয়েছে, কিন্তু চলছে, সৃষ্টি করছে গতি। মাহুঘের সভা-অংশটুকু গোয়া যায় ভিড়ের এই অগ্রস্রতিতে। থাকে কি? যন্ত্রাংশটুকু, জীবাত্মমাত্র। তাতে চলে না, ওটুকু মূলধন শীঘ্রই নিঃশেষিত হয়। সাবিত্রীর মুখে ছিল বিহ্বলতা, কেন না সে তার স্বল্প-মূলধনের ওপরই ব্যবসা চালাচ্ছিল, তার দলের মধ্যে নিজেকে বিসর্জন দিয়েছিল, অভ্যাশে তার বৈশিষ্ট্য ছিল না, তাই টান পড়ল তার জীবনে। মাসীমা বলতেন, কলসীর জল গড়াতে গড়াতে ফুরিয়ে যায়। খগেন বাবুর কেমন একটা আতঙ্ক হল, তাঁর পা দুটো ছলছে বেন, নামকীর্্তনের লয়ে না ত' ? তাঁকে বাঁচতেই হবে, মূলধন ব্যাংক জমা রাখতে হবে, সূদে টাকা বাড়বে, সেই সূদে তাঁর জীবন চলবে—ব্যবসা-বাণিজ্যে ধনবৃদ্ধি অনিশ্চিত, নিরাপদ স্থানে রাখাই ভাল, দরকার হ'লে চেক কাটলেই হবে, কাকে ধার দেবেন, কে দিতে পারবে না ঠিক সময়ে! না, সে ভারি গোলমেলে ব্যাপার—তাঁকে পালাতেই হবে লোকজনের সঙ্গ থেকে। পালাবার চেষ্টায় সচেতন হয়ে তিনি বুঝলেন যে গঙ্গাব্যস্থান থেকে খানিকটা দূরে চলে গেছেন প্রানপণে ভিড় ঠেলে বাইরে এলেন। 'পায়ের তলায় অত ব্যথা কেন, গলায় ব্যথা হয়েছে কেন, গা দিয়ে ঘাম ঝরছে কেন। তিনিও নেচেছিলেন, নামকীর্্তন করেছিলেন না কি ?

সেই গলি, সেই গলির মোড়, রাজ্যের নোংরা টিনের খোল উপ্ছে পড়েছে। দুর্গন্ধ বেরুচ্ছে। সাবিত্রী নাকে ক্রমাল দিয়ে বড় রাস্তার মোড়ে একদমে চলে আসত, যেখানে রমলা দেবীর, আরো কত দেবীর মোটর থাকত। সাড়ির প্রান্ত উচু করে ডিকিয়ে হাঁটত, লাল সাড়িতে ফ্যামিলি, সাদায় সারস। কোথা থেকে অষ্টাদশ শতাব্দীর বিলেতী হাঁটা শিখেছিল কে জানে? বাড়ির দরজা বন্ধ। গলির মোড়ের গ্যাসের আলো দরজার দামনে এসে পড়েছে। খগেন বাবু দরজা ঘেঁসে দাঁড়ালেন, কড়া নাড়তে সাহস হল না—আশু আশু ঠেললেন। দরজা একটু খুলে গেল। একজন অপরিচিত লোক ফাঁক থেকে উঁকি মেরে বলে, ‘বাবু, বাড়ি নেই, বাইরে গেছেন’। খগেনবাবু দরজা ঠেলে লোকটিকে কিছু না বলে বরাবর ওপরে উঠে গেলেন। কোথেকে জুটল? মুকুন্দের ফ্রেণ্ড্ নিশ্চয়! সব বাড়ি অন্ধকার, রান্নাঘরে কেবল আলো জ্বলছে, ধোঁয়ায় বিজলী বাতি প্রদীপের আলোর

তনই নিশ্চিত। খগেনবাবু আলো জ্বলে ওপরের বসবার ঘরে প্রবেশ করলেন, ঘর দোর পরিষ্কার রয়েছে, মুকুন্দ নিশ্চয়ই পরিষ্কার করেছে। বেচারি! ইচ্ছাস্বৈর বসবার ঘর কখনও গোছাতে পারেনি, বাধা পেয়েছে, আজ মনের সাথে ঘর গুছিয়েছে; এইযে, প্রমাণও রয়েছে যথেষ্ট, বইগুলো উল্টো করে সাজান! লোকজন এলে মুকুন্দ না সেজে ঘরে ঢুকতে পেত না, তখন মুকুন্দকে ফরসা ও লম্বা কোটি পরতে হত, কাঁধে তোয়ালে রাখতে হত, সকাল বেলাতেই দাঁড়ি গোঁফ কামাবার নোটিন্ ও পয়সা

অন্তঃশীল।

পেত। আর বেচারি কাঁপতে কাঁপতে ট্রে নিয়ে আসত।
সাবিত্রী ছুটে গিয়ে তার হাত থেকে ট্রে তুলে নিত। মুকুন্দের জ্ঞান
বন্ধুদের কাছে সাবিত্রী লজ্জিত হ'ত, অথচ তাকে যে বক্তৃতাও
নয়। মুকুন্দের দ্বিতীয়বার দারপরিগ্রহের সময় কি একটা গহনাও
দেয়। মুকুন্দ তাইতেই কত খুশী! চেপে জল এনে বলেছিল,
'বৌমা, এ গহনা তাকেই মানাত'—অর্থাৎ প্রথমাকে। এই কথা
শুনে সাবিত্রীর মন ভারি নরম হয়ে যায়, রাত্রে খগেনবাবুকে বলে,
'ছোটলোকদের মধ্যেও দ্বিতীয়বার বিবাহে লজ্জা আছে।'
খগেনবাবু আস্তে আস্তে মুকুন্দ বলে ডাকলেন। নীচে থেকে
অপরিচিত লোকটি উঠে এসে বলে, 'মুকুন্দ বাজারে গিয়েছে,
এখনি আসবে।' অল্পক্ষণ পরেই মুকুন্দের গলা শুনতে পেলেন।
পর্দা সরিয়ে মুকুন্দ এসে হাজির। 'কোথায় যাওয়া হয়েছিল বাড়ি
ছেড়ে?' 'আপনাকে খুঁজতে ওঁদের বাড়িতে, মেম সাহেব বলেন,
আপনি বাড়ি ফিরেছেন, তাই ছুটে এলাম' 'আবার খুঁজতে যাওয়া
হয়েছিল কেন? ঠাকুর কোথায়?' 'ঠাকুর চলে গিয়েছে' 'বেশ
হয়েছে, এখন খাব কি? কেন গেল? তোমার কীষ্টি বোধ হয়'
'না বাবু, না বলে পালিয়েছে, কেন গেল বুঝলাম না, বড় ভয়
লাগছে বলছিল' 'কিসের ভয় রে?' 'ঠিক পুলিশ নয় বাবু, উড়ে
বামুনদের কথা ছেড়ে দিন, ওরা যা'ত। বিশ্বাস করে আর ভয়
পায়' 'এখন অল্প জুটবে কি করে?' 'ভালই হয়েছে বাবু, রাঁধতে
জানত না, এ লোকটিকে অর্ধমি নিজে এনেছি, তৈরী লোক,
গোবরডাঙ্গার বাবুদের বাড়ি রেঁধেছে, বিলেতী খানা পাকাতো

জানেন' 'ও এ বাড়িতে কি করবে ! সব গুণ মাঠে মারা যাবে যে ! আমি ত শিকারী নই, ওকে মুক্তাগাছায় পাঠিয়ে দে । এ বাড়িতে আর কে বিলেতী খানা খেতে আসবে—কেউ আসবে না । আমার জন্ম শুকুতো, মাছের বোল রাঁধতে পারে কিনা জিজ্ঞাসা কর । আর দই পাততে জানে ? কাজটি বড় সোজা নয়—যে সে পারে না' । 'ও সব জানে বাবু, তবে একটু দেখিয়ে দিতে হবে বাবু আমাকে, তা আমি খুব পারব । রান্না চড়াতে বলি ? বাবু, কয়লা নেই, আর কিছু পয়সা দিন তরকারির জন্য, মশলাপাতি চাল ভাল সব আছে' 'একটু পরে এসে নিয়ে যেও ।' মুকুন্দ নীচে গেল ।

তাইত, চাখির গোছাটা কোথায় ? রমলা দেবী জানেন, আনলেই তাঁকে হত । না এনে ভালই হয়েছে ; কেমন খারাপ দেখায়, নিজেই খুঁজে বার করা যাবে । সর্বদাই আঁচলে চাখির গোছা থাকত ; বেড়াতে যাবার সময় সাপের চামড়ার ভ্যানিটি ব্যাগে—সেটাই বা কোথায়, ঘরেই আছে নিশ্চয় । খগেনবাবু সাবিত্রীর ঘরে সম্ভর্পণে প্রবেশ করলেন । ছোট্ট পৃথক ঘর, অন্ধকার, গন্ধ এল নাকে এক ঝলক, এই ত' তার নিজের ঘর । তার ব্যক্তিত্বে ভরপুর ! তা হলে ছিল, ছিল তার ব্যক্তিত্ব... ! দেয়ালে হাত দিয়ে খগেনবাবু আনকক্ষণ দাঁড়িয়ে রইলেন । টেবিল ল্যাম্পটির রঙ্গীন শেড্‌টা আবছা দেখা যাচ্ছিল, তার স্নাইচ্‌টা টিপলেন, ছোট্ট পাথরের টেবিল, ছোট ড্রেসিং টেবিলে ভাল আয়না, বিবাহের যৌতুক, কোণে একটি সেল্‌ফে বান্ধান বই

সাজান, পাশে একটি গদীর সোফা। অগ্নি একটি জাপানী
 রম্যকের ওপর চন্দন কাঠের বাক্স, তার ভেতর কাগজ পত্র ড্রেসিং
 টেবিলের চাবি সব থাকত; চন্দন কাঠের বাক্সের চাবি
 থাকত বইএর পিছনে। বইগুলি বেনারসী সাড়ির টুকরো
 দিয়ে বাঁধান, শাস্ত্রনিকেতন থেকে রমণা দেবী বাঁধিয়ে এনে
 দেন। বেনারসী জরীর পাড়ে বইগুলো চমৎকার দেখাত।
 বইএর উপর তার মনতা ছিল অদ্ভুত, অগ্নি ধরণের, খগেন
 বাবুকেও হাত দিতে দিত না, এক রমণা দেবীই ধার পেতেন।
 নতুন বই বেরুলেই খগেন বাবু কিনে জ্ঞানতেন, চাইলে পেতেন
 না, আসতে না আসতেই লোপাট হ'ত। কত আধুনিক লেখকের
 বই ছিল, সে গুলো কোথায় গেল? কত নভেল, কত কবিতা।
 সাজান রয়েছে প্রভাতকুমারের গ্রন্থাবলী; আর নীচের থাকে
 ভারতবর্ষ, বসুমতী,—সবুজপত্রও রয়েছে সব চেয়ে নীচু থাকুটায়।
 কিছুতেই সে সবুজপত্র পড়ত না,—বলত, ঘরে-বাইরের ভাল
 সংস্করণ ত রয়েছে। বুঝতে পারত না বোধ হয়। কোণে রেকর্ডের
 বাক্স—সব বাংলা গান, মানদা, আঙ্গুরবালা, পান্নার। পান্নার
 কীর্তন শুনে সাবিত্রীর চোখে জল আসত তিনি নিজে দেখেছেন।
 তার ভাল লাগত কীর্তন, তাঁর নিজের ভাল লাগত ধ্রুপদ, খেয়াল
 ও ঠুংরী। সাবিত্রী বলত ‘ও সব বুঝিনা, আমার অত বিচ্ছে
 নেই!’ সাবিত্রী একবার জোহরা-বাইএর রেকর্ড শুনে হেঁসেছিল;
 খগেন বাবু অত্যন্ত চটে যান, ‘যে জোহরা বাই-এর গান ভাল-
 বাসেনা সে যেন গান শুনতে ভালবাসে না বলে, জোহরা বাই-এর

কান রেকর্ড চলেনা বাজারে, তার থেকে প্রমাণ দেশ থেকে
রের মর্যাদা উপে গিয়েছে, আমি চোরাবাজার থেকে খুজে
নেছি'। 'এনেছ বলেই শুনতে হবে'। 'তুমি অত কষ্ট ক'রে
ধলে আমাকে ভাল বলতেই হয়'। আমার কষ্টের কথা ছেড়ে
ও, ওস্তাদে শেখবার জন্ত কত কষ্ট করেছে, তোমাকে সন্তুষ্ট
রবার জন্ত প্রাণপাত করেছে, একটু ধৈর্য ধরে শোনই না, যদি
ই বোঝা?' 'বেশরে! কষ্ট করলেই বুঝি ভাল হয়?' 'কষ্ট করে
ধলে শক্ত জিনিষ সোজা হয়, আর সহজ হয় বলেই আনন্দ
দওয়া সম্ভব হয়। যাক্গে, ওসব বুঝবে না, অন্তে তোমার জন্ত
কষ্ট করেছে দেখলে নিজে একটু ভদ্র হ'তে হয়, নিজে যদি এইটুকুও
শুনতে তা হলে দয়ালু হতে।' 'আমি বুঝিনা, বুঝিনা মানছি,
মি পায় কি করব?' 'তা হলে ফ্যাশন করে কালচার
দখাতে গান শুনতে যেও না, এ ওস্তাদ অমুক খাঁ সাহেবের
ম নিও না, বাড়ীতে বসে রেকর্ডে কীর্তন শুনো, আর কেঁদো।'।
সাবিত্রী উঠে যেত চুপ করে, মুখে চাবি দিয়ে। তার মনের
ক্স বন্ধই রয়ে গেল, জগতে যা কিছু ভাল তার আশ্বাদ
পল না। ভালর ওপর মোহ ছিল তার, আকর্ষণ ছিল না। আজ
দি ওস্তাদি গান শোনা, ছবি দেখা কোন কারণে বড়মানুষী
কংবা আধুনিকতার লক্ষণ পরিগণিত না হয়, তা হলে সাবিত্রী
কি গান শুনতে, ছবি দেখতে যাবে, না পান চিবুতে চিবুতে,
দাক্তা জরদা মুখে দিয়ে, দাস দাসী, ননদ জা বৌদিদের সঙ্গে
সিকতা ক'রে কালাতিপাত করবে? চোখের জল সাবিত্রীর

পড়ত কীর্তন শুনে, চোখের জল ফেলাই কি উপভোগের প্রকৃষ্ট পরিচয়? উপভোগ কি চোখের পিছনের গণ্ড থেকে গড়িয়ে পড়ে? উপভোগ মাথায়, বুদ্ধিতে, মনে; সেই মাথা, মন, বুদ্ধি সব বন্ধ, বেচারি কি করবে! খোলবার চাবি চাই।

বইএর পিছনে চাবিটা পেয়ে খগেন বাবু আলমারি খুলেন। অনেকগুলি ব্যাগ, সাদা রোঁয়াঅলা, জস্ত্রজানোয়ারের চামড়ার, নানা রং বেরংয়ের কাপড়ের, রূপোর চেনের ব্যাগ, ঐ এক সখ ছিল তার! এক একটি বার করে অঙ্গুল দিয়ে টিপতে লাগলেন, একটার মধ্যে টাকা রয়েছে। অনেক কষ্টে খুলে তার ভেতর থেকে টাকা ও খানকয়েক নোট বার করলেন। ব্যাগটা বন্ধ করা গেল না, আলমারিতে রেখে চাবি নিয়ে বসবার ঘরে এলেন। তার ঘরটা বাইরে থেকে তাল লাগালে বেশ হয়, নতুন লোক। ভেতর দিকের ছিটকিনী সে করিয়ে নিয়েছিল, খগেন বাবুরই পরামর্শে। প্রত্যেক মেয়েদেরই পৃথক একটি ঘর ও নিজের ঠাই থাকা উচিত। এখন কিন্তু চুরি হবার সম্ভাবনা, মুকুন্দ নেবে না, মাসীমার চাকর, কিন্তু মন না মতিভ্রম! পুরাতন ভৃত্যরাও কি অবিখ্যাসী হ'তে পারে না, প্রলোভনের স্ববিধা না দেওয়াই ভাল। 'মুকুন্দ, মুকুন্দ,'—মুকুন্দ এল, 'একটা ছুতোর ডাকতে পারিস?...আচ্ছা, কাল সকলেই ডেকো, এই নাও টাকা, এক দিন খেলে কি?' 'আমরা খেয়েছি, সবই ছিল, আপনার জগ্ন ফুলকো লুচি করি? আধ ঘণ্টার ভেতর হয়ে যাবে, পাখাটা খুলি? আপনি বসুন, জায়গা করে দিচ্ছি...বিলেতী ডাক

এসেছে।’ কত দিন কথা না কইতে পারলে চাকর মনিবের সঙ্গে অত ও ঐ রকম কথা কয়? ‘নাইবার জোগাড় কর দেখি, সব করসা চাদর ওয়াড় বার কর’। ‘মিজ্জেই বার করুন না’। ‘করছি, জল তৈরী করে দে আগে’। মুকুন্দের সঙ্গে একটু বেশী কথা কওয়া হয়ে গেল বোধ হয়। হোকগে, ভালই। চূপ করে থাকলে মুকুন্দ ভাববে বাবু দুঃখে কাতর হয়ে পড়েছেন; অমনি স্বেযোগ পেয়ে নিজেকে থেকে বেশী কথা কয়ে সহানুভূতি জানাবে। সে সহ হবে না; সহানুভূতি বড় একাকার করে দেয়, তাতে চাকরের সঙ্গে মনিবের সম্বন্ধ ঘুচে যায়, সব সামাজিক সম্বন্ধই লোপ পায়। সহানুভূতি-প্রকাশের স্বেযোগ দিলে মুকুন্দ আস্কারা পাবে, এ’র মধ্যে ঠাকুরটাকে তাড়িয়ে নিজের লোক ঢুকিয়েছে; ক্রমে হবেন বাড়ীর কর্তা। গম্ভীরভাবে কথা কইতে হবে নিজেকে থেকেই। করসা জামা কাপড় চাদর ওয়াড় আলমারি থেকে বার করে রেখে গগেন বাবু স্নানের ঘরে গেলেন। আঃ পরের বাড়ী কখনও স্নান হয়, গান গাওয়া যায়? গান গাওয়া অশোভন হবে, গাইবার ইচ্ছা দমন করলেন জোরে কেশে, স্নান সমাপ্তির পর ধোপ-দোরস্ত করুয়া ধুতি পরে, চুল আঁচড়ে বেরিয়ে এলেন। ‘ওরে মুকুন্দ, গেঞ্জীটা ছেড়ে এসেছি, সাবান-কাচা করে ইস্ত্রী করবি, নিজেকে করতে হবে না, দোকান থেকে করিয়ে আনিস, বিকেলে চাই, তুলে রাখিস, হারিও না, যাও থাবার নিয়ে এস।’ নিজের গায়ে গেঞ্জী কেমন গায়ে ফিট করে। কতদিন গায়ে দেবার পর নিজের মনে হয় কে জানে? পরে ছাড়তে ইচ্ছে হয় না, ফেলে

অন্তঃশীলা

দিতে মন চায় না, সবই অভ্যাস, এই বাড়ি ঘর, বসবার চেয়ার, টিউজুতো, বিছানা, স্ত্রীর সঙ্গ। সানিট্রী অভ্যাস ভেঙ্গে দিয়ে গেল—যদি ভুগে যেত অত কষ্ট হত না। কষ্ট আবার কিসের? অকস্মাৎ বলে? বিবাহও হয়েছিল অকস্মাৎ, আগে পরিচয় ছিল না। তবে, রোগশয্যায় রোজ রোজ একটু একটু করে অভ্যাসের কঠিন আবরণ সরে যেত—তার পর স'য়ে যেত। নাঃ তার চেয়ে একদিনেই চিত্তরঞ্জন দাশের তামাক ছাড়ার মতন অভ্যাস কাটানই ভাল। অনেক দিন রোগে ভুগলে মাসীমাকে আনাতে হত, হাঁসপাতালে 'দওয়া যেত' না, মাসীমা আসতেন কি? বোধ হয় আসতেন না, 'আত্মসম্মান আছে ত'! অনেক দিন রোগে ভুগলে অল্পবয়সী মেয়েরা বড় ভাবপ্রবণ হয়ে পড়ে, বিশেষতঃ যদি ছেলে মেয়ে না থাকে—ওষুধ খেতে চায় না, 'আমার কিছু হয় নি, আমার কিছু হবে না গো, ভয় নেই, অত স্নখ তোমার কপালে নেই যে রাক্ষা টুকটুকে বউ ঘরে আসবে'—এ রকম কথাবার্তা শুনে পুরুষ একটু দুর্বল হয়ে পড়ে, কপালে হাত বোলাতে, চুলে বিলি কাটতে ইচ্ছে হয়... ইত্যাদি কত কি! তারপর দেবী মস্তব্য করেন, 'তুমি কি কৃতজ্ঞ! আচ্ছা, যত শীঘ্র যাই ততই ভাল, তোমার কত কষ্ট হচ্ছে! বন্ধুদের সঙ্গে বেড়াতে যেতে পারছ না, তাঁদের পত্নীরা কত ভাবছেন! ভেবে ভেবে সোণার রং কালি হয়ে গেল, ও রকম কালো হয়ে গেলে কেউ পছন্দ করবে না—এই বেলাই যাই... উঃ'... বাধ্য হয়ে স্বামীকে কাঠ-রসিকতা করতে হয়, চীনদেশের

বিপ্লব, মহাআজীর অনশনব্রত, ইঞ্জিন্টের রাণীদের পুরাতন গহনার কারুকার্য, বকুপত্নীর উড্ডয়ন...প্রভৃতি উত্তেজক সংবাদ দিতে হয়...তারপর সন্ধ্যার কোঁকে, কোঁকে কোঁকে সখীদের আগমন, সেজেগুজে, মোটর চড়ে, ঘরে ঢুকেই সেবার পালা, যার প্রধান অঙ্গ সেবার ক্রটি দেখান, অ-প্রধান অবক্ষয় প্রসাধন।..... দেওয়ানীর চেয়ে ফৌজদারী ভাল। নিয়তিতে টানছে, রুখবে কে? সারাজীবন ধরে মিথ্যাআচরণ, ছলনা...তার থেকে বোঁচছেন ত! এই যথেষ্ট! সাবিত্রী রূপাময়ী, বুদ্ধিমতী, সতী সাবিত্রী। স্বামীকে খুব ভাল না বাসলে স্ত্রী আত্মহত্যা করেন।

খাবার হয় নি বোধ হয়। খগেন বাবু আরামকেদারায় শুয়ে পড়লেন। হাতের কাছে বিলিতি কাগজ ছিল, মোড়ক খুলে পড়তে আরম্ভ করলেন। বিলেতী কাগজ পড়া তাঁর ছিল একটি প্রধান সখ—নানা রকমের, সাপ্তাহিক, মাসিক, ত্রৈমাসিক। বাংলা দেশে কাগজ নেই, যা আছে তাতে সমালোচনা হয় না, তাতে না থাকে খবর, না থাকে খাতি। ক্রাইটেরিয়ান এসেছে, দমে ভারি, কিন্তু যেন এ যুগেরই কাগজ নয়। বলে কিনা অথরিটি মান! ওরা মামুলুকে—অনেকদিন পোপের আধিপত্য, রাজার প্রভুত্ব, সাহিত্য-সম্রাটের অমুশাসন চলে গিয়েছে, অনেকদিন ধরে ওদের দেশে ব্যক্তি-স্বাভাৱ্য চলেছে, নিজের ব্যবসায় নিজে লাভ করবার দুর্দ্ধম আকাঙ্ক্ষায় ওদের সর্বনাশ হয়েছে; ওদের দেশে এসেছে নৈতিক অরাজকতা, তাই ওদের প্রামাণিক মানবার প্রয়োজন রয়েছে।

অন্তঃশীলা

কিন্তু এদেশের সমাজে সবই প্রামাণ্য, সবই আপ্তবাক্য, সবই শ্রোত, সবই প্রথাগত, এখানে 'বরঞ্চ একটু পার্থক্যের ও আত্ম-নির্ভরশীলতার চেষ্টা দেখলে মন্দ হয় না।' সর্বসময়ে চার্চের জগৎ ওকালতী শুনে শুনে এলিয়টের ওপর কেমন আক্রোশ হয়—অত সূক্ষ্মবুদ্ধি, অত পাণ্ডিত্য, অমন লেখবার ক্ষমতা যেন নিয়োজিত হচ্ছে মাত্র একটি সিদ্ধান্ত প্রতিপন্ন করার জগৎ। সাহিত্যের ক্যাসিজম্। খগেন বাবু ক্রাইটোরিয়ান তুলে রাখলেন। হাতের কাছে ফিকে হলদে রংএর অ্যাডেলফি—না এ কাগজটা আর নেওয়া চলে না। 'মিডলটন মারি' লোকটি মজার—নিতান্ত ভাবপ্রবণ। একধালাে লিখতেন ভাল—সাহিত্য সম্বন্ধে, অন্তদৃষ্টি আছে সাহিত্যে। যেই স্ত্রী, ক্যাথারিন মারা গেল—অমনি ধসে, খসে গেল লোকটা। পাঠকবৃন্দকে পাদ্রীর গুরু-গম্ভীর কণ্ঠে বাণী পাসালেন, আশ্রয় চাই, হয় ভগবান, না হয় বীণা; এখন আর ও চাহিদা নেই, এখন কমুনিজম, তবে রাশিয়ান ছাঁচে নয়, ইংরেজী ছাঁচে। এক কথায়, 'দ্যাথ গো তোমরা, আমি ভেঙ্গে পড়েছি, খোঁটা চাই, উঠতে পারছি না, যা হয় একটা দাঁও হাতের কাছে, নুচং তোমাদের গুরুর তিরোভাব হবে। মারি'র চাই ভগবান, বীণা, কমুনিজম, কিন্তু লোকদের চাই মিডলটন মারি! কিন্তু তাঁর দল্যকারেব প্রয়োজন ছিল আর্টের, সেক্সপীয়র, কীটস্ দস্তয়েভ-স্কীর সাহিত্যের, হয়ত ব্লেকেরও। একেই বলে পরধর্ম ভয়াবহ। যুদ্ধের পর মেয়েদের ঘাঘরা সঙ্কুচিত হয়ে আসছিল, তখন ডাক্তারে

বলেছিল, দেহ দেখান একপ্রকার রোগ, মারি সাহেবের রোগ মানসিক দুর্বলতা দেখান। আত্ম-অনুকম্পা পাপ নয় কি ? না, আর সহ্য হয় না। মারিও আশ্রয়প্রার্থী। যদি ভদ্রলোক অত চেষ্টা না লিখতেন, নিজের বাৎসরিক ও মাসিক অভিব্যক্তি ও আবিষ্কার অত ঢাক ঢোল শাঁখ ঘণ্টা কঁাসর বাজিয়ে না প্রচার করতেন, স্ত্রীর মৃত্যুর পর সাহিত্য নিয়েই পড়ে থাকতেন, তাহ'লে ভগ্নতের কল্যাণ হত—তঁার বাণীর চীৎকারটাই শুনতে হত না। ব্যাকুলভাবে বাণীপ্রচার করার অর্থই তাই—আমার নিজের প্রতি ভেমন বিশ্বাস নেই, তোমরা বিশ্বাস ধার দাও—আমার বন্ধু হও, আমার দলে এস। এ প্রকার ব্যাকুলতা মানুষের অন্তঃনিহিত সামাজিকতারই পরিচয়, তার বেশী কিছু নয়। ‘আমি না মিশে থাকতে পারি না, তোমাদের আমার প্রতি গ্নেহ ও বিশ্বাসের সমর্থনেই আমি বাঁচতে পারি, আমার সঙ্গে মেশ, অবশ্য বন্ধু হিসাবে নয়, শিষ্য হিসাবে।’ আর মিশে কাজ নেই ! সার্বিজীও মিশেছিল রমলাদেবীর সঙ্গে। আগে মনে হত শিষ্যা হিসেবে। রমলা দেবীর কথা শুনে মনে হল ঠিক তা নয়। সার্বিজী রমলা দেবীর বন্ধুও ছিল না। নিজে অতক্ষণ রমলা দেবীর সঙ্গে সময় কাটালেন কি করে ? একটু বেশী কথা কয়ে আত্মপ্রকাশ করে ফেলেছেন মনে হচ্ছে। তিনিও আশ্রয় চান না-কি ? ছিঃ, মারি দুর্বলতা প্রকাশ পেয়েছে ! খগেন বাবু অ্যাডেলফিটা মাটিতে ফেলে দিলেন। এখনও থাবার হল না, পাকা বামন ধরে এনেছে মুকুন্দ ! ‘কৈরে মুকুন্দ !’ ‘এই যাই বাবু’। নেশন অ্যাথি-

অন্তঃশীল।

নিয়ম আগে পড়লে মাথা ঠাণ্ডা হত, নাম বদল করে যেন মাথা
গুলিয়ে গেছে, বিবাহের অব্যবহিত পরে যেমন মেয়েদের হয়, না-
বাপের বাড়ির, না-শুশুর বাড়ির—পুরা স্ট্রোশিয়ালিষ্টও নয় আবার
পুরো লিবারেলও নয়। কিন্তু ইংরেজ জাতের তারিফ না করে
যেন থাকা যায় না—রমলা দেবীর সঙ্গে যত তর্কই হোক না কেন,
অগ্নায়ের বিপক্ষে মাথা তুলে দাঁড়ায় ঐ জাতিই সর্বপ্রথমে—
এশিয়ার প্রতি নিজেদের অগ্নায় আচরণ সম্বন্ধে সচেতন
হতে অবশ্য দেবী লাগে। ন্যাৎসীরা কি অভূত প্রকৃতির?
সব এক রকম শার্ট পরতে হবে, স্ক্রলক এক কদমে হাটুতে হবে,
আবার দেহের প্রত্যেক স্নায়ুতে আর্থ্যরক্ত প্রবাহিত হওয়া চাই,
মেয়ে ছেলে আইবুড়ো থাকতে পারবে না! জার্মানরা বরাবরই
অনুশাসনপ্রিয়। জার্মানদের আশ্রয় চাই, তারাও কি লক্ষ্মীছাড়া
হয়েছে, তাদেরও কি অভ্যাস ভেঙেছে? অভ্যাস আর ছিল কোথায়?
অভ্যাসই ছিল আশ্রিত থাকা, মধ্যে পার্লামেন্টের প্রবর্তন হল,
স্লিমারের রাজ্যতন্ত্র সংস্থাপিত হল—সবই পরীক্ষা হিসাবে। কিন্তু
ও সব জার্মানের ধাতে বসল না। কেবল জার্মান কেন, রাশিয়া
ইটালী, পার্শিয়া, টারকী সবই একধরণের, কাকুরই পার্লামেন্ট,
সাধারণ-তন্ত্র ধাতে বসে না। ব্যাপার হল এই, ব্যক্তিস্বাভাত্ম্য কিংবা
ব্যক্তিগতস্বাধীনতা যুরোপীয় সভ্যতার ত্রিধারার একটিমাত্র ধারা;
কুলজ, বংশজ, গোত্রীয়, ট্রাইব্যাল ধারা জার্মান জাতীর প্রতিষ্ঠানে
বেশী প্রকাশিত। যে ঘাই বলুক না কেন পশ্চিমী যুরোপকে বেশী
আপন মনে হয়, বোধ হয় ইংরেজের সম্পর্কে এসে; জার্মান

ইটালীর মধ্যে কোথায় যেন একটু অসভ্যতার ছোঁয়াচ আছে। জাতের মত' মাহুঘেরও দু'রকম শ্রেণী আছে, ব্যক্তিত্বাভিমুখী ও কুলাভিমুখী। জাতীয়তাবোধের যুগে শেষেরই জয়। রমলা দেবী বেশ নিজের পায়ে দাঁড়াতে পারেন, তাই বোধ হয় স্বদেশী জিনিষ না ব্যবহার করলেও তাঁর চলে। যারা একলা থাকার ভয়ে সদাই সম্ভ্রান্ত তাদেরই চাই একাধিপতি, একছত্র সম্রাট, সম্রাট না হলে মহামানব। তাদেরই শাসনপদ্ধতি অত্যাগ্রভাবে নিজের যৌথ-অস্তিত্ব প্রকাশ করে। এই একাকী থাকার ভয় ও অক্ষমতার ওপর সমগ্র শাসন-প্রণালী প্রতিষ্ঠিত। রাজারা ক্ষমতাশালী, পুরোহিতরা চালাক, আমলাতন্ত্র সুপ্রতিষ্ঠিত বলে প্রতিষ্ঠার ভক্ত, আর ধনীরা—তাঁরা লোভী ও চালাক দুইই, তাই তাঁরা একলা থাকার ভয় নামক সামাজিক প্রবৃত্তিকে নেজের অ-সামাজিক কাজে লাগান। অথচ এ জীবনের অর্থ, এ জীবনটা কি ঠিক বোঝা না গেলেও—তার প্রধান কথা একাকিত্ব আর সমতল ভূমির বুকের ওপর তাল গাছের মত সোজা খাড়া হয়ে দাঁড়ান। কিন্তু এই সব কাগজেই স্থির সঙ্কেত রয়েছে যে গতে একলা থাকা আর যাচ্ছে না, খোলাখুলি বলা রয়েছে যেন একলা থাকতে গেলেই ভেঙ্গে, ছুয়ে, ধুলিসাং হবে। দেখাই থাক, এঁরা ঠিক কথা কইছেন, না প্লোটারিনাস খাটি খবর দিয়ে গেছেন ?

মুকুন্দ ঘরে এসে বসে, 'বাবু খাবার দিই ?' 'এতক্ষণে হল ?' খাবার নিশ্চয়ই দিবি, ভাবিস কি ? বায়ুভুক ?' একটু হতভম্ব

অন্তঃশীলা

হয়ে মুকুন্দ আসন পেতে দিলে। ‘না, ছোট টেবিল নিয়ে
•আয়,—যা...’ মুকুন্দ ছোট টেবিল নিয়ে এল। ‘দাঁড়া, টেবিল
ক্লথ দিচ্ছি’ খগেন বাবু টেবিল-ক্লথ বার করতে না করতে
নতুন বামুন খাবার নিয়ে এল। টেবিল-ক্লথ পাতা হল, খগেন
বাবু লোকটিকে আপাদমস্তক নিরীক্ষণ করে বল্লেন, ‘আমি একটু
লাল লুচি খাই’ ‘কাল থেকে তাই হবে, আজ তাড়াতাড়ি
হয়েছে’ ‘কাল তাড়াতাড়ি কোরো না, কোন কাজ হঠাৎ করতে
নেই, হুন দাওনি?’ লোকটি হুন্ আনতে গেল। ‘মুকুন্দ, লোকট
রাঁধে কেমন?’ ‘আজ্ঞে, খুব ভাল, একবার ওর হাতের পোলাও
কোর্খা খাবেন, ওর সঙ্গে তত্ত্ব নিয়ে যেতে আলাপ—আপনার
বোনের বাড়ীতে কাজ করত’ ‘কোন বোন রে?’ ‘সেই যে যিনি
খুব গান গাইতেন, তাঁর বাড়িতে মা তত্ত্ব পাঠাতেন, তাই দেপ
সাক্ষাৎ’ ‘সে ত’ বিদেশে থাকত রে, বুদ্ধিমান, অল্প কোথায়
তত্ত্ব দিয়ে এসেছিঁস্ নিশ্চয়ই—এ বোধ হয় যার গোবরভাঙ্গায়
বিয়ে হয়েছিল—সে গান গাইতে পারত না’ ঠাকুর হুন্
নিয়ে এল। ‘রান্না মন্দ হয়নি, বাইরে দাঁড়াও, আচ্ছা, তুই
যা—আমার কিছু দরকার নেই—তোমরা খেয়ে নাও গে—মুকুন্দ
বিছানা করে দে—এই নে চাবি—চাদর বার কর আলমারীর
নীচের তাক থেকে—দেখিস যেন ঘাটস না—ভারি রাগ...হবে
বুঝলি—চাবিটা হারিও না যেন, আত্মাকে দিও’ ‘বাবু এই ে
নিজে বার করলেন’ ‘বার করেছি? চাবিটা দাও...তুমি ব
হারিয়ে ফেল, মুকুন্দ, এতদিনেও তোমার কিছু জ্ঞানবুদ্ধি হ

হলনা, এইবার খাও গে যাও' ঠাকুর চলে গেল, মুকুন্দ দাঁড়িয়ে রইল—‘মুকুন্দ এত রাস্তিরে গোলাপ জল পাওয়া যাবে? যাবে’ বোধ হয়, ছাথ দিকিনি, মোড়েই পাবি, এই নে মনিব্যাগ থেকে টাকা, এক টানে তাড়াতাড়ি আসবি’ মুকুন্দ চলে যাবার পর খগেন বাবু খাওয়া শেষ করলেন, থিদে নেই মোটেই, চোখ বড় খচ্‌খচ্‌ করছে, ‘লোকটা রাঁধে ভাল, বড় মানুষের বাড়ী কাজ করেছে, একটু চাল আছে—বলে কিনা ‘কাল থেকে তাই হবে’—মুকুন্দ বরাবরই মিস্ত্রী, তত্ত্ব নিয়ে যেতে আলাপ, সেই থেকে বন্ধুত্ব, হয়ত এরি মধ্যে একটা সম্বন্ধ ণ্ঠাতিয়ে ফেলেছে, দু’দিন পরে টাকা ধার দেবে, তারপর খুড়ো পালাবে, তখন তাঁকেই ক্ষতিপূরণ করতে হবে, মাসীমা দু’বার করেছিলেন, সাবিত্রীও একবার করেছিল, কিন্তু বেশ নাকের জল চোখের জল বার করিয়ে। সেই থেকে মুকুন্দ আর মিতে পাতায়নি। এতদিন রয়েছে; কোন বোন কোথায় থাকে জানে না, গুলিয়ে ফেলবার একজন, অল্প কোথায় তত্ত্ব দিয়ে এসেছে তারইবা ঠিক কি? আবার বাবুর বলা হয়, এই বাড়ির লোক! গান গায় মণিকা, থাকে বহুদূরে, তাকে আবার সাবিত্রী তত্ত্ব পাঠাবে! ছুরি পাঠাবে! তবে যখন কোলকাতায় এসেছিল তখন হয়ত তত্ত্ব কিংবা উপহার নেওয়া দেওয়া চলত। মুকুন্দের স্থিতিশক্তিকে বিশ্বাস করতে নেই। তত্ত্ব টত্ত্ব বাজে কথা!

মুকুন্দ যখন গোলাপ জল নিয়ে ফিরে এল তখন ন’টা বেজে গিয়েছে। ‘এতক্ষণ কোথায় ছিলে?’ ‘বাবু রাস্তায় ভিড়’ নাচ

অন্তঃশীল

দেখছিলে বুঝি’? মুকুন্দ চুপ করে রইল। ‘শিশিটা খুলে
‘আনি’ মুকুন্দ চলে গেল নীচে। খগেন বাবু চোখে হাত দিয়ে
বসে রইলেন, সেই কীৰ্ত্তনের দলে মুকুন্দ একটু নেচে এল।
‘কইরে হল’? ‘এই যে...ঐ যাঃ’ ‘ভাকতে পারলে—না যাব?’
মুকুন্দ ভাক্তা শিশি নিয়ে হাজির। ‘এখনও একটু আছে’।
‘চোখে কাঁচের গুড়ো দিলে কি হয় জান মুকুন্দ? - ফেলে
দাও। আচ্ছা এইখানে রাখ। বিছানা করে খাওগে যাও—
নীচের দরজা ভাল করে বন্ধ করো, তোমার খুড়ো কি বাড়িতেই
শোবে, না বাসায় যাবে?’ ‘না বাবু, খুব ভাল লোক, বাসা
নেই, আমার কাছেই থাকবে।’ ‘থাক, কিন্তু তোমার বাস্তু
চুরী গেলে আমি দায়ী নই, গোড়াতেই বলে দিচ্ছি।’ ‘সে কি
বাবু! তা কখনও হয়!’ মুকুন্দ বিছানা পেতে চলে গেল।
খগেন বাবু স্নানের ঘরে গিয়ে তোয়ালেটা ভেজালেন, তার ওপর
ভাক্তা শিশি থেকে খানিকটা গোলাপজল ঢেলে দিলেন, বাকিটা
ঢাললেন বিছানায়।

বিছানায় শুতে যাচ্ছেন এমন সময় মুকুন্দ এল। ‘বাবু
গুবাড়ি থেকে চাকর এসেছে’ ‘কি বলে?’ ‘ডেকে দেবো?’ ‘দে’
রমলা দেবী চাকর পাঠিয়েছেন, হাতে একটা ছোট্ট চিঠি।
‘আপনার খাবার তৈরী, অল্পগ্রহ করে দেবী করবেন না। শরীর
খারাপ হয়নি ত?’ খগেন বাবু তাড়াতাড়ি উত্তর লিখে দিলেন,
‘আমার কি খাবার কথা ছিল? মাপ করবেন, যেতে পারছি না,
শরীর ক্লান্ত, সামান্য কিছু খেয়ে নিয়েছি। আপনি এত রাত

অবধি খাননি ? সত্যই দুঃখিত ।’ চাকর চিঠি নিয়ে চলে গেল । মুকুন্দ নীচে গিয়ে দরজা বন্ধ করে দিলে ।

তাও তো বটে ! রমলা রাজ্বে কিছু খান না—মোটো হবার ভয়ে । মোটা জ্বীলোক জঘন্য কিন্তু প্যাকাটিতে পরিণত হবার আদর্শটাও লোভনীয় নয় । রোগা হওয়ার আদর্শটা বিদেশী । বিলেতের মেয়েরা রোগা হচ্ছে, তাই এঁরাও হাড় সার হচ্ছেন । যার যা ইচ্ছে করুকগে ! তবে সাবিত্রীও খাওয়া ছেড়ে দিয়েছিল কেন ? মাসীমা নতুন নতুন খাইয়ে দাইয়ে গোলগালটি করেছিলেন, তারপর যে ‘কে, সেই’ ! বলে কিনা অম্বল হয়, আরো কত কি ? যম্মা হবার সাধ হয়েছিল । ডাক্তারে একবার কি বলেছিল তাইতে খগেন বাবু ভয় পেয়েছিলেন । একজন ডাক্তারবন্ধু পরীক্ষা করে একটা দামী ওষুধ লিখে দিয়ে যান । তার মধ্যে অনেকটা সুরা ছিল । খগেন বাবু দু’তিন দিন অস্বস্থতার জন্তু খেয়েছিলেন—তারপর চেয়ে পান নি । সাবিত্রী দেয় নি, শিশিটা ভেঙ্গে ফেলে, কি ফেলে দেয় । বেশ চন্ চন্ করে উঠত, কান-দুটো, নাকের ডগাটা, শ্রান্তির অবসান হত ।

আজ ওষুধটা থাকলে বেশ হত । খগেনবাবু বিছানায় শুয়ে পড়লেন । দূর থেকে মনে হল নাম-কীর্তনের আওয়াজ কানে আসছে । কোলকাতার ‘সহরে ঘুমোবার জো নাই । ‘হরেকেষ্ট হরে রাম হরে রাম হরে হরে’—কোলকাতায় থাকা চলবে না । সহরে সর্বসাধারণের উৎপাত আরম্ভ হয়েছে । কোথা থেকে এ

অন্তঃশীলা

জনবৃদ্ধি হল কে জানে? রাস্তা চলতে গায়ের ওপর এসে পড়ে, ট্রাফে
বাসে ওঠা যায় না, কলেজ স্কোয়ারে বেড়ান যায় না, থিয়েটারেও
ছবি দেখতে যাওয়া যায় না। আগে তবু সিনেমাতে গিয়ে
খানিকটা চুপ করে থাকা যেত, এখন সেখানেও কথা, টকি
একমিনিট, এক ইঞ্চি জাগায় নিশ্চিন্ত হবার জো নেই। কে এই
ভিড়কে আদর দিয়ে মাথায় তুলেছেন! এরাই বাঙলা মাসিক,
দৈনিক, সাপ্তাহিক, পাক্ষিক বার করে, খেয়াল হলে এরা মিনিটে
মিনিটে কাগজ বার করত। গায়ে পড়া লোক সব। খগেনবাবু
পাশ বালিশটা সরিয়ে দিলেন, মাথার তলায় দুটো হাত দিয়ে
ঘুমোতে চেষ্টা করলেন। তারি আবদার বেড়ে গেছে—আত্মরে
ছেলের মতন। সাবিত্রী বলত মাসীমার আত্মরে বোনপো।
মাসীমার কাছে গেলে হয়, কম কথা কন। কথা কেন কইবে না
মানুষে? নিশ্চয়ই কইবে, তবে চোঁচিয়ে নয়। কথা কইবেনা কেন,
তবে শেষের কবিতা, মালঞ্চ, বাঁশরীর চরিত্রের মতন। তা নয়
অর্থহীন প্রলাপ! কথা না কইলে মানুষে বাঁচে না—হয়ত বাঁচে
কে জানে? কথা কইবার ফাঁকে ফাঁকে নীরবতা চাই—আলাপে
ভিড় করলে চলে না। তুমি কথা কইবে, আমি চুপ করে শুনব
আমি হয়ত উত্তর দেবোনা, তোমার চোখ মুখ সমগ্র ভঙ্গিমা মুখরিত
হবে, ঠোঁট নড়বেনা, কিংবা নড়বে, জাপানী ছবির বাঁশপাতার
মতন। রবিবাবু ঠিকই বলেন—অবকাশ চাই। কিন্তু খালি
ছবির ফ্রেম টাঙিয়ে রাখলেই নিরাকার ব্রহ্মের রস উপভোগ কর
যায় না—একজন গায়ককে দেখলেই কর্ণকুহর পরিভূপ্ত হয় না।

একটা কিছু অবলম্বন থাক। চাই যার চারপাশে নীরবতা চাক
বাঁধতে পারে, তবেই মধুর গুঞ্জন—ঘেঁটা নামকীৰ্ত্তন নয়। একলা
হওয়ার মধ্যেও কথোপকথন, সেখানেও ভাবের ঠেলাঠেলি। একলা
হওয়ার বাইরে খানিকটা দূরে, বেশ খানিকটা দূরে, বহু জন-
সমাগম থাকে—থাকুকগে। দরবারে রাজা সিংহাসনে বসে আছেন
দূরে প্রজা সারবন্দি দাঁড়িয়ে আছে। সিংহাসন একটি। পাশে
সিংহাসন নেই, থাকলেও খালি। বরাবরই শূন্য ছিল। হিন্দুরাণী
পর্দানশীন। কালো পর্দা ধীরে ধীরে ওপর থেকে নামছে,
পাদপ্রান্তের আলো ধীরে ধীরে কমে আসছে। ঐক্যতান কমে
এল, কীৰ্ত্তন শোনা যাচ্ছে না, যবনিকার ত্রিকোণ অবকাশে নটীর
মূর্ত্তি, হাতে ফুলের তোড়া—গোলাপ জলের শিশি, লজ্জা ও জয়ের
মিশ্রিত আনন্দে অবনতমুখ, টানা চোখ টানা ভুরু, কোথায় যেন
দেখা হয়েছে—কোন কেশতৈলের বিজ্ঞাপনে? যবনিকা পড়ছেন
কেন? কোথায় আটকে গিয়েছে, ভেতরের দড়িতে বোধ হয়।
খগেনবাবু মাথার নীচ থেকে হাত সরিয়ে পাশ বালিশটা টেনে
নিলেন।

খানিক পরে মুকুন্দ পা টিপে এসে আলো নিবিয়ে দিয়ে গেল।

৩

খগেন বাবুর পায়ে রোদ পড়তে ঘুম ভেঙে গেল। মুকুন্দ ট্রে করে চা ও দুটো টোষ্ট নিয়ে এল। মুখে দিয়ে খগেনবাবু বললেন, 'টোষ্ট চমৎকার হয়েছে, কিন্তু ছেঁড়া যায় না,' 'বাসি বলে'—'ও: তাজা রুটি নিয়ে আসা হয়নি কেন' ? 'বাজার করতে যাবার সময় নিয়ে আসব। মা ঠাকুরণ লোক পাঠিয়েছেন।' 'মা ঠাকুরণ!' 'ও বাড়ির মেমসাহেব' 'ভেকে নিয়ে আয়' জিনের গলা-বন্ধ ফরসা কোট পরে একটি লোক এসে নমস্কার করলে, চিন্তামণি। ভারি সুসভ্য চাকর, একদিনের জন্যও লোকটা আধময়লা জামা পরলেনা, কাঁধের ঝাড়ন সর্বদাই পরিচ্ছন্ন, কোঁচার কাপড় সারাক্ষণ ওলটানো, চুল সর্বদাই ফিটফাট, সামনের গোছাটা সাদা—আর, কখনও গোঁপ দাড়ি উঠেছিল বলে মনে হয় না; ভাষা সুমিষ্ট ও সংযত,

ভিস্ ভিন্ন জলের গেলাস আনে না ; জুগ্ থেকে জল ঢালে যেন
 মদ ঢালছে, বৎসরে ছয় মাস নিশ্চয়ই পাহাড়ে কাটায়, নচেৎ অস্ত
 মেজাজ ঠাণ্ডা হয়না, উড়ে হয়েও জগন্নাথ দেখেনি, খোদ মেম
 সাহেবের হাতের তৈরী। চিন্তামণি খগেনবাবুর হাতে খাম
 দিয়ে বাইরে গিয়ে দাঁড়াল। মুকুন্দকে ঘরের ভিতর দেখে খগেন
 বাবু মুখ তুলে তার দিকে চাইলেন। তার মুখে চোখে ঔৎসুক্য
 প্রকাশ পাচ্ছে, 'এইবার রান্নাবান্নার জোগাড় দেখে' 'রান্নাবান্নার
 কথা বলতে হবে না, বনেদী ঘরের চাকর নিজেকে করে নিতে জানে,
 ওকে কারুর বলতে হয় না! 'বুড়! 'এখন যাও।' মুকুন্দ নেমে
 যাবার পর খগেনবাবু খাম খুলে পড়লেন, 'আশা করি বিশ্রাম
 লাভ হয়েছে। সকালে এখানে খেলে সুখী হব। অত্যাশ্র
 দরকারী কথা আছে।' বিশ্রাম? নিশ্চয়ই হয়েছে, নিজের
 বাড়ির তত্ত্বপোষও ভাল পরের বাড়ির খাট পালঙের চেয়ে।
 দরকারি কথা না বাজে কথা! নাঃ এ বেশী হচ্ছে, এরকম করলে
 চলবে না, দু'দিন পরে নিজেকে খুঁজে পাওয়া যাবে না, যা করতে
 হয় নিজেই করা যাবে, স্নেহ মমতার আশ্রয়ে থাকা তাঁর ধর্ম নয়,
 দুদিন পরে ভগবানে বিশ্বাস পর্যাস্ত করতে হবে, শেষে গুরু বিনা,
 ঠিকুজী ছাড়া একপা হাঁটা যাবে না। 'মুকুন্দ! আচ্ছা, একটু পরে
 এস, বাজারে যাবার আগে দেখা করে যাস।' খগেনবাবু তাড়াতাড়ি
 চিঠির কাগজের প্যাড্‌টী নিয়ে লিখতে বসলেন—শ্রদ্ধাংশনা—
 দস্ত্য স, না মূর্খণ্য ষ? কোন মহিলাকে কখনও চিঠি লেখেন নি,
 সাবিত্রীকে সাবু লিখতেন, আপত্তি উঠেছিল, 'কেন, আর্ম কি

তোমার রোগের পথি ?' সেই থেকে রাণী, মমু, কত-কি ! সে-
 খব গোড়ায় গোড়ায়, তার পর সাবিত্রী, শুধু সাবিত্রী, তার বেশী
 লিখতে ইচ্ছে হত না, কি করা যাবে ? কি লেখা যায় ? পাঠ
 লেখবার প্রয়োজন কি ? না লিখলে বড় গুড়া গুড়া দেখায় ।
 সাবিত্রী নিশ্চয় নরমানি লিখত, স্বজনের মতন । পাঠের কোন
 দরকারই নেই, শ্রদ্ধারও দরকার নেই, শ্রাদ্ধেরও নেই,
 অপঘাত মৃত্যুর শ্রাদ্ধ হয়, কিন্তু এয়ে আত্মঘাতী, শ্রাদ্ধ হয় না, হিন্দু
 আচার অনুষ্ঠানের তাৎপর্য বোঝা যায় না । যা হয় নমঃ নমঃ শেষ
 করেই কাশী যেতে হবে ।" সেখানে গিয়ে শ্রাদ্ধ, কি প্রায়শ্চিত্ত
 করলে মন্দ হয় না—কাশীতেই সুবিধা । তাই ভাল, মাসীমা
 আছেন, যোগাড়যন্ত্র করে দেবেন, বিধবা মামুষ, জানেন শোনে ।
 কিন্তু তাঁকে বিরক্ত করে লাভ কি ? ভারি বিরক্ত ঠেকে
 কলম থেকে কালি না পড়লে । কলমটা ঝাড়তে গিয়ে চিঠির
 কাগজে খানিকটা কালি পড়ল—বিশী দাগ, ব্লটিং কাগজ কোথায়
 গেল ? মুকুন্দ...উনি ত খুব জানেন ! আর একখানা কাগজ টেনে
 নিয়ে খগেনবাবু লিখলেন, 'ধন্যবাদ । একটু পরে যাচ্ছি, কিন্তু
 এইখানেই খাব, কতদিন আপনাকে কষ্ট দেবো ? যা করেছেন
 তার জগু চির কৃতজ্ঞ ।—খগেন্দ্র ।' চিন্তামণি চিঠি নিয়ে ঘর থেকে
 বেরোবার সঙ্গে সঙ্গে মুকুন্দ এল । 'ডেকেছেন ?' 'এত ক্ষণ আসা
 হয়নি কেন ? বিশ দফা জবাব দিওনা' 'আজ্ঞে না, দরজার
 গোড়ায় দাঁড়িয়ে থাকলে চলে কি আমাদের বাবু ?' 'নিশ্চয়ই,
 তোমার কত কাজ ! কি খেতে দেবে মনস্থ করেছে ?' 'বাজারে

যাই' 'যাও, দু' পয়সার ব্লটিং পেপার কিনে এনো, আর একটা রোলার ছিল তাইতে লাগিয়ে দিও, সেটা খুঁজে রেখো' 'ও আমি পারব না বাবু, ঠাকুরকে বলব'খন, বাবুদের বাড়ির খানসামা ছিল' 'না তাকে আর ওপরে ঢুকিয়ে না, স্বস্থানেই শোভন হবে, ওরে আমার অনেক কাজ আছে বুঝিস নর কেন? এখনি আসব, এখন বেরুচ্ছি।' 'তা হলে স্নান করে নিন' 'বা বলেছি! কামাবার যোগাড় কর, ঐখানে বাক্স আছে' মুকুন্দকে চুপ করে দাঁড়িয়ে থাকতে দেখে খগেনবাবু বলেন, 'সব শিখে নাও না হলে কাশী যাবে কি করে?' আমার সঙ্গে দেশবিদেশে ঘুরতে হবে ত' ? আগে একটি পেয়ালায় গরম জল নিয়ে এস' 'কাশী কবে যাবেন?' 'যত শীঘ্র পারি এখানকার কাজ শেষ হোক' 'কবে হবে?' 'যথা সময়ে নোটিশ পাবে যাও, নিয়ে এস, বেশী গরম এনো না'। মুকুন্দ এক পেয়ালা গরম জল নিয়ে এল। 'তা হলে মাকে আজই তার করে দিন না বাবু?' 'অত ব্যস্ত হলে চলে কি মুকুন্দ! কিন্তু মার কাছে গেলে তাঁর কষ্ট হবে না ত' ? 'একটু হবে বৈকি। তাঁকে আবার রান্নাবান্না করতে হবে, আমার হাতে ত খান না' 'বেশত, তোমার ঠাকুরকে নিয়ে গেলেই হবে, কি বল?' 'আমি বলছি না নিয়ে যেতে, সে আপনার ইচ্ছে.....তবে মায়ের কষ্ট হবে তাই ভাবছিলাম' 'বাস্তবিক মুকুন্দ, তুই বড় দূরদর্শী, অনেক ভাবিস্ তুই,' 'আর কে ভাববে বলুন?' 'সে থাক—

খগেনবাবু যখন রমলা দেবীর বাড়ী পৌঁছলেন তখন প্রায়

অন্তঃশীলা

ন'টা। রমলা দেবী ঘড়ির দিকে চেয়ে জিজ্ঞাসা করলেন 'চা খাওয়া হয়েছে?' 'হ'য়েছে সকালেই' 'এই সময় আর একবার খান ত?' 'খাই' চিন্তামণি কেতলীতে গরম জল নিয়ে এল— চাএর সরঞ্জাম সাজান ছিল। 'রাত্রে ঘুমিয়েছিলেন?' 'খুব, অনেকদিন এমন ঘুমুই নি।' 'ক্লান্তিতে, চোখে কষ্ট হয় নি?' 'বেশী নয়, মুকুন্দকে গোলাপজল আনতে দিলাম, শিশিটা ভেঙ্গে গেল।' 'মুকুন্দ তৎপর নয়, চিন্তামণিকে নেবেন? লোকটি কাজের।' 'চিন্তামণি ভাল চাকর, কিন্তু সে কি হয়! মুকুন্দ কোথা যাবে?' 'সাবিত্রী বলত ওকে কাশী পাঠিয়ে দেবে, সেখানে থাকবে ভাল, লোকজন আছে, কথা কইবে আর মন্দির দেখে বেড়াবে।' 'আমিও ভাবছি কাশী যাব।' রমলা দেবী উঠে চা ঢালতে ঢালতে প্রশ্ন করলেন, 'কবে?' 'যত শীঘ্র হয়ে ওঠে, কাজটা সমাপ্ত হলেই।' 'সে কাজ না করলেও চলে।' 'আমাদের ধর্ম কত সুবিধার দেখুন!' 'কাশীই যাবার প্রয়োজন?' 'একটু কোথাও বেড়িয়ে এলে, একলা একলা, মনটা ভাল হবে, শরীরটাও ভাল যাচ্ছে না অনেকদিন থেকে।' চিন্তামণি ডিশে করে চিড়ে ভাজা ও সিদ্ধাড়া নিয়ে এল। রমলাদেবী ডিশ দুটো সামনে ধরতে খগেনবাবু বড় একচামচ চিড়ে ও একটি সিদ্ধাড়া তুলে নিলেন, কালো লঙ্কা ভাজা নেবার সময় রমলা দেবী বারণ করলেন। 'আর একটি সিদ্ধাড়া নিন।' 'লোভ হয়, কিন্তু নেওয়া উচিত নয়' 'সব উচিত কাজ এখনই করা উচিত কি?' 'আগের কথা ছেড়ে দিন, এখন কোন্টা করা অগ্রায়?' 'আপনি ভারী অভিমানী,

শেষে বাড়ী গিয়ে ঠোট ফোলাবেন... রমলা দেবী বলেন
অপ্রস্তুতে পড়লেন, খগেনবাবু তাঁকে এই অবস্থা থেকে উদ্ধার
করবার জ্ঞান হাঁসি মুখে উত্তর দিলেন, ‘অত সহজে নয়, ওকাজ
আপনাদেরই মানায়।’ ‘মানাচ্ছে আর কৈ?’ ‘কোথায় মানাচ্ছে
না বলুন?’ ঠোট একটু চেপে রমলা দেবী উত্তর দিলেন,
‘তা হলে বলি? অভয় দিচ্ছেন ত? শেষে রেগে দেশত্যাগী
হন যদি?’ ‘অভয় দিচ্ছি।’ ‘কাল এলেন না কেন?’ ‘কাল?
দেখুন, পরশুর কথা আলাদা, কিন্তু রোজ রোজ আসাটা.....’
‘সে জ্ঞান ভাববেন না, সান্থিত্রী আমাকে বোনের মত ভাবত।’
‘তা জানি...তা নয় ঠিক, বাড়ীতে কি রইল, কি গেল, দেখতে
হবে ত?’ ‘কি গোছানি লোক আমার! মুকুন্দ খুব বিশ্বাসী
নয় কি?’ ‘তা বটে, কিন্তু...’ ‘তার মানে, আপনি...’ ‘বলুন না
মানে কি? ...আধখানা বলা কেমন আপনাদের অভ্যাস।
বলুন না?’ ‘আপনি এখানে আসতে চান না...’ ‘আমি অকৃতজ্ঞ
নই।’ ‘কৃতজ্ঞতার কথা যদি তোলেন তবে কষ্ট করে আসতে হবে
না।’ ‘তা হলে কি বলব?’ ‘কিছু বলতে হবে না। চা আর
দেবো?’ ‘দিন।’ দুজনের মধ্যে একটা আবরণ পড়ে গেল।

নীরবে আর এক পেয়ালা নিঃশেষ করবার পর খগেনবাবু
মুখ তুলে চাইতে দেখেন যে রমলা দেবী পাথরের মূর্তির মত
চূপ করে, কোন বিশেষ দিকে দৃষ্টি না নিবদ্ধ করে বসে আছেন।
মুখে তাঁর বিষাদের ছায়া, নিশ্চল স্ফটিকের অস্বচ্ছতা, কোন
প্রকার মিথ্যার আবরণ নেই; কয়েক মুহূর্তের জ্ঞান মুখোমুখি

অদৃশ্য হয়েছে, অন্তরের রূপ অশ্রুভাবে উদ্ভাসিত হচ্ছে। অনেক পুঁথিতে পুরাতন হস্তলিপির ওপর নতুন লিপি লেখা থাকে, তাল পাতার ওপর সেই পুরাতন অক্ষরের আঁচড়ই পুঁথির আন্তরিক ইতিহাসের খবর দেয়। খগেনবাবুর মনে হল যেন রমলা 'দেবীর মুখে সেই পুরাতন বহুপুরাতন, অক্ষরের ছাঁদ দেখা যাচ্ছে। ভাল করে দেখতে ইচ্ছে হল, কিন্তু তৎক্ষণাৎ রমলা দেবী নিজেকে সামলে নিয়ে উঠে পড়লেন—চিহ্ন লোপ পেল—স্ফটিক উজ্জ্বল হ'ল, পরিস্ফুট হ'ল ভদ্রতার এনামেল, মুখোসের অন্তরালে মুখ দেখা গেল না, খগেনবাবু চোখ নাড়িয়ে নিলেন। 'এই খানেই স্নান করুন।' 'করছি, কিছু মনে করবেন না।' রমলা দেবী ট্রে সাজিয়ে রাখলেন। খগেনবাবু বললেন, 'আমার একটু একলা থাকতে ইচ্ছে হচ্ছিল, তাই আসিনি।' 'একলা ত' আপনি চিরকালই থাকবেন। কাশী গেলেই কি একলা হবেন?' 'সেখানে কাউকে চিনি না, অতএব খানিকটা হওয়া সম্ভব।' 'পারবেন না।' 'কি পারব না?' 'সেখানেও স্নেহ মমতা আপনাকে ঘিরে ফেলবে।' 'একটু তফাৎ আছে।' 'কার সঙ্গে কার? কি তফাৎ? বলুন না স্পষ্ট করেই, ভয় কি? আচ্ছা আমিই বলছি, সাবিত্রীর হাত থেকে রক্ষা পেতে চান ত? এই না? আর আমি সর্বদাই সাবিত্রীর কথা স্মরণ করিয়ে দিচ্ছি—এই ত? আপনি আমার স্নেহ মমতা থেকে নিষ্কৃতি চান—এই না?' রমলা দেবী খগেনবাবুর আনত চোখের প্রতি দৃষ্টি রেখে বলে যেতে লাগলেন, 'আপনাকে বলতেই হবে। কাল থেকে এখানে আসতে

বলছি, আর আপনি কেবল লুকিয়ে লুকিয়ে বেড়াচ্ছেন, এর অর্থ আমি বুঝি।’—একদমে অত কথার পর হাঁকিয়ে পড়ে রমলা দেবী একটু হাসলেন— ‘বেশ ভালো কথা, আমার সোজা কথার উত্তর দিন।’ ‘বেশত’ বলুন না, আপনাদের সোজা প্রশ্নই অত্যন্ত ভয়ঙ্কর, কারণ তার উত্তর হওয়া চাই আপনাদেরই মনোমত। বলুন, ‘আমি প্রস্তুত।’ ‘আমাদের মন সম্বন্ধে অত অভিজ্ঞতা সঞ্চয় করলেন কোথায়?’ ‘একজনের কাছেই শুনী।’ ‘সবাই আমরা এক ছাঁচের?’ ‘হাঁ...তোমরা সবাই ভাল।’ ‘নিজের ভাষায় উত্তর দিন না।’ ‘কবি আমাদেরই ভাষা গুঁছিয়ে বলেন।’ ‘আপনার বোন, আপনার মাসীমা সব সাবিত্রীর মতন?’ ‘না, ঠিক তা নয়’ ‘তবে?’ ‘আপনি বলুন। পুরুষে স্ত্রীজাতির সম্বন্ধে যা জানে তার চেয়ে জানেন স্ত্রী পুরুষ জাতিকে।’ ‘আমার অভিজ্ঞতা সীমাবদ্ধ।’ ‘বেশ লোক আপনি, নিজেকে সর্বদাই গোপন রাখবেন!’ ‘কি আছে যে প্রকাশ করব? যা আছে তাই বুঝে নিন, আপনি ত আর অণ্ডের মতন নন’ ‘যা বুঝেছি সে ত ভুল প্রমাণ করে দিলেন, যা বুঝিনি তাই হয়ত ঠিক। বলুন না আমরা কি?’ ‘আপনি বড় ভাল মানুষ।’ ‘অর্থাৎ বোকা।’ ‘না, সত্যিই ভালমানুষ।’ ‘ভালমানুষের কোন প্রয়োজন নেই এ সংসারে।’ ‘আমার হয়ত থাকতে পারে।’ ‘আপনার? যে লোক একলা থাকতে পারে তার আবার অণ্ডকে প্রয়োজন?’ কথাটা মুখ দিয়ে ফস করে বেরিয়ে গেল, শব্দে বাবুর ইচ্ছা ছিল না রমলা দেবীর কোলকাতা সহরে একলা থাকার উল্লেখ

অন্তঃশীলা

করা। কোথায় যেন ক্রুর-মুখে শুনেছিলেন যে রমলা দেবীর স্বামীর সঙ্গে বনিবনাও নেই—ব্যাপারখানা কি জানবার জন্য কখনও ঔৎসুক্য পর্য্যন্ত প্রকাশ করেন নি, বাসনাও হয়নি। হয়ত পরের কথা জানবার ব্যগ্রতারূপ সামাজিকতা তাঁর ছিল না। সাবিত্রী তাঁকে একবার রমলা দেবীর স্বামী সন্মুখে কি একটা খবর দিতে যায়, তিনি তাঁর মুখ বন্ধ করেন এই বলে, ‘আমি ভদ্রলোক, কোন স্ত্রীলোককে অমূকের স্ত্রী ভিন্ন একজন মাত্র ভদ্রমহিলা হিসাবেই দেখতে পারি; তুমিও অলুগ্রহ ক’রে কোন পুরুষকে স্ত্রীলোকের স্বামী ভিন্ন ভদ্রলোক হিসাবে দেখতে চেষ্টা কোরো, চেষ্টা কোরো, চেষ্টা কোরো। পারবে না জানি, মেয়ে মানুষে পারে না, পুরুষেও অনেকে পারেন না। তোমাদেরকে দণ্ডবৎ করি, কেছা শোনার ও করার প্রবৃত্তিকে তোমরা সামাজিক গুণে পরিণত করেছ, সেই প্রবৃত্তির তাড়নায় তোমরা নভেল পড়, চা-পাটিতে যাও, যদি প্রাণভরে কেছা না শুনতে পাও, তা হলেই বল নভেলে গল্প নেই, চা-পাটি জমল না... মনের জুচ্ছুরীগুলো ধরতে শেখ। রমলা দেবী কেন, তোমার কোন বন্ধুরই গোপন কথা আমাকে শুনিও না। মানুষকে নিঃসম্পর্কিত করে দেখাই সত্যকারের দেখা।’ আজ অসাবধানে তিনি রমলা দেবীকে আঘাত করেছেন, প্রতীকারস্বরূপ তিনি বলেন, ‘আপনার মতন আত্মপ্রতিষ্ঠা ব্যক্তির কি প্রয়োজন থাকতে পারে আর কাউকে?’ বিষাদের শাস্তি উদ্ভিন্ন করে রমলা দেবীর মুখে উত্তরের কোন প্রকার লক্ষণ ফুটল না। খগেন বাবু ধীরে

বীরে বলে যেতে লাগলেন, ‘মিথ্যে বলছি না, আপনাকে স্বয়ংসিদ্ধই মনে হয়, আপনার যেন কোন প্রকার সম্বন্ধেরই প্রয়োজন নেই,’ একেবারেই নিঃসম্পর্কিত। কি রকম মনে হয় জানেন? বাঁকুড়া অঞ্চলের শ্মশানের এক বুড়ো বটগাছ, ধুঁ ধুঁ করছে মাঠ, তারই গুঁড়ির মধ্যে এক পাথরের দেবীমূর্তি, ঝুরিতে ‘ঢেকে রেখেছে সূর্যের তাপ ও লোকচক্ষুর জনতা থেকে। গ্রামের লোকে ভূতচতুর্দশী কি অমনি কোন অঙ্ককাররাত্রে মধ্যে মধ্যে পূজো দিতে আসে, সকলে নয়, নেশাখোর ডানপিটের দল, তান্ত্রিক সাধু হু’ একটি। মূর্তির শীতল কঙ্কণ হাসি পূজার প্রতীক্ষায় ফোটেনি। দিগন্তব্যাপী নীরবতা, বুড়ো-বটের সনাতনত্ব, জীবন-মৃত্যুর পারস্পর্য্য, উষর ভূমির নিষ্ফল অবকাশের সাথে মিতে পাতিয়েই দেবীর আত্মা সন্তুষ্ট। এ দেবীকে ফুল দেবার দরকার নেই, এর পূজারী নেই, তবু এই মূর্তি হাসে, স্নেহ দুঃখের প্রতি গভীর ঔদাসীত্যে, পরিবর্তনের প্রতি চরম নিরপেক্ষতায় এই দেবী সম্মিত-বদনী ও চিরকুমারী!’ হঠাৎ রমলা দেবী খিল খিল করে হেসে উঠলেন, এ হাসি ঋগেন বাবু কখনও তাঁর মুখে,—কারো মুখে শোনে নি, তাই চমকে উঠে বসেন, ‘বিশ্বাস করেন না? গোকে জ্যাকগার হাসিই উল্লেখ করে, কিন্তু আমি হু’একটি এমন মূর্তি দেখেছি, যাদের হাসি আরো অপাখিব।’ ‘কোথায় বলুন না?’

দেশেরই মূর্তি। একটি ঝাঁকেটের ড্রায়াড, আর একটি বুদ্ধের।
‘বুদ্ধের মূর্তিতে ত’ থাকবেই, কিন্তু ড্রায়াডে কেন? ঐ সব যক্ষিনী
কিন্নরী আমার তত ভাল লাগে না।’ ‘সব গুলিই ভাল নয়, কিন্তু

অন্তঃশীলা

তা'দের উদ্দেশ্য হ'ল ভার বহন ও বিলি করা। মন্দির ও স্তূপের ওপরকার ভার ভীষণ, গ্রীক মন্দিরের এবং মেট্রোভিচের ক্যারিয়াটিডের দেহ অবলম্বন করে সোজাসুজি সেই ভার নেমে আসে। তাতে দোষ হয় কি জানেন? মনে হয় যেন মেয়ের সোজা দাঁড়িয়ে সব ওজনটা মাথায় বহন করছে; অবশ্য রাজপুতনী যখন মাথার ওপর জলের ঘড়া বসে তখন মন্দ দেখায় না, কিন্তু ঘড়ার ওজন বেশী হলে একটু পুরুষালী ঠেকে না কি? তবু ত' রাজপুতনী জোরে হাঁটে। বোধ হয় অ্যাথিনীয়রা তাদের শত্রু অ্যামাজনদের আদর্শ কিংবা তাদের ওপর প্রতিশোধ নেবার জ্ঞানই মাথার ওপর ভার চাপাত। তার চেয়ে বাঁকাভাবে দাঁড়ানই আমার, আমাদের ভাল লাগে, বেশ হাল্কা মনে হয়, স্থূল মাধ্যাকর্ষণ শক্তিকে যেন ইচ্ছে করে বঞ্চিত করা হল। তাই হওয়া উচিত, মেয়েরা জগতের সব ভার বহন করবে না, ভার হাল্কা করে দেবে বাঁকাভাবে দাঁড়িয়ে, বণ্টন করে। তা ছাড়া...না, বলব না'

'কেন? বলুন না, তাতে কি?'

'তা ছাড়া, মেয়েদের গঠনরীতিই বাঁকা-রেখায়।'

'কিসের গঠন?'

'দেহের। অতএব, মেয়েদের পক্ষে মনের। যে খাম ওপরের ভার বইবার জ্ঞান ব্যর্থ হয়ে লাফিয়ে ওঠে সেই খামই সোজা, আমার অত সোজা ভাল লাগে না, তার মধ্যে দাস্তিকতা আছে।'

'আমরা নিজের পায়ে দাঁড়াতে পারি না?'

‘না, পারেন না, পারা উচিত নয়, পারলে বিসদৃশ ঠেকে, তার চেয়ে ড্রায়াদের মতনই ভাল, পাথরকেও লঘু মনে হয়।’

‘অথচ পরনির্ভরশীলতাও পছন্দ করেন না?’

‘তা ঠিক নয়।’

‘কি ঠিক?’

‘একটা সামঞ্জস্য।’

‘আপনার স্ত্রীবিধায়?’...রমলা দেবী হেসে ফেললেন। খগেন বাবুর কুঞ্চিত ক্র লক্ষ্য করে তিনি বল্লেন, ‘শুনেছি, ড্রায়াদের মূলা ডেকরেটিভ?’

‘ও কথাটার মানে নেই, সভ্যসমাজের বুলি মাত্র। আমি মেয়েদের কেবল ঘরের আসবাব ভাবি না, মৌল্যবুদ্ধির উপকরণ ভাবি না। আপনি বেশ ঠাট্টা করতে পারেন!’

‘কোথায় ঠাট্টা করলাম? আপনিই ত’ আমাকে কালো কষ্টপাথরের হাত পা ভাঙ্গা মূর্তি, আমার বাড়ীতে যারা আসে তাদেরকে ডানপিটের দল বল্লেন, কত কবিতা করে!’

‘ঐ দেখুন! ভুল বুঝলেন ত’! আপনাদের সঙ্গে পেরে উঠি না। আমি দিলাম উপমা, আপনি উপমার পাদপূরণ করলেন ব্যক্তি দিয়ে! বেশ!’

‘না, না, আমি ঠাট্টা করছিলাম এখন। যখন লোকে ঠাট্টা করে তখন বোঝেন না, অর্থচ নিজে ঠাট্টা করতে তৎপর! বেশ মানুষ! আচ্ছা, অপার্থিব হাসিটা, কি রকম?’

‘সে এখন উড়ে গেছে। আচ্ছা, আপনি তখন হাসলেন কেন?’

অন্তঃশীল।

‘কখন ?’

‘ঐ আমার উপমার উত্তরে ?’

‘মনে নেই ত ! বেশ বা হোক, পরের ওপর দোষ চাপাতে পারলেই বাঁচেন দেখছি !’

‘বলুন না ।’

‘মনে নেই । মিথ্যে কথা বলি ?’

‘তাই বলুন, সত্য কথা বেরিয়ে আসবে’

‘একটু সময় দিন । পরে বলছি, এখানে খেয়ে যান ।’

‘খুব দরকষাকষি করতে পারেন য় হোক !’

‘বলছি । কি বলব ? আপনি পরের ওপর অত দোষ চাপান কেন বলুন ত ?’

‘এর নাম বুঝি মিথ্যে বলা ? অ মি দোষ চাপাই না, আপনি দোষ করেছেন ।’ রমলা দেবী উদ্বিগ্ন হয়ে চাইলেন ।

খ—আপনি সাবিত্রীকে কুশিক্ষা দেন নি ?

র—যা ভাবেন ।

খ—যা ভাবি তা প্রকাশ করেছি ।

র—কুশিক্ষা কেউ দেয় নি । তার স্বভাবই ছিল নরম, কাকুর হুকুম ভিন্ন সে চলতে পারত না । আমি হুকুম করতাম না, ...আমি তাকে ভালবাসতাম ।

খ—তা জানি, সেও খুব ভালবাসত—তারও বেশী করত । কিন্তু আমার ‘হুকুম’ সে মানত না ।

র—আপনি হুকুমই করতেন না, করতেন যদি ভাল হত ।

খ—আমি হাকিম হয়ে জন্মাইনি, কি করব ? আমি যে তাকে ভালবাসতাম না তাও বলতে পারি না। সে ভাল হোক, আমি এই চাইতাম।

র—সেও আপনাকে অত্যন্ত ভালবাসত—বোধ হয়, অত ভালবাসার রীতিই তাই।

খ—কণ্ঠনো না। বেশী ভালবাসলে ছেড়ে দেয়।

র—শেষের কবিতায়।

খ—আদি সত্যের তাগিদে

র—সে চেষ্টা করত আপনাকে ঐ ভাবে ছেড়ে দিতে, আমি নিজেকে জানি, কিন্তু পারত না। তার স্বভাব তখনও তৈরী হয় নি—আপনি তৈরী হবার সময়ও তাকে দিলেন না।

খ—তা হলে আমারই দোষ !

র—দোষ আবার কি ? তাকে একান্ত করে দেখেন নি। আপনার আদর্শ সাবিত্রীকেই আপনি বাসতেন ভাল। তাকে ভালবাসা বলে না, মেয়েরা বলে না, মেয়েরা তা চায় না।

খ—তারা কি চায় আমি জানি না, চেষ্টা করলেও জানতে পারব না। আমি যা আমি তাই। সেই জগুই ত' কাশী যাচ্ছি।

র—রাগ করলেন ত ?

খ—কমা করুন, সত্যিই রাগ করিনি। রাগ করবার জগু এখানে আসি না।

র—আপনি আর আসেন, কোথায় ? আমিই কেবল নিলজ্জের মত ডেকে পাঠাই।

অন্তঃশীলা

থ—ছি ; বলবেন না । নিজেই অসি—কোথায় যাব বলুন ?

• র—যাবার জায়গা নেই বলে আসেন ?

থ—আমার সোজা কথার বাঁকা অর্থ বার করে কি তৃপ্তি পান ?
আসতে ভাল লাগে বলেই আসি । স্বজনকে দেখছি না কেন ?

র—ডেকে পাঠাব ?

থ—না, ডাকতে হবে না ।

র—আপনি কাশী যাচ্ছেন কবে ?

থ—জানি না ।

র—এই বার স্নান করুন ।

থ—স্নান করে এসেছি ।

র—আপনার চোখ কেমন ?

থ—চোখ খারাপ হচ্ছে বোধ হয় ।

র—দীর্ঘ চোখ আছে, নচেৎ অপাখিব হাঁসিও দেখতে পান ।

থ—সত্যি দেখোছ । ঠোঁটে হাঁসি, চোখে জল নেই, কিন্তু কি
অসম্ভব করুণা, জল জমে বরফ হয় নি, হাঁসি ফুটে লোভনীয়
করেনি, অত্যন্ত সংযত, সংহত, যীশুর মুখে যে করুণা মাখান
হাঁসি প্রত্যাশা করা যায় ।

র—সেই লাল মাঠের মাঝখানে বুড়ো বটগাছের তলায় মূর্তির
মুখে ?

থ—না, তার মুখ কঠিন ।

র—তার চোখে জল দেখেন নি ?

থ—না ।

র—সে জ্ঞাত চোখ থাকে চাই ।

থ—আমি কি এতই কাণা ? তার চোখ শুখনো ।

র—হবে—আমি ত' দেখিনি ।

থ—আপনার চোখে ছানি আছে ।

র—হয়ত আছে ।

থ—নিজেই জানেন কিসের ।

র—আপনারই আছে ।

থ—আদর্শবাদের ছানি ? থাকতে পারে । যদি থাকে,
নিজেই থসে যাবে ।

র—তাই কি বায় ? সার্জ্ঞান ডাকতে হয় ।

থ—গোলাপ জ্বলে হয় না ?

র—আপনাকে খাবার দিই ?

রমলা দেবীর কণ্ঠে গান্ধীর্ষ্য লক্ষ্য করে থগেন বাবু বল্লেন,
'এই বার বুঝেছি । সাবিত্রীর জ্ঞাত আপনারও যে কষ্ট হয়েছে
আমার বোঝা উচিত ছিল । আমার বুঝতে একটু দেরী হয় ।'

রমলা দেবী হঠাৎ উঠে পড়ে বল্লেন, 'দেবী হয়েছে ।
'মুকুন্দ রাগ করবে না ?' 'মুকুন্দ কেন রাগ করবে ?' 'না, তাই
বলছি, দেবী হয়েছে কিনা ?' 'তা হোক গে ! আপনি বসুন !'
'না, আগে খাবার দিই ।'

* * * *

রমলা দেবী যখন ঘরে এলেন তখন থগেনবাবু চুপ করে বসে
আছেন ।

অন্তঃশীলা

‘এখনি খাবার দিচ্ছে। কি ভাবছেন?’

- ‘কি আর ভাবব? কেবল অত্যাশ্রয়ের স্তূপ বেড়েই যাচ্ছে—
পরের কথা বুঝিনি। কেবল নিজের সম্বন্ধেই ভেবে এসেছি।’

‘ক্ষতি কি?’

‘ক্ষতি যথেষ্টই হ’য়েছে। অবশ্য সেই জন্তই নিজের পায়ে
দাঁড়ান আমার পক্ষে সোজা হবে। আমার জগৎ কি জানেন,
এই মস্তিষ্কের মধ্যে। আমার বাইরে কি আছে জানি না, তার
একটা মোটা নাম দিয়েছি, সাধারণ মানুষ, জনগণ। ভিড়ের
হাত থেকে আমাকে পরিজ্ঞান পেতেই হবে। বোঝাতে পারলাম
কিনা জানি না।’

‘বুঝিয়ে কি আর হবে? আপনি তা হলে মাসীমার কাছে
যান!’

‘তাই যাব, এক একবার মনে হয় তাঁকে এই বয়সে বিরক্ত
করবার আমার কি অধিকার আছে? অনেক কষ্ট করেছেন,
আর কেন?’

‘আপনিত’ ছুংগের পশরা উজাড় করতে যাচ্ছেন না, আপনি
যাচ্ছেন নিরুদ্দেশে।’

‘তা বটে। কিন্তু কাশী গেলেই যে সংসারত্যাগী হ’ব তা
বলছি না। আমার একাধিক বন্ধু আশ্রমবাসী হয়েছেন—
তাঁদের কাজ চিঠিই লেখা, আরো কত কি! তাঁদের বন্ধুদের
সঙ্গে কথাবার্তা কইতে বড্ড ইচ্ছে হয় বেশ বুঝতে পারি।’

‘সকলেই কি এক? একবার তাঁদের দেখিয়ে দিন না, কি ভাবে

নমস্ত সামাজিক বৃত্তিগুলোকে সঙ্কুচিত করলেই প্রকৃত আত্মজ্ঞানী হওয়া যায়।’

‘আপনি ঠাট্টাই করুন আর বিদ্রূপই করুন, আমি নিশ্চয়ই বলতে পারি যে কালী গিয়ে আমি কাউকে চিঠি লিখব না। বন্ধু-টুকু আর আমার নেই। নিজে নিজে সুখী হতেই তাঁদের প্রত্যেকের শক্তি নিঃশেষিত হয়ে গিয়েছে, বাকি যতটুকু অবশিষ্ট আছে সেটুকু ব্যয় হচ্ছে নিজের সুখের বিজ্ঞাপন দিতে। আচ্ছা, আপনি বন্ধুত্বে বিশ্বাস করেন?’

‘করি।’

‘সাবিত্রীর সঙ্গে যা ছিল তা নয়। ওত’ কেবল এক তরফ। আমি বলছি অল্প রকমের বন্ধুত্ব। এই কি রকম জানেন? পেটেতে ধক্ ক’রে লাগে যার কথা ভাবতে গেলে—একেবারে নাড়িতে টান পড়ে। কি যে পাগলামী করছি! কৈ খাবার দেবেন না? আজ স্নান করব!’ ‘একবার করেছেন না? শরীর ভাল থাকলে আবার না হয় করুন না, মাথাটা ধুয়ে ফেলুন’।

‘আচ্ছা তাই ফেলি’।

‘বসুন না, একদিন না হয় দেবীই হল, বিশ্ব-ব্রহ্মাণ্ড উলটে যাবে না। কাল আপনার পুরানো সব বন্ধুদের কথা বলছিলেন বড় ভাল লাগছিল। বন্ধুত্ব হলে কি রকম হয়?’

‘ও সব ছেলেমানুষী কথা ভুলে যান্।’

‘সে কথা থাক্। বন্ধুত্ব হলে কি করতে হয়?’ ‘কি আবার করতে হয়! কি রকম হয়ে যায়! ঠিক বলা যায় না’।

‘বলা না গেলেও বন্ধুত্বটা আছে ত !’

- ‘নিশ্চয়। বন্ধুত্বটা দেহগত, বুকটা কেমন ধক্ ধক্ করে, যেন ধসে যায়। প্রেমে যেন একটু হাল্কা হাল্কা মনে হয়—ওটা যেন মাথার ব্যাপার। আমি অবশ্য শেষেরটি সম্বন্ধে অনভিজ্ঞ’

‘আপনার জ্ঞানেছি ছেলে বয়সে একজনের সঙ্গে খুব ভাব হয়েছিল’

‘সে-সব ছেড়ে দিন। মনে নেই সব কথা, করতেও চাই না। তবে বন্ধুত্বটা বইএর ধার করা কথা নয়—কারণ বড় কেউ বন্ধুত্ব নিয়ে নভেল নাটক লেখেনি।’ যে সব কবিতাও আছে সেগুলি ছন্দে লেখা দর্শন। বেশীর ভাগই কেন সব কবিতাই প্রেমের— তাই কবিতা আমার নতুন না হলে ভাল লাগে না।’

‘নতুন আর কি হবে বলুন ?’

‘নতুন বিষয়, নতুনভঙ্গী। পুরাতন বিষয় হলে ভঙ্গীটা নেহাৎ ভাল হওয়া চাই। সত্যি বলতে গেলে ছেলে মানুষ না হতে পারলে কবিতা লেখা যায় না, কবিতামাত্রই মানসিক অপরিপক্বতার নিদর্শন, তাই যৌবনে কবিতা ভাল লাগে। আর যেই ভাল লাগা, অমনি কবিতার চোখা-চোখা ভাষা মাথার মধ্যে উকুনের মত বাসা বাঁধা, তখন আর মাথা গ্যাড়া না করা ছাড়া উপায় নেই। কবিতাই প্রেম সৃষ্টি করেছে, নভেল নাটক সাহায্য করেছে কবিতাকে। যদি না স্বীকার করেন তা হলে বলব প্রেম অপরিণত সাহিত্যিকের বই বিক্রী করবার ফন্দী, ষড়যন্ত্র, চক্রান্ত। কিন্তু বন্ধুত্বকে সাহিত্যিক বাগে আনতে পারেন নি। কি করে

পারবেন ? ওটা যে সত্যকারের অভিজ্ঞতা, বাস্তব, খাটি জিনিষ, যেমন, যেমন—আপনি আমার সামনে রয়েছেন। কৈ কেউ আঁকুন দেখি আপনাকে ? সকলে বলবেন, বেশ একজন মহিলা বসে রয়েছেন—কিন্তু হ'ল না ঠিক—বাদ পড়ে গেল অনেকটা। আপনি আমার কথা শুনছেন, আমি কথা কইছি—এই মানবিক সম্বন্ধটি বর্ণনা থেকে বাদ পড়ল। এইটাই কিন্তু আসল, এই সম্পর্কেই আপনি আপনি, আমি আমি। কোন সাহিত্যিক এই চলিষ্ণু, গতিশীল, এই অশব্দীর অথচ বাস্তব সম্বন্ধরূপী সত্তাকে রূপ দিতে পারেন কখনও ? সে আঁকতে পারে আপনাকে আমাকে, টেবিলরূথকে, পৃথক, পৃথক করে...

‘ছবিতে কিন্তু এই সম্বন্ধটি ধরা পড়ে নাকি ? এ রকম যেন দেখেছি, টেবিলের ওপর ফল রয়েছে, সেই জন্তু টেবিল ও ফল ভিন্ন রকমেরই দেখাচ্ছে ?’

‘ধরা পড়ে, কিন্তু সত্য সম্বন্ধটি কিছুতেই পড়ে না ! বলছি আপনাকে—আপনি ত’ ইম্প্রেশনিষ্টদের কথা বলছেন ? তাঁদের চোখটি ক্যামেরার চোখ মানছি, তাঁরা আলোকে ছবির নায়ক করেছেন স্বীকার করছি, রঙের খেলা দেখানই তাঁদের উদ্দেশ্য স্বীকার করছি, তবু, তবু প্রত্যেক আর্টিষ্টই সত্যকারের সম্বন্ধটিকে মেরে ফেলে তবে নতুন সম্বন্ধ রচনা করে। নতুনটা হয়ত সত্যের চেয়ে বেশী মনোহারী, তাতে আসে যাচ্ছে না, কারণ বন্ধুত্বের চেয়ে বেশী মধুর আর কি হতে পারে ? প্রেম ? কিছুতেই না, প্রেমের পরিণতি বন্ধুত্ব, বন্ধুত্বের অবনতি প্রেমে।’

অন্তঃশীলা

‘সম্বন্ধের অস্তিত্ব মানেন দেখছি’ বলে রমলা দেবী একটু হাঁসলেন, খগেন বাবু ন্লা লক্ষ্য করেই তাঁর চিন্তাধারার অনুসরণ করলেন।

‘আটের মূলধন স্থিতি, প্রেমেরও তাই, সেই জন্তু আট ও প্রেমে অত মিল! বন্ধুত্ব হয় আছে, না হয় নেই, নতুন কিছুতে পরিণতও হয় না—ভারি মজার ব্যাপার! বড় খাটি জিনিষ, দেহটা যেমন। এদের নিয়ে আলোচনা করা যায় না, অতএব সাহিত্যও করা যায় না।’

‘খুব শুদ্ধ?’

‘মাতৃস্নেহের চেয়ে। একটা ছেলে মারা গেলে মা অত ছেলে চায়, নতুন ছেলের ওপর মায়া পড়ে, কিন্তু বন্ধু মারা গেলে আর একটা বন্ধু কাড়তে ইচ্ছে হয় না। বন্ধু গেল, সূর্য্য নিবে গেল... আপনি কি ভাবছেন? হল কি? কি সব বাজে বকুছি। বন্ধুত্বটা প্রেমের চেয়ে বড় মনে হয়। অবশ্য সবই আমার ‘মনে হয়’, মনে হওয়া ছাড়া আর কি আছে বলুন? সবই আমার মনে’

‘কেন বন্ধুত্ব? সেটা ত মনে নয়’

‘তা বোধ হয় না, সেই জন্তুই ত’ শুদ্ধ। ওলট পালট কথা হল, নয়? তা হোক গে! তার ভেতর মিল একটা কোথাও আছে, আপনি বুঝে নেবেন।

‘মন দিয়েই বুঝছেন মনের অতিরিক্ত বন্ধুত্ব?’

‘তা ছাড়া উপায় কি?’

‘স্বৈচ্ছায় রাজ্যত্যাগের মহিমা আছে’

‘মহিমা অর্জনে ব্যগ্র নই, কিন্তু, রামচন্দ্র বনবাসে চললেন।’ •

‘উপমাটি খাটল না’

‘কেন?’

‘এই...লক্ষণের অভাব। এইবার মাথা ধুয়ে থাকেন চলুন, দেবী হয়ে গেল। কবে কাশী যাচ্ছেন?’

‘যেদিন ছুটি পাব’

‘ছুটি কিসের?’ ‘দরকারি কাজ থেকে—চিঠিতে যা লিখেছিলেন।’

‘শ্রাদ্ধের প্রয়োজন নেই, পুরোহিত ঠাকুর নিজেই করে নেবেন, পঞ্চাশ টাকা চাই’

‘হিন্দুধর্ম বিপদেও ফেলে, আবার উদ্ধারও করে। চলুন’

* * * *

খাবার পর বসবার ঘরে এসে রমলা দেবী বলেন, ‘ঠাট্টা করেছি বলে রাগ করবেন না’

‘রাগ করব কেন? নিজেই যদি পরস্পর বিরোধী মন্তব্য করি, আপনার দেখিয়ে দেবার অধিকার আছে নিশ্চয়।’

‘অধিকার আবার কি! সম্পর্ক যে রাখতে চায় না তার ওপর অধিকারও নেই’

‘বন্ধুদের অধিকার’ আছে নিশ্চয়, নিস্পর্কিত হয়ে জীবন কাটান যায় কিনা পরীক্ষা করছি মাত্র; হয়ত পরীক্ষায় উত্তীর্ণ হবে না।’

অন্তঃশীলা

‘নিশ্চয়ই পরীক্ষা করবেন, চেষ্টা করলে কি না হয়। তবে কিসের জন্ত চেষ্টা?’

‘জন্ত আবার কি? ভিড়ের সঙ্গে মানুষের মতন মানুষের পার্থক্য খোঁজা, এই চেষ্টা। যে মানুষ সে নিজের ওপর দাবী করে, নিজের কাছে চায়, যে সাধারণ সে চায় পরের কাছে। সেই জন্ত অবলম্বনহীনতাই যোগ্যতার কঠিনতম পরীক্ষা। ধ্যানী ও যোগীরাই একমাত্র মানুষ, বাকী সব canaille—সাধারণ। আমার সাধারণ থেকে স্বতন্ত্র হবার প্রয়োজন আছে, অধিকার আছে।’

‘শক্তি?’ ‘পরে দেখা যাবে। শক্তি নিয়ে জন্মায় না, ঘসুতে ঘসতে হয়। চেষ্টা করব না, আত্মসংযম করব না, গড্ডলিকা প্রবাহে ভেসে যাব যে!’

‘কোন সম্বন্ধই রাখবেন না? এই যে বল্লেন, ছবিতে...’

‘বাজে কথা বলেছি...ও রকম মুখ দিয়ে বেরিয়ে যায়, ধরতে নেই সব কথা’

‘একটিও বাজে মনে হয়নি আমার। বন্ধুদের খবর দেবেন না?’

‘না। আগেই বলেছি, দেখাব কি করে কন্ঠবৃত্তি অবলম্বন করতে হয়। নেহাৎ না পারি...’

‘মুন্সুদ বাচ্ছে? লোকটা কি, কাজের? যদি কিছু না মনে করেন তা হলে চিন্তামণিকে সঙ্গে নিয়ে থাকার অনুরোধ করতে

পারি কি ? চিন্তা সাবিজীকে বড়ই ভালবাসত, সাবিজীরও চিন্তাকে পছন্দ হয়েছিল, মুকুন্দ না হয় বাড়ী 'আগলাক্' •

‘না, না, সে হয় না, বেচারী মাসীমার কাছে মালুম, যাকর নাম শুনে অবধি কি খুশী ! বাড়িটা আপনি এখান থেকে যা পারেন তাই দেখবেন । চাবি আপনার কাছেই থাকবে । দরকার হয় যদি কিছু—আচ্ছা, আমি গিয়েই আপনাকে পত্র দেবো, যদি বইটাই পাঠাবার প্রয়োজন হয় সৃজনকে দিয়েই পাঠাবেন । চিঠির উত্তর দেবেন ত ? আমিও অবশ্য নিয়মিত চিঠি লিখতে পারিনা’

‘দরকার হলে লিখবেন ! কখন’ যাবেন ? যাবার আগে যেন খবর পাই ।’

‘ভাবছি তা হলে কালই যাই’

‘গোছগাছের কি হবে ?’ ‘ঐ ত বিপদ ! মুকুন্দ যা বুদ্ধিমান ! কোথায় কি আছে ছাই জানিও না, কখনও জানবার ইচ্ছেও ছিল না’

‘আমি জানি’

‘সেত’ খুবই ভাল হয়—যদি অনুগ্রহ করে, কষ্ট যদি না হয়... যদি একবার দেখিয়ে দেন...ও কাজ আপনাদেরই শোভা পায় । সৃজনকে না হয় নিয়ে যাবেন ।’ রমলা দেবী সম্মতি জ্ঞাপন করলেন ।

বেলা একটার সময় রমলা দেবীর প্যারাসল মাথায় দিয়ে নীচে এলেন । দরজার গোড়ায় মনে হল চাএর নিমন্ত্রণ করাটা ভদ্রতা, কিন্তু এ সময় নিমন্ত্রণ কেউ প্রত্যাশাও করে না ; তা ছাড়া

অন্তঃশীলা

মুকুন্দটা একেবারেই অকর্মণ্য। ফিরে দাঁড়িয়ে বস্লে, ‘প্যারাসলটা
থাক্, রোদ্দুর নেই, বিকেলে ঐখানেই চা খাবেন’

রমলা দেবী রেলিংএর ওপর ঝুঁকে বস্লে, ‘যাবো, চাএর
প্রয়োজন নেই, প্যারাসলটা নিয়েই যান, আচ্ছা, থাক্’ রমলা দেবী
নীচে এসে প্যারাসলটা নিলেন।

পথে খগেন বাবু বইএর দোকানে প্রবেশ করলেন। বেনারস
যেতে হবে, সেখানে প্যাড়া পাওয়া যায়, বই পাওয়া যায় না।
এই দোকানটির প্রত্যেক আলমারির সঙ্গে তাঁর পয়িচয় ঘনিষ্ঠ।
নতুন নতুন বই সর্বদাই বিদেশ থেকে আসছে, মালিক ও
কর্মচারীরা সাহায্য করতে সদাই প্রস্তুত, যতক্ষণ ইচ্ছে বই ঘাঁটা
যায়, কেনাবার কোন অভদ্র তাগিদ নেই, মাঝে মাঝে চা
পাওয়া যায়, মিঠে পানের দোনাও আসে। দোকানে প্রবেশ
করতেই ছোট বাবু বস্লে, ‘এত রোদ্দুরে, এই দুপুরে! ভেতরে
আসুন’ দোকানের এককোনে একটি ছোট্ট ঘর, খগেন বাবু
সেইখানে গিয়ে বস্লে। খবরের কাগজে তা হলে বেশী উচ্চ-
বাচ্য করেনি। এঁরা খুব ভদ্র, হয়ত জেনে শুনেও উল্লেখ
করলেন না। ছোট বাবু এক গাদা বই এনে টেবিলের ওপর
রাখলেন। সিগারেট ধরাতে ধরাতে খগেন বাবু জিজ্ঞাসা
করলেন, ‘সরবতের দোকানে অর্ডার দিলে বাড়িতে দিয়ে আসে?’
‘নিশ্চয়ই, কেন?’ ওরে খগেন বাবুর জষ্ঠ্য এক গেলাস ঘোলের
সরবৎ নিয়ে আয়, আর দু দোনা মিটে থিলি’ ‘না, না তা
বলছি না।’ ‘খান না’ ‘আনান তা হলে, ঘোলের সরবতে গা

ঘিন্ ঘিন্ করে’ ‘ওরে, গেলাস ধুয়ে নিয়ে যা’ ‘যে সে নোকে তৈরী করে নোংরা আঙ্গুল দিয়ে, বাড়িতেও...’ খগেন বাবু, বাড়ীতেও ঘোলের সরবৎ খেতেন না, আঙ্গুল দিয়ে তোলু নাথনেও তাঁর আপত্তি ছিল, মেয়েদের হাত বড় নোংরা। সাবিত্রী একবার ঘোলের সরবতে কি একটা উগ্র গন্ধ দেয়, বড় তেতে। হয়, খগেন বাবু খেতে পারেন নি, মান অভিমান, সেই থেকে ঘোল ত্যাগ, ডাবে প্রেম। ‘একটা ডাব আনতেই বলুন’ খগেন বাবু বই ঘাঁটতে লাগলেন।

বিদেশী নভেল, বেশীরা ভাগই তর্জমা। অনুবাদ পড়তে তাঁর ভাল লাগত না; প্রত্যেক কথার প্রত্যেক বাক্যের শিকড় থাকে, অনুবাদক অপটু মালির মতন গাছ উপড়ে ফেলে, শিকড়-সমেত তুলতে পারেনা, ছিঁড়ে যায়, তাই টবে বসালেই যায় মরে। মেয়েদের কথারও শেকড় আছে, সাবিত্রীরও ছিল, তিনি তুলতে গিয়ে শিকড় ছিঁড়ে ফেলতেন; ‘তুমি এই বলছ ত?’ ‘না বলিনি, তুমি আমার কথা বুঝবে না।’ এক একজন অনুবাদককে মালি বলতেও ইচ্ছে হয় না, বাছুর বলেই হয়। স্টু মনুক্রিফের ব্যাপারই আলাদা, কেমন করে ফ্রেন্সের ঐ গোলক ধাঁধার মধ্যে প্রবেশ করলেন কে জানে? রচনাভঙ্গীর ওপর বাঙালী সাহিত্যিকের স্নেহযত্ন যে কমে আসছে তার কারণও ঐ অনুবাদ পড়ার অভ্যাস। নভেল পড়া আর চলেনা। এই যে! বটিসেলীর জীবনীটা সস্তায় বেরিয়েছে, কেনই বা আগে কেনা! অধৈর্য্য, সকলের আগে দামী বই কিনে পড়েছি—এই

অন্তঃশীলা

সংবাদ দেবার মধ্যে একটা মোহ ও দাস্তিকতা আছে। বই পড়াতেও রেবারেবি, ঘোড়দৌড়। কোলকাতায় থাকলেই সর্বাগ্রে কিছু করবার ইচ্ছা হয়—আর ভাল লাগেনা। বিলেতী প্রকাশকরা ভারী চাক্ষুঃ—গোড়ায় ৩০, দু বছর পরে ১০! জাপানীরা ছবি ও কবিতা সম্বন্ধে লেখে ভাল—বটিসেলী ও ইটালীয়ান প্রিমিটিভদের ছবি জাপানীরা বোঝে ভাল, রেখার কম্পন তাদের প্রাণে অতি সহজেই স্পন্দিত হয়। বেরেন্সন্‌এর বইটা নিতে হবে—সত্যকারের সমালোচক। নতুন কবিদের কবিতা—এদের জগৎ থেকে সাধারণে বহিষ্কৃত এই লোকে বলে, তা নয়, প্রত্যেক আধুনিক নিজের গঁড়ের মধ্যে কেলা বেঁধে বসে আছে। সে কি করবে? পৃথিবীটাই বিগড়ে গিয়েছে, তাই মর্গ্যান লিউইস্কে হল্যাণ্ডের এক কেলায় পুরেছেন। এটা কি? পাউইস্ নির্জনতার গুণকীর্ত্তণ করেছেন। মন্দ নয়, সাহেবরা হল কি? ভিড় থেকে পালাচ্ছে—কিন্তু কোথায় পালাচ্ছে? সে দেশের খবর পেতে হলে পড়তে হয় পুরানো বই। ‘ছোট বাবু, এটাও দিন; প্যাস্ কালের পেন্সীজ সস্তায় বেরিয়েছে?’ ‘হাঁ, অভরিম্যান সিরিজে, দিই।’ প্যাসকালের তুলনায় পাউইস্ পান্‌সে। ‘গ্যাসেটের ‘জনসাধারণের উপদ্রব’; বইটার খুব স্মৃতিয়াতি দেখ ছিলাম, দিনত; কোন ভাল এডিশন্‌ আছে মার্কাস অরেলিয়াসের?’ ছোট বাবু প্যাস্ক্যাল, অরেলিয়াস ও গ্যাসেট আনলেন। রাশিয়া-সংক্রান্ত নতুন খবর আর কি থাকবে এ সব বইএ? ও দেশে জন-সাধারণকে স্বর্গে তোলা হয়েছে, ভাল লাগেনা।

সাহিত্যও তাই হচ্ছে না। সাহিত্যের জগৎ চাই অবসর, অবসরের জগৎ বড়লোকের দল থাকতে বাধ্য, যারা নিকামভাবে চিন্তা করে যাবে, যাদেরকে কাজের জগতে নামতে বলা সমাজের পক্ষে মূর্থতা। প্রোগ্রাম বেঁধে প্রোপাগান্ডা করে কখনও সাহিত্য হয়! রুশিয়ান ফিল্মের বই দু'একখানা নিলে হয়, ফিল্ম করেছে নতুন ধরণের। 'সিনেমাট' আর ফিল্মের নতুন বইটা নেওয়া যাক। ছোট বাবু এপিক্টেটাস, সেনেকা, মন্টেন, আর গ্যোটের নিব্বাস এনে টেবিলে রাখলেন—মরোক্কো চামড়ার চমৎকার বাদান, মোড়া যায়। বইএর পাতার ও চামড়ার গন্ধ ও স্পর্শ খগেন বাবুকে অভিভূত করত। ছোট খাট বই, রং-বে-রংএর বাদাই, পকেটের মধ্যে আপত্তি না জানিয়ে চলে যায়, গায়ে হাত বোলাতে ইচ্ছা করে, নিজের গা শির শির করে ওঠে, কাঁটা দেয়। প্রত্যেক অক্ষর স্পষ্ট, ভুল নেই কোথাও। মাথার বালিশের পাশে চুপটি করে নিঃসাড়ে শুয়ে থাকে, খোলো খুলবে, না খোলো মুখ বন্ধই রইল, কোন মান অভিমান নেই, আদর-কাড়ান নেই। সাবিত্রী ঘুমুত পাশ ফিরে, বেশ দেখাত টেবিলল্যাম্পের আলোয়; শোবার সময় চুল আঁচড়ে ঢিলে খোঁপা বাঁধত, মুখে দিত হাইড্রজেন পেরক্সাইড্ আর গ্লিসারিন্; শুত কুকুড়ে সজ্জিত হয়ে, আলগোছে, বিছানায় দাগ পর্যন্ত পড়ত না, হাল্কা ছিঁদ, এই বটিসেলীর অদ্বিত মেয়ের মতন, যারা সব হাওয়ায় উড়ছে ওপর দিকে, মাটিতে পা দিচ্ছে যেন করুণা করে, যারা মাধ্যাকর্ষণ শক্তিকে কাজ করবার

অন্তঃশীলা

কোন স্বেযোগই দেয় না। তা নয়, যত সব নিতম্বিনীর দল !
সাধে কি গোড়ীয় শ্রীতি হীনরুচির পরিচায়ক ! উদ্ধগতি না
হলে আত্মার সদগতি হয় না। রমলা দেবী কি করে নিজেকে
হালুকা রাখলেন কে জানে ! নিশ্চয়ই গরম জলে লেব, ভিনিগার
খান, মিষ্টি খান না। তাইত, তাঁর জ্ঞা কি আনান যায় !
স্যাণ্ডউইচ্ করলে মন্দ হয় না। একবার রমলা দেবী
চীনেবাদামের স্যাণ্ডউইচ করে পাঠিয়েছিলেন, চমৎকার লেগে-
ছিল, পরের দিন সাবিত্রী করতে যায়, হয়নি। অল্পকরণ ;
সাবিত্রী ছিল উৎসবমূর্তি, মন্দিরভাস্তরে যে মূর্তি বিরাড
করত সেটি রমলা দেবীর।

খগেন বাবুর নির্বাচিত বইগুলি একজন কর্মচারী প্যাকেটে
বঁধে দিলেন। সেটি নিয়ে, খাতায় সুই করে খগেন বাবু
বেরিষে এলেন। বাইরে রোদ্দুর না। ঝাঁ করছে। কলেজ
স্কোয়ারের ঘড়িতে তিনটে। গ্রাশতাল হোটেলে স্যাণ্ডউইচের
অর্ডার দিয়ে, মনোহারি দোকানে একটিন বিলেতী বিস্কুট ও
মাখন কিনলেন—ছারিকের দোকান থেকে ভাল সিঙ্গাড়া
আনাতেই চলবে। তাড়াতাড়ি বাড়িতে প্রবেশ করেই মুকুন্দকে
বল্লেন, ‘যাও মুকুন্দ, এখনি ছারিক ঘোষের দোকান থেকে
৮ খানা সিঙ্গাড়া, ৮ খানা খাস্তার কচুরী ও আধসের টাক,
ঝুরিভাজা কি ডালমুট নিয়ে এস। যাও দেবী কোরো না—
কাশী বাওয়াই ঠিক। তোমার খুড়ো কোথায় গেলেন ? তাঁকে
চা-এর যোগাড় করতে বল। ব্যাসে যাও, ব্যাসে এস, দেবী

কোরো না, চারটের মধ্যে আনা চাই। হাঁ করে দাঁড়িয়ে
 আছিস কেন? যাঃ' মুকুন্দ চলে যাবার পর ঠাকুরকে ঠোঙ
 দরাতে বল্লেন। তাও ত' বটে! সবুৎ কে করচে? অউর
 দেওয়া হল না! 'ঠাকুর, এক কাজ করতে পার? গোল-
 দিঘির ধারে ভাল সবুতের দোকান থেকে সেরপানেক ঘোলের
 সবুৎ নিয়ে এস, বড় কাঁচের জাগটা খুঁজে নিয়ে যাও' বাবু,
 নিজেই করব? খানিকটা দই নিয়ে আসি, নীচে কল রয়েছে,
 ওপর থেকে ভ্যানিলা কি অন্য কিছু সেট দেবেন। দেখুন
 না, আমার হাতে খেয়ে, আমাদের সেজ বাবু আর কাকুর
 হাতে...' 'আচ্ছা, তাই নিয়ে এস' 'কিছু বিলেতী খাবার করব?'
 'দেশী বিলেতীর দরকার নেই, মুকুন্দ আনতে গিয়েছে, তুমি
 জ্ঞান?' 'আপনাদের আশীর্বাদে পাপমুখ আর কি বলব!
 মাঝে কি বাবুরা পঁচিশ টাকা করে দিতেন! আর স্ত্রীর জন্ত
 পূজার সময় সাড়ি...' 'ও সব কথা পরে হবে। চাই কর,
 দেখব কেমন কর' 'কখন চাই বাবু' 'চারটের' 'বাংলা, না
 ইংরেজী? একটা যদি রান্নাঘরের জন্ত টাইমপীস্ দেন্' 'এখন
 যাও' ঠাকুর চলে গেল। পঁচিশ টাকা! ফাজিল! একেবারে
 'অ্যামেরিকান! মুকুন্দ গলায় ছুরী দিতে পারে দেখছি,
 নিশ্চয়ই রফা হয়েছে! খগেন বাবু প্যাকেট খুললেন। প্রথমেই
 গ্যাসেট রয়েছে। সাধারণ মনের দুটি নিদর্শন তিনি দেখাচ্ছেন,
 the free expansion of his vital desires, and there-
 fore, of his personality; and his radical ingrati-

অন্তঃশীলা

tude towards all that has made possible the ease of his existence' জৈবিক কামনা-পূরণের অবাধ সুবিধা চাঁপিয়া এবং অকৃতজ্ঞতাই হল আত্মের ছেলের মনোভাব। বাস্তবিক, সাধারণ মানুষ বড় আবদারে হয়েছে—চায় কি? রাস্তায় রাস্তায় কীর্তন গেয়ে বেড়াবে আর ভদ্রলোককে ফুটপাথে হাঁটতে দেবে না? ট্রামে ট্রেনে চড়ে পশ্চিমের বৈজ্ঞানিক বর্বরতার নিন্দা করবে? একটা অধ্যায় Noble Life and Common Life, or Effort and Inertia—These are the select men, the nobles, the only ones who are active and not merely reactive, for whom life is a perpetual striving, an incessant course of training. Training = askesis. These are the ascetics—এই ত' ঠিক! সাধনা করতেই হবে, শ্রোতের বিপক্ষে সাঁতার কাটতেই হবে, নচেৎ গা ভাসান ভিড়ে, ফ্যাসানে—তাতে আভিজাত্য নষ্ট হয়। এই গ্যাসেটই না স্পেনের নূতন দলের নেতা? লোকটা কি বলছে দেখতে হবে। personality না লিখে individuality লিখলে ভান করতেন। দর্শনের অধ্যাপক, লিখছেন সমাজতত্ত্ব, ভালই হবে বইটা। স্পেনের একটা আভিজাত্যের দম্ভ আছে, ভারী অহঙ্কারী জাত। কথায় কথায় ছুরী চালায়। কিন্তু এদের আভিজাত্য যুরোপের নয়, আফ্রিকার। এ জাতের রক্ত বিন্দুতে মরুভূমির ধূলিকণা প্রবেশ করেছে, এদেশের আবহাওয়াতে

মিশেছে সাহারার আঁধি, মেজাজে এসেছে মূরের তেজ। ধাত
পিত্তপ্রধান নয়, বায়ুপ্রধান। নিষ্ঠুর ও গম্ভীর; এদের ভাল
বাসায় নিষ্ঠুরতার খাদ থাকে, এদের গান্ধিব্যো রয়েছে
রোখামি। প্রত্যেক স্প্যানিয়ার্ড, ক্যাস্টিলিয়ান একদম একাকী,
ডনকুইক্সটের মতন। আমরা হাঁসি তার সম্পর্কহীন,
নিঃসংশ্রবস্বাতন্ত্র্য দেখে, কিন্তু স্প্যানিয়ার্ডের কাছে ডন একজন
অতিমানব, মহাত্মা, প্রতিভূ। লোকে হাঁসে হাঁসুক্কে, রমলা
দেবী যেমন না বুঝে ঠাট্টা করছিলেন। না বুঝে কি? বোধ
হয় বুঝেছিলেন, তবু অত্যাগোপনের প্রচেষ্টা, কেন? মেয়ে
মানুষ বলে? মেয়েরা বড়ই গতানুগতিক, রক্ষণশীলতার
পক্ষপাতী; তাই ব্যতিক্রম সহ্য করতে পারেন না। লোকে
হাঁসুক্কে, মেয়েরা যত পারেন আপত্তি করুন, কিন্তু ডন কুইক্
সটের জগুই স্পেন এখনও টিকে আছে, বর্তমান স্পেনে অন্য
কোন মহাত্মা নেই, এই কাল্পনিক বীরেরই পূজা এখনও চলেছে :
একটু খ্যাপামী ভাল। মুকুন্দ যেন স্যাঞ্ঝো পাঞ্জা! কিন্তু...
স্পেনের মেয়েদের কাল চোখ, কাল ভুরু, দাঁড়ায় কোমরে
হাত দিয়ে, দেহের গঠন পুরুষ্ট, বেশী বাঁকা, অথচ যেন
মিলিটারী মেয়ে, নিল্লঙ্জ ১০০০মোটে সাড়ে তিনটে ঘড়িতে
দম দেওয়া হয়নি যথাসময়ে—যায় মস্তুরগতিতে—ডন কুইক্সটের
ঘোড়ার মতন, সাঞ্ঝো পাঞ্জার মতন। ডন রোগা ছিলেন, তিনি
হাঁটতেন কেমন? অত আন্তে চলা পোষায় না, নতুন ঘড়ি
কিনতে হবে। মুকুন্দকে নিয়ে যেতেই হবে—চিন্তামনিকে নিয়ে

অন্তঃশীল।

যাওয়াই যায় না—রমলা দেবীর চাকর—বন্বে না। কিন্তু মুকুন্দ সত্যি গায়ে পড়া। ওর কাছে আবার কোথায় খেয়েছি, ক্লেশ খাইনি কৈফিয়ৎ দিতে হবে! ছাই দিতে হবে! বা হুকুম করব তাই করতে হবে, আব্দেদে হয়ে উঠেছেন, ভাবছেন, না আর নেই বাড়ীর গিন্নী হয়েছেন, পঁচিশ টাকার বামুন এনেছেন! ঠাকুরটা ফাজিল। ‘বাবু, দই এনেছি, একটু সেন্ট্ দিতে পারেন।’ খগেন বাবু উঠে কাঁচের আলমারী থেকে ফলের নির্ঘাস ও চাএর ভাল বাসন বার করলেন। ‘সরবৎ আনলে নিজেসাই গন্ধ দিয়ে নেবো’খন। এখন যাও, মুকুন্দ আসে নি?’ ‘আজ্ঞে না, আসতে একটু দেরী হবেই।’ এতক্ষণেও চারটে বাজে নি! ততক্ষণ বই ঘাঁটা দাক্।

গলির মোড়ে মোটরের হর্ণ বাজল, খগেন বাবু নীচে গেলেন। এই হর্ণ শুনে নামতে গিয়ে একদিন সাবিত্রী হোঁচট খেয়ে প্রায় পড়েই গিয়েছিল, গোপিক, কৃষ্ণের বাঁশী, লেসবীয়ান লভ...কত কি মস্তব্য তিনি প্রকাশ করেছিলেন। গাড়ি এসে গলির সামনে থামল। সামনে চিন্তামনি। খগেন বাবুই দরজা খুলে দিলেন। রমলা দেবী হাঁসিমুখে বল্লেন, ‘আগেই এলাম, এ বাড়ীতে আগি—’ ‘তা আর কি করা যায় বলুন... মাস্তবে’ রমলা দেবী ওপরে এলেন, ওঠবার সময় পায়ে গোড়ালির ওপর পর্য্যন্ত দেখা দাচ্ছিল, খগেনবাবু চোখ কিরিয়ে ঠাকুরকে ইসারা করলেন জল চড়াতে—দেখতে পেলেন চিন্তামনি তোয়ালে ঢাকা একটা বড় কাচের পাত্র নিয়ে ভাঁড়ার ঘরে ঢুকছে।

‘এই নিন্ কুসান্টা’

‘হুপুৱে ঘুমুলেন ?’

‘না’

ঘরে দু’জন, না তিনজন ? দুজনে যখন বাক্যালাপ করে তখন অল্পস্থিত তৃতীয় ব্যক্তির দেহহীন অস্তিত্ব বাক্যবিজ্ঞাসের ব্যাকরণ হয়ে ওঠে। কেবল মৌখিক ভাষারই নয়, অব্যক্ত সম্বন্ধের গোপন রীতিও সেই অনস্তিত্বের দ্বারা নিরূপিত হয়। খগেনবাবু ও রমলা দেবীর মধ্যে বাক্যহীন ব্যবধান জীবন্ত স্মৃতির দ্বারা ভরে গেল। খগেনবাবুর অস্বস্তি হচ্ছিল, রমলা দেবী নীরবে বসে রইলেন।

‘স্বজনবাবু এলেন না ?’

‘না’

‘কাজ আছে নিশ্চয় ?’ ‘দেখা হয়নি, আসেনি’

‘এখানে কতবার এসেছেন...’

রমলা দেবী চোখ উচু করলেন, তাঁর দৃষ্টি খগেনবাবুর চোখ যাস্ত উঠল না।

‘বসতে অস্ববিধে হচ্ছে ?’

‘মোটাই না’

‘চা দিতে বলি ?’

‘থাক’

খানিকক্ষণ নীরব থাকার পর রমলা দেবী প্রশ্ন করলেন, ‘ঘর রিফার হয়নি ?’ ‘মুকুন্দ নিশ্চয়ই করেছে, খুব কাজ করেছে, ওকে নিয়ে যেতেই হবে’

অন্তঃশীলা

‘কবে যাওয়া ঠিক করলেন ?’

‘এখনও ঠিক করিনি, কবে যাই বলুন দেখি ?’

‘যেদিন আপনার সুবিধে হয়’

‘রোজই সুবিধে’

‘দিন ক্ষণ মানেন না বুঝি ?’

‘পাঁজি পুথি মানি না, তবে মনকে যাবার জ্ঞাত তৈরী, উদ্গত করতে হয় এখনও ; ভীষণ কুঁড়ে আমি’

‘আপনি ত’ মৈত্রী’

‘হাঁ অনেকটা, তবে কাশীতে গিয়ে মাসীমাকে বিরক্ত করতে মন চাচ্ছে না, কাশীতে বড় ভিড়’

‘দ্বীপ আর কোথায় পাচ্ছেন ?’

‘সেখানেও ফ্রাইডে জুটবে’

‘জুটিয়ে নিজেই নিয়ে যাচ্ছেন’

‘নিজেরই দরকারে । স্বজন এলেন না কেন ?’

‘বলুন ত দেখা হয়নি, চিন্তামণিকে আনতে পাঠাব ? একটা চিঠি লিখে দিন’ ‘ভারী অগ্নায় হয়ে গিয়েছে চিঠি দেওয়া কিংবা নিজে যাওয়াই উচিত ছিল, ঠিকানা জানি না, আপনার হাতে দিলে অবশ্য হোত’

‘অগ্নায় হয় নি’

‘হাসলেন কেন ?’

‘কই, হাসিনি ত ?’

‘তা হলে ঠাট্টা করলেন’

‘কি ঠাট্টা?’

‘আপনি বোধ হয় ভাবছেন, আমি একলা থাকতে পারি না, অতএব সামাজিক, ভদ্রতা জানি ন্দ, অতএব অ-সামাজিক। তা হলে একলা থাকার চেষ্টা বুঝা...নয়?’

‘ওসব কথা মনেও ওঠে নি’

‘মনেও ওঠেনি, কিন্তু নীচের স্তরে রয়েছে’

‘আপনি বড় বেশী তলিয়ে দেখেন’

‘প্রবাহ-অন্তঃশীলা, ওপরে বৃদ্ধ বৃদ্ধ, তারই মাম ভাষা, হাঁসি, চাহনি’

‘ওপরে বালি’

‘তাও হয়, যেমন ফল্গু নদী’

‘কিন্তু আমি অত গভীর নই’

‘সে আমি বুঝি’

‘বুঝুন, কিন্তু ভুল বুঝবেন না’

‘তাতেই যদি সন্তোষ পাই, তাই বুঝব’

‘বেশ’

‘তবু আপনি ‘বেশ’ বলেন, সাবিত্রী তর্ক চালাত’

রমলা দেবী খগেনবাবুর দিকে চাইতে তিনি কথাটি ঘুরিয়ে
| দিলেন, ‘সন্তোষ পাওয়া নিয়ে কথা’

‘সাধনায় সন্তোষ আছে?’

‘আছে, নিশ্চয়ই আছে’

‘সাধনা মানে কি?’

হাস্তশীল।

‘অস্বাভাবিকতাকে স্বাভাবিক কখন নামই সাধনা। আজকের
‘সাধনা, কালকার অভ্যাস’

‘কি জানি! কষ্টটুকু একেই বায়’

‘সংহত অবস্থা কি কৃত্রিম অবস্থা?’

‘জানি না’

‘বলুন না। আমি জানি আপনি জানেন, তবু কেন বলুন
না? বলুন’

‘অভ্যাস হয়ে গেলে সহজ, না হওয়া পর্যন্ত কৃত্রিম। কিন্তু
রাস্তার শেষ নেই যে’

‘আপনি কি ভাবেন যে আমাদের সকলের কেবল চলতেই
হবে, কোথাও কখনও নিঃশ্বাস ফেলবার বিশ্রামের স্থান নেই?’

‘তাই মনে হয়, বিশ্রামের লোভে ও আশ্বস্তিতে মন ফাঁকি দিতে
শেখে, আপনি বিদ্বান আপনি বলুন না’

‘অন্তরোধ করছি অপমান করবেন না। এখানে বিচ্ছেদ খুঁট
পায় না, বিচার অতিরিক্ত কিছু আছে কিনা তাও জানি না।
শুনেছি মেয়েদের বোধি আছে এবং সেটা বুদ্ধির ওপর। আমি
তারই সন্ধানী—সন্দেহ করি যে আপনার মধ্যে বোধির সন্ধান
পাব। অতঃপর করে অসঙ্কোচে মনের ভাব ব্যক্ত করুন। অত
লজ্জা কিসের? মেয়েরা গম্ভীর কথাবার্তা কইতে পারে না, কিংবা
তাদের কওয়া উচিত নয় এ ধারণা প্রচার করতে ব্যর্থ কেন?
আপনি বলুন, কখনও কোথাও কি শাস্তি নেই, চলতেই হবে
আমাদেরকে?’

‘সকলের বেলা কি হয় জানি না’

‘বেশ মেয়েদের বেলায় কি হয় বলুন’

‘মেয়েদের ? ভাগ্য তাদেরকে হিড় হিড় করে টেনে নিয়ে যাচ্ছে—তাই পট পরিবর্তন মুহূর্তে মুহূর্তে, কাল যে ছিল কিশোরী আজ সে হল নববধূ, কালকার নববধূ আজকার...মা, তারপর বিধবা, পিতামহী, অনাবশ্যক, জঞ্জাল। আমরাই সত্যকারের বারম্বার দেখি, আমাদের সংস্কার সাজান নয়, অভিজ্ঞতা দিয়ে মালা গাঁথার আমাদের সময় নেই, সুবিধে নেই। আমাদের স্মৃতি-শক্তির স্মৃতিশক্তি করেন অনেকে, কিন্তু আমাদের স্মৃতি-শক্তি নেই, তাই আমাদের আক্ষেপ নেই’

‘বিশ্বাস হয় না’

‘আছে, তবে অল্প ধরণের’

‘কি রকম ?’

‘বিধাতা চূলের মুঠি ধরে আমাদেরকে নিয়ে যাচ্ছেন, তিনি খানলেন ক্লান্তিতে, আমরা তৎক্ষণাৎ উঠে তাঁরই জন্ত জল এনে দিলাম, তাঁকে বীজন করতে লাগলাম, তাইতেই কত স্থপ, ভাবলাম এইত’ সুখের জীবন...কিন্তু আবার টান স্ক্রু ন’

‘বিধাতা টানছেন ?’

‘ভাগ্য-বিধাতা’

‘কে ?’

রমলা দেবী চোখ নামিয়ে নিলেন। যেন বিষাদের প্রতিমূর্তি,

অন্তঃশীলা

সমগ্র বিশ্বের দুঃখ তাঁর সকল অঙ্গে ছায়াপাত করেছে। Saint Gaudensএর সেই ছবি !

‘ভাগ্য বিধাতা মানুষের তৈরী। না তৈরী করলেই হল’
‘তৈরী করতেই হয়’

‘কেন ? কি প্রয়োজন আছে ? এতটা না ভাবলেই চলে’

‘আপনার মুখে না ভাবার উপদেশ শোভা পায় না’ .

‘সব সময় একই মত প্রকাশ করবার বাধ্য বাধকতা মানি না ;
যা মনে হচ্ছে তাই বলছি। আমার মনে হয়, আপনারা বিধানকেও
মুষ্টিমান করতে চান, তাই ভাগ্য-বিধাতার প্রয়োজন আপনাদের।
মানুষ না হলে চলে না আপনাদের, তাই বিধাতাও ‘মানুষ হয়ে
কাজ করেন বিধাতা’

‘তাই হবে !’

‘আমি নিয়ম মানতে প্রস্তুত, নিয়ম-কর্তা মানতে প্রস্তুত নই’।

‘আমি নিয়ম জানি না, নিয়তির উপলক্ষ্যকে চিনতে পারি’।

‘তা হলে একলা থাকেন কেন ?’ প্রশ্ন করেই খগেনবাবু উঠে
দাঁড়ালেন। সিগারেট ধরিয়ে উত্তরের প্রতিক্ষায় আবার বসলেন।
রমলা দেবীর ঠোট কাঁপছে দেখে তিনি বলেন, থাক্, বলবেন না’

‘সময় হলে বলব’

‘সময় যদি না আসে ?’

‘এলে বলব’

‘একলা থাকা কষ্টকর, অসাধ্য ?’

‘হাঁ, আপনার পক্ষে’

‘একবার নিজেকে সন্ধান করবার সুবিধা দিন। আমি চেষ্টা করি—অনুমতি দিন—কাশী যাই?’

‘যান্’

হু’জনেই নীরব রইলেন, চমক ভাঙ্গল সদর-দরজা খোলবার আওয়াজে, নিশ্চয় মুকুন্দ, ‘মুকুন্দ’

‘বাবু যাই’

মুকুন্দ ঘরে এল খাবার চুবড়ী হাতে নিয়ে। ‘আশ্চর্য্য!’ গরম গরম ভাজিয়ে নিয়ে এলাম, বড় ভিড় তাই দেবী হল ‘বাণ্ড, ঠাকুরকে চা ও খাবার আনতে বল’ ঠাকুর পিরিচের ওপর দু’গলাস ঘোলের সরবৎ নিয়ে এল। রমলা দেবী একটি গেলাস নিলেন, খগেনবাবু নিলেন না। ‘একটু পরে—আধঘণ্টা পরে চা নিয়ে এসত ঠাকুর’। ঠাকুর চলে গেল—‘এখনি চা আনতে বল?’

‘না, চা না খেলে নয়?’

‘আমি খাব, সঙ্গ দেবেন। একটা কথা মনে উঠছে।’

রমলা দেবী চাইলেন, ‘সাবিত্রীর মৃত্যুতে আপনি বড় একলা লেন বলে আমার দুঃখ হচ্ছে, সাস্তুনা এই যে আপনার অভ্যাস আছে’

‘আপনার অভ্যাস আছে?’

‘মনে মনে অভ্যাস আছে, মনে বরাবরই একলা’

‘মনে মনে নয়, প্রাণে?’

‘জানি না’

অন্তঃশীলা

‘আমরা কেউই বোধ হয় জানি না।’

‘তবে জানতেই হবে’

‘আপনার গলা শুখিয়ে আসছে, চা দিতে বলি?’

‘বলুন’। রমলা দেবী বারাণ্ডা থেকে চা দিতে বল্লেন চিন্তামনি চাএর কেতলী ও খাবার নিয়ে এল। পেয়ালা ও পিরিচ সাজিয়ে রমলা দেবী চা ঢাললেন, খাবার রাখলেন। খগেন বাদ্যগোষ্ঠেইচ্ছা দেখে জিজ্ঞাসা করলেন, ‘এ আবার আনলেন কেন? বাড়ির?’

‘ছিল নষ্ট হয়ে যেত’

‘ভালই করেছেন। বিস্কিট মিন, সিঙ্গাড়া খাবেন না?’

‘একখানা নিয়েছি, আর নেবো না, চা ঢালি?’

‘একটু পরে, ফিকে চা ভাল লাগে না। স্বজন এলে ভা-
হত’

‘কেন?’

‘স্বজনকে আমার ভাল লেগেছে’

‘মনে মনে একলা কি রকম?’

‘দারই মন আছে সেই একাকী; ভিড়ের কোন মন নেই’

‘সাধারণের সঙ্গে মেলা মেলা যে না করেছে তার মন কোথায়? মন নিয়ে জন্মায় কেউ? ভিড়ের মন হয়ত নেই কিন্তু ভীষণ শক্তি আছে, একবার বিপ্লবচরণ করলেই হাড়ে হাড়ে বোঝা যায়’

‘সাধারণ আমার অভিব্যক্তির উপকরণ মাত্র’

‘উপকরণের চেয়ে বেশী, সেই প্রভু, আমরা দাস’

‘তা হলে সমাজ শাসন মেনে চলেন না কেন?’

‘যতদিন ও যতদূর পেরেছি মেনেছি ; তারপর...’

‘কি?’

‘তারপর...সেটা মানাই নয়; বাধ্য করে মানান, স্বেচ্ছায় নয়, ইচ্ছার বিপক্ষেও নয়। জলের মধ্যে মাছের মতন...আমি বলতে পারছি না’

‘বলতে চাইছেন না, না বলতে পারছেন না?’

‘আপনি ত’ জানেন’

‘কিছুই জানি না’

‘জিজ্ঞাসা করুন, উত্তর থাকে, উত্তর দিতে পারি, দেব’

‘আপনাদের মধ্যে মনোমালিগ্ন আছে’

‘হুঁ’

‘তিনি কোথায়?’

‘জানি না’

‘একটা কথা না জিজ্ঞাসা করে থাকতে পারছি না, বড়ই অশ্রদ্ধতা কিন্তু ...’

‘না আমি কিছু মনে করবো না’

‘মনোমালিগ্ন খুঁচবে না?’

‘না’

‘তা হলে, আর তাঁর কৃপায়...?’

‘তাঁর পয়সায় ? তাঁর পয়সায় নয়!’

অন্তঃশীলা

‘কার ?’

‘আমার বিধবা মা তাঁর সম্পত্তি খুইয়ে আমার সদগতি করেন,
অতএব সেই অর্থের ফলভোগে আমার অধিকার আছে’

‘ফলভোগই বটে! কিন্তু...’

‘এর মধ্যে কিন্তু নেই’

‘প্রায় সব বড়লোকেরই সার্থকতার মূলে আছে অগ্নোর সম্পত্তি’

‘অতএব সেটা গ্ৰায়! অগ্ৰায় পুরাতন হলে গ্ৰায়ে পরিণত হয়
কি ?’

‘সহনীয় হয়’

‘পাত্ৰভেদে’

‘বান্জালী মেয়েদের সহগুণ অসীম, আমাদের মা মাসীদের
দেখলেই বোঝা যায়’

‘সেই মা-ই সহ্য করতে পারেন নি’

‘আপনার মা ?’

‘আমার মা মৃত্যুশয্যায় বলেন, ‘তোকে বিক্রী করেছি মা’
মার মুখে ক্ষমাপ্রার্থনার অহুচ্চারিত কাতরতা ফুটে উঠেছিল
মনে পড়ে’

‘ওঃ, অথচ মেয়েদের অতীত নেই!’

‘এতদিন ছিল না’

‘মনে করিয়ে দিলাম সে জন্ত দুঃখিত। কিন্তু স্বাধীন হবার
অমন সুবিধা কয়জনে পায় ?’

‘সুবিধা কোথায় ?’

‘আপনার অর্থের অভাব ছিল না, আর কাউকে মানুষ
ফরবার দায়িত্ব ছিল না, ছেলেপুলে থাকলে কি হত বলা যায় না,
হয়নি তাই নিজের পায়ে দাঁড়াতে চেয়েছেন ও পেরেছেন।’

‘বৈঁচে থাকলেও আমি যা হোক করে নিজে মানুষ করতাম’

‘আপনার বুঝি...?’

‘হয়োঁছিল’

‘ছেলে?’

‘হু’

‘অল্প বয়সেই বুঝি মারা যায়?’

‘হু’

‘কি অস্থখ?’

‘অযত্ন’

‘আপনার কাছে অযত্ন?’

‘পরের ছেলে’

‘আর হয়নি?’

রমলা দেবীর চোখমুখ লাল হয়ে উঠল, চিবুকের মাংসপেশী
হল, দৃষ্টি স্থির, শ্বাস প্রশ্বাস নিকর, খগেনবাবু তাঁর এই
উঁ দেখে স্তম্ভিত হয়ে গেলেন। ‘না, আমি আর জানতে
ই না’

‘তাঁর বংশের ধারা অক্ষুণ্ণ রাখার কর্তব্য পালন করতাম যদি
...’

‘বলবেন না বুঝেছি...’

অন্তঃশীলা

‘সহজেই বোঝেন দেখছি... অথচ সাবিত্রীকে বোঝেন নি...
কি অদ্ভুত প্রকৃতির আপনারা!’

‘বুঝেছি’

‘বোঝেন নি’

‘কর্তব্য পালনের অহরোধ নয়, হুকুম, জুলুম...তার ওপর
কি নির্মল বংশ! সকালে খোকা মারা গেল, সন্ধ্যায় পাশের
বাড়ি চলে যাই। কন্ট্রাক্টর গিন্নি বললেন, ‘দিদি কাদ
কাদলে দুঃখ যাবে’...অথচ, অথচ, তারই হাতে খোকা হয়।
চলে আসছি, এমন সময় লণ্ঠন হাতে নিজে হাজির...ইঞ্জিনিয়ার
সাহেব আর কন্ট্রাক্টরের গিন্নী—তাদের ইচ্ছা কখনও পৃথক
হতে পারে! যখন দুজনেই আবার নিষ্ঠাপরায়ণ হিন্দু...প্রঃ
উঠল, ‘সম্পত্তি ভোগ করবে কে?’ উত্তর দিলাম ‘কার সম্পত্তি
কে ভোগ করবে? যে ভোগ করবার আশায় জন্মাবে সে বাঁচবে
না—কেউ তাকে বাঁচাতে পারে না, নিশ্চিৎ মৃত্যুর কবল থেকে
বাঁচাবার চেষ্টা করাও উচিৎ নয়, অত্নের স্পর্শে সে সম্পত্তি
বিষাক্ত হয়েছে, বাবার মুখের রক্ত ওঠা টাকা...অত্নে ভোগ করে
সে টাকা অচল হয়েছে’...কিন্তু সমাজ আমার বিপক্ষে...যাক সে
সব কথা...অতীত নেই...সেই থেকে আমি এখানে...একলা
কি ভীষণ দুর্ভোগ ছিল সেই রাতে, পাড়া গাঁয়ের অন্ধকার রাতে
অঝোর ঝরে বৃষ্টি পড়ছে...সেই রাতটাই আমার পক্ষে বিভীষিকা
...কোথায় ছিলাম মনে নেই...আমার কিছুই মনে নেই, মনে
থাকেও না...’

অনেকক্ষণ পরে খগেনবাবু ধীরে ধীরে বল্লেন, ‘আমি জানতাম না, তাই ভুল বুঝেছি’ রমলা দেবী হাসলেন, মুখের কাঠিগা লোপ পেল, সহজভাবেই বল্লেন, ‘কিন্তু আপনাকে আমি ভুল বুঝি-নি’ •

‘না জেনে যদি ভুল বুঝেই থাকেন, তাতে অগ্নায় কি?’

‘আপনার একলা থাকার ইচ্ছার কারণ হল এই, যতটা সহানুভূতি আপনি সাবিত্রীর কাছে প্রত্যাশা করেছিলেন ততটা সে দিতে পারে নি...অতএব ভাবছেন—’

‘কি ভাবছি?’

‘এইবার নিজে বলুন’

‘বলতে পারি পাদপূরণ হিসেবে—অতএব আমি ভাবছি কোথাও সহানুভূতি পাওয়া যায় না, অতএব দরকার নেই, অতএব আমি একলাই থাকুব। কচি ছেলের আবদার বলছেন ত?’

‘একটু তাই বটে’

‘সাবিত্রী আমাকে তাই করে ফেলেছিল, আমাকে পুরুষ করতে পারেনি’

‘আপনি তাকে কি করেছিলেন?’

‘আমি তাকে সব করতে চেয়েছিলাম’

‘কেবল দাবীই করেছিলেন’

‘দাবীর জোরেই দাবী সত্য হয়’

‘হয় না, হয় না, হয় না। কার ওপর দাবী করেছেন দেখবেন না? এ কী অত্যাচার! সাবিত্রী কোন স্তরের ছিল দেখলেন না, সে দাবী পূরণ করতে পারবে কিনা বুঝলেন না, তবু

অন্তঃশীলা

বলছেন আপনি তাকে সব করতে চেয়েছিলেন ! আপনি সাবিত্রীকে মানুষ হিসেবেই দেখেননি, দেখেছেন আপনার স্বথবুদ্ধির উপায় হিসেবে’

‘ভীষণ গালাগালি দিচ্ছেন ! অত পুরুষ-বিদ্বেষ আপনার মত স্নেহশীলা মহিলার উপযুক্ত নয়’

‘ইচ্ছে ক’রে দিইনি। সম্পত্তির লোভ আর স্বথের লোভ সনাত্ত্রণী, অতএর সব পুরুষই সমাগোত্রের। তবে আপনার স্বকীয়তা আছে বলেই বাইরের কোন বস্তু আপনার চোখে পড়ে না—আর অন্তের ও সব বালাই নেই—তারা কেবল স্বার্থপর, সমাজ-বিধিকে কাজে লাগায়।’

‘কি ভাবে মানুষকে একান্ত করে দেখা যায় ?’

‘একলা থেকে নয় এইটুকু জানি, তার বেশী নয়। নিজেই ভেবে দেখুন না’

‘এখানে ভাবতে পারছি না’

‘কাশী যান দিন কয়েকের জন্ত’

‘যদি সেখানে পথ না পাই ?’

‘তখন উপায় আছে। কোলকাতা ফিরে আসবেন, ভাবনা ছেড়ে দেবেন, কেবল মানুষ হবেন, অন্ত সাধারণের মতন নয়, সেটা চেষ্টা করলেও হতে পারবেন না, তবে সকলে যেমন...’

‘সকলে যেমন কি করে ?’

‘জানি না। জীবন-ধারণ করা’

‘জীবন-ধারণ জীবেরই শোভা পায়, মানুষ জীবের অতিরিক্ত।

আগে ভেবে দেখব, কোন কলকিনারা না পাই, তখনও ভাবব—
তবে সে ভাবনা হবে felt thoughts—শুঁণের তফাৎ অনেক ;
অগ্ন্যধরণেরই বোধ হয়। চিন্তার ওপর আমার অগাধ বিশ্বাস’ •

‘চিন্তার ওপর আমার অগাধ অবিশ্বাস। অভিজ্ঞতার বদলে,
জীবনের পরিবর্তে চিন্তা করা হল সমগ্রতার বদলে অংশকে গ্রহণ
করা।’ এতুল করতে আর পারব না—আমার সব বিদ্রোহী হয়ে
ওঠে।’

‘স্বীলোক ব’লে, কিম্বা চিন্তা করেননি ব’লে’

‘তাই হবে...কই চাবি’ দিন, ট্রান্সটা গুছিয়ে দিই’

খগেনবাবু রমলা দেবীকে চাবির গোছা দিনেন। আস্তে
আস্তে রমলা দেবী পাশের ঘরে উঠে গেলেন। চিন্তামণি চায়ের
বাসন নিয়ে গেল—সামনের বাড়ীর বেনে বৌ তখন ছাদে
উঠেছেন...পাশের ঘরে ঠুং ঠুং চুড়ির আওয়াজ হল, খগেনবাবু
পাউইসের পাতা ওল্টাচ্ছেন...ভাল লাগল না—কেবল বইএর
কথা...মনের যথার্থ পরিচয় বইএর পৃষ্ঠায় ফোটে না...ফোটে
মুখোমুখি...গুঁর জীবনে অনেক কিছু ঘটেছে...তার জীবন বিচিত্র
নয়, বেচারি...এক একটা মেয়েকে দেখলে মনে হয় তারি শব্দ,
ভেতর তাদের ফোঁপরা, দস্তুর জোরে দাঁড়িয়ে থাকে...বেচারিরা
...বাইরেটা কত কঠিন, কত উগ্র, কত ঝাঁজ, ফোঁস ফোঁস
করছে, সাপ যখন চলে যায় তখন শব্দ নেই, ফণা ধরলেই ফোঁস,
ফণা ধরে আত্মরক্ষায়, কিংবা কোমরে লাঠি পড়লে...তখন কি
ভীষণ শব্দ! কিসের শব্দ...পাশের ঘরে...খগেনবাবু পা টিপে

অন্তঃশীলা

দরজার পাশে দাঁড়ালেন...রমলা দেবী ট্রাকের ওপর মাথা রেখে বসে আছেন...আশ্বে আশ্বে ফিরে এলেন। ‘ই্যালা, মাকি আর স্বামীর ঘর করবে না?’...‘কে জানে ভাই, মেয়ের ঢং দেখে বাঁচি না’...মক্ষিরাণী কঁদেছিল...মেয়েরা কেন কঁাদে? বেচারীরা...বেটাছেলেরা কঁাদে না। খগেনবাবু পাইপে তামাক ভরে বারাণ্ডায় এলেন। নীচে ভাঁড়ার ঘরের দরজায় চিন্তামণি, ভেতরে বেতে দেয়নি মুকুন্দ,—ভারি হিংস্ফটে...বোঝে না...মানুষের মন কত বিচিত্র...তাই হুল বোঝাবুঝি। নীচের কলতলায় মুখ হাত পা ধুয়ে খগেনবাবু ওপরে এলেন, ঘরে আলো জল্ছে...রমলা দেবী মাটিতে পিছন ফিরে বসে আপন মনে ট্রাক গোচাচ্ছেন...লক্ষ্মীটি...!

‘ভাবছি কাশী যাব না’

‘না, যান’

‘চিঠি যদি লিখি?’

‘উত্তর দেবো, তবে অভ্যাস নেই’

‘যদি উচ্ছে হয় দেবেন’

রমলা দেবী চলে যাবার পর খগেনবাবু মুকুন্দকে ডেকে বলেন, ‘আজ আমার খাবার করতে হবে না, যা আছে তাই ঠাকুরকে একটা থালায় নিয়ে আসতে বলো’ ঠাকুর খাবার রেখে চলে গেল। মুকুন্দ বলে, ‘বাবু এত খাবার নষ্ট হল, হোটেল থেকে

কটী দিয়ে গেল, কি করব?’ ‘নিজেরা থেও, না হয় সকালে মেথরাণীকে দিও!’ সাবিত্রী তাই দিত, রমলা দেবীও বলেন ‘স্যাণ্ডুইচ নষ্ট হত’। অপ্রয়োজনীয়কে ভদ্রভাবে বহিস্কৃত করণ নামই মেয়েদের স্বচাৰুৰূপে সংসার চালান! পুরুষের পক্ষে প্রয়োজনের অতিরিক্ত দতটুকু ততটুকুই ভদ্রতার পরিসর। চিন্তা মেয়েদের পক্ষে অতিরিক্ত, তাই চিন্তার প্রতি অত তাঁদের অশ্রদ্ধা। রমলা দেবীর কথাবার্তা শুন্লে মনে হয় না যে তিনি চিন্তা করেন না। সাবিত্রী ভাবতই না, কাজ করতে পারত। কাজ ভালই করত, বাক্স*গুছাত ভাল। রমলা দেবী নিশ্চয়ই আরো ভাল করে গুছিয়েছেন। কাশী যেতে বলেন ‘আজ, অথচ কাল যেন মনে হল এইখানেই থাকি ইচ্ছেটা! মনের কথা বোঝা যায় না। খগেনবাবু টেবিলল্যাম্পের টেবিলটা টেনে সোফার কাছে আনলেন। পাইপ নিভে গিয়েছিল, ছুরি দিয়ে সাফ করে ফুঁ দিলেন, শীষ দেবার মতন আওয়াজ হল, নতুন তামাক ভরলেন, তামাক শুকিয়ে গেছে, একটুকরো আলু টিনে রাখলে হত, শীতকাল ভিন্ন পাইপ চলে না। পাইপ বেখে গ্যাসেটের পাতা গুলটাতে লাগলেন...বেশ লিখেছে...স্বভাব হল সেই বস্তু খেটি আপনা থেকে পাওয়া গিয়েছে, সোপার্জিতও নয়! কিন্তু মানুষের মতন মানুষ অত্নের দান গ্রহণ করে না, সে সৃষ্টি করে, নিজের কর্তব্য নিজে নির্ধারিত করে, সেই অনুসারে জীবনধারণ করে। অতএব কালস্রোতের দ্বিপক্ষে মাতার কাটতেই হবে, স্রোত জনসাধারণের; যারা ভিক্ষার ধনে জীবন চালায়। নিজের

অন্তঃশীলা

রোজগারেই বড়লোক । রমলা দেবীর সম্পত্তি তাঁর নিজের, 'তার মধ্যে কিন্তু নেই', সাবিত্রীর সম্পত্তি তার স্বামীর। এই কি স্বাভাবিক ? স্বাভাবিকতাই হল আদিমতা ; আদিম যুগে জঙ্গল ছিল, এখনও সেই জঙ্গল সভ্যতাকে গ্রাস করবার জন্য ধীরে ধীরে এগিয়ে আসছে, অষ্ট্রেলিয়ার 'বুশ' এর মত। জন-সাদারণ সেই অষ্ট্রেলিয়ান বড় বড় কাঁটাগাছের ঝোপ । খগেনবাবু একবার তেরাইএর জঙ্গলে গিয়ে-ছিলেন, গাছ লতা পাতা গুল্মের নৃশংস আত্মপ্রসার দেখে তাঁর দম বন্ধ হয়ে গিয়েছিল, একটি গাছ একলা নেই, তাকে জড়িয়ে পিশে মারছে পঞ্চাশটা আগাছা। তলায় শ্বেতুলা পচা পাতা, গায়ে লতাগুল্ম, সব ভিজে, যত ভিজে, তত নূতন জীবন । কিন্তু আগাছার মাথায় ফুল, সাবিত্রী ছিল সেই বুনো অকিডেন ফুল, রমলা দেবী কাঁটা গাছের ফুল । ক্যাকটাসেরও ফুল হয়...এইবার মনে হয়েছে, সাবিত্রী একদিন রমলা দেবীর বে সাভিট। পড়ে এসেছিল তার রং ছিল সৌখীন ক্যাকটাস্ ফুলের মতন টক্টকে লাল । রমলা দেবীর মনে অনেক কাঁটা, মনে না গায়ে ? ভেতরের কাঁটা না বনের কাঁটা বিঁধেছে ! নিজে টেনে খুলে ফেলেন নি, বাথারও বিলাস আছে, তিনি বাথাটা পোষণ করেই এসেছেন মেয়েরা যেমন বেড়াল পোষে । খগেনবাবু পাইপ মুখে নিলেন,... নিশ্চয়ই তাই । অনেক কষ্ট পেয়েছে মেয়েটা ! লোকে না বুঝে হুণাম করে বোধ হয়, হুণাম তিনি শোনেননি অবশ্য । কিন্তু হুণাম যদি কারুর প্রাপ্য হয়ত' রমলা দেবীরই ; খাটি বিলেতী মেয়ে, অধিকার সম্বন্ধে সচেতন, বিভ্রাটগরের মত ভুল করে এদেশে

জন্মেছে। একলা থাকে বেশ করে। কিন্তু কতদিন থাকবেন ? নিজেই বলেন একলা থাকা কষ্টকর, স্বাভাবিক হওয়াই ভাল। তবুও রয়েছেন এতদিন এই যথেষ্ট ! ওঃ সেইজন্যই ভাল লাগতে না, স্বভাবের সঙ্গে যে লড়াই করে তাকে ভাল লাগতে পারে না, যেমন বিশী লাগে কিশোর কিশোরীকে যখন তারা শৈশবাবস্থার পিরাণ ফ্রঁক ছাড়িয়ে যায়। ক্লাসে এক একটা ছেলে থাকে যার প্রত্যেক ব্যবহার সহজ, এমন কি পরীক্ষায় প্রথম হওয়া পর্যন্ত, তার মধ্যে কোন ঘন্ড নেই, বেশ মিষ্ট স্বভাব, সকলকেই আকর্ষণ করে। সূজনের মত ? সহজ শক্তি কিন্তু সহজেই নিঃশেষিত হয়। আর এক একটা ছেলে থাকে যার ব্যবহারে কোন সামঞ্জস্য নেই, একবার হল ফাট, পরের বার কেল, যার প্রকৃতি অশান্ত, বুনো, বেশীরভাগ লোকে তাকে পছন্দ করে না, কিন্তু জনকয়েকের কাছে সে অতিশয় প্রিয়। এই ধরণের ছেলেও খারাপ হয়ে যায়, কিন্তু শক্তিব্রাসের জন্ত নয়, শক্তির অপব্যবহারে, অনুকূল প্রতিবেশের অভাবে। দ্বিতীয় শ্রেণীর ছেলেরাই দ্বিজ, প্রথম শ্রেণীর ছেলেরা একবারই জন্মায়, বোধ হয় একঘায়েই মরে ! কবি ওয়ার্ডস্‌ওয়ার্থ কঠঁবা সম্বন্ধে যে উপদেশ দিয়েছেন সেটি ভুল। লড়াই যখন চলছে তখনকার অবস্থা বিশী, জয়ের গৌরবেই মানুষের শ্রী ফুটে ওঠে। সে অনেক পরে—ইতিমধ্যে, This arid, barren, dry, dull, dreary cactus land, Waste Land...মনে নেই...Good night, good night, good night. মেয়েদের স্বৃতি নেই--ঠিক বলেছে

অন্তঃশীলা

রমলা, প্রকৃতির আবার স্মৃতি কি ? স্মৃতি থাকে, যদি ভাব থাকে, প্রকৃতির আবার emotion কি ? রমলা দেবীর প্রাণে ব্যথা আছে—না হলে কাঁদছিল কেন ? বেচারী—প্রকৃতির কিন্তু ইতিহাস আছে, রমলারও আছে, নচেৎ কি ভুলতে চায় ? কিন্তু রমলা দেবীকে মেয়েমানুষ ভাবতে পারা যায় না, পায়ের গোছ... শ্বেত-পাথরে কাঁদা হাতীর গুঁড়। রমলা দেবীকে স্মরণ করলে কোন কুভাবই মনে আসে না—কুভাব আবার কি ? তবে কু-স্মৃতি একটা আছে। বন্ধুত্বের মধ্যে কু-স্মৃতি নাই, তার মধ্যে আছে নিয়তির লীলা। নিয়তি কোথায় নিয়ে যায় কেউ জানে না। বলে, নিয়তি মেয়েদের হিড় হিড় করে নিয়ে যাচ্ছে—হতে পারে না। নিয়তি আর স্মৃতি জন্মশত্রু, স্মৃতির ওপরই সভ্যতা প্রতিষ্ঠিত, নিয়তি ছনিবার, তাকে জয় করতে হয় জ্ঞান দিয়ে। জ্ঞান আর স্মৃতি বিরোধী শক্তি। ও চিন্তায় বিশ্বাস করে না। বাঁচবে কেবল স্মৃতি নিয়ে ! প্রকৃতি চিন্তা করে না, কেবল সে বাঁচে, চিন্তা করে পুরুষ। রমলা হয়ত বলবে, পুরুষকারের দ্বারাই নিয়তিকে বশ করা যায়, চিন্তার দ্বারা যায় না। কিন্তু পুরুষকার পুরুষের ধর্ম, ব্যক্তির ধর্ম। পুরুষকারের তাৎপর্য জ্ঞান, চিন্তা দিয়ে প্রতিবেশকে অতিক্রম করা। মেয়েরা চিন্তা করতে জানে না, তাঁরা চিন্তার বিষয়।

সাংখ্যটা পড়তে হবে, কালই কেনা চাই, কার সংস্করণ ভাল ? দোকানের ছোট বাবু বলে দেবেন। ইংরেজীতে পড়া হবে না, বরঞ্চ বাংলায় পড়লে মূল রসের খানিকটা পাওয়া যায়। এমন

হয়েছে যে ইংরেজী ভাষাতেই যেন বেশী বোঝা যায়। বাস্তবিক তা যায় না। চেষ্টা করে পড়তে হবে। পুরুষকার অর্থে ইচ্ছাশক্তি নয়। কর্মীরাই কি এ সংসারের একমাত্র পুরুষ? মেয়েরা ও মেয়েলী পুরুষে তাই মনে করে, তাই নভেলে কর্ম অর্থাৎ গল্প চান। কর্ম করা মানেই নিয়তিকে স্বীকার করা, নিয়তি আছে বলেই না কর্ম! তা ছাড়া, সভাজগতে শ্রমবিভাগের জ্ঞান কর্মের অবসর নেই, ভূগোলে নতুন জগৎ নেই যে জয় করবে, গৌরীশৃঙ্গ চড়া যায় না, সমুদ্রের তলা থেকে সোনার তাল উদ্ধার করাও যায় না—বস্ত্রে কাজ করে দিচ্ছে। নিরীহ ব্যক্তির পক্ষে নতুন জগৎ হল চিন্তাক্ষেত্র। এই গরমে কাজ করাও অসম্ভব। ছোট্টগাট্ট উদ্দেশ্য সিদ্ধির জ্ঞান যতটুকু কর্মের প্রয়োজন ততটুকু কর্ম করতেই হবে—কিন্তু বিজ্ঞান ও দর্শনের উদ্দেশ্য হল নিষ্কাম চিন্তা। আইনষ্টাইনের সঙ্গে কর্মের কি সম্বন্ধ? চিন্তাই চিন্তার একমাত্র উদ্দেশ্য, একমাত্র বিচার-দণ্ড। জীবনটা ডিটেক্টিভের গল্প নয় যে আদর্শ-উদ্দেশ্যকে প্রকৃত আসামীর মতন খুঁজে বার করতেই হবে। কর্মীর সব দান্তিক, অতএব তাদের কাব্যাবলীও নাটকীয়। সভ্যতারের নভেলে গল্পাংশ থাকে না, থাকা উচিত নয়, চিন্তাস্রোতের বিবরণ থাকবে, হয়ত কোন সিদ্ধান্তই থাকবে না, কীটসের negative capability থাকবে; তবে স্রোত যে বইছে তার ঈঙ্গিত থাকবে, একটা ঘটনা ঘটুক, অমনি, খড়কুটো যেমন স্রোতে ভেসে যায়, ঘটনাটি তেমনি বিস্মিষ্ট হয়ে যাবে। অন্তঃশীলা গতির

অন্তঃশীলা

ইতিহাসই হল pure নভেল, কারণ সেটি সাস্থিক মনের পরিচয়।
জীবনে নাটকীয় ঘটনা ঘটে না, অতি সাধারণ, তুচ্ছ দৈনন্দিন
ঘটনাকে নিয়ে চিন্তাস্রোত প্রবাহিত হয়, কখনও আসে জোয়ার,
কখনও ভাটা, কখনও বা বান ডাকে, বন্যা আসে, চোখ খুলে
দেখলে সেই স্রোতে কত ঘুণী, কোথায় ঢেউ, কোথাও বা গর্ত,
এই ত' জীবন! এরই প্রতিচ্ছবি—না প্রতিচ্ছবি ঠিক না,
এরই বিচার ও মূল্য নির্ধারণই আটিষ্টের কাজ—অভিজ্ঞতা নয়,
অভিজ্ঞতার তাৎপর্য গ্রহণ ও প্রকাশ। কিন্তু প্রধান কথা স্রোত
চলছে—কুলকুল তার ধ্বনি, কুলকুল কবে কোথায় ভেসে যাচ্ছে কে
জানে? তীরে দাঁড়িয়ে থাকা যায় না, ঝাঁপিয়ে পড়তে লোভ
হয়, বড় বড় গাছ সেই স্রোতের টানে মাটির সংশ্রব ছাড়ে, মহা
মহারথী তারই টানে আদর্শ থেকে বিচ্যুত হয়, লোকে নিন্দে
করে, অশ্রয় করে, আদং কথা, মিথ্যার মাটি ধুয়ে যায়। কেবল
শোনা যায় কুলকুল শব্দ কুল কুল কুল...কুল—

হাতমুখ ধুয়ে চা খেতে থগেনবাবুর দেৱী হল, কাল রাতে খাওয়া হয়নি, একখানা সিদ্ধাড়া খেলেন। সাংখ্যাতত্ত্বের বই কিছু কিনতে হবে। থগেনবাবু বইএর দোকানে এলেন। ছোট বাবু হরিহর আরক্তকের সাংখ্যাতত্ত্ব ও খানকয়েক উপনিষদ বেছে দিলেন। দোকান তখনও খোলেনি, অর্থাৎ বিক্রী শুরু হয়নি। ততক্ষণ কি করা যায়? বই ঘাঁটতে ইচ্ছে হচ্ছিল না। রমলদেবী ঠিকই বলেছিলেন বইএর কথা খাটি নয়—বোধ হয় তিনি বলেননি, সেটা তাঁরই মনের খবর, যেই বলুক সেই তাঁকে বোধে। পিছনে কে একজন দাঁড়িয়ে রয়েছেন বোধ হল, গায়ে ফরসা পাঞ্জাবী, আস্তিনের ইস্ত্রি ভাজেনি, কাপড়ের কোঁচা হুসাজ্জিত, বাদামী রংএর এলবার্ট স্লিপার, কিন্তু বাক্যকে নয়। পোষাকে উগ্রতা নেই ভদ্রতা আছে। ভদ্রলোক জামা কাপড়

অন্তঃশীলা

পরতে জানেন, সব শাদা, কেবল জুতোটাই রঙীন, তাও উজ্জল নয়। কোন বড়লোকের ভাগ্যে হবে, বড়লোকের ছেলের মাসতুতোভাইও হতে পারে। ঝুলপিতে চশমার দাগ রয়েছে, চশমা নেই, পড়াশুনার অভ্যাস আছে। সাহসভরে চাইতেই ভদ্রলোকের মুখে পূর্বপরিচয়ের চিহ্ন ফটে উঠল। খগেনবাবু বল্লেন, ‘এই যে আপনি!’ ভদ্রলোক হাসিমুখে উত্তর দিলেন, ‘বই দেখতে এসেছি, নতুন কিছু এল কি না’ ‘কি ধরনের?’ ‘অমনি যা-তা’ ‘তবু?’ ‘আপনিই বলুন না কি দেখি?’ ‘আপনিত ...’ ‘পাশই করেছি’ ছোট্ট বাবু বল্লেন, ‘সুজন বাবু আপনার মতই বই ভালবাসেন, খুব পড়েন, সব বিষয়েই আগ্রহ’ ‘তা হলে ভদ্রলোক বলুন! শুনেছি বটে।’ ছোট বাবু খবর দিলেন সুজন বাবুর লাইব্রেরীর কথা। দেখার আগ্রহ প্রকাশ করতে সুজন অপ্রস্তুতে পড়ে বল্লেন, ‘তাকে লাইব্রেরী বলেন।। নিজে দেখলেই বুঝবেন’ ‘চলুন না যাই’ ‘এখনি যাবেন?’ ‘আপনার বই দেখা হল না’ ‘পরে হবে’ খন’ ‘একটু ঘুরে গেলে হয় না?’ ‘বেশত’, তাই চলুন’। বইএর প্যাকেট না নিয়ে দুজনে বেরিয়ে পড়লেন। ‘কোথায় যাওয়া যায়?’ ‘চলুন না, রমলাদির বাড়ি’ ‘এইত’ কাল সারাদিন ছিলাম। কাল এলেন না কেন?’ ‘কাল একটা কাজ ছিল’, ‘কি কাজ?’ ‘কাল বিজ্ঞানের সঙ্গে তার ক্লাবে গিয়েছিলাম’ ‘কোন ক্লাবে?’ ‘সে কি একটা? তবে সবই টেনিসের, নেলা তিনটের সময় যে ক্লাবের মাঠে রোদ্ধুর পড়ে না প্রথমে সেইখানে, তারপর সাড়ে পাঁচটার সময়

যেখানে রোদ্ধুর পড়ে, তাছাড়া' 'এ ছাড়া আর কিছু থাকতে পারে না কি?' 'আছে বৈকি! তারপর ভাল মার্কার, নতুন বল, ভাল খেলোয়াড়...' 'খুব ভাল খেলেন বলুন' 'এখন শিখছে' 'ভীষণ গম্ভীর ভাবে শিখছেন তা হলে!' 'পরে খেলবে ভাল, আপাততঃ বল পরদাতেই বেশী যায়' 'চিরকালই যাবে যদি এখন থেকে না অভ্যাস করেন' 'বিজনের ধারণা অন্য, সে বলে আগে বল পরে বুদ্ধি!' 'অথচ খেলাকেই ব্রত করে নিয়েছে!' 'ব্রত করেনি, পড়াশুনাতেও ভাল। 'অথচ' কেন?' 'অত গম্ভীর ভাবে যে ব্রত পালন করে সে নিশ্চয়ই পিউরিটান, এবং পিউরিটানরা বড় হিসেবী লোক, নয় কি? কোন পয়েন্ট ছাড়তে চায় না, আশা করি প্রোহবেন না?' 'না তার কোন প্রয়োজন নেই' স্বজনকে নীরব দেখে খগেন বাবু বল্লেন, 'আপনাকে রোজই তার খেলা দেখতে যেতে হয়?' 'না' 'আমি কখনও কোন খেলা খেলিনি তাই খেলার মর্মগ্রহণ করতে পারি না। ম্যাচ দেখেছি, তবে সেটা পারিপাট্যের দিক থেকেই। প্র্যাক্টিস দেখা আমার ভাল লাগে না। যদি কোন তরুণ কবি কবিতা পাঠের সময় প' এ র ফলা একার আর ম, প্রে-ম বানান ক'রে ক'রে পড়েন, কিংবা কোন গায়ক গান না গেয়ে কি করে গলা সেধেছেন শোনান তা হলে ভাল লাগে কি? আমাদের জীবন ক্ষণস্থায়ী, সাধনার ইতিহাস জানবার ফুরসৎ কোথায় বলুন?' 'কেন? মাজঘরের কোন স্থান নেই নাটকে?' 'না' 'পিরাঙেলো?' 'তার পদ্ধতি এখনও ধাতে বসেনি' 'র্যাফেল, রেমব্রান্টের স্কেচগুলো?'

অন্তঃশীলা

‘ছবির চেয়ে তার দাম কম, তাঁদের ছবি দেখার পূর্বে তাঁদেরকে বড় আঁকিয়ে জানি বলেই সেগুলোকে ভাল বলি’ ‘আত্মকাহিনী কিংবা ধরুন বসওয়ারের লেখা জনসনের জীবনী, জয়েস্কেও বড় মানতে হয়’ ‘তার effect অল্প ধরণের, স্তূপের, মালার নয়। ওয়ার্কশপ আর দোকান এক জিনিষ নয়। আর্ট ও ক্রাফ্টের পার্থক্য স্বীকার করি’ ‘ঠিক বুঝি না। মরিস কিন্তু...চলুন না, রমলাদির বৈঠকখানায় বসেই বুঝিয়ে দেবেন। তিনি এই সব কথা শুনতে খুব ভাল বাসেন’ ‘বেশ, তাই হবে’ খগেন বাবু একটিন সিগারেট ও ‘একটা দেশলাই কিনলেন। স্বজন তাঁর হাত থেকে টিন্টা নিয়ে নিজেই খুলে দিলে। ‘খাওয়া হয় বুঝি?’ ‘এক রকম না-ই—’ খানিকক্ষণ পরে স্বজন ধীরে ধীরে বললে, ‘একটা কথা ছিল’ ‘বলুন না, আপনার সামনে আমার স্কোচ আর নেই, আপনারও থাকা উচিত নয়’ ‘সেদিন ছেলেরা একটু অসভ্যতা করেছিল, সে জ্ঞাত...’ ‘না, না, মোটেই না, সে জ্ঞাত আমি দুঃখিত হইনি। তারা ত করবেই, ছেলেমানুষে করেই থাকে—আর এমন কি আর করেছিল?’ ‘চুপ করে থাকলেই পারত’ ‘তারা চুপ থাকবে কেন? তারা যে উপকার করছিল! না স্বজন বাবু, আমি সত্যি কিছু মনে করিনি। কেন করব? সকলেই কি বোঝে? উপকার করাও ভাল বাসি না, উপরূত হতেও ভাল লাগে না।’ ‘তবু...’

রমলা দেবীর বাড়ি এসে শুনলেন যে তিনি মোটরে করে দমদমায় কোন এক আত্মীয়ের বাড়ি গিয়েছেন। ফেব্রুয়ার সময়

গেন বাবু বলেন, ‘কই কাল ত’ কিছু শুনিনি!’ ‘হয়ত কাকুর
 যস্থ বিস্থ করেছে হঠাৎ খবর এসেছে’ ‘উনি বুঝি খুব সেবা
 করতে ভালবাসেন?’ ‘সেবা করতে পারেন’ কেবল সেবা আর
 সেবা—কার সেবা? দুঃস্থ ও পীড়িতের—কিন্তু কি হয় সেবা
 করে! কৃতজ্ঞতা কুড়িয়ে বেড়ান হয় অবশ্য। এইটাই ওঁদের
 কর্তব্য। দুঃস্থ ও পীড়িতেরও গোপনতার একটা প্রয়োজন
 থাকতে পারে কজন বোঝে? সমাজের উপকার, হাসপাতাল,
 সেবা-সমিতি, সাধারণ প্রার্থনা-এ সব জোর করে ঘোমটা খোলা
 -যেমন বিবাহের রাত্রে বাসর ঘরে জোর করে প্রবেশ করে
 রাখাত্রীরা নববধূর ঘোমটা খোলে। তাদের হল মজা, কিন্তু
 ময়েটির হল সর্বনাশ। এর ফলে নববধূর স্বাভাবিক কমনীয়তায়
 চূড় আঘাত পায়, তার সরম টোটে; তার স্বর হয় ওঠে কর্কশ,
 গতি চঞ্চল, স্বভাব চপল, ভাষা অমার্জিত। সমাজ-সেবার মধ্যে
 এই ধরনের অভদ্রতা বর্ন্তমান! একলা লজ্জা ভাঙতে লজ্জা আসে,
 একলে মিলে লজ্জা ভাঙায় আর সঙ্কোচ থাকে না, দুঃস্থের প্রতি
 সম্মেলবোধের দায়িত্ব ঘুচে যায়। সেবা-ধর্ম যতই বৈজ্ঞানিক ততই
 কাঙ্ক্ষাকরী, কিন্তু ঠিক ততটাই নৈব্যক্তিক ও মানুষের পক্ষে
 অসম্মান-সূচক। স্বজন কি সেই অসম্মানের জগ্ন ক্ষমা চাইছে?
 আচ্ছা স্বজনবাবু, আপনাদের দলে কি অসম্মাতা করেছিল মনে
 হয়? মৃতের প্রতি সম্মান দেখায়নি?’ ‘আপনার প্রতি’ ‘মৃতের
 প্রতি নয় কি?’ ‘তাও বটে, কিন্তু প্রথমত আপনার প্রতি’ ‘পরের
 উপকার করে কি হয়?’ ‘শক্তি সঞ্চয়’ ‘আপনি বুঝি অ্যাড্‌লারের

অন্তঃশীলা

শিষ্য ?’ ‘এখনও গুরু কাড়িনি’ ‘অর্থাৎ অনেক গুরু ?’ ‘বোধ হয় তাই’ রমলাদেবী বোধ হয় প্রকৃত্ব খাটাতে ভালবাসেন, অমন সপ্রতিভ ও আত্মপ্রতিষ্ঠ স্বভাব দেখলেই ঐ ধারণা হয়। মনের জোর আছে, নিজেকে ভালবাসেন, ভালবাসেন শক্তিমতী হতে, ভক্তি তাঁর ধাতে, নেই, বৃন্দাবনের গোপিকা নয়, মথুরার মহেশ্বরী। কোথায় যেন স্বভাবে পামখেয়াল আছে,...কিংবা হয়ত জোর করে নিজেকে তাঁর কাছ থেকে সরিয়ে নিচ্ছেন। দমদমা চলে যাওয়ার অর্থ হল তাঁকে আজই কাশী যেতে আজ্ঞা করা। বেশ তাই ভাল, তা ছাড়া উপায় কি ? কোন দাবী নেই—কি দাবী ? স্ত্রীর বন্ধু ? স্ত্রী ওপরই দাবী থাকে না ত আবার স্ত্রীর বন্ধুর ওপর ! বন্ধুর ওপর থাকতে পারে—কিন্তু বন্ধুত্ব সম্ভব কি ? ‘চলুন, আপনার লাইব্রেরী দেখিগে’ ‘সেইভাল’ ‘তখন ‘তবু’ বল্লেন কেন ?’ ‘অল্প সময় হবে’ ‘না, এখুনি, জুড়িয়ে গেলে কি প্রশ্নের কি উত্তর দেব জানিনা’ ‘চলুন, বাড়ি যাই’

কলেজ ষ্ট্রীট থেকে একটি গলি পূর্বদিকে গিয়েছে, তারই মধ্যে বিজন-স্বজনদের বাড়ি। বাড়িটা বেশ বড়, গেটের এক পাশে দারোয়ানের ছোট্ট ঘর, অল্প পাশে গ্যারাজ। সিঁড়ি দিয়ে উঠেই বারাণ্ডা, তারই কোণে একটি সুসজ্জিত ‘হল’, ডাইনে বাঁয়ে আরো দুটি বৈঠকখানা, ডাইনের ঘরটি-বইএ ভর্তি, তারই পিছনে, ভেতরের বাঁধান উঠানের দিকের ঘরটি স্বজনের। পর্দার ফাঁক দিয়ে দু’চারটে টেবে সাজান*পাতাবাহার এবং গোল লোহার সিঁড়ির খানিকটা চোখে পড়ে। অঙ্গনের সিমেন্ট কেটে

একটা ‘ম্যারীশাল নীল’ তোলা হয়েছে গোল সিঁড়িকে বেঁধে
 করিয়ে। পরিপাটি উঠান দেখে মনে হয় যে বাড়িতে কোন
 মহিলা নেই। স্বজনের ঘরটি পড়বার ও শোবার। একটি
 কোনে লোহার খাটের ওপর ক্যামেল হেয়ারের কঞ্চল বিছান—
 পাশে ছোট টেবিলে পড়বার আলো, কোনে কাঠের আসনে
 কুঁজো, তার মাথায় কাচের গেলাস। পুলী লাগান একটা বাতি
 টেনে শিয়রের কাছে আনা হয়েছে। পড়বার টেবিলে বই,
 রিভলভিং সেল্ফেও বই। বৈঠকখানায় যাবার দরজার ফাঁকে
 বড় আলমারী, বইএ ভর্তি। কোনে ‘চেপ্ট অফ ড্র্যাস’, ওপরে
 আর্শী। টেবিলের ওপর অবনীন্দ্রনাথের আঁকা যুবাবয়সের
 রবীন্দ্রনাথের প্রতিকৃতি। টেবিলের ওপর বড় একখণ্ড কাচ,
 পাশেই লম্বা কাচের নলে লাল জল পোনা। খগেন বাবু
 রিভলভিং কেশের পাশে চেয়ার টেনে বসলেন। স্বজন জিজ্ঞাসা
 করলে ‘চা খাবেন’ ‘বেলা হয়ে গিয়েছে’ ‘একটু বসুন, বিজনকে
 ডাকাছি’ ‘তাকে আর বিরক্ত করে লাভ কি?’ ‘সে খুব খুশী
 হবে, আমি আসছি’ খগেনবাবু একলা বসে বই দেখতে
 লাগলেন। ছেলেটির রুচি একমুখী নয়—নানা রকমের বই;
 বেশীর ভাগ মনোবিজ্ঞানের, তা ছাড়া নতুন পদার্থ-বিজ্ঞানের সরল
 ব্যাখ্যা, সৌন্দর্য্যতত্ত্ব এবং বিশেষ করে ধর্ম ও বিজ্ঞানের সম্বন্ধ
 -নিরূপণ সংক্রান্ত একাধিক বই ও প্রবন্ধ। সব বইগুলিই
 আধুনিক ও নতুন লেখকদের—একটিও পুরাতন নামজাদা
 লেখকের নয়। আজকালকার ছেলেরা বই সম্বন্ধে বই পড়ে,

অন্তঃশীলা

পরাক্রান্ত বই, তাই পরগাছা মন তাদের। এই সব সংক্ষিপ্তসার গণমনকে তুষ্ট করবার জন্যই সরলভাষায় লেখা হয়, তাতে মনের অভিজাত্য বজায় থাকে না। খগেনবাবু এই ধরনের বই পছন্দ করতেন না—বলতেন, অ্যামেরিক্যানিজম্ সভ্যতার রিপু বিশেষ। ডিমক্রেসী মনের একাগ্রচিত্ততা ভঙ্গ করে, মনকেই অস্বীকার করে, তার পরিবর্তে হট্টমনের পূজা করে, অথচ ব্যক্তিরই মন আছে, সমূহের ও বালাই নেই। প্রমাণ দিতেন ইতিহাস থেকে; যেমন টিউটন জাতির গ্রাম্য ও কোল সভ্যতা গ্রীক ও রোমানদের পৌর ও নাগরিক ব্যক্তিপ্রধান সভ্যতাকে বিধ্বস্ত করেছিল; তবু সেটি লোপ পায় নি, গ্রীক ও রোমানদের অভিজাত ব্যক্তিপ্রাণ বৈদগ্ধ্য আরবদের রূপায় রক্ষা পেল, এবং পেল বলেই আইন কানুন এবং রোমীয় খৃষ্টান ধর্মের দ্বারা যুরোপ এখনও উত্তমরূপে ধৃত রয়েছে, তারমত এখনও জীবন্ত, ভারতবর্ষীয় মনের মতন নিজীব নয়। খগেনবাবু বলতেন মধ্য যুগের কুতিত্ব এই ব্যক্তির মনকে বাঁচিয়ে রাখা। আজ সভ্যতার দুর্দিন এসেছে, নতুন অসভ্যতার উৎপাত আরম্ভ হয়েছে, কুলের নাম হয়েছে জন-গণ, সেই জনগণমনঅধিনায়কের ক্ষমতা অসীম। নতুন দেবতার হাতে মস্ত মোটা কলম, তাই দিয়ে বিংশ শতাব্দীর সার্থকতার দেবতা একই বার্তা, একই মন্তব্য লিখে যাচ্ছেন। এই ঠাকুরের মুখে হাঁসি নেই, আছে গান্ধির্ষ্য। 'ইনি টেল্-এল্ কবীরের কেরাণী নয়, গ্রামের স্তূদগোর। বেনে, লাল খাতায় যে সর্বদাই কি লিখে যায়, আর লোকের হয় সর্বনাশ তার অজানিতে।

এই যুগে, এই উৎপাতের বিরুদ্ধে ব্যক্তিস্বাতন্ত্র্য রক্ষার জন্ত কি ষড়যন্ত্র করা যায়? ভিড় ঠেকিয়ে রাখতেই হবে, নিজেকে সামলাতেই হবে। বিপদ কি একটা? কোথা দিয়ে শত্রু প্রবেশ ক’রে স্বকীয়তার মূল উচ্ছেদ করে কে জানে? ভিড় আর জ্বীলোক একই বস্তু, দুটোই স্বাতন্ত্র্য-বিরোধী। রমলা দেবী দমদমা চলে গিয়ে পুরুষোচিত, অর্থাৎ সত্যকারের ভাল মেয়ের উপযুক্ত ব্যবহারই করেছেন। খগেন বাবু Outline of Artএর ছবি দেখতে লাগলেন।

শ্বেত পাথরের খালায় ফল, সুন্দর ও গেলাসে জল নিয়ে স্বজন ঘরে প্রবেশ করল। খগেনবাবু বললেন, ‘এ আবার কেন? আমি কিছু খাই না।’ থালা ও গেলাস টেবিলের উপরই রইল। খগেনবাবুকে কেউ খেতে অমরোধ করলে অসন্তুষ্ট হতেন। তাঁর মনে হ’ত যে খাবার দিয়ে তাঁর মুখ বন্ধ করে দিচ্ছে। খগেনবাবু জিজ্ঞাসা করলেন, ‘কি প্রশ্ন মনে এসেছিল?’ ‘প্রশ্ন? এখন মনে নেই। একটা কি?’ ‘বলুন না, প্রশ্ন মনে হয় অনেক, কিন্তু বাস্তবিকই একটা’ ‘ঐ কথাটা বুঝতে দেবী লাগে না কি?’ ‘অভিজ্ঞতার উপর নির্ভর করে, বয়সের উপর নয়’ ‘অভিজ্ঞতা অর্জন করতে পারে কি সকলে?’ ‘অভিজ্ঞতার জন্ত প্রতীক্ষা করতে হয় বটে, সেজন্ত অবসর চাই...Dread the passage of JESUS for he does not return...অভিজ্ঞতা অর্জন করব বলে ছুটে বেড়ালে আসে না, আবার না ডাকলে আসে। কক্ষের উপর আমার কোন আস্থা নেই। চীন জাপানের ধানী

অন্তঃশীলা

সম্প্রদায় অবসরই চাইতেন, চারধারের আগাছা তুলে ফেলে এক নিভৃত পরিষ্কৃত কেন্দ্রে আশ্রয় হতেন। কাচের উপর ময়লা থাকলে আলো প্রতিফলিত হয় না। ‘সে ত’ হল চিন্তাশক্তি ‘যাই নাম দিন—অবসর চাই’ ‘কিছু থাকেন না? ফল, কোন অশুখ করবে না’ ‘না আমায় অশুরোধ করবেন না ... অবসর মানে কুঁড়েমি নয়, মন খুব সক্রিয় থাকে তখন, অবসরের মধ্যেই মন অভিজ্ঞ হয়’ ‘বাইরের আগাছা পোড়াবেন কি করে? How will you burn the bush? গোলমালের হাত থেকে অব্যাহতি কি ভাবে পাবেন?’ ‘সাধনার দ্বারা’ ‘যদি তার মধ্যে কোনটা রঙ্গীন কিংবা স্নগন্ধি ফুল দেয়, যদি কলরবে কোন বানী গুপ্ত থাকে?’ ‘ঝোপের মধ্যে বাণী! Voice in Wilderness? অত বাহুল্যে চলে না, দেখুন, সৃজন বাবু, অত খাতির করা যায় না, কবে কোন ফুল দেখবো, কবে কোন বাণী শুনতে পাব—এ সব ভাবলে চলে?’ ‘কেন?’ ‘স্বনিশ্চিতের জ্ঞান অনিশ্চিতকে ত্যাগ করতেই হবে’ ,আপনার ব্যক্তিস্বাতন্ত্র্য থাকছে কেমন করে? ব্যক্তিই ত’ এক মাত্র অনিশ্চিত বস্তু, গড়পড়তা জিনিষট। অপেক্ষাকৃত স্বনিশ্চিত’ খগেনবাবু গালে হাত দিয়ে ভেবে বসেন, ‘আপনি যা বলছেন তার উত্তর আছে, এখন ঠিক ভেবে পাচ্ছি না—উত্তর বোধ হয় এই ধরনের হবে থানিকটা—সমাজের বর্তমান অবস্থায় ব্যক্তির বৈচিত্র্য ফুটে উঠতে পারছে না গড়পড়তার চাপে, প্রত্যেকে যখন পৃথক সত্তা অর্জন করবে তখনও গড়পড়তা বস্তুটি থাকবে, তবে প্রভু হিসেবে নয়, এবং তার স্তরও হবে উন্নত।’

‘ইতিমধ্যে?’ ‘ইতিমধ্যে অস্বীকার’ ‘বাধা রয়েছে যথেষ্ট’ ‘বাধা অতিক্রম করার নামই সাধনা—সেটা নিজের কাজ, পরের দ্বারা হয় না, কেননা পরই হল সমাজ নামক শত্রুর গুপ্তচর। সেইজন্য উপকার করতেও চাই না, উপরূত হতে আত্মসম্মানে আঘাত পড়ে। সেইজন্য সেবা সমিতি, অস্থান, প্রতিষ্ঠান, আশ্রম—সব কিছুই ভাল লাগে না। মানুষ অক্ষম, তাই না উপকারের প্রয়োজন? যতই উপকারের মাত্রা বাড়বে ততই অক্ষমতা ক্রমবর্ধমান হবে। আমি স্বাধীন ব্যবসার পক্ষপাতী, infant industry argument এ ক্ষেত্রে অঁচল।’ ‘অনেকটা ছাড়তে হয়’ ‘তা হোক, রঙ্গীন বুনা ফুলের ক্ষতিপূরণ হয় ভেতরের পদ্ম পেয়ে।’ স্বজন চূপ করে বসে রইল, খগেনবাবু পানিক পরে বললেন, ‘আমার একটি প্রশ্ন আছে, উত্তর দিও। কি উপায়ে আপনি দেশে ব্যক্তিস্বাভিত্ত্য আনবেন? গ্রীক সভ্যতার রেশ টানলে রোমানরা, তাকে সমৃদ্ধ করলে আরবরা, টিউটনিক জাতির কোল অস্থান তার সর্বনাশ করত যদি টিউটন জাতি প্রটেস্ট্যান্ট না হত। আর এই প্রোটেষ্ট্যান্টিজমের দৌলতেই বিজ্ঞান, ছাত্র সমাবেশে যান্ত্রিক সভ্যতা ও ব্যক্তিস্বাভিত্ত্য বোধ, অর্থাৎ লিবারেলিজম। আমাদের দেশে কি হবে? যুরোপের অগ্র স্ববিধা ছিল—তার ক্যাথলিক চার্চ। আমাদের সমাজ বন্ধন অত শক্ত নয়। রাষ্ট্র ভারতবর্ষের নেই, আছে শাসন-পদ্ধতি, সেটা না হয় বদলে গেল। আমার প্রশ্ন হচ্ছে এই—ধরণ আমাদের ঐতিহ্যে প্রত্যেক মানুষকে একান্ত করে দেখার অভ্যাস ছিল, বর্তমানে যে

অন্তঃশীল।

সব দল বাঁধা হচ্ছে তাতে বিধি ও অঙ্কশাসনের চাপে মানুষকে একান্ত করে দেখা হচ্ছে না, অথচ দল না বেঁধে কোন উপায় নেই, এখন কি উপায়ে প্রত্যেকের বৈশিষ্ট্য অক্ষুণ্ণ রাখবেন?' 'কোন কোন দলের উল্লেখ করছেন? আমাদের ইতিহাসে কি প্রত্যেকের বৈশিষ্ট্যকে সমর্থন করা হয়েছে? সমাজের কল্যাণসাধনে ব্যক্তির কল্যাণসাধনা বরাবরই অসম্ভব ছিল।' 'প্রথমে দ্বিতীয় প্রশ্নের উত্তর দিই। গোড়ায় বলেছি, ধারণা ছিল। ব্যক্তিস্বাতন্ত্র্যটি আনুমানিক সত্য অর্থাৎ hypothesis, সেটা খাটি পবর নাও হতে পারে। হিন্দু সমাজ বরাবরই মানুষের ওপর অত্যাচার করে আসেনি—তার প্রমাণ বানপ্রস্থ ও সন্ন্যাস এই পর্যায়ে দুটি। ব্রহ্মচর্য ও গার্হস্থ্য পর্যায়ে সমগ্রের প্রভুত্ব খাটিত, কিন্তু অগ্র দুটিতে নয়। তখন ব্যক্তিগত সাধনার দ্বারা সমগ্রের উপকার করাই ছিল সাধনার উদ্দেশ্য। এখন অবশ্য সবটাই গার্হস্থ্য। যদিও আমার ইতিহাস ভুল হয়, তবুও আদর্শ হিসেবে ব্যক্তিস্বাতন্ত্র্যের সাধনার উপায় আলোচনা করা চলে। আদর্শটা বড় এবং ঐ আদর্শ এখন নিতান্ত প্রয়োজনীয় স্বীকার করতেই হবে, কারণ আমাদের সমাজ নির্জীব, তার সাধারণ স্তর নীচু, তাকে উন্নীত করবার একমাত্র উপায় সমাজের প্রত্যেককে বড় করার স্ত্রযোগ দেওয়া। দেবেন কি উপায়ে? দ্বিতীয় প্রশ্নের উত্তরে আমি অনুষ্ঠানের নামোল্লেখ করছি। কংগ্রেস, গভর্ণমেণ্টের চাকরী, বৃত্তি, হিন্দুসভা, ইত্যাদি। তা ছাড়া নব্যগোষ্ঠী ত বটেই।' 'নব্য পরিবার কেন?' 'সেখানে স্বামীর উপর স্ত্রী অত্যাচার করে, স্ত্রী না করুন, স্ত্রীর বন্ধুরা করেন।

অবস্থা ভাল হলে নিকট আত্মীয়স্বজন দূরে চলে যান, কিন্তু দূরসম্পর্কের আত্মীয়েরা, বন্ধুরা, মধুমক্ষিকার মতনই আকৃষ্ট হন। মধুচক্রের অনুশাসন কি রকম জানেন ত? একেবারে জার্মান-পসন্দ্...বৈজ্ঞানিক...অথচ তাও চাই, খুব চাই...একটা পদ্ধতি চাই, নচেৎ সাধনার অর্থ থাকে না' 'বৈজ্ঞানিক পদ্ধতি একটা লোকের গোপন সাধনার কি উপকারে আসবে?' 'বৈজ্ঞানিক মনোভাব—অর্থাৎ কোন বাইরের শাসন না মানার প্রবৃত্তি, নিজের মার্জিত বুদ্ধি অনুসারে নিজের জীবন যাত্রা নির্বাহ করবার' প্রবল 'আকাঙ্ক্ষা; ল্যাবরেটরীতে কলকল্লা নাড়াচাড়া করার বিজ্ঞান নয়। প্রকৃতিকে শ্রদ্ধা করা, ইতিহাসকে মানা, অভিজ্ঞতা-স্থলভ বুদ্ধির দ্বারা নিয়ন্ত্রিত হওয়াই সত্যাকারের বৈজ্ঞানিক মনোভাব। আরবদের অভ্যাসই ছিল তাই। যাকে inductive intellect বলতে পারেন আমি তাই চাই।' 'সেটা কি হিন্দুদের মধ্যে পেলেন না?' 'হিন্দুদের মধ্যে নেই, হিন্দু ধর্মে আছে খানিকটা, যদিও গুরু ও বেদ মানাতে নেই! মনে হয়, হিন্দুদর্শনে আছে, সেই জগুই ভাবছি বেদান্ত, সাংখ্য পড়ব।' 'নবা হিন্দুয়ানী প্রবর্তন করতে চান?' 'চেষ্টা করে দেখব। মুসলমানরা যদি আরব সভ্যতার প্রতি বেশী শ্রদ্ধাবান হন, তা হলে ভারতবর্ষের কাজ সহজ হয়।' 'বিজ্ঞান-শিক্ষা?' 'সেটা সঙ্গে সঙ্গে চলবে। সংস্কৃত, আরবী ও বিজ্ঞান পড়লে দেশের স্তর উঁচু হবে।' 'স্বজন হেঁসে ফেলে। খগেন বাবু উত্তেজিত হয়ে বলেন, 'হাস্তন আর ঘাই করুন, কংগ্রেস ফংগ্রেসে

অন্তঃশীলা

কাজ হবে না। এর বেশী আর জানি না।’ ‘ব্যক্তিস্বাতন্ত্র্য বেশী হলে যান্ত্রিকসভ্যতাও সঙ্গে সঙ্গে আসতে বাধ্য’ ‘ততদিনে নতুন সমাজ যান্ত্রিক সভ্যতার প্রতিবন্ধক হবে। valuesএর পরিবর্তনে সব সম্ভব হয়।’ ‘সে ত’এক প্রকার ধর্মত্যাগ’ ‘ধর্মত্যাগ ও নতুন ধর্ম-গ্রহণ—আমি চাই conversion’—বলেই খগেনবাবুর মুখে হাসি ফুটে উঠল, ‘দেখুন, যত বড় বড় ভাব দিয়েই আরম্ভ করি না কেন, সিদ্ধান্ত সব ছোট্ট হয়ে যায়,’ ‘ছোট্ট-তে লজ্জা কিসের?’, ‘না, লজ্জা আর কি? তবে দাস্তিকতায় ঘা লাগে।’ ‘বিজ্ঞনকে ডাকছি—বিজ্ঞান—বিজ্ঞন...’

বিজ্ঞন ঘরে প্রবেশ করল, বলিষ্ঠ যুবক, বয়েসের পক্ষে অযথা দীর্ঘ। খগেনবাবুকে দেখে একটু থমকে দাঁড়াল। স্বজন বিজ্ঞনকে বসতে ইঙ্গিত করলে। খগেনবাবু নীরবে সিগারেট খাচ্ছেন দেখে বিজ্ঞন উঠে চলে গেল, পাশের ঘর থেকে একটা নেভিক্যাট সিগারেটের নতুন টিন ও লাঠটার খগেনবাবুর সামনে রাখলে, খগেন বাবুর হাতের সিগারেট শেষ হবার সময় পুনরায় উঠে গিয়ে একটি ছাই রাখার পাত্র খানলে ও নতুন টিন খুলে দিলে।...কেতা ছুরুস্ত ছেলে, বড় লোকের বংশধর, তাই রমলা দেবী ঘাটে যেতে দেন নি একে...‘বিজ্ঞন ভাল টেনিস খেলে, ইন্টার মিডিয়েট আর্টস পড়ে’ বি—‘কৈ কিছু খেলেন না?’ স্ব—‘শরীর ভাল নয়, খাওয়া উচিত নয়—বিজ্ঞন, তুমি নিজেই খগেন বাবুকে জিজ্ঞাসা কর না অবনী বাবুর ছবি কিসে ভাল?’ বিজ্ঞন চুপ করে বসে রইল দেখে স্বজন বলে, ‘আচ্ছা অবনীবাবু

এই ধরনের প্রতিকৃতি আঁকা ছেড়ে দিলেন কেন ?’ রবীন্দ্রনাথের প্রতিকৃতির ওপর চোখ রেখে খগেনবাবু বলেন, ‘স্বর্ধর্মে নিধনঃ শ্রেয়ঃ, অবনীবাবু যখন ঐ ধরনের ছবি আঁকতেন তখন নিজেও ধর্ম বোঝেন নি। তখন অঙ্ককরণ করতেন চমৎকার, এখন সৃষ্টি করেন’ বিজ্ঞান মূচকী মূচকী হাসছে দেখে স্বজন তাকে খেতে অহুরোধ করলে, কিন্তু বিজ্ঞান ঘাড় নেড়ে অসম্মতি জানাল। খগেনবাবু বিজ্ঞানকে প্রশ্ন করলেন, ‘আপনার বুঝি ঐদের ছবি ভাল লাগে না?’ ‘না, আমি পুরানো দলের’ ‘আপনার দল পুরানো নয়, আর্টের ইতিহাসে আপনার দলটি নাবালক। সিমাবো, জিয়টোর পূর্বে প্রকৃতির অঙ্ককরণ করাকে আর্ট বলত’ না, তাঁদের পরেও বাইজ্যানটাইন আর্ট-ও জীবিত ছিল, এখন আবার সেই ধারাকে পুনর্জীবিত করার চেষ্টা চলছে। তা ছাড়া, পশ্চিমযুরোপ সমগ্র যুরোপ নয়, যুরোপ সমগ্র বিশ্ব নয়, আর তিনশ’ বছরে সময় ফুরিয়ে যায় নি’

স্ব—তা নয় ঠিক, বিজ্ঞানের আপত্তি নতুন দলের ছবির রুগ দেহে। নিজে ভাল টেনিস খেলে কি না!

খ—তা হলে ওর হেলেন উইলস, ল্যাংলার ছবি দেখা কিংবা সুইডিশ ড্রিলের ফোটো দেখাই ভাল।

স্ব—আমিও বলি বিজ্ঞানকে, ঐদের অঙ্কিত মহিলা তোমার ভাবী পত্নীর ফোটো না হলেই হল।

বিজ্ঞান উঠে পড়ল দেখে খগেন বাবু হাসলেন। দাঁড়িয়ে উঠে উদ্ভার সহিত বিজ্ঞান বলে ‘যা দেখছি, তা আঁকব না?’

অন্তঃশীল।

খ—আপনি দেখছেনই না, দেখার অভ্যাস করা চাই।

বি—কি ভাবে অভ্যাস করব ? চোখ বুজে, ঘুমিয়ে, দুঃস্বপ্ন দেখে ?

খ—চোখ বুজেই দেখতে হয়, নচেৎ বাজে জিনিষের সমগ্রত চোখকে আচ্ছন্ন করে ; স্বযুপ্তির অবস্থাই আর্টের পক্ষে সব চেয়ে ভাল, কেন না, জেগে থাকলে অল্প ইন্দ্রিয় ধ্যানচ্যুত করে। দুঃস্বপ্ন নয়।’

স্ব—নতুন ছবি দেখে মনে হয় কিন্তু যেন দুঃস্বপ্ন দেখছি—
এমনি অদ্ভুত !

খ—দুঃস্বপ্ন হয় গরহজমে। যুরোপ নতুন খাবার পেয়েছে অনেকদিন উপবাসের পর, তাই বেশী খেয়ে ফেলেছে। সত্যকারের আর্টিষ্টের হৃদয়শক্তিতে কোন দোষ নেই।

বি—দোষ চোখেই। চোখ বুজলে সরষের ফুলই দেখি। আপনি কি ভাবেন যে বড় বড় লেখকরা চোখ বুজে পৃথিবী দেখেছেন ?

খ—আপনি কাকে বড় বলেন ?

বি—এই ধরুন চিত্রকরের মধ্যে রেগী, কিংবা গ্রয়েজ, লেখকদের মধ্যে এচ, জি, ওয়েলস্।

খ—‘নাবালকের চিত্রকর ও সাহিত্যিক।’ বিজনের মুখ লাল হয়ে উঠল...

বি—আপনার মতে কে বড় শুনতে পেল আমার বড় উপকার হয়।

থ—রবীন্দ্রনাথ পড়েন ?

বি—না।

থ—কেন ?

বি—জ্ঞোর নেই লেখায়।

থ—তা বটে, হাতে গুল নেই।...বিজ্ঞান উঠে দাঁড়াল

বি—ওয়েলস্ বড় নয় কেন ?

থ—ভারী অস্থির, নিতান্তই প্রগল্ভ, সর্বসাধারণের তুষ্টিসাধন করে, চোখ টেনে বড় করে চায়, তাই অত ব্যজে জিনিষ চোখে এসে পড়ে, সেই জন্তু তাঁর সর্ববিষয়েই মন্তব্য করা চাই। স্থির নয়, শাস্ত্র নয়, এই যুগেরই লেখক, সর্বযুগের অন্তর দিয়ে যে ধারা প্রবাহিত হয় তার সন্ধান তিনি পান নি। বর্তমান যুগের পিতা যেমন ছেলের বন্ধু হতে চায়, তার সঙ্গে বেশী কথা কয়, উপহার দিয়ে দিয়ে তার স্নেহ প্রমাণ করতে ব্যগ্র হয়, স্নেহের মাত্রা ছাড়িয়ে ফেলে, ছেলেকে উন্নত করবার জন্তু যেন প্রাণপাত করেছে দেখাতে ব্যগ্র হয়, ওয়েলস্ সেই ধরণের সর্বসাধারণের বন্ধুপিতা।

বি—তাতে ক্ষতি হয় না, লাভই হয়।

থ—ক্ষতি ভীষণ, ছেলে আব্দেরে হয়ে ওঠে।

বি—কি করা উচিত, ছেলেকে ?

থ—আত্মীয়কে দূরে রাখলেই আত্মার মঙ্গল, নিজের এবং আত্মীয়ের।

বি—ছেলে উচ্ছন্ন যাবে না ?

অন্তঃশীলা

খ—যায় যাক্ গে.....খগেনবাবু সিগারেট ধরালেন ।

সু—তিনিও কিন্তু একীকরণের বিপক্ষে ।

‘খ—মুখে তাই বলেন, বাস্তবিক ত্রা নয়, নচেৎ নতুন ব্যবসায়ী বড়লোক দিয়ে জগৎ চালাতে চান ? তারা ঐ একীকরণের সাহায্যেই বড় হয়েছেন ।

সু—কিন্তু স্বাধীনতার একটা সীমা থাকা চাইত’ ?

খ—সীমা ? নিজের চারপাশে যে যতটুকু অবসর তৈরী করতে পারে, সেইটুকুই তার স্বাধীন কক্ষক্ষেত্র ।

সু—তা ছাড়াও...

খ—তা ছাড়া নয়, তারপর বলুন । তারপর, তারপর, বোধ হয় নিজের অতিরিক্ত কোন শক্তি কিংবা নিয়তির বাধ্যতা ইচ্ছা ক’রে, জেনে শুনে স্বীকার করার নামই স্বাধীনতা, অন্ততঃ তাইতেই জগতের মঙ্গল ও পরিপূর্ণতা । পিতার মৃত্যুর প্রার্থনা করছি না, তবে যে ছেলে পিতার অধিকারের হেতু আবিষ্কার করে সেই ছেলে ভাল ছেলে ; আবিষ্কারের পর যে বাধ্যতা আসে তাইতেই সংসারের শান্তি ।

সু—হেগেল, কার্ল মার্কসের ঐ ধরণের স্বাধীনতার অর্থ আজ রুশিয়ায় নিরর্থক হয়েছে শুনতে পাই ।

খ—ইতিমধ্যে তাই হয়েছে, কিন্তু গক্কীর মতন লোক বলেছেন যে রুশিয়ার ব্যক্তিত্বের পূর্ণ বিকাশ শুরু হয়েছে ।

সু—সেখানে কিন্তু দলের প্রভুত্ব ।

খ—জানি, কিন্তু উদ্দেশ্য ভিন্ন । তা ছাড়া, দলের কার্যাবলীর

সমালোচনা দলের সভাদের মধ্যে এতই রুঢ় যে অনেকের মতে তাতে ক্ষতি হচ্ছে।

সু—উদ্দেশ্য অনুসারেই তা হলে কার্যাবলী বিচার করতে হয়!

খ—উদ্দেশ্য অসাধারণের। অসাধারণের পক্ষে বনবাস চাই, প্রথম অবস্থাতে, লেনিনের জীবনী পড়ুন—তার বনবাস জীবনের প্রথমাংশে, যেমন হিন্দুদের শেষাংশে। লোকটা কত ভেবেছিল! সাইবিরিয়া, সুইজারল্যান্ডে বসে—বই-ই লিখেছেন কত! দেখুন সুজন বাবু, মাতুষের একটা জীবন আসে যখন নিজেকে সরিয়ে রাখতেই হয়। বড় লোকে কখনও জনসাধারণের নিকটাত্মীয় হতেই পারে না। এই বনবাস আত্মরক্ষার জগু, আত্মোন্নতির জগু, পরের স্বাধীনতা, অগ্নের সঙ্গে মৈত্রী কি সাম্যের জগু নয়। আত্মরক্ষা কথাটির অপপ্রয়োগ হয়েছে, আদং কথা আত্মজ্ঞান এবং আত্মপ্রতিষ্ঠা, অর্থাৎ স্ব-রাট হওয়া। অন্তরে ভূয়ো, আর মুখে স্বাধীনতা, সাম্য, মৈত্রী! ওসব ধরতাই বুলি, কথার কথা, মন ভুলানো জাদুমন্ত্র!

বিজন চেয়ার ছেড়ে দাঁড়িয়ে উঠে বলে, ‘সাম্য, মৈত্রী, স্বাধীনতা কথার কথা!’

খ—আজ্ঞে হাঁ, ইতিহাসের পাঠ্য পুস্তক থেকে মুখস্থ বিচার লালাক্ষরণ মাত্র। প্রকৃতির মধ্যে সাম্য নেই, আত্মোন্নতির কে কোন ধাপে রয়েছে তরে ওপর সাম্য নির্ভর করছে। স্বাধীনতা বহিঃপ্রকৃতিতে নেই, জড় আমাদের টুটি চেপে মারছে...

অন্তঃশীলা

জড়ের দৌরাণ্ডো, জড়ের dictatorshipএ প্রাণ হাফিয়ে
ওঠে।

বি—আর মৈত্রী ?

খ—মৈত্রী, মৈত্রী,.....ঠিক জানিনা।

বি—আপনি আবার জানেন না! স্বজন বিজনের দিকে
তীক্ষ্ণদৃষ্টিতে চাইল।

খ—না, সত্যি ঠিক জানি না...আমি জানি না...তর্ক করবার
জ্ঞান তর্ক করি না, জ্ঞেতবার জ্ঞানও নয়, তাই বলছি, জানি না...
মানুষ ভীষণ একলা, তবে সঙ্গী চায়...আমার বড় দেরী হচ্ছে,
যাই।’ খগেন বাবু বেরিয়ে এলেন—গেটের কাছে স্বজনকে
বল্লেন, ‘চলুন না, বইএর দোকান পর্য্যন্ত, এতক্ষণ বই বিক্রীর
সময় হয়েছে’

পথে স্বজন জিজ্ঞাসা করলে ‘মৈত্রী মানে কি ?’

খ—‘মৈত্রীর মানে জানি না—বন্ধুত্ব বৃদ্ধি, সেও একজনের
সঙ্গে অগ্রজনের সম্বন্ধ, সকলের সঙ্গে একের নয়, সকলেরও নয়।
বোধ হয় দেহের ব্যাপার কিছু।

সু—সঙ্গীর্ণ স্থানে অনেক লোক একত্র থাকার দরুণ ব্যক্তির
দৈহিক প্রক্রিয়ার পরিবর্তন হয়, সেই জ্ঞান, ঠিক কি পদ্ধতিতে
এখনও জানা যায় নি, মানুষ জনতার মধ্যে নিজের বুদ্ধিস্বাদি,
স্বাতন্ত্র্যজ্ঞান হারিয়ে ফেলে—আপনি কি তাই বলছেন ?

খ—দেহতত্ত্ব দিয়ে সম্পূর্ণ ব্যাখ্যা হয় না বোধ হয়। বন্ধুত্ব
হল খানিকটা আকাঙ্ক্ষা, প্রতীক্ষা, অসম্পূর্ণতা বোধ। লোকে

রেতেই পারেনি মৈত্রীটা কি বস্তু। লোকে জানে প্রেমকে, কিন্তু মৈত্রী আরো ব্যাপক। এক রকম খিদে বলতে পারেন। এ, দেহগতও বটে খানিকটা। মাটির জন্তু যে খিদের পরিচয় পাওয়া যায় বটগাছের নতুন ঝুরিতে, বন্ধুত্ব সেই রকমের, নচেৎ টিগাছ টলমল করে ঝড়ে, উলটে যায় সহজে। রমলা দেবীর সঙ্গে ঐ কথাই হচ্ছিল। আচ্ছা...বিজন আপনার কে?

স্ব—‘ভাই’ থ—‘আপনার?’ স্ব—‘না’ থ—‘আত্মীয়?’ মামাতো ভাই ‘বাপের এক ছেলে?’ ‘হাঁ মাসীমা নেই’ ‘তাই...’ বিজন চমৎকার ছেলে, প্রাণ আছে, খুব উদারহৃদয়, একদিন নিয়ে যাব আপনার কাছে’

থ—‘বুদ্ধি কেমন?’ স্ব—‘বেশ বুদ্ধিমান—যেমন খেলায় তমনি পড়াশুনায়, অল্প পড়েই ভাল করে। কথা কয়ে দখবেন’

থ—বিজন আমার বিপরীতধর্মী। আমি কাশী যাচ্ছি’ স্ব—‘কাশী? কবে?’ ‘ঠিক নেই। কাশী থেকে অল্পত কোথাও যাব বোধ হয়, কোলকাতার ভিড় ভাল লাগছে না।’ ‘সেখানে আত্মীয় আছেন বুঝি?’ ‘হাঁ, মাসীমা আছেন তবে আত্মীয়েরই দরকার কি? স্বজন, মৈত্রীতে বিশ্বাস কর?’

‘জানি না’ ‘কি মনে হয়?’

‘মৈত্রী মানে Catalysis—সম্বন্ধ স্থাপন করিয়ে দেওয়া—ধ্বংসের জন্তু নিজে বদলে গিয়ে’

‘কিন্তু পুনরায় নিজেতে ফিরে আসা চাই’

অন্তঃশীলা

‘তাত’ বটেই’

‘আপনি আমার মতের দেখছি। অর্থাৎ ঘটকালি করা?’
খর্গেন বাবু হঠাৎ স্ফুর্জনের কাঁধে হাত রাখলেন, ‘ঘটক ঠাকুর
হলেন কবে থেকে? এত অল্প বয়সেই হতে হয়েছে!’ ‘স্বভাবে
ছিল’ ‘স্বভাব না ভাগ্য? অবশ্য একই কথা।’ ‘আপনি মৈত্রী
মানেন?’ ‘পরে জেনে বলব’ ‘কবে?’ ‘কাশী থেকে জানাব’
‘লিখবেন?’ ‘আমার খুব ভাল লাগবে আপনার চিঠি পেতে;
কবে যাচ্ছেন?’ ‘আজই ভাবছি’ ‘আজই!’ ‘কি জন্ম আর
থাকব!’ ‘রমলাদি জানেন আজ যাচ্ছেন?’ ‘তিনিই যাবার
সুবিধা করে দিলেন...পুরোহিতের সঙ্গে বন্দোবস্ত করে...জানেন
নিশ্চয়। আর মতামতের প্রয়োজনই বা কি!’ ‘না, তাই বলছি’
‘চিঠির জবাব দেবেনত?’ ‘আগে লিখুন, তার পর। ষ্টেশনে
যাব?’ ‘না’

বইএর দোকানে লোকজন; প্যাকেট নিয়ে খর্গেন বাবু
বাড়ী এলেন। ‘মুকুন্দ, মুকুন্দ, আজ সন্ধ্যার টেনেই কাশী
যেতে হবে তাড়াতাড়ি কাজ সেরে নে। গুছিয়ে নাও নিজের
জিনিষপত্র, ঠাকুরকে খাবার দিতে বল, সেও যাবে। আত্মীয়কে
তোমার খবর দাও, বাড়ী আগলাবে। হারে চাবিগুলো
কোথায় রে!’

মাননীয়াসু,

আমি প্রায় এক সপ্তাহ কাশী এসেছি। এখনও পারিপার্শ্বিকের সঙ্গে খাপ খাওয়াতে পারিনি, সেই জন্য আপনাকে পত্র দেওয়া হয়নি। আজ সকালে অবসর পেয়েছি; তাই প্রথমেই আপনাকে চিঠি লিখছি।

আসবার দিন সকালে আপনার সঙ্গে দেখা করতে যাই। শুনলাম, আপনি দমদমা গিয়েছেন। একটু নিরাশ হয়েছিলাম বলে আশা করি বিশ্বাস করবেন। আপনার আত্মীয়া কেমন আছেন? সৃজনের সঙ্গে ঘনিষ্ঠ পরিচয় হল, বড় ভাল লাগল। তার প্রকৃতিতে যে ভারসাম্য আছে সেটি স্বাভাবিক পদার্থের নয়, চলিষ্ণু জীবের। ভাবছি পূর্বে আলাপ হয়নি কেন? আপনি ঠিকই বলেছিলেন, নিজেকে সরিয়ে রাখতে সে ভালবাসে, সেই

জগত তার অল্পগ্র উপস্থিতিতে বিরোধের সমন্বয় হয়। বিজ্ঞান প্রাণময় জগতের অধিবাসী, এখনও অপরিণত। সে ভাবে তার আছে স্থিরসিদ্ধান্তে আসবার যৌবনশূলভ দৈব অধিকার।

কাশীতে কেমন আছি? কাশীতে ধুলো আর ভিড়, ভিড় আর ধুলো, কাশীর টেনে ভিড়, তার বেষ্টিতে ধুলো। ভিড়ে মুকুন্দ হারিয়ে গিয়েছিল, অনেক কষ্টে উদ্ধার করি। 'ষ্টেশনে দেখলাম 'বাস্'! কোথাও টঙ্কাচড়ে পশ্চিমে এসেছি অল্পভব করব, না সেই কোলকাতার যান-বাহন! কি যাচ্ছেতাই ষ্টেশন! মনকে ছোট ও সঙ্কীর্ণ করে দেয়; ওপারে যাবার পুলের আচ্ছাদন ঘাড়ের ওপর ঝুঁকে পড়েছে। বোধ হয় এদেশের কর্তারা ভাবেন যে পবিত্রস্থানের প্রবেশদ্বার ঐ রূপই হওয়া উচিত; এবং সংসারের চাপে মন কুজ, হ্যাক্স সঙ্কচিত না হলে ভগবানের দিকে মন যায় না, ভক্তিরসে মন আপ্ত হইয়া না। রস ত' পরে আসবে কিন্তু ইতিমধ্যে রাস্তার ধুলো ও রুদ্ধতায় মনের আত্মতা শুথিয়ে ঝুনো হয়ে যাচ্ছে যে! রাস্তার দুধারে গাছের পাতা পর্যাস্ত সবুজ নয়, কাশীবাসী বৃদ্ধ-বৃদ্ধার পক্ককেশের অল্পরূপ। কিন্তু একটা জিনিষ ভারী তাজা ও ঝকঝকে; পানের দোকানের পিতলের বাসন, ও রং বেরংএর ফুকো গোলা ও শিশি। দিনের বেলায়ও দোকানের বাহার খোলে। কিন্তু এত ভোগের চিহ্ন! কাশীতে এসে মানেৎ ক'রে বাবা বিশ্বনাথকে কেউ পান দিয়ে গিয়েছে শোনা যায় নি। কাশীর পানের চেয়ে বাঙ্গালী পরিবারের বাংলা পান সাজা ঢের ভাল। ছাঁচিপান খেতে পারি না।

সহরে প্রবেশ করবার এত খারাপ রাস্তা সভ্য জগতে কল্পনা করা যায় না, আরো খারাপ হয়েছে সারাতে গিয়ে। সংস্কারের অবস্থা কি সর্বক্ষেত্রেই এই রকম? যদি তাই হয়, তা হলে কয়েকদিনের মধ্যে আপনার কাছে মুখ দেখাতে পারব মনে হয় না। কিংবা হয়ত কাশীর প্রতি অবিচার করছি। কাশী আরম্ভ হয় মেংগল সরাই থেকে, আর সব চেয়ে বেশী উপভোগ করা যায় রেলের পুল থেকে। ঘাটে দাঁড়িয়ে এই পুলকে ঘূর্ণা করতে ইচ্ছে হয়, কিন্তু পুল থেকেই কাশীর সঙ্গে ভালবাসা হয়, প্রথম দর্শনেই। কোন্ স্থানে দাঁড়িয়ে দেখা হচ্ছে তার 'ওপর সৌন্দর্য্যামৃতভূতি নির্ভর করে না কি? কিন্তু উপভোগের সময় স্থানের কথা মনে থাকে না।

মানুষ ভারি অকৃতজ্ঞ, নয় কি? নচেৎ কাশী চলে আসি? মাসীমা একরকম ভালই আছেন বলতে হবে। কিন্তু একেবারে বৃদ্ধা হয়ে গিয়েছেন, সে শ্রী আর নেই! এক কালে মাসীমার রূপ ছিল, কিন্তু এখন দেখলে দুঃখ হয়। লাবণ্য পুঁছে গেছে, জড়তা আশ্রয় করেছে, শুগিয়ে গিয়েছেন। সব চেয়ে আশ্চর্য্য এই যে মাসীমার চোখের সে জ্যোতি নেই, মরা মাছের মতন চোখ, একটা বুড়ো চশমা পরেন স্মৃতি বেঁধে। তাঁকে নতুন চশমা পরতে, অন্তত ফ্রেমটাও বদলাতে বললাম, রাজী হলেন না। কিন্তু তাইতেই সেলাই করছেন, যখনই সময় পান তখনই পাড়ার কারুর না কারুর নাতিপুত্রির জন্ম কাঁথা তৈরী করছেন। কাঁথা, পেনী ফক্ নয়, বলেন নতুন কাঁট ছাট বুঝতে পারেন না, তাঁদের সময় ছিল এক জামা ও দোলাই, পরাতে

অন্তঃশীলা

বিড়ম্বনা হত না, এখন কোথা দিয়ে মাথাগলাতে হবে তাই মাথায় আসে না। মাসীমা পরের জন্ম বরাবরই সর্বত্যাগী হতে পারতেন, কিন্তু এই বয়সে, কাশী ব'সে, সময় অসময়, পরের জন্ম কাঁথা সেলাই!—এ আমি বরদাস্ত করতে পারি না। কাঁথা শুনলেই মনে হয় বৎসরে বৎসরে নিয়মিত সন্তানপ্রসব, শিশুমৃত্যু, অনশন, অনাটন। কাঁথা আমি অত্যন্ত ঘৃণা করি, ভারতবর্ষের সমগ্র দৈন্ত ঐ কাঁথার প্রতি সেলাইএ গাঁথা। অয়েলরুখও জঘন্ট। সস্তায় তোয়ালে পাওয়া যায় না।

কাল দুপুরে, দুপুর নয়, বেলা আড়াইটে তিনটে হবে, মাসীমা দ্বাদশ মন্দির সদলবলে প্রদক্ষিণ করে, স্নান করে, স্বপাকে খেতেই বেলা দু'টো, কিছুতেই বামনী রাখবেন না, দেখি, মাসীমা রোয়াকে বসে খুব মন দিয়ে সূচের রাক্ষাস সূতো পরিণে কাঁথার ফোড় তুলছেন। মনে হল যেন নিয়তি, মুখে কোন প্রকার ভাব নেই, আছে মাত্র একাগ্রতা, নীরবে নিজের কাজই করে যাচ্ছেন, কোন শব্দ নেই, প্রাণের চিহ্নমাত্র নেই। বিশেষের মধ্যে অথঙের আভাস—চিত্রের বিষয়। মনে হল, ভারতবর্ষে যতগুলো অপ্রয়োজনীয় শিশু মরে ততগুলি লাল সূতোর ফোড়। শিশুদের পিতামাতার বিবাহে নিয়তি আপত্তি করেনি কেন? বিবাহ ঘটিয়ে, জন্মের স্নযোগ দিয়ে, মৃত্যুকে বরণ করা—এ কি নিষ্ঠুর পরিহাস! বড় ভয় হল, মাসীমা চেয়ে দেখলেন, কিছুই বলেন না, নিজের কাজ করে যেতে লাগলেন, সূচের মুখে রক্তমাখা সূতো। ভারি একলা মনে হল—মাসীমার জীবনে আমি অপ্রয়োজনীয় শিশু। মাসীমা

আছেন—ভালমন্দের অতীতে আছেন। অপ্রয়োজনীয়কে বর্জন করবার নামই কি সাধনা? ভূত ছাড়াবার মন্ত্র মাসীমার কাছে শিখতে হবে।

আমার খাওয়া দাওয়ার কোন কষ্ট হচ্ছে না। মুকুন্দ খুবই যত্ন করেছে—তবে ডাকলে পাওয়া যায় না, কেবলই মাসীমার সঙ্গে মন্দির দেখে বেড়াচ্ছে। বেড়াকুগে! আমার কাজই বা কি! মুকুন্দ অনেকদিন পরে অবসর পেলে। বামনটা ভাল, কাশীতে অনেক তরকারি পাওয়া যায়, শুনলাম শীতকালে বেগুন উঠবে—পাঁচসের পয়সান্ত ওজনে! লোকটা রাঁধে চমৎকার। আপনি নেবেন ওকে? কুড়ি টাকায় রাজি হয়েছে।

নিজের কথাই সাতকাহণ। আপনি কেমন আছেন, কি করছেন, কি ভাবছেন জানালে আমাকে কৃতজ্ঞ করা ছাড়া নিজের প্রতিজ্ঞা পালনও হবে।

ইতি খগেন্দ্রনাথ

পুঃ চিন্তামনিকে একবার আমার বাসায় পাঠিয়ে দেবেন, বইগুলোতে উই ধরল কিনা দেখতে। কিছু নিমপাত ছেড়ে দিলে মন্দ হয় না। যে চিঠিগুলো এসেছে এইখানেই পাঠিয়ে দেবেন। পোষ্ট অফিসে লিখে দিচ্ছি এবার থেকে এইখানে পাঠাতে। স্বজনকে ধরবেন পরে তাকে লিখব। আমার লাইব্রেরী থেকে সে বই নিতে পারে। আমার সিগারের বাক্স টেবিলে আছে, নষ্ট হয়ে যাবে, সিগারগুলো বইএর তাকে ছড়িয়ে রাখলে পোকা ধরবে না। থঃ

অন্তঃশীল।

মানাবরেম্,

আপনার চিঠি পেয়েছি। যথাসময় উত্তর দিতে পারিনি বলে ক্ষমা করবেন। আপনার যাবার দিন সকালে নানাকারে বাড়ীতে উপস্থিত থাকতে পারিনি। আত্মীয়্যর এমন কিছু হয়নি, তিনি ভালই আছেন। আপনার চিঠিপত্র ডাকযোগে পাঠাচ্ছি। মুকুন্দের লোক যথাসম্ভব বাড়ি রক্ষা করছে, কিন্তু ওপরের ঘর চাবিবন্ধ থাকার দরুণ পরিষ্কার হচ্ছে না। চাবি পেলে মধো মধো চিন্তামণি গিয়ে কাঁট দিয়ে আসবে—নিজে গিয়ে বই-গুলি সাজিয়ে রাখব। তবে আমার মাজান কি আপনার মনোমত হবে? শুনেছি আপনি অণ্ড কাকুর বই কিংবা টেবিল সাজিয়ে দেওয়া পছন্দ করেন না।

এখানকার খবর ভাল। বিজ্ঞান ভাল আছে, সে ম্যাচের জন্ত প্রস্তুত হচ্ছে। স্বজনকে আপনি ভাল বলেছেন খবরটি দিতে তাকে বড় ইচ্ছা হয়েছিল, কিন্তু লোভ সম্বরণ করেছে। বাস্তবিকই স্বজন খুব ভাল। তবে কেন ভাল আগে বুঝতে পারিনি। তার মনে অনেক প্রশ্নই ওঠে, কিন্তু সে কোথা থেকে যেন আপনা হতেই উত্তর পায়। স্বজন বিজ্ঞানের পিসতুতো ভাই, ছেলেবেলা থেকেই মামার কাছে মানুষ, পিতৃমাতৃহীন, তার বাবা সম্মাসী হয়ে যান শুনেছি, তার মাকে আমি দেখেছি, গোরার আনন্দময়ী মা। স্বজনের মামা স্বজনকে বড় ভালবাসেন। বিজ্ঞানই বাড়ির কর্তা তার পরামর্শেই সংসার চলে, বিজ্ঞানের মা নেই, কিন্তু স্বজনের জ্ঞান শৃঙ্খলার অভাব নেই। বিজ্ঞানের বাবা বিজ্ঞানকে স্বজনের

হাতে সঁপে দিয়েছেন, প্রায়ই তাঁকে মফঃস্বলে থাকতে হয় !
বিজনের বাবা আমার বাবার বাল্যবন্ধু—স্বজনকে আমি এইটুকু
থেকে জানি। আমার চেয়ে অনেক ছোট, কিন্তু নিজেকে মানে না,
জ্ঞানে বুদ্ধ। তারও দুঃখ যে আপনার সঙ্গে তার ইতিপূর্বে পরিচয়
হয়নি। এখন সে কি একটা লিখছে, তাই ব্যস্ত। তবে প্রায়ই
এখানে আসে, আপনার কথা খুবই কয়।

বিচিত্রায় রবীন্দ্রনাথের দুই বোন বেরিয়েছে, পড়েছেন ?
কেমন লাগল আমাকে যদি লেখেন, তা হলে আমার উপকার
হয়। সেই ভাবে আমি বুঝতে চেষ্টা করব।

মাসীমার শরীর ভাল নয় জেনে দুঃখিত হলাম। এই বয়সে
মানুষের মতিগতি ধর্মের দিকে যাওয়াই স্বাভাবিক। মুকুন্দ
আপনাকে যত্ন করছে ও ঠাকুর ভাল রাখছে শুনে নিশ্চিন্ত হলাম।
কাশীর ঘাটে যখন বেড়াতে যান ভাবি, তখন সানাই শুনতে বড়
ইচ্ছে হয়। গান ভালবাসি, কিন্তু ভাল করে শিগিনি, পরতৃপ্তির
জগ্না শেখান হয়েছিল, পরতৃপ্তির জগ্না গেয়েছি। কিন্তু আরত'
শেখা হবে না।

মাসীমার শরীর যদি এতই খারাপ হয় তা হলে একটা নিজের
জগ্না বাড়ি নিন্না, লোকজনও সঙ্গে আছে। বলেন ত' চিন্তা
মণিকে পাঠিয়ে দিই ? অধিক আর কি লিখব ? কোন প্রয়োজন
হলে নিঃসঙ্কোচে লিখবেন, পত্রপাঠ, পাঠিয়ে দোবো। ইতি—

রমলা

অন্তঃশীলা

মাননীয়াসু,

আপনার চিঠি পেয়েই লিখতে বসেছি, ভাবছি আজ আর কোথাও বেড়াতে যাব না। গিয়ে কি হবে বলুন? সেই সব পেন্সনভোগী বৃদ্ধ বৃদ্ধার দল! তবে ঘাট আমাকে টানে, তার অসমতা তার সনাতনত্ব তার বৈচিত্র্য তার অ-পাখিব ইঙ্গিত আমাকে স্বপ্নলোকে নিয়ে যায়। ঘাটের ওপর সন্ধ্যার ছাপ, সভ্যতার পলি পড়েছে, তার ওপর দিয়ে হেঁটে বেড়াচ্ছে বিরক্ত সন্ন্যাসী নয়, বিংশ শতাব্দীর বিরক্তিকর স্বাস্থ্যস্বেষী বৃদ্ধ, বিতাড়িত বৃদ্ধা। মা অনেকক্ষণ মারা গিয়েছে, কচি ছেলে মরা মা'র কোলের কাছে শুয়ে দুখ খাচ্ছে। কি রকম গা ছম্‌ছম্ করে ওঠে না?

এই ঘাটের ওপর যে 'ইতর' জনমানব নির্ঝিল্লি, নিশ্চিন্তমনে বেড়িয়ে বেড়াচ্ছে তারা ইতিহাসের দল সঙ্ক্ষে সচেতন নয়। তারা অতীতের উত্তরাধিকারী, কিন্তু কি রকম জানেন? অণু উপমা দিচ্ছি, কারণ এঁদেরকে শিশুর সঙ্গে তুলনা করা উচিত নয়, যুগ-ধরা, টোল খাওয়া, আড়ষ্ট স্বভাব শিশুর নয় নিশ্চয়। পোস্তাপুস্ত্রের মতনই এঁরা অন্তঃসারশূন্য; পোস্তাপুস্ত্র যেমন সম্পত্তি অর্জনের সাধনা ও ইতিহাস সঙ্ক্ষে উদাসীন, এবং উদাসীন বলেই সম্পত্তি রক্ষা ও তার চেয়ে দরকারী কাজ সম্পত্তিবৃদ্ধি সঙ্ক্ষে দায়িত্বজ্ঞানী হয় না, কাশীর ঘাটবিহারীরাও তেমনি। ইচ্ছে করে এদেরকে বলি, 'ওরে তোরা জানিস, কি করে বৃদ্ধদেব এইখানে প্রাণহীন ও প্রাণনাশী যাগযজ্ঞের বিপক্ষে মালুমকে মাথা তুলে দাঁড়াতে

বলেছিলেন ! তোরা জানিস ভগবান বুদ্ধদেবের ভাষা ? সে ভাষা সংস্কৃত নয়, অস্তরের, সে অস্তরের প্রকৃতি ভিন্ন ধরণেরই, সে অস্তর মহাকাব্য শুনতে তৎপর উৎসুক, উন্মুগ্ন । তারপর এই কাশীতে এলেন শঙ্কর হিন্দুধর্মের প্রাণ প্রতিষ্ঠা করতে । কি অদ্ভুত এই লোকটি ! আর্ষাভূমি আর দাক্ষিণাত্যের পার্থক্য ঘূচে গেল, এখন গভর্নমেন্টের বড় চাকুরী অধিকার করে মাদ্রাজীরা যেমন ভারতবর্ষের ঐক্য প্রচার করছেন তেমন ভাবে নয়, কেবল তেজ ও দুঃসাহসের জোরে । শঙ্করের মত অসীম সাহস কার ? নেলসনের নাটকী সাহসের কথা শুনে হাঁপি পায় । জ্ঞানের সীমা নেই—উত্তর ভারতী ও রাজা অমরকের গল্প সত্য নয়—জলছে যেন একটা শিখা । তারপর কাশী মরেও মরেনি—মধ্যযুগের সব মহাত্মারই পদধূলি পড়েছে এই কাশীতে, এখানে এসে সকলেই কৃতার্থ হয়েছেন । বেণীমাধবের ধ্বজা ভেঙ্গে কেন আওরঙ্গজেবের মসজিদ হল বলুন ? ঘাটের ভিড়ে দোষ দেবে আওরঙ্গজেবকে । কিন্তু তার দোষে ধ্বজা ভাঙেনি, তাঁর গুণে চূড়া উঠেছিল । লোকটাকে আমার বড় ভাল লাগে—তার মধ্যে নিষ্ঠা ছিল, একাগ্রতা ছিল—তা ভাল বুঝত তাই করবার সাহস ছিল—আমার মত দুর্বল ছিল না । মানবেন না ? কিন্তু চিঠি লিখতেন চমৎকার ! সেই যাই হোক, এই কাশীতে মধুসূদন, সরস্বতী নামে এক মহাপণ্ডিত বাঙ্গালী থাকতেন—তখনও বাংলা দেশ ভারতবর্ষকে বিশ্ববিদ্যালয়ের অধ্যক্ষ যোগান দেবার ভার নিয়েছিল । ইনি বুদ্ধি দিয়ে হিন্দু-ধর্মকে বাঁচাতে চান । আমি এঁকে টমাস অ্যাকোয়াইনাসের সঙ্গে

অন্তঃশীলা

তুলনা করি। তারপর সেদিন পর্য্যন্ত দয়ানন্দ, ভাস্করানন্দ এবং আমি ষাঁকে সব চেয়ে শ্রদ্ধা করি—সেই তৈলঙ্গ স্বামী কাশীর গৌরব অক্ষুণ্ণ রেখেছিলেন। তৈলঙ্গ স্বামীই এ যুগের একমাত্র বৈদান্তিক! বেদান্তের চরম পরিণতি তাঁতেই পাই—*reductio ad absurdum*! অত স্থির, অত ঘন, অত গাঢ় চরিত্র কোথাও দেখি নি। কর্মবীর নন, মোনাই—দুটো ভিন্ন থাকের চরিত্র—অবতার নন, যোগী। জনসাধারণ অবতার চায়, আমি চাই যোগীকে। যোগী অবতারের চেয়ে বড়, কর্ম লয় পেয়েছে যোগীতে, সেই জন্ত যোগী নেমে এসে অবতার হন। যদি সন্ন্যাসী হতাম তা হলে তৈলঙ্গ স্বামীর কাছে দীক্ষা নিয়েই হতাম—যদি তিনি দীক্ষা দিতেন। এখনও কাশীতে হয়ত দু একজন সাধু অছেন—তাঁদের সঙ্গে দেখা পাওয়া শক্ত। কিন্তু এই জনতার মধ্যে আসবারই বা কি প্রয়োজন তাঁদের? হিমালয় কি লোকারন্ত হয়েছে? এলেনই যদি দেখা দেন না কেন? দেখা দিন আর নাই দিন, কাশীতেই হিন্দুসভ্যতার ধারাবাহিকতা অটুট আছে—তবে খুঁজতে হয়, যেমন আমি খুঁজছি। ইংরেজী সভ্যতা, দর্শন ও খবরের কাগজ একে ছুঁতে পারেনি। ধারাটি হল আত্মোপলব্ধির, যার উপায় বই পড়া নয়, সংসার ত্যাগ করা, সন্ন্যাসী হওয়া, অর্থাৎ নিঃসঙ্গ অন্তর্দৃষ্টির সাধনা। আমি বুদ্ধি দিয়ে এই অবস্থায় পৌঁছবার ছুরাশা পোষণ করি। যেমন লিওনার্ডো ডা ভিন্চি পৌঁচেছিলেন। প্রমাণ তাঁর নোটবুকে। বইটা আমার ঘরে বা দিকের শেলফের ওপর তাকে আছে, তারই পাশে ভ্যালেরীর বইটা আছে

নেবেন, খুব ভাল লাগবে, আমি কি বলছি বিশদ করে তাইতে লেখা আছে। পড়বেন কিন্তু—চাবি পাঠাচ্ছি দিয়াশালাইএর বাক্সে—তুইবোনের সঙ্গে গল্প করে সময় কাটাবেন না।

তুইবোন পড়িনি, পড়ব বইএর আকারে প্রকাশিত হলে। খাপ-ছাড়া করে পড়তে ইচ্ছে হয় না—চিন্তাধারা বিচ্ছিন্ন হয়। রবিবাবুর লেখা কখনও ইচ্ছাপূরণ হিসেবে পড়বেন না। রবিঠাকুরের লেখা পড়বার সময় যদি কেউ টু শব্দ করে আমার তাকে মারতে ইচ্ছে হয়। একবার আমি ঘরে-বাইরে পড়ছি, বইটা আমার এত ভাল লাগে যে কাউকে পড়তে পয়সাস্ত্র অনুরোধ করি না—পাছে ঝগলামী করে দোষ দেখায়—সাবিত্রী ঘরে এসে বলেন, ‘আচ্ছা, আমি যদি মক্ষির মত অণু কাউকে ভালবাসতাম, তুমি কি করতে?’ শুনেই আমার মাথায় রক্ত চড়ে গিঁছিল, ঘর থেকে বইখানি হাতে নিয়ে বেরিয়ে চলে যাই—একেবারে শিবপুর! একবার ভারি মজা হয়েছিল—একজন বড় লোকের বাড়ি বৌভাত উপলক্ষে গান বাজনা হচ্ছে, ওস্তাদ হাঙ্গীরের চৌতাল—‘কোরা বরখা’ গাইছেন, এমন সময় এক ‘ফড়ে’ এসে জোড় হাত করে বলেন, ‘এইবার আজ্ঞা হয় উঠতে, লুচি জুড়িয়ে যাচ্ছে’ শুনেই ওস্তাদজী কাঁধ থেকে তানপুরা এত জোরে মাটিতে রাখলেন যে নাউটা ভেঙ্গে গেল! মেয়েরা ঐ রকম! তারা এমনি সব বোকা প্রশ্ন ও আবদার করে! তারা এখন নভেল পড়ে তখন ইচ্ছাপূরণের জন্য চরিত্রের সঙ্গে নিজেদেরকে মিশ্রিত করে। অবশ্য দুপুরবেলা ঘুম আনবার

অন্তঃশীলা

জগৎও নভেল পড়া পরিচিত ঔষধ বলে স্বীকৃত হয়েছে। প্রথমটাই বেশী সত্য, প্রমাণ এই যে পাঠিকারা নভেলে এমন সব ঘটনার বর্ণনা প্রত্যাশা করেন যেগুলি তাঁদের জীবনে ঘটেনি, অথচ তাঁদের বিশ্বাস ও ইচ্ছা যে সবই ঘটতে পারত। একটু অস্বাভাবিক রকমের কিছু ঘটনা তাঁরা সহ্য করতেই পারেন না। তাঁরা পূর্বপরিচিত চরিত্র ও ভাবের ভাবময়ী বর্ণনা কিংবা অল্পদূরপর্যাহত অথচ তাঁদেরই জীবনে খানিকটা সম্ভাব্য ঘটনার বিবৃতিই পছন্দ করেন। তাঁদের নভেল পড়ার অর্থ হল নভেলিষ্টের ঘাড়ে কাঁঠাল ভাঙ্গা, নভেলের চরিত্রের মধ্য দিয়ে জীবন চালান, অত্যন্ত রোমাঞ্চকরভাবে। পাঠিকা, পাঠিকা কেন, অনেক পুরুষই, বিশেষত বিবাহিত পুরুষ পাঠকই এই প্রকারের পরাশ্রিত জীব। বিক্রী করবার জগৎ লেখকেরাও মেয়েলী মনোভাবকে রঞ্জন করে থাকেন। 'যাঁরা লেখেন না, তাঁরা বলেন 'আচ্ছা বেচারিরা রান্নাঘরেই সারাদিন থাকে, ছেলেপুলে মানুষ করতেই সময় চলে যায়, কি করবে!' আমি বলতে পারি কি করা উচিত। এ সব পাঠিকার জগৎ নভেলিষ্টের নভেল না লিখে একটি করে পাচক রাখবার টাকা খোগান, পালে পার্কসে সাড়ি ও গহনা দেওয়া এবং মাসে একবার ছুবার সিনেমা ও থিয়েটার দেখতে নিয়ে যাওয়াই ভাল।' আবার অনেক সাহিত্য সমালোচকে বলেন, 'নভেলের চরিত্র সম্বন্ধে মেয়েদের জ্ঞান পুরুষের চেয়ে বেশী সেই জগৎ নাক-উচু নভেল এরা পছন্দ করেন

না, আর ভালই করেন, কারণ নভেলে গল্পাংশই প্রধান। মজা দেখুন, এঁরা উচ্চপালে নন, অথচ জীবনে রোমাঞ্চকর ঘটনা ঘটুক প্রত্যাশা করেন, জীবনে না ঘটলে নভেলিষ্ট কোথা থেকে আঁকবেন বলুন? মেয়েদের এই প্রকার চরিত্রজ্ঞান, এবং সমালোচকবৃন্দের এই প্রকার সমালোচনাকে আমি সন্দেহের চক্ষে দেখি। একে মেরে ফেলা হল কেন?—এর সঙ্গে এর বিবাহ না হলেই হত, কিংবা হলে কি হত?—এই সব প্রশ্ন যে সব সমালোচক ও পাঠক তোলেন, তাঁরা নিম্নশ্রেণীর-সাবিত্রীর সমগোত্রের। মেয়েরা যেমন—আপনি নন—পরান্ন-গাঙ্গী হয়েও বলে, ‘আমার গাড়ি, আমার বাড়ি, আমার চাকর, আমার সব’—এই শ্রেণীর পাঠক-পাঠিকা-সমালোচকও হই। এঁদের নিজেদের জীবন নেই, তাই নভেলের চরিত্রে আত্মনিবেদন করে দেন, যেখানে দিতে পারেন না, সেইখানেই বলেন লেখার দোষ। পরান্নভোজী কুমির দল! করেন পরের ধনে পোন্ধরী! নিজেদের জীবন যদি থাকত তবেই বুঝতেন পরেরও অল্প ধরণের জীবন সম্ভব এবং আছে। আত্মজীবনী না জানলে পরের জীবনী লেখা যায় না, বোঝাও যায় না।

গানেও তাই হয়। শুনে বড় লোকদের পোলাও হজম হয়, তাই খাবার পর তাঁরা রেকর্ড রেডিও, নেহাৎ ভদ্দলোক হলে ওস্তাদ বাঈএর গান শোনেন। গান শুনে মরা ছেলে কিংবা বিলেত প্রবাসী প্রেমিকের কথা স্মরণ হতে দেখেননি? প্রথমটা সহ্য করতে পারি, কারণ নিজেরই লিভার খারাপ,

অন্তঃশীলা

কিন্তু দ্বিতীয়টি পারি না—বিলেত যাইনি বলে কি? একজন কথক রামায়ণ পাঠ করছিলেন, জানকীর দুঃখে শ্রোতারা কঁদে আকুল, শ্রোতার মধ্যে একজন মুসলমান প্রজা ছিল, সেও কান্না শুরু করলে। জমীদার জিজ্ঞাসা করলেন, ‘তুই কঁাদছিস কেন? তুই রামায়ণের কি জানিস? জানকীর দুঃখ তুই কি বুঝিস?’ প্রজা বলে, ‘বাবু ঠুঁদের জানি না, কিন্তু কথক ঠাকুরের মাথা নাড়া দেখে আমার সেই পুরানো রামছাগলের কথা মনে হচ্ছে—ওরে মটকুরে...কোথায় গেলিরে বাপ!’ কথক ঠাকুরের দাড়ি ছিল। মেয়েদের গান শোনা ও গায়ত্রী প্রকারেরই, সাহিত্য চর্চাও তাই, অনেক পুরুষদেরও। এ বিষয়ে দেশে স্ত্রীপুরুষের মধ্যে সাম্য আছে—অন্ততঃ এই কারণে দেশের মেয়েরা পুরুষদের মতন ভোটের অধিকারী—

এই দেখুন, কত লম্বা লেকচার দিলুম—অধ্যাপক না হয়েও! কেন জিজ্ঞাসা করলেন? আমাকে জ্ঞানেন ত! আপনার সঙ্গে কথা কইতে বড় ইচ্ছে করছে—কতদিন যেন কারুর মনের পরিচয় পাইনি। তাই এত কথা লিখলাম। আমি চাই সাহিত্য আলোচনায় গীতার নিষ্কাম-বন্ধ প্রয়োগ করতে। কারণ জীবনের সেইটাই বড় কথা, এবং আট ও জীবন যুক্ত।

আপনি আমার সঙ্গে থাকলে, সানাইএর স্বর কেন ভাল লাগছে বোঝাতে পারতাম না, স্বরের নামই বলে দিতাম—তাতে কোন তৃপ্তি হত না, নাম জেনেই যে তৃপ্তি আসে সেটি সৌন্দর্য্যবৃত্তির আনন্দ নয়, পূর্বপরিচিতের সঙ্গে সাক্ষাতের

চকিত আনন্দ। গান কেন ভাল লাগছে বুঝতে ও বোঝাতে অনেক কাঠখড় পোড়াতে হয়, নিজে বোঝবার জ্ঞান কি পোড়াবার প্রয়োজন জানি না—বোধ হয় সাহিত্য-প্ৰীতি। শুদ্ধতা অর্জন ও উপভোগের জ্ঞান চাই burning of the bush। মনের ওপর ভাবের আধিপত্য না। সরালে স্বরাজ্য প্রতিষ্ঠিত হয় না। অথচ সেই কথিত ভাষা ভিন্ন অণু কি উপায় আছে বোঝাবার? স্বীকার করি সেটা ব্যাখ্যার পক্ষে খুব উপযুক্ত নয়, সে জ্ঞান সুরের ভাষারই প্রয়োজন, অতএব সুরকে অব্যক্ত বলে ছেড়ে দেওয়াই ভাল। 'তবে এইটুকু বলতে পারি যে আপনার পাশে থেকে মানাই শুনলে সুর বেশী উপভোগ করতাম—আপনি—ও—আপনার কথা জানি না।

দেখুন, একটা কুথা আজকাল আমার প্রায়ই মনে হয়—আমরা বুঝি বাক্য দিয়ে, সেই জ্ঞান প্রথমে ভাবায় প্রকাশ করা এবং বোঝা একবস্তু হয়ে ওঠে, অথচ প্রকাশের ভাষা একাধিক হতে পারে, অসভ্য জাতির অঙ্গসঞ্চালন থেকে সুরের রেশ প্ৰযাস্ত। তার চেয়েও বিপদ আসে যখন ভাষাকেই সত্তা বিবেচনা করি। এর চেয়ে ভুল আর নেই। লোকে এতদূর প্ৰযাস্ত বলতে সুরু করেছে যে যেটি প্রকাশিত হতে পারে মাত্র তারই আছে সত্তা! আমরা কিন্তু সন্দেহ উঠেছে। বাক্যে দব ধরা পড়ে না—এবং সত্তা এবং প্রকাশ এক বস্তু নয়। অনেকটা আইস্বাগের মতন, ভাষা কেবল ওপরের ভাসমান ও দৃশ্যমান অংশটুকু। চারভাগের তিন ভাগ থাকে নেপথ্যে।

অন্তঃশীলা

তাকে প্রকাশ করতে হয় সমগ্র ব্যক্তিত্ব দিয়ে। সমগ্র এই কারণে যে, ব্যক্তিত্বের মধ্যে তৎসদৃশ ভাষাতিরিক্ত অবচেতনা ও উর্দ্ধচেতনা রয়েছে। বলা বাহুল্য, এ জ্ঞান আপনারই দান। ঠিক লোকের পাশে বসে গান বাজনা শুনলে অমনি বোঝা যায়, বদাখ্যার প্রয়োজনই হয় না।

কত বিপরীত মনোভাবের পরিচয় দিলাম! 'হোকগে! পরীক্ষা দিচ্ছি না, চিঠি লিখছি। চিঠি পেয়ে নিশ্চয়ই হাসবেন, মনে মনে বলবেন, 'ইনি আবার মৌনী হবেন! একবার উস্কে দিলেই হল, অমনি রক্তপূজের 'স্রোত বইছে! ইনি আবার একলা থাকবেন, যিনি ছোট্ট চিঠির উত্তরে মহাভারত লেখেন! কিন্তু সে জগৎ দায়ী আপনি। আপনি দেখছি তপোভঙ্গ করতে পারেন।

বই কষ্ট করে গোছাতে হবে না, চিন্তামণি মধ্যে মধ্যে গিয়ে কাঁট দিয়ে এলেই চলবে। চিন্তামণি এলে আপনার চলবে কি করে?

স্বজনকে লিখব দুদিন পরে। আমার বক্তব্য হল—গানই বলুন, মানুষই বলুন, আর সাহিত্যই বলুন, শুদ্ধভাবে গতি ও রূপটা লক্ষ্য করতে হয়, তারপর ব্যবহার যা হয় হোক—পরে, পূর্বে নয়। পূর্বের ব্যবহার কেবল অভ্যাস, সংস্কার, পুথিপড়া মুখস্ত বিত্ত। শুদ্ধভাবে দেখার অর্থ—বস্তুর সত্তা বোঝা—যেটি যা ঠিক তাইটি বোঝা—বোঝা নিজের সমগ্রতা দিয়ে। তা হলে, প্রত্যেকে প্রত্যেকের উপায় ঠিক করে নেবে। আমার

উপায়ের প্রথম স্তর হল অবাস্তর থেকে নিজেকে সরিয়ে নেওয়া।
আপনার উপায় কি ?

ছোট চিঠি দিলেন কেন ? হাতটি বুঝি ব্যথা করে ?

ইতি থগেন্দ্র

পুঃ—আলাদা বাড়ির খোঁজ নিতে হবে দেখছি। মাসীমার
কষ্ট হচ্ছে—অভ্যাস নেই অনেকদিন কি না !

প্রদ্যাম্পদেষু,

চিঠি ও চাবি পেয়েছি। চিন্তামণিকে সঙ্গে নিয়ে সৃজন
বই পরিষ্কার করে এসেছে।

আপনি যখন পৃথক বাড়ি নেবেন ঠিকই করেছেন তখন আমার
কিছু বলবার নেই, নিশ্চয় আপনার অসুবিধা হচ্ছিল।
আমার কেবল ভয় হচ্ছে নতুন বাড়িতে আপনার কষ্ট হবে।
বাড়িটা স্বাস্থ্যকর ত ? শরীরের প্রতি বিশেষ যত্ন নেবেন।
আপনি অবাস্তরকে দূরে রাখলেও অবাস্তর ছুটে আসে।

আপনার চিঠির উত্তর দেবার সামর্থ্য নেই। সৃজন বলছিল
সব চিঠিরই জবাব যে দিতে হয় তাও নয়। আমি বিদ্যুৎ নই,
যেমন পড়তে হয় পড়েছি। আমাদের বেলা শিক্ষার সঙ্গে
জীবনের মাত্র একটি মুহূর্তের সংশ্রব—সারাজীবনের সংশ্রব নেই।
সেই অভাববোধেই নভেল পড়া, গান শোনা। নভেল পড়বার
সময় কি মনে হয় বিশ্লেষণ করে দেখিনি—কিন্তু আপনার চিঠি
পাবার চিন্তা করে দেখলাম, আমরা নভেল পড়ি নিজদের জগৎ,
আমাদের অপ্রকৃষ্ট জীবনকে রসাল করার জগৎ। নভেলই

অন্তঃশীলা

আমাদের জীবনের খোরাক। আপনাকে আমি বোঝাতে পারব না, তবে আমার পরিচিতার মধ্যে অনেকেরই জীবনের সন্ধিস্থলে নভেলের নায়ক নায়িকা উপস্থিত হয়ে মোড় ফিরিয়ে দিয়েছেন জানি। নভেল পড়ে একাধিক মেয়ের জীবনধারা পরিবর্তিত হয়েছে। তবে কেউ পড়েন ভাল বই, কেউ বা শিক্ষা সুবিধার অভাবে বটতলার! সৃজন বলছিল—ইচ্ছাপূরণ ব্যাপারটাই যে খারাপ তা নয়, সদিচ্ছাপূরণে শেষ কোথায়?

গান শুনলে আমার সুর-বাতীত অল্প অ-বাস্তব আনন্দ আসে—তাকে তাড়াতে পারি না। আনন্দের মাত্রা কমাতে আমার মায়া হয়—যে কারণেই মাত্রা বাড়ুক না কেন? আপনি যাকে গুরুভাব বলেছেন সেটি ধারণা করা আমার পক্ষে অসম্ভব।

কিন্তু আপনার চিঠি বোঝবার চেষ্টা করছি, পারছি না, কেবল ভেসে উঠছে আপনারই ভাষা, যেন আপনি মুখে বলছেন, আর আমি শুনছি। কথা কইবার সময় আপনার সর্বাঙ্গ চিন্তা করে, চোখ উজ্জ্বল হয়, মুখে দিব্যভাব আসে। দেহটি অথচ আপনার তখন কোথায় কার সঙ্গে মিশে যায়, যে স্থান আপনার দেহ অধিকার করেছিল সেখানে থাকে কেবল দীপ্তি।

আপনি জীজ্ঞাতিকে অত ঘৃণা করেন জানতাম না। তারা আপনার কি করেছে? আপনার মত কে বুদ্ধিমতী হবে? ক'জন পুরুষেই বা হতে পারে?

এই চিঠিটা লিখে আমার ভারি লজ্জা হচ্ছে, কিন্তু এর

অন্তঃশীলা

বেশী ভাল যে লিখতে জানি না। ইচ্ছে করে আবার ছোট হয়ে যাই, আবার নতুন করে শিপি। কিন্তু সে হবার নয়।

আপনার নতুন বাড়ির ঠিকানা পাঠাবেন। ভালই করেছেন নতুন বাড়ি নিয়ে। শরীরের যত্ন করবেন। চিঠির প্রত্যাশায় রইলাম।

রমলা

পুঃ—বিজ্ঞানের টাইকয়েড হয়েছে—স্বজন খুব সেবা করেছে, তার মামা বিদেশে। নাস' রাখা হয়েছে, আমাদের মাঝে মাঝে যেতে হয়। অতি অবশ্য, দু'ধ' ও জল ফুটিয়ে, ছেঁকে, কর্পূর দিয়ে থাকেন। নিজে দেখে থাকেন, মুকুন্দকে বলে হবে না, সে বাসি জল খাওয়াবে আর বলবে গরম জল খাওয়াচ্ছি। তার চেয়ে এক ডজন সোড়া কিনে রাখবেন—সোড়াভাঙ্গার কল পাওয়া যায় নিশ্চয় কাশীতে। সামান্য অসুখ বিস্মৃতি করলেও কলকাতায় চলে আসবেন। মাসীমাকে এই বয়সে কষ্ট দেওয়া উচিত নয়।

পুঃ—হাত ব্যথা করে না, শক্তিহীন। স্বজনকে লিখলেন না?

রমা

রমা দেবী,

আমি স্ত্রীজাতিকে ঘৃণা করি না! তাঁদের কাছে আমি অত্যন্ত বেশী প্রত্যাশা করি, পাইনা তাই ক্ষোভ হয়। ক্ষোভে রাগ, রাগে ঘৃণা। তা ছাড়া, স্ত্রীজাতি বলে কিছু জাতি নেই, স্ত্রীবিশেষ থাকতে পারে।

অন্তঃশীল।

আজ ভারি ব্যস্ত, নতুন বাড়ি চূণকাম করতে দেবী হল—
আজই উঠে যাচ্ছি। মাসীমা ঘেন কেমন হয়ে গিয়েছেন। সকাল
থেকে কাঁদছেন—ভয় হচ্ছে সম্মাসী হয়ে যাব। কাল পরশু একটু
সংসদ করেছিলাম, কোথা থেকে টের পেয়েছেন। কথক
ঠাকুরের সঙ্গ নয়, একজন সত্যকার সাধুর। তাঁর কথা পরে
লিখব।

আপনার চিঠি আমার বড় ভাল লাগে। সোডা কিনব, কিন্তু
বড় দম্ করে শব্দ হয়। একবার বোতল কেটে ভীষণ কাণ্ড হয়
সেই থেকে কেমন ত্রাস হয়েছে। 'জল ফুটিয়ে কপূর দিয়ে খাচ্ছি।

বিজনের বাড়ি যাবেন, কিন্তু ইতিপূর্বে একটা ইন্জেক্সন
নিলে হয় না? বিলি ভ্যাক্সিন খাওয়াই ভাল, নচেৎ
হাতে বড় ব্যথা হয়, জ্বরও হয়—একেই অত ছোট্ট চিঠি। স্বজন
ছাড়া বিজনের অণু কোন আত্মীয় নেই কি? বিজনের বাবাকে
তার করে দিন। এই রকম দেশী অভ্যাস আমার বড় খারাপ
লাগে—পরিচিত ও আত্মীয়ের দ্বারা নাসের কাজ করিয়ে নেওয়া।
সাহেবরা এই বিষয়ে খুব ভাল—একেবারে বৈজ্ঞানিক—নিজেরাই
হাসপাতালে চলে যায়, বীজাণু ছড়ায় না। আচ্ছা, আসি এখন?
বাইরে টঙ্ক এসেছে। শুদ্ধ ভাব অর্জন করা শক্ত—। কাল
সাধু মহারাজ বলেছিলেন গুরু ভিণ্ডু উগায় নেই। ইতি থগেন

পু: সত্যি আমার কথা শুনতে ভাল লাগে? না, সামাজিক
ভদ্রতা করছেন? আপনি এখন ফ্লোরেন্স নাইটিঙ্গেল হয়েছেন,
কিন্তু তিনিও লম্বা চিঠি লিখতেন।

খ:

অন্তঃশীলা

পূজনীয়েষু,

একদিন কোন সময় পাই নি—কাল চোদ্দদিন কেটেছে, কোন উপসর্গ নেই। জর কম। খাওয়া দাওয়া কেমন হচ্ছে? জল ছেকে নিতে হয়। শরীর ক্লান্ত। গুরু ভিন্ন উপায় নেই? বোধ হয় সত্য।

রমা

রমা দেবী,

এই মাত্র আপনার কয়েক ছত্র চিঠি পেলাম। শরীর খারাপ হয়নি ত? ভাবনা হচ্ছে, পত্রপাঠ চিঠি লিখবেন কেমন আছেন। কাশী মোটেই ভাল লাগছে না। শরীরটা মস্ মস্ করছে, বোধহয় একটু জর হবে। অ্যামন-কুইনিন খেয়েছি, ওতে আমার ভারি উপকার হয়। আপনি যদি জর করে বসেন তা হলেই বিপদ। যদি আমাকে অসুখ ক'রে কোলকাতায় যেতে হয় তখন দেগবে কে? কি স্বার্থপর আমি!

থগেল্ল

না হয় পত্রের উত্তরে একটা টেলিগ্রাম করে দেবেন। পরের সেবা আপনাদের নেশা। টেলিগ্রামের প্রয়োজন নেই যদি পত্রপাঠ উত্তর দেন। বড় ভাবনা হচ্ছে।

ঃ

মাত্তবরেষু,

আপনার জর শুনে টেলিগ্রাম করা উচিত ছিল, কিন্তু নানা ভেবে চিন্তে করলাম না—আপনার বারণও ছিল।

এ চিঠিটা দেবার ইচ্ছা ছিল না। পড়ে ছিঁড়ে ফেলবেন।

অন্তঃশীলা

আপনি আমার শরীরের জন্তু ভাববেন না, আমারই কাছে তার কোন মূল্য নেই।

আপনি একবার শ্মশানে বুড়ো বটগাছ-টেশ দেওয়া ভাস্কর্য মূর্তির সঙ্গে তুলনা করেছিলেন মনে পড়ে? উপমা উপযুক্ত হয়েছিল। একটি প্রশ্ন করতে ইচ্ছা করছে—আপনি কি জানতেন, গভীর রাতে এই বুড়ো বটগাছের সঙ্গে এই ভাস্কর্যমূর্তির কি কথা হয়? ভরা দুপুরে যখন লাল মাঠের ওপর শুখনো হাওয়া চলে তখন তার মুখের পথথুরে হাঁসি মুখর হয়ে কোন দিগন্তে ভেসে যায়? আর যখন শব্দযাত্রীর সমাগম হয় সেই বটের ছায়াতলে তখন কি জানেন তার চোখের অবস্থা? সেই উন্নত ভূমিতে আর রোদ্দুর নেই, তার ওপর নেমেছে ঘোর অমাবস্যা।

কিছুই আমার ভাল লাগছে না, বড়ই ফাঁকা, ফাঁকা ঠেকছে। নিজেকে ফাঁকি দিতে পারছি না। এইত' সেদিন অল্প ছিলাম—আমার সংকম ছিল। সৃজন আসে—আপনাকে খুব শ্রদ্ধা করে, আর ভালবাসে—সাবিত্রীও ভালবাসত, আপনার ভাগ্য ভাল। এ চিঠিটা ডি'ড়ে ফেলবেন। আমার ভয় করছে—কি হয়ে গেলাম। আপনাকে নীচু করব না, করব না, করব না। আপনি কোলকাতায় আসবেন না।

৬ রমা

রমা দেবী,

আমি কাশী ছেড়ে যাচ্ছি।^{*} বিশেষ প্রয়োজনেই যেতে হচ্ছে, প্রয়োজন কি জানাবার জন্তু খানকয়েক কাগজ পাঠানাম, ভিন্ন

মোড়কে। আবোল-তাবোল যা মনে এসেছে তাই লিখেছি, নিজের কাছে লজ্জা কি? একবার লিখেছিলেন আমার কথা শুনতে ভাল লাগে, এগুলি প্রাণের মনের গোপনকথা। এঁদের সঙ্গে আমার জীবনের সম্বন্ধ ঘনিষ্ঠ। পৃথিবীর দেহে যেমন প্রাণ জন্মায়, আপনার প্রাণ থেকে যেমন স্নেহ ঝরে, তেমনি এই ভাব-গুলি আমার সমগ্র প্রাণ মনের সহজ স্ফরণ। নিষ্ঠুর মস্তিস্কের উল্লেখ করলাম না—কারণ শুষ্ক মস্তিস্কের একাধিপত্য সহ্য করতে পারছি না। মন-প্রাণ দেহের অতিরিক্ত কিনা তাও জানিনা। একজন পুরুষের চেতনার ইতিহাস, কল্পনার স্রোত, কিংবা অনুভূত চিন্তা, ওয়ার্ডস্‌ওয়ার্থের felt thoughts হিসেবে কাগজ গুলো পড়বেন। আমার ডায়েরীর তারিখ নেই—আমার চেতনার অভিব্যক্তির পাজি বুদ্ধিমান, বুদ্ধিমতীর চেতনার ইতিহাসে।

ইতি

খগেন্দ্র

রমা দেবী,

অনেক দিন পূর্বেই এই চিঠিটা পাঠাবার ইচ্ছা ছিল। আপনার শেষ চিঠি পাবার পূর্বেই আমার মনে বিস্তর সন্দেহ উঠেছিল। আমার মত যেন ওলট পালট হয়ে গেল। চিঠির জবাব আমি প্রত্যাশা করি না। কোথায় থাকব নিজেই জানি না, কতদিন থাকব তারও স্থিরতা নেই। মন বড়ই বিক্ষুব্ধ হয়েছে। দিন কয়েকের জন্তু কোথা থেকে ঘুরে আসি; একজন সাধু আমার বন্ধু হয়েছেন, আধুনিক সাধু, অর্থাৎ ভ্রমণ-বিলাসী; জ্বিলজ্বীতে

অন্তঃশীলা

কাষ্টক্লাস পেয়েও চাকরী পান নি। শাস্তি না পাই চলে আসব। কিন্তু আসব কোথায়? দিন কয়েক পরে একবার কাশী আসব, কাশী ত্যাগ করলেও আসতে হবে, বাড়ি, মুকুন্দ ও আসবাব-পত্রের জগ্গ।

. আপনি বিপরীত ধর্মী নন ত? স্বজনকে ভিজ়াসা করবেন। পুরুষসিদ্ধিই একমাত্র শুদ্ধ প্রচেষ্টা। শুদ্ধ না হলে সিদ্ধি হয় না; শুদ্ধি ও সিদ্ধি একই প্রক্রিয়া। আপনি গুণবতী প্রকৃতিস্বরূপা—আমি আপনার অতিরিক্ত হতে চাই।

ব্যগ্র হবেন না, আমাকে পরীক্ষা করতে দিন। যেদিন উত্তীর্ণ হব, পুরুষ হব, সেই দিন নিজেই আপনার দ্বাবে উপস্থিত হব, তখন আপনি কি হবেন? প্রকৃতি শুদ্ধ হয়ে নারী হয়—সামান্য হয়ে ওঠে বিশেষ। তবে কি উপায়ে আমি জানি না, নিজেই পন্থা আবিষ্কার করুন। ততদিন পৃথক। তসম্পূর্ণতার ডালি উপহার দিতে অনিচ্ছুক—পুরুষের কর্তব্য নয়, ব্যক্তির অধিকার নেই। আপন পায়ে হেঁটে যাব আপনার কাছে—চৌদোলায় নয়। না, আপনি আসবেন?

ক্ষমা করবেন। ভগবান মানি না—প্রমাণাভাব্য বলে নয়, প্রয়োজনাভাব্য বলেই। তাই প্রার্থনা করতে পারি না। তবু বলি শুদ্ধ হয়ে শাস্তি পান। আপনার, শুদ্ধি আপনার হাতে। আত্মা এক নয়, বহু। ফুজিয়ামার ছবি দেখেছেন? কেমন নিরালস্য! হিন্দু বিবাহের আদর্শ কি বলুন ত?

খগেন্দ্রনাথ

রমলা দেবী শেষ চিঠিটা পড়লেন। আয়না-টেবিলের ওপর মোড়কটা ছিল। চিঠির কয়েক ছত্র অস্থায়ীর মতন ঘুরে ফিরে মনে আসছিল—কাশী ছেড়ে যাচ্ছি, চিঠির জবাব প্রত্যাশা করি না, কোথায় থাকব নিজেই জানি না, কতদিন থাকব তারও স্থিরতা নেই। হাত কাঁপছিল, গলা আটকে গেল, রমলা দেবী বিছানায় বসে পড়লেন। শিশুরাই সন্ন্যাসী হতে যায়, সন্ন্যাসী হলে সাংসারিক নাম-ধাম কিছুই থাকে না—সন্ন্যাস এক বিরাট শূণ্যতা; ভিক্ষে করতে হয়, বিশ্রাম নেই, সারাদিন পায়ে হাঁটা, রোদ নেই বৃষ্টি নেই—নিজের চাকির ঠিকানা থাকে না, সোডার বোতল খোলার শব্দে ভয় হয়...পারবে না, পারবে না। আমি

অন্তঃশীল।

পায়ে হেঁটে যাব আপনার কাছে...সময় যেদিন আসিবে আপনি
যাইব তোমার কুঞ্জে...যুনিভাসিটি ইনষ্টিটিউটে ছেলেরা আরাতি
করছে রবীন্দ্রনাথের অভিসার...নগরের নটা চলে অভিসারে যৌবন
মদে মত্তা...যৌবন না ভাঙ্গা মূর্তি। রমলা দেবী বিছানা থেকে
ধড়মড় করে উঠে পড়লেন—আয়নায় প্রতিবিম্ব পড়ল মোড়কটা
তুলে ড্রয়ারের মধ্যে রেখে দিলেন। এখন পড়া হবে না, গভীর
রাত্রে, এখন মাত্র দুজন, রুঢ় ও কুতূহলী দিনের আলো যখন বড়
বড় চোখ মেলে অসভ্যের মতন চেয়ে থাকবে না। পায়ে
কাঁটা ফুটলে সূচের ভয়ে যেমন অনেক কাঁটা পুষে রাখে
তেমনি রমলা দেবী ব্যথাকে ভয়ের দ্বারা স্থগিত
রাখলেন। মোড়কটি খোলবার প্রবল ইচ্ছা হল।
মুখে পাউডার দিয়ে, সামনের চুল গুছিয়ে চিত্তামণিকে গাড়ি
আনতে বল্লেন। গলায় স্কার্ফ জড়ালেন—ইশাভোরা ডানকান
মোটর চড়ে বেড়াতে যান, যাবার সময় ঝিকে বলে যান যে আর
ফিরবেন না—সেই গাড়িতে স্কার্ফ জড়িয়ে তাঁর মৃত্যু হয়। ‘চিত্তা-
মণি, আজ পাব না, তোমরা খেয়ে নিও, বিজনবাবুর বাড়ি চল।’
কেবল খাওয়া আর খাওয়া, রাস্তার দুপাশে খাবারেরই দোকান,
খাওয়া ভাল্গার ব্যাপার, বড় বড় বাড়ি, আকাশ আর মানুষের
সঙ্গে ঝগড়া বাধিয়ে দিয়েছে, মোটরের ভিড়ে পায়ে হাটা বন্ধ হল,
অভাব কমিয়ে বেশ আনন্দে থাকা চলে। পুরুষে পারে না, কষ্ট
হয়, পা টন্ টন্ করে, ঠাণ্ডা লাগে, সর্দি হয়, চোখ কব্ব কব্ব করে।
চাএর দোকানে ‘গোকুল চন্দ্র’ গানটা বাজছিল—‘যোগিনী হইয়ে

যাব সেই দেশে’ কোন্ দেশে ? সেখানে পথে ধুলো, গাছের পাতা সবুজ নয়, নিরুদ্দেশে । বিজ্ঞনদের গলির মুখে গাড়ি থামতেই রমলা দেবী ড্রাইভারকে থাকতে বলে নিজে নেমে পড়লেন । •

সুজনকে তার ঘরে না পেয়ে রমলা দেবী বিজ্ঞনের ঘরে গেলেন । পূবদিকের ঘর, নানা রকমের খেলাজতার চিহ্ন বর্তমান, ছবিগুলো সব টেনিস খেলোয়াড়ের—টিলডেন, কোসে, বোরোট্রা, লাকষ্ট, লাংলার । সব ছবিই ভঙ্গীর, টিলডেনের গড়ন বিশ্রী, লম্বা লম্বা হাত পা, মুখটাও তাই, সামঞ্জস্যের অভাব, মাষ্টারগীর মতন ।

• ‘বিজ্ঞন, তোমার টিলডেন মোটেই সুশ্রী নন’

‘তোমাদের কেবল ঐ এক আছে, কে সুশ্রী, আর কে বিশ্রী’

‘আমরা মুখে বলি, তোমরা কাজে দেখাও—নির্বাচন ক’রে’

‘পৃথিবীর সর্বশ্রেষ্ঠ খেলোয়াড়’

‘খেলেই ঐ রকম চেহারা—বিশেষজ্ঞের মতন’

‘কিন্তু রমাদি, আমি হ’তে চাই বোরোট্রা—তার মতন খেলতে, তার মত হাসতে, যেদিন পারব সেদিন সত্যি মানবজন্ম সার্থক হবে । কি কৃষ্টি লোকটার, যেন elan vital রূপ নিয়েছে, আম্পায়ার পয়েন্ট দিলে, নিলেনা, দ্যাখ, কেমন বেরেট ক্যাপে মানিয়েছে—সমগ্র ফ্রান্স তার দিকে চেয়ে আছে, ভ্রক্ষেপ নেই । রমাদি, একেই বলে যৌবন, যেন ব্র্যাডম্যানের ভাই, একেই বলে প্রাণশক্তি । তা নয়, এদেশের লোকেরা যেন ঝিমুচ্ছে, আকিম খেয়ে খেলছে । কেবল পয়েন্ট পাবার চেষ্টা, লব্ আর, লব্, সেলিমের

অন্তঃশীলা

মত খেলতে চাই না, অত বুদ্ধি চাইনা আমি। আফিম দেশ থেকে তুলে দিতে হবে—আমাদের ছেলেরা টেনিস কোর্টে নামে যেন যোগভঙ্গের পর, ঘুম থেকে উঠেছেন। যেমন ছেলে দেশের, তেমনি মেয়ে,—লীলা কত ছোট্ট দেখেছ? তুমিও যেন কি হয়ে যাচ্ছ !’

‘কিন্তু কোশে ?’

‘কোশের কথাই আলাদা—ও হল জিনীয়াস—না হলে সার্ভিস লাইনে দাঁড়িয়ে কেউ সিংগল্‌স খেলে, সেইপান থেকে হাফ্‌ ভলিতে ড্রাইভ করে ! ও একটা কল, অদ্ভুত কল, ভূতে পাওয়া কল, রোবো’

‘ওর খেলাই ভাল লেগেছিল সাউথ ক্লাবে’

‘ও: সে খেলা খেলাই নয়, কার সঙ্গে খেলবে? বেলে খেলা, কিন্তু তুমি যে বলছিলে অষ্টিনের খেলা আরো ভাল লাগে? ইতিমধ্যে মত বদলেছে তা হলে? অষ্টিনের কচি মুখ দেখে বুঝি মায়া হয়েছিল তখন? এখন সে মায়া কোথা গেল?’

‘ভূতে পাওয়া লোকের খেলা ভাল লাগে, ছেলে মানুষের খেলা ভাল লাগেনা। আচ্ছা, লাংলা কেন অত লাফায়? তোমার জেনী বেশ মরাল গমনে চলে।’

‘আবার ঠাট্টা। কেবল ঐ কথা! অন্য কথা কইতেই জাননা তোমরা? ফের যদি জেনীর নাম কর তাহলে আর—দেখবে মজা! আর খেতে ইচ্ছে হবেনা’ ‘বিজন, তোরা আজকাল হয়েছিস কি? মেয়েদের অত ঘৃণা করতে শিখলি কবে থেকে?’

অথচ...’ ‘যেদিন থেকে ভালবাসতে শিখেছি...তোমাকে,তোমাকে’
 ‘তা বোঝা গিয়েছে কত দরদ ভাইএর!’ ‘কিসে বুঝলে?’
 ‘অনুখের মধ্যে যার নাম করেছিলে তার মধ্যে র-ও নেই মাও
 নেই।’ ‘আবার! মাথা ধরবে’ ‘ভালই হবে, দাদা ও দিদির
 আদর থাকে—কাকা বাবুকে ভাবিয়ে তুলবে—ম্যাচ খেলাও আর
 হবেনা’ ‘আচ্ছা, রমাদি, ম্যাচ খেলা হবেনা?’ ‘হবে তাড়াতাড়ি
 সেরে নাও’ ‘আমার গায়ে জোর এসেছে, রোজ যদি বেড়াতে
 পাই তাহলে তাড়াতাড়ি সেরে যাব। আজ সন্ধ্যাবেলা নিয়ে
 যাবেত?’ ‘সন্ধ্যাবেলা পারব না, এখনি চলনা, ঘুরে আসি। থাক,
 রোদ লাগবে’ ‘না লাগবে না, আজ তিন সপ্তাহ সেরে উঠেছি,
 তবু রোদ লাগবে! আমি কি ননীর পুতুল যে গলে যাব? অত
 শীগ্গির আমাদের মাথা ধরেনা। এখুনি যাব। চল আমার
 র্যাকেট দুটো ঝাঁং করতে নিয়ে যাই, দেশী র্যাকেটে আর জীবনে
 খেলব না, ঝাঁং করাতে গেলেই বঁকে যায়। তোমরা যাই বল
 বিলেতী র্যাকেটের ওদোষ নেই; স্বরাজ পেলেও আমি
 বিলেতী র্যাকেটে খেলব। তার মেজাজই আলাদা, তাতে বল
 পড়লে লাফিয়ে ছুটে যায় আপনা হতে, দেশী র্যাকেট ও গাটের
 দোষ ঐখানে—ঠালা মারলে তবে বল ছুটবে’

‘যে রকম বিলেতী জিনিষের গুণ গাইছিস তাতে বিলেত
 গেলে মেম বিয়ে করে আনবি দেখছি। এখানে থাকলে আংলো-
 ইণ্ডিয়ানই জুটবে’ ‘বেশত’ অত ভয় হয় যদি, বলছিত, বাবাকে
 বুঝিয়ে বিলেত পাঠাওনা, এই বেলা যাওয়াই ভাল, ছেলেবেলা

অন্তঃশীল

থেকে পড়লে, খেলতে পেলোই ত' ভাল হব। আচ্ছা ফ্র্যানেল ট্রাউজার্স ও ব্লেজার পরব ?' 'এখন ? লোকে হাঁসবে না ?' 'আচ্ছা পর, এই বয়সেই তোদের মানায়।' 'টেনিসের পোষাকই সব চেয়ে ভাল, গলা খোলা শার্ট, সাদা ফ্র্যানেল ট্রাউজার্স, সবুজ কার্পেটের মত ঘাস—কাল লোকদেরও স্নানর দেখায়।' 'সব লোকে পরে না কেন বলতে পারিস ?' 'তা বুঝি জান না ? এ যে কোপীনের দেশ, সকলেই হবু-সন্ন্যাসী। তা ছাড়া সকলে কি টেনিস খেলতে পারে ? টিলডেন বলেছেন, ক্ষমতাটা ঈশ্বরদত্ত, অবশ্য অভ্যাস চাই, ছেলেবেলা থেকে অভ্যাস না করলে চলে না। এ দেশে কি করে ভাল খেলা সম্ভব বল ? কেবল পড়া আর পড়া, জোর আড্ডা দেওয়া আর লম্বা চওড়া কথা কওয়া ; ভাল ছেলের মানেই তাই, যে খেলে না, বই পড়ে আর মুখস্থ বিত্তে আওড়াতে পারে। দেশের সর্বনাশ হল এদের জন্ত' 'যাবে ত' চল, গাড়িটা মোড়ে আছে, ডাকি' 'না ডাকতে হবে না, ওটুকু হাঁটতে পারব' 'পারবে ? হাঁটাই ভাল, ব্লেজার পরা ছেলের সঙ্গে আমার হাঁটতে ভালই লাগে। ব্লেজারটা পরে নাও, ঠাণ্ডা লাগতে পারে' 'এই বল্লো রোদ্দুর লাগবে ! তোমার মাথা খারাপ হয়েছে, উল্টো-পাল্টা কথা কইছ'

মোটর যখন কলেজ স্ট্রীট দিয়ে যাচ্ছে তখন একটা দোকানের সামনে রমলা দেবী গাড়ি থামাতে বসলেন। ইকমিক্ কুকারের দোকান, রমলা দেবী একটি ছোট্ট কুকার কিনে গাড়িতে বসলেন। বিজন জিজ্ঞাসা করল, 'এ আবার কি খেয়াল রমাদি, আমাকে

রোগী বানিয়ে ছাড়বে দেখছি—আমার কুকারের রান্না পান্‌সে লাগে।’ ‘তোমার জ্ঞান নয় মশাই, অনেকের পান্‌সে খেতে ভাল লাগে’ ‘তঁারা আলোচাল ঘি ও নিরামিষে অভ্যস্ত, মহাপুরুষ সব! খাব না’ ‘খেয়ো না’ ‘কাকে পাঠাবে?’ ‘আমার কে আছে যাকে পাঠাব?’ ‘কি জানি কোন ভাগ্যবান পাবে! তোমার ছেলেমানুষী বুঝতে আমার দেরী আছে। চল গঙ্গার ধারে যাই।’ গাড়ি চলল গঙ্গার দিকে। বহুবাজারের জনশ্রোত পশ্চিমদিকে, ট্রামে ও পদব্রজে চলেছেন সব লালদিঘীর অফিস ভরাতে, চেয়ারের পিঠে কোট ঝোলাতে, অগ্নির সংস্থান করতে। জনশ্রোত আবার পাঁচটার পর থেকে পূর্ব দিকে ফিরবে। মাহুঘের জোয়ার ভাঁটা। ফেরবার সময় মুখে রোদ্দুর লাগে না এই যা, নচেৎ জঘণ্টা এই ভিড়ের টান। মুখে রোদ্দুর লাগলে এই সব মুখে কালসিটে পড়ত। গৌরবর্ণ ষারা তাঁরা তামাটে হতেন, সন্ন্যাসীদের মতন। জন-শ্রোতের প্রত্যেকেই সংসারী, পকেটে টিনের কোটায় খাবার ও পান গৃহিনীর। ভরে দিয়েছেন, ফেরবার সময় সকলেই জ্বাপুত্রের জ্ঞান কিছু না কিছু কিনে নিয়ে যাবেন। মাসিক, সাপ্তাহিক, দৈনিক পত্রিকা।

চিত্তরঞ্জন অ্যাভিনিউএর মোড়ে রমলা দেবী বল্লেন, ‘বিজন, একটা কাজ মনে পড়ে গেল, আমাকে বাড়ী পৌছে দিয়ে তুমি গঙ্গার ধারে বেড়িয়ে এস।’ স্বরটা এতই দৃঢ় যে বিজন আপত্তি করলে না। গাড়ি ফিরে রমলা দেবীকে নামিয়ে দিলে। ‘রমাদি, তোমার অস্থখ করছে?’ ‘না’ ‘তোমার মুখ দেখে মনে হচ্ছে’

অন্তঃশীলা

‘বড় গরম, বেলা হয়ে গিয়েছে, অফিসের লোকজন যাচ্ছিল দেখলে না’ ‘তাতে আর কি হয়েছে ? আমিও বাড়ি ফিরি’ ‘তাই ফের, রেল্‌জার পরে কষ্ট হচ্ছেনা ?’ ‘না, কেন ?’ ‘তোরা গায়ে রেল্‌জার দেখে আমার গরম হচ্ছে । এ দেশে খালি গায়ে চলে । বিকেলে এস, গাড়ি পাঠিয়ে দেব’ ‘তুমিই এস না ?’ ‘বাড়ি থেকে বেরুতে ইচ্ছে করছে না ।’ গাড়ি বিজ্ঞকে পৌছতে গেল ।

শোবার ঘরে বরাবর গিয়ে রমলা দেবী বিছানার ওপর শুয়ে পড়লেন । পাখাটান্ন হাওয়া হয় না ; মাথাটা ঝিম ঝিম করছিল, মেন্থেপিপের কোন্‌ রঙে ওঁ কপালে ঘসতে লাগলেন, কপাল থেকে সিঁথীতে, ধীরে থেকে জোরে ; সিঁথীর ধারে খুব ছোট্ট ছোট্ট চুল আঙ্গুল দিয়ে বড় চুলে বিলি কাটতে লাগলেন । বেশ ঠাণ্ডা হয়ে আসছিল, চোখ বুজে এল ঝাঁজে, ডান হাত দিয়ে চোখ ঢাকলেন, সাড়িটা দেহকে সম্পূর্ণ আবৃত করছে না মনে হওয়াতে বাঁ হাত দিয়ে ঠিক করে নিলেন । ঘড়িতে ঢং ঢং করে এগারটা বাজল—মিষ্টি আওয়াজ, পর পর তিন পর্দায় বাঁধা, গির্জার ঘণ্টার মতন । ঘড়িটা বিবাহের যৌতুক, বিজ্ঞের বাবার । ডান হাত দিয়ে সিঁথীটা ঘষতে লাগলেন ! মন্দিরে আরতির সময় শাকি ঘণ্টা কঁাসর ঝাঁঝর বাজে, ছেলেবেলা মন্দ লাগত না, এখন মাথা ধরে, তবে মন্দ লাগে না । কবি লিখেছেন, জাপানী মন্দিরের বাজে শব্দের আভিজাত্য আছে, একলাই অবকাশকে পূর্ণ করে, সাহায্যের ভিখারী নয়, শুদ্ধ স্বর । জাপানের ফুজিয়ামার মতন । ও ! তাই লিখেছে ! ছবিটা পরিচিত, চীনে

হোটলে দেখেছেন, সমগ্র নিসর্গকে উচ্চ মস্তকে একাকী জয় করে আছে,—বাকী সব অবসর। ফুজিয়ামা ভাল, না গৌরীশৃঙ্গ, নন্দা, কাঞ্চনজঙ্ঘা? আত্মীয়পরিবৃত হয়েই যাদের গৌরব? খগেনবাবুর আদর্শ ফুজিয়ামা, তাঁর বিশ্বাস মানুষ পৃথক হয়ে জন্মায়, মানুষে-মানুষে সম্প্রীতি দূরত্বের ওপর প্রতিষ্ঠিত। কেবল মানুষ কেন? সৃজন বলছিল, বিজ্ঞানের মতে অণু-পরমাণুর মধ্যেও দূরপনীয় অবসর। তবু পরমাণু মিলে অণু হচ্ছে ত! যদি সত্য হয়, তা হলে কি কষ্ট এই অল্পভূতিতে, সারা জগৎ কাঁদছে মিলে মিশে এক হয়ে যেতে, দূরত্ব ভাঙতে, কিন্তু পারছে না। এ কি বিরোধ! ইচ্ছার সঙ্গে নিয়মের। কিন্তু মিলতেই হবে—না হলে সমাজে বিবাহ হয় কেন? কি লিখেছেন, ‘হিন্দু বিবাহের আদর্শ কি বলুন ত?’ বিবাহের আবার আদর্শ কি? ও ত’ আদেশ, হিন্দু-বিবাহ বলে পৃথক কিছু আছে না কি? কে জানে! যেখানে মিলনের কোন আকাঙ্ক্ষাই নেই, মিলন অসম্ভব, তার নামই হিন্দু-বিবাহ।

ইকমিক্ কুকারের ভাতে ফ্যান, মাগো, সে ফ্যান গলান গেল না, অথচ সব মেয়েরাই পারে, ভাল ভাতে ডালা হয়ে গিয়েছে—ভাল ভিজিয়ে বোধ হয় ভাতে দিতে হয়। একেবারে অকস্মার ধাড়ি! কি খেয়াল গেল! ছেলে মানুষী! হোক্গে—বেশ না হয় ছেলে মানষীই করা গেল—অত পারা যায় না। কিন্তু খাও-যাও যায় না। ‘চিন্তামণি এগুলো নিয়ে যাও, ফেলে দাওগে’ চিন্তামণি নিয়ে গেল, রমলা দেবী দু’খানা বিস্কুটে মার্মালেড মাখিয়ে খেলেন—কমলা লেবুর রং, সন্ধ্যাসীদের আলখাল্লার মতন।

অন্তঃশীলা

বড় ইচ্ছা হচ্ছিল মোড়কটা খুলতে। কিন্তু ভয় চল পাছে লেখা থাকে, পাছে লেখা থাকে আর আসবে না, কাশীতেও না, পাছে লেখা থাকে সেই তার উন্নতির অন্তরায়। দরকার নেই খুলে, রাত্রে পড়তে হবে, যখন সব নিস্তরঙ্গ। বিজন আসবে বিকেলে। ড্রাইভারকে ডেকে তিনটের সময় বিজনকে আনতে হুকুম করলেন আর চিন্তামণিকে বল্লেন সাড়ে তিনটেয় চাএর সরঞ্জাম রাখতে। দরজা বন্ধ করে। সবুজ মেজের ওপর শুয়ে পড়লেন।

ঘুম থেকে উঠে মুখ ধুয়ে আসবার পরই বিজনের আওয়াজে পেলেন, ‘রমাদি, স্বজনদাকে ধরে এনেছি’ ‘তোমরা বোসো, আসছি’; বেশ পরিবর্তন করে রমলা দেবী বসবার ঘরে এলেন। বিজন স্বজন উঠে দাঁড়াল, রমলা দেবী হাসিমুখে বসতে ইঙ্গিত করলেন। বিজন—‘রমাদি, এখন তুমি কেমন আছ? যে রকম গম্ভীর হয়ে আধ-রাস্তা থেকে বাড়ি ফিরলে তাতে ভয় হয়ে গেল বুঝিবা অসুখ করেছে।’

র—কোন দিন অসুখ করতে দেখেছ?

বি—আমারও কোন দিন অসুখ করতে দেখেছ?

র—তোমাতে আমাতে অনেক তফাৎ

বি—তুমি সেবা করলে, আর আমি সেবা খেলাম—এই যা তফাৎ!

র—প্রতিশোধ নিও

স্ব—যদি আপনার অসুখ হয় বিজন বড়ই কৃতজ্ঞ হবে, কৃতজ্ঞতা প্রকাশের সুযোগ পেয়ে

বি—না ঠাট্টা নয়, বলনা রমাদি, তোমার শরীর খারাপ হয়নি ত ?

র—না গো বাবু নয়—দেখছিস না কেমন হুটপুট ?

সু—চেহারা দেখে মনের অবস্থার ইঙ্গিত পাওয়া অনেক ক্ষেত্রে শক্ত ।

র—আমার ভুল হয়েছিল, মনো-বৈজ্ঞানিকের সঙ্গে কথা কইছি ভুলেই গিয়াছিলাম । আমার মানসিক অবস্থা মজল ।

সু—মুখ দেখে তা মনে হচ্ছে না.

র—ঘুম থেকে উঠলে অনেককে ঐ রকম খারাপ দেখায় । বেশ তর্ক করতে শিখেছ ত স্বজন !

বি—শিখবেনা, গুরু কে !

র—গুরু কে ?

বি—জান না বুঝি !

সু—মনের খবর যখন পাওয়া যায় না তখন দৈহিক ইঙ্গিতের আশ্রয় খুঁজি, দৈহিক প্রক্রিয়ার সন্ধান যখন পাই না, তখন মানসিক বিশ্লেষণের সুবিধা চাই । দেহ ও মন বিচ্ছিন্ন নয়, বোঝবার জন্ত যখন বা সুবিধা ।

বি—স্বজন দা, খগেনবাবুর মত হেঁয়ালি করে তর্ক কোরো না, চা খেতে এসেছ, গল্প কর, চা খাও ।

র—বিজন, টেনিস্ খেলিস্ বুদ্ধির জোরে, না দেহের জোরে ও মনের জোরে ?

বি—আমি তোমাদের সঙ্গে টেনিস আলোচনা করব না,

অন্তঃশীলা

জীবনে তোমরা র‍্যাকেট ধরনি তোমরা টেনিসের মর্ষ কি বুঝবে ?
কোথায় গিয়ে তর্ক পৌছবে আমার জানা আছে, মেয়েরা তর্ক
ঠেলে তোলে সেই প্রেমের কোঠায় । তোমরা তর্ক করতেই জান
না ।

১ র—এটা বুঝি নিজের কথা !

বি—বইএর মুখস্থ বুলি খগেনবাবু ও তাঁর শিষ্য স্বজনদার মত
আওড়ানর অভ্যাস আমার নেই । আমি সাধারণ মানুষ, খাই
দাই, খেলাধুলো করি, ওয়েল্‌স্‌ পড়ি, বাঁশি বাজাই, টেনিস খেলি—
বাস্‌ । নিশ্চয়ই নিজের কথা । তুমি শুনেছ এ-সব কথা ইতি-
পূর্বে ?

র—না !

বি—যে রকম ভাবে ‘না’ বললে তাতে মনে হয় হাঁ-ই বলা হল ।
তোমাদের হাঁ-ই না, আর না-ই হল হাঁ, মাদ্রাজীদের ঘাড় নাড়ার
মতন । একবার কি হয়েছিল জান রমা-দি ! সাউথক্লাবে মাদ্রাজীরা
খেলতে এসেছিল, চাএ নিমন্ত্রণ করি । জিজ্ঞাসা করলাম, চা
দেবো ? কৃষ্ণস্বামী ঘাড় নাড়লে, আমি চা দিলাম না, সকলেই ঘাড়
নাড়লে, আমি মহা অপ্রস্তুত, সরবৎ পাই কোথায় ? লেমনেড
আনালাম, প্রথম একজন বল্লেন, ‘লেমনেড খাব না, চা খাব—’
তার পর আর একজন, তার পর আরো একজন, চা দিলাম,
লেমনেডগুলো ‘বয়’রা খেলে । তখন বুঝলাম হাঁ মানে না, না
মানে হাঁ ।

সু—সেই থেকে পরিষ্কার প্রমাণ হয়ে গেল যে মেয়েদের হাঁ

মানে না, না মানে হাঁ। লজিকটা প্রত্যেক ছেলের পড়া উচিত,
নচেৎ কথাবার্তার মধ্যে বালস্থলভ চপলতা এসে পড়ে। অমৃতম্
খাবার লোভ নেই। রমলাদি, চা আনতে বলুন।

র—স্ব, তোমার বাড়াবাড়ি। ও কি মন্দ বলছে?

স্ব—রমলাদি, কেন কাঁদাচ্ছেন ওকে? আবার জর আসবে।

বি—ছাথ স্বজন দা, প্রতিজ্ঞা না রাখতে পার ভদ্রতা রাখ।

স্ব—মাপ কর ভাই, তোমাকে জ্বালাতন না করার প্রতিজ্ঞা
একেবারেই ভুলে গিয়েছিলাম, আমার স্মৃতিশক্তি কমে আসছে।

বি—আরো বাজে বই পড়! কোন নতুন আইডিয়া মাথায়
আসবে না—মাথা খারাপ হয়ে যাবে—খগেনবাবুর মতন।

র—সেইজন্ত বুঝি পড়িস না?

বি—জীবনটাকেই বড় করে দেখা আমার অভ্যাস।

স্ব—জীবন! অভ্যাস!

বি—ধর্ম।

স্ব—ধর্ম!

বি—যাই বল, জীবনটা আইডিয়া নিয়ে খেলা নয়, তার
চেয়ে ঢের কঠিন কাজ।

স্ব—টেনিস খেলার মতন!

র—স্ব, চুপ কর না, বলতে দাওনা ওকে।

স্ব—চুপ করলাম, একদম চিস্তরহিত করলাম।

বি—স্বজনদা, অমন গম্ভীর হোয়ায়ো না, সহ্য করতে পারি
না। চোখ কৌচকাতেও শিখেছ দেখছি।

অন্তঃশীলা

সু—এক রমাদির আদর খাওয়া ছাড়া আর কি সহ্য করতে পার ?

র—হ্যারে বিজন, আইডিয়া নিয়ে খেল! নয় কেনরে ? আর একটুকরো চিনি নে।

বি—আচ্ছা দাও, বলছি। কি জ্ঞান, বইএর পাতা উল্টে গেলাম, ইচ্ছে হল বন্ধ করে দিলাম, বস, চলে গেল আইডিয়া, আবার খুললাম—এল, আবার বন্ধ করলাম, ফিরে গেল ; কিন্তু তুমি ইচ্ছে করলে কোন ঘটনা বন্ধ করতে পার ? পার না, চলেছেত' চলেইছে, যেন একটা—একটা...

সু—লং র্যালী

বি—কথা কওয়া আমার চলে না তোমাদের সঙ্গে।

সু—অন্ততঃ ভাষার বৈচিত্র্য না অর্জন করা পষাস্ত।

বি—তোমার গুরুও ত কথা কইতে কইতে আটকে যান—
লাফিয়ে যান—Cataract of Lodorএর মত !

সু—এই ত' বিজন বেশ সাহিত্যিক হয়ে উঠেছে ! রমাদি ভুলবুঝ না ওকে—ও কবিতাটির আবৃত্তিই শুনেছে ইন্সটিটিউটে। তা হলে বিজন, তোমার মত হল বই আর আইডিয়া একই বস্তু ?

বি—তুমিই তা হলে কথা কও।

র—সেই ভাল। সৃজন তোমার কি মত ?

সু—‘জীবন’ সম্বন্ধে আমার কোন মতামত নেই, বিজনের জীবন সম্বন্ধে আমার মতামত আছে, সেটা এতই সুস্পষ্ট ও

স্বদৃঢ় যে তাকে বিশ্বাস বলতে কুণ্ঠিত হব না। আমার বিশ্বাস এইরূপ, জীবনকে সাউথ ক্লাবের বেড়ার বাইরে টেনে না আনলে সেই সম্বন্ধে মতামত প্রকাশ অর্কচীনতার নামান্তর। অঁত বড় বিষয়ে কথাবার্তা কইবার ওর অধিকার আছে স্বীকার করি না। এও বলতে রাজি যে জীবন সম্বন্ধে ওর মতামত গড়ে ওঠেনি, কারণ, বেচারি সুযোগ পায় নি। ওর জীবন এখন টেনিস কোর্টের চুনের সমান্তরাল রেখার মধ্যে আবদ্ধ।

বি—দাদার অনেক সুযোগ হয়েছে জানি !

র—বলই না স্বজন !

স্ব—আমি বিনয়ী। আপনি বলুন।

র—আমি অজ্ঞ, সত্যই জানি না। ছুটো কালো পদ্মার মধ্যেই আমি সীম্যবদ্ধ। এইবার তোমার চা খাও। আজ নিজে ভাই কিছু তৈরী করতে পারিনি।

বি—ঐ জ্বাথ ! শরীর নিশ্চয়ই খারাপ হয়েছে ! তুমি ঢাকতে গেলে পারবে কেন আমার কাছে !

স্ব—মেয়েরা মনের কথা বিজ্ঞের কাছে গোপন রাখতে পারেন না। ওর দৃষ্টি তীক্ষ্ণ। জীজ্ঞাতির মনের কথা ঢাকবার চেষ্টা হল ঢাকনা উত্তোলন করার নিমন্ত্রণ মাত্র—এই হল বিজ্ঞের মত।

বি—আমার মতামত কি তোমাকে প্রকাশ করতে হবে না।

স্ব—ভুল বিচার করলে। প্রকাশ নয়, সুপ্রকাশ

বি—সাহিত্যিক মশাই থামুন, কেবল কথার প্যাচ, খগেন

অন্তঃশীল।

বাবুর শিষ্য বটে ! কি করে হলে ! তবু যদি বেশী আলাপ থাকত ! মহাভারতের একলব্য বিংশশতাব্দীতে জন্মেছেন !

স্ব—রমাদি, বিজন শিশুদের মহাভারত পড়েছে।

চিন্তামণি চা ও খাবার নিয়ে এল। বিজনকে খানকয়েক বিস্কট ও ফল দিয়ে রমলা দেবী বাকি খাবার স্বজনের সামনে রাখলেন।

স্ব—নিজেকে কিছু খাবেন না ?

র—না দেবীতে খেয়েছি। বিজন, চুপ করলে কেন ? তোমার কথা শুনতে আমার ভাল লাগে।

স্ব—বাস্তবিক রমলাদি, ওর প্রাণময়তা সকলকে আচ্ছন্ন করে। কথাই হল ওর প্রাণ। কথার মধ্যে একটু অগ্নি কিছু মেশান থাকলে মন্দ হত না। বলা বাহুল্য, আমি একটু ঘি-এর পক্ষপাতী।

বি—থগেন বাবুর মতন বুদ্ধিতে আমার কাজ নেই স্বজনদা। কচকচানি পাঁচ কাটা আমার ধাতে বসে না। রস সব শুথিয়ে গেছে ভদ্রলোকের ! যার স্ত্রী মরেছে মাত্র দুদিন আগে—মাপ কোরো তোমরা—সে কি করে তর্ক করে ! বলবে তোমরা, চিন্তা যাঁরা করেন তাঁদের স্বভাবই ঐ। ও রকম thoughtful লোকের সংস্পর্শে নদীও শুথিয়ে যায়, সাবিত্রীদি ত' কোন ছার ! তোমরা কিছু মনে কোরো না, তোমাদের হীরোকে আমি নিন্দা করছি বলে। কিন্তু ও কি রকম চিন্তা, যার তাপে সব মুসুড়ে পড়ে, নিজের রস, ভাবগুলো পক্ষান্ত ?

স্ব—চা দেব ?

বি—না স্বজন দা, তুমি বল। না হয় রমাদি তুমিই বল।

স্ব—আমি বলছি। খগেন বাবুর চিন্তাগুলি সব এগিয়ে চলেছে, জীবনের সঙ্গে। তিনি সমগ্রভাবে চিন্তা করেন, দেহ মন বুদ্ধি ইন্দ্রিয় দিয়ে, চিন্তাব্যবসায়ীর মতন নয়। মস্তিষ্ক তাঁর সর্বদেহে পরিব্যাপ্ত।

বি—অত বাজে কথা কন্ কেন?

স্ব—তোমার পক্ষে অপ্রাসঙ্গিক হতে পারে, তাঁর নিজের পক্ষে নয়। নিজে তাঁকে কতটা বোঝ এইটাই তোমার প্রশ্ন যদি হয়, তা হলে তার উত্তর সহজ—তোমার নিজের স্তরের ওপরই সেটা নির্ভর করবে। আর তিনি কি প্রকৃতির যদি বোধ করতে চাও, তা হলে উত্তর একটু কঠিন হবে।

বি—ধন্ববাদ! বুঝে কাজ নেই। চা খেতে এসেছি চা-ই খাই, তর্ক করব না। চুপ করলাম।

র—কটা বাজল?

বি—এখন যেতে বলছ?

র—না।

বি—ছাথ স্বজনদা আমি তোমার শত উপদেশেও আমি ঐ রকম অ-স্বাভাবিক ও আত্মসত্তরী হতে পারব না।

র—একটু ফল দেব?

বি—পারব না—মানুষের মধ্যে রস থাকা চাই, শুষ্ককাষ্ঠ উল্লুনের প্রয়োজন। আমার মনে হয় খগেন বাবু কখনও সাবিত্রীদির সঙ্গে প্রাণ খুলে হাসেন নি, সর্বদাই তাঁকে উপদেশ

অন্তঃশীল।

দিয়েছেন, নয় তাঁর সঙ্গে তর্ক করেছেন। সর্বসাধারণকে তিনি দেখতে পারেন না—কেন না তাতে তাঁর দার্শনিকতায় আঘাত পড়ে, ভাবেন—‘হ্যাঁ! আমার সঙ্গে ওদের একমত! তার চেয়ে উল্টো কথা বলি।’

র—চা?

বি—দাও। ভাবছ, বোধ হয়, কবে দেখলাম! এই সেদিন আলাপ হয়েছিল

র—কবে?

সু—আপনি যে দিন দমদমা যান সেই দিন সকালে। সন্ধ্যায় কাশী চলে গেলেন।

বি—একদিন গিয়েছিলেন। ভদ্রলোক ভাবেন, কারুর যে মতামত আছে, কি থাকতে পারে বিশ্বাস করতে চান না। যে বই বলি ভাল লাগে, অমনি লেকচার দিয়ে প্রমাণ করেন বইটা খারাপ, যেই বলি নতুন ধরনের ছবি ভাল লাগে না, অমনি—সে সব কথা মনে নেই, যেই বল্লান ডিমফ্রেসী, অমনি বল্লেন, আবদারে ছেলে, যেই স্বাধীনতার কথা উঠল, অমনি বল্লেন, নিজের অতিরিক্ত কোন শক্তির বাধ্যতা স্বীকার করাই জগতের পক্ষে মঙ্গল, যেই সাম্য—অমনি, সাম্য নেই। আর মৈত্রীর বেলা তুমি রমাদি যদি একবার তাঁর মুখ দেখতে তা হলে না—হেঁসে থাকতে পারতে না—তর্ক’বুদ্ধি সব লোপ পেল—বল্লেন, মানুষ একলা, তবে চায় বন্ধুত্ব, একেবারে আম্তা আম্তা...এ লোকের ঐ রকম হবে না ত’ কার হবে? বেঁচে

থাকলে ভদ্রমহিলা পাগল হয়ে যেতেন। আমার তাঁকে বড় ভাল লাগত—এত লক্ষ্মীটি ধরণের! ভদ্রলোক বুঝি কাশী গেলেন! স্বজনদার তাঁকে বড় ভাল লাগে, রমাদি।

র—তাই নাকি ভাই? স্বজন ভারী ছুটছে, খুব বকে দেব ওকে।

বি—তোমার বকা আমি জানি—এই ধম্কে এই মাপ চাওয়া—তাতে ছেলে খারাপ হয়।

র—ঠিক বলেছ বিজন—তাতে ছেলে আবদেহে হয়। আচ্ছা বিজন, যে একলা থাকতে চায় সে বুঝি খারাপ লোক?

বি—নিশ্চয়ই, সে লোক স্বার্থপর, দাস্তিক। এজগতে মানুষ একলা থাকতে পারে না, মানুষ একলা থাকার জন্ত জন্মায়নি। জগতে পাটনার চাই।

সু—Mixed এ। বিজন খুব ভাল Mixed Doubles খেলতে পারে বুঝি জানেন না? পাটনার সার্ভিসে ভুল করলেও বলে My fault! আর যদি ওর মিষ্টী Sorry শোনেন তা হলে ...অসম্ভব একেবারে সামালান নিজে।

বি—আর বুঝি Singles পারি না? এবার দেখো, আদং খেলা ঐ!

সু—ছি: ছি: বিজন, ওখেলা খেলো না, এ জগতে কেহই Singles খেলবার জন্ত জন্মায়নি, যে খেলে সে স্বার্থপর, আত্মসত্তরী, অতএব খারাপ খেলোয়াড়।

বি—ঐ খানেই ভুল করলে, Singles-এতেও অল্প একজনের

অন্তঃশীলা

সঙ্গে খেলতে হয়, তবে সে নেটের উলটো দিকে থাকে ।
কখনও খেলনি, জানবে কোথেকে ?

র—এ কোর্টে একলা ত' ?

বি—কৈ সৃজন দা', একেবারে চুপ, উত্তর দাও ।

সু—সময় পাচ্ছি কৈ ? উত্তর দেওয়া অসম্ভব, অতএব
অন্তায় ; চল বেড়াতে যাই ।

বি—রমাদিও চল, র্যাকেট সকালে আনা হয় নি ।

সু—তোমরা যাও ।

র—সৃজনের কোথাও দরকার আছে না কি ?

বি—না, অমনি, থাক্ ।

সু—বলই না বাপু, ভারি গুঁজ গুঁজে লোক ! একেবারে
খগেনবাবুর হাতঝাড়া আশীর্বাদ পেয়েছ !

র—কেন তখন থেকে বাজে কথা কষ্টে, বিজন ?...কি
দরকার আছে সৃজন তোমার ?

সু—বইএর দোকানে, পরে হবে । চল বিজন, আগে টেনিসের
দোকানেই যাই । তোর ঠাণ্ডা লাগবেনা ত ?

বি—লাগে লাগুক গে !

সু—মাফ্লার আন নি কেন ? চল বাড়ি থেকে নিয়ে যাই
আচ্ছা, গিয়ে কাজ নেই, কোর্টের কলারটা উলটে নে । সত্যি,
তোর আবার ম্যাচ খেলতে হবে, মাদ্রাজী ও পাঞ্জাবীদের হারাতে
পারবি ত ?

বি—না পারব না ।

র—চল

বিজ্ঞান তাড়াতাড়ি নেমে সামনের সীটে ড্রাইভারের পাশে এসে বসল দেখে সূজন জিজ্ঞাসা করলে, ‘ওখানে কেন?’ ‘এখানেই ভাল, এঞ্জিনের তাপ পাওয়া যায়, হাওয়া লাগে না। তোমরা দুজন ভেতরেই বোসো না।’ গাড়ি টেনিসের দোকানের সামনে এল। ‘তোমাদের কষ্ট করে নামতে হবে না’ বলে বিজ্ঞান একাই দোকানে গেল। রমলা দেবী সূজনকে জিজ্ঞাসা করলেন, ‘এখানে টেনিসের বই পাওয়া যায়? বেশ, তা হলে একে একটা singles খেলার বই কিনে দাও গে’ ‘ও নেবে না, এখন’ ‘তবে কাল কিনে দিও’ ‘তাই ভাল’ ‘তার চেয়ে চল এখনি যাই, তোমারও দরকার আছে ত?’ ‘পরে হবে’ ‘এখনি চল না, যাই। কি বই?’ ‘খগেনবাবু খান কয়েক বই পড়তে লিখেছেন।’ টেনিস ব্যাট তৈরী হয়নি, বিজ্ঞান দোকান থেকে ফিরে এসে বাড়ি যেতে চাইলে। রমলাদেবী সম্মতি দিলেন। সূজনও বাড়ির সামনে এসে নেমে পড়ল, ‘রমাদি, এস না?’ বিজ্ঞান— ‘আসা হোক না?’ র—‘এখন আসা হবে না’ র—‘সু, কাল আসবে?’ বিজ্ঞান চলে গেল দেখে রমলা দেবী বল্লেন, ‘এস, কেমন? লক্ষ্মীটি’

রাত হয়েছে। চা-পাটির সামান্য অবশিষ্ট, কিছু মুখে দিয়ে রমলা দেবী শোবার ঘরের দরজা বন্ধ করলেন। কথা কইতেই হয়, না হলে সামাজিকতা রক্ষা হয় না, সামাজিকতা বজায় রাখতেই হয়, নচেৎ একলা সারাক্ষণ থাকা যায় না। বিজ্ঞান আর সৃজন ভিন্ন প্রকৃতির, সৃজনের সঙ্গে খগেনবাবুর কোথায় মিল আছে যেন, চিঠি লিখেছে...ভাল, ভাল, ভাল...সৃজন ভাল, কম কথা কয়, জীবনকে বুঝতে চেষ্টা করে। বিজ্ঞানকে ধমকান উচিৎ হয় নি, ছেলেমানুষ, জীবনকে খেলা মনে করে, কিন্তু যারা বুঝেছে যে খেলা নয়, খেলা ছাড়া অগ্র কাজ রয়েছে তারা খগেন বাবুর মতনই ব্যবহার করবে। মানুষের ধর্ম বুঝে তার সমালোচনা করা উচিৎ। বিজ্ঞানের প্রাণ ছুটেছে অবাধগতিতে, কোন বাধা

নেই তার শ্রোতের মুখে, তাই সে অনর্গল কথা কয়। খগেন বাবুর জীবনে বাধা পড়েছে অনেক, নিজের তৈরী বাধা হলে কি হয়! বাধা ত' বটে, তাই তিনিও অনর্গল কথা কন। তবে ধনি ভিন্নপ্রকারের, বিজনের হল তরাইএর নদীর, খগেন বাবুর হল পাগলা ঝোরার। বাধা তাঁর অস্তরের, বাইরের নয়, অস্তরের বাধাই বড়, পুরুষের কি মেয়েদের বাধা কি কেবল সমাজের, অজ্ঞতার? সাধারণতঃ তাই। মন ভোলান কথা মেয়েদের সেই জন্তু কইতেই হয়—কিন্তু বেশীক্ষণ সহ্য করু' যায় না—বিজ্ঞনকে ধম্‌কান উচিত হয়েছে।

রমলা দেবীর মনে খানিকটা শান্তি এল। ড্রয়ার থেকে মোড়কটি বার করলেন। একটি ছোট্ট কাঁচি দিয়ে সূতো ও বাইরের কাগজ কেটে টেবিলের ওপর গুছিয়ে তুলে রাখলেন। সূজনকে কি লিখেছেন?

কাশীর রাতে নিশ্চিন্তা নেই। লোকেরা নিশাচর। দিনে ধর্ম, রাতে ভোগ। সহরের অশুষ্ঠ ও অবাক্ত সুরকানে আসছে। ছেলে বয়সে একবার পাড়াগাঁয়ে যাই, দুপুর বেলা মাঠে পালিয়ে গিয়েছিলাম, খোলা ধু ধু করছে মাঠ, ফসল বোনা হয়েছে, মাটি পরিষ্কার ও নরম; তার ওপর শুয়ে পড়তে ইচ্ছে হল, শুয়ে পড়লাম, বোধ হয় ঘুম এসেছিল। তন্দ্রাবস্থায় মনে হল মাটির ভেতর থেকে কলরব উঠছে, 'জায়গা ছাড়, সরে যাও, ফুটতে

অন্তঃশীল।

দাও।’ আমি লাফিয়ে উঠে পালিয়ে যাই—সে আজ কতদিনে কথা। কাশীর অঙ্কুরিত বাসনা আলোর কপট ধর্মকে দূরে ঠেলে ফেলে দিয়েছে। আমার যৌবনের অভিজ্ঞতার পুনরাবৃত্তি হল কলরবের রেশ লেগেছে আমার মনে। বহু সাধনার মিথ্যাভার আজ এই যাহ্নমস্ত্রে লঘু হয়ে গেল। আমার বাসনা হল উন্মুগ্ন। কাশীর রাতের ভোগম্পর্হা আমাকে আক্রমণ করেছে। .

দিনের সাধনা, রাতের বাসনা, দিনের আদর্শ, রাতের বাস্তব, আলোর বুদ্ধি, তর্মিষার দেহ—এই কি চিরন্তন বিরোধ? বিরোধের অতিরিক্ত কি কিছুই নেই? সামঞ্জস্য কি কেবল সাহিত্যের ভাষা? এই দোলাতেই কি তুলব সারাক্ষণ? সাধনা, আদর্শ, বুদ্ধির অত্যাচারে চিত্ত আমার জর্জরিত।

সাবিত্রী চেয়েছিল সামঞ্জস্য। আমার অন্তরে বিরোধ ছিল, তাকে সেই বিরোধের ক্রেশ ভোগ করতে আমন্ত্রণ করেছিলাম। সে কেন বুঝবে? তার ইতিহাস তারই। আমার আদর্শে তাকে গড়তে চাই নি, রমলা দেবী ভুল বুঝেছেন। বিরোধ আমি সহ্য করতে পারছিলাম না, তাই তাকে বলেছিলাম, ‘ওগো, একটু ভাগ নেবে?’ হুকুম করেছিলাম সম্ভবতঃ। সে ভাগ নিলে না। বাইরের বিরোধের বিপক্ষে সে আমাকে নিশ্চয় সাহায্য করত। কিন্তু সে বিরোধ ভয়ঙ্কর নয়, যুদ্ধের ভান মাত্র।

রমলাই আমার অন্তরের বিপ্লব বুঝেছে। তারও হৃদয় আগ্নেয় গিরির মতন। বাইরে থেকে দেখলে মনে হয়, কত নিরীহ; মুখ থেকে কেবল মাঝে মাঝে গরম ধোঁয়াই নির্গত হয়,

তাতে আশ্রিত ব্যক্তির আতঙ্ক হয় না, বরঞ্চ উৎসাহ আসে। আমি ধোঁয়া দেখে বিরক্ত হতাম। কিন্তু আজ আমি বুঝেছি রমলা কি আগুণ বুকে ধরে আছে। আমার সমগ্র মন ও দেহে কম্পন ধরেছে। রমলা আমার সহধর্মী, সহধর্মিনী হতে পারবে না। আমি তাইতেই সন্তুষ্ট।

* * * *

রমলা দেবী হাঁটুর মধ্যে মুখ গুঁজে, বসে রইলেন.....
...এইত', এইত' সব বোঝে, ঠিক বোঝে, নিভুল। সমধর্মী
যে সেইত সহধর্মিণী—কেন অসম্ভব, একবার স্ববিধা আসুক!
আশ্রয়? মিলবে না? খুব মিলবে। মুখে হাসি ফুটে উঠল।
ডায়েরীর পাতা আবার পড়তে লাগলেন।

* * * *

নিজের মনের কথা প্রকাশ করবার ভাষা নেই, ভাবও বেশ
সাজান নয়, তবুও লিখতে বসি। যদি সাহিত্যিক হতাম
সমালোচকে বলত, লেখ কেন? কিন্তু রমলাকে বলেছি, ডায়েরী
লিখব, চিঠি লিখব না। তা ছাড়া, অন্তরের ভাবগুলি আজ
আমাকে বড়ই পীড়িত করছে, লিখলে খানিকটা শান্তি পাব।
লেখা আমার পক্ষে আত্মসংস্কার, সাধনা, সোয়াস্তি। বড়ই মনটা
ভারি ঠেকছে।

আজ আমার জীবনের সব পড়াশুনা, সব চিন্তা নিতান্ত
নিরর্থক মনে হচ্ছে। যেন সময় কাটাবার জন্তই সব কিছু করেছি,

অন্তঃশীলা

পড়েছি, ভেবেছি। যেমন রমলা দেবী ভদ্রতা রক্ষার জগুই
হেঁসেছেন, সেজেছেন, উপকার করেছেন। কিন্তু আজ আমার
তাগিদ এসেছে। মনের কি প্রকার গঠন হলে মানসিক ক্রিয়া-
কলাপ আপনা থেকেই অর্থযুক্ত হয়? আপনা থেকে হয় কি?
বোধ হয়, না। সম্বন্ধেই অর্থের উৎপত্তি। সম্বন্ধ নিজের সঙ্গে
হয় না। একের মধ্যে আবার সম্বন্ধ কি? প্রতিজ্ঞা-প্রমেয় নিয়ে
যে সম্বন্ধ তার অর্থ, তারই কাছে যার সে-সম্বন্ধ হৃদয়ঙ্গম না
করলে চলছে না। 'আমার সমগ্রতার সম্পর্কেই সম্বন্ধ অর্থে ও
তাৎপর্যে ভরে ওঠে। কেবল আমার কি? একতরফা-সম্বন্ধ
নেই, থাকলেও সে একপ্রকার দোষাত্ম্য।

এতদিন আমার ধর্ম কি ছিল? মনগড়া একটা ধর্ম আমার
ছিল নিশ্চয়ই, যদিও তার রূপ আমার কাছে প্রকট হয়নি।
ধর্মের প্রয়োজন আমি চিরকালই মেনে এসেছি। বাহ্যিক
আচার অনুষ্ঠান, সমাজকৃত নিয়মাবলী স্বীকার করিনি। ভূতের
ভয় থেকে যে ভগবৎবিশ্বাস তৈরী হয় তারও কোন প্রয়োজন
হয়নি। ভাবভ্রাম—আমি যেকালে বিচিত্র, আমার অভিজ্ঞতা
যেকালে পর পর চলে আসছে, তখন সে বৈচিত্র্যের একটা
মূলগত ঐক্য ও সূত্র থাকবেই থাকবে। অভিজ্ঞতার অন্তরে
কিছু পাইনি বোধ হয়, তবু বুদ্ধির দ্বারা একটা ঐক্য সৃষ্টি করতে,
একটি মালা সাজাতে গিয়েছি। অন্তরের সূত্র খুঁজে পাইনি,
তাই বিশ্বাস করে এসেছি বুদ্ধির সূত্রে, তাকেই ধর্ম ভেবে
এসেছি। যেটা ধারণ করে সেই ধর্ম। আমার স্মৃত্যয় সাবিত্রীকে

বাঁধতে যাই, তাই সে বাঁধা পড়ল না, স্ত্রী ছিল পল্কা, ছিঁড়ে গেল। ভালই হল, রজ্জুতে সর্পভ্রম মায়ামাত্র ; মায়া আমার গিয়েছে। কিন্তু জীবনের কোন কাজেই স্থিরসত্য ধারণাশক্তির কোন চিহ্ন পাচ্ছি না। হঠাৎ বড়লোকের বাড়ির নতুন বৌএর গায়ের গহনার মতনই আমার অভিজ্ঞতা আমাকে অসুন্দর করে তুলেছে, আমার দেহকে গুরু করেছে। রমলার অলঙ্কার রমলাকে সুন্দর করে, তার দেহ কেন এত লঘু এতদিনে বুঝেছি, না খেয়ে নয়, সুন্দর সামঞ্জস্যে। রমলার ধর্ম আছে, 'তুমি অভিজ্ঞতা উত্তম-রূপেই ধৃত, তাই তার পদক্ষেপ লঘু'। অধার্মিকেরাই স্থূল হয়।

এমন সময় নিজের অতিরিক্তকে যদি ভালবাসতে পারতাম, তা হলে প্রেমাস্পদের সম্পর্কে এসে আমার ভার লাঘব হ'ত, আমার জীবন অর্থপূর্ণ হত।

বড় ভাবতে ইচ্ছে করে প্রেমে পড়লে আমি কি করতাম। এই সব বিচ্ছিন্ন অভিজ্ঞতা মালায় গ্রথিত হত। রূপ থাকত, গন্ধ থাকত, প্রত্যেকটি ফুলের গন্ধে মনপ্রাণ পুলকিত হত, লাভের ওপর মালার রূপে মোহিত হতাম, ধারণ করে সুন্দর হতাম।

ভালবেসে জীবনকে বাংলা দেশের মন্দির করে তুলতাম। ভারতীয় ললিতকলায় লতায়িত চম্পক-অঙ্গুলিকে অবলম্বন করে অস্তরের সৌন্দর্য যেমন বিচ্ছুরিত হয় এবং অনন্ত সৌন্দর্যের ইঙ্গিত দেয়, তেমনি তাকে আশ্রয় ক'রে আমার দৈনন্দিন জীবনের ব্যাহতশক্তি অস্তরের শক্তির আভাস দিত। তাকে আপন করতাম প্রথমে, তার পর তাকে ছেড়ে দিতাম। তাকে

অন্তঃশীলা

অধীনে এনে স্বাধীন করতাম। স্বাধীন করতাম তাকে আমার চেয়ে বড় করে—আমার আদর্শের বাইরে পাঠিয়ে। সাবিত্রী ও রমণী দুজনের কাছে এই শিক্ষা পেয়েছি। এখন বুঝতে পেরেছি আদর্শ অনুযায়ী ভালবাসা পাপ, তাতে অত্নের জীবনকে অপমান করা হয় নিজের স্বার্থের জন্ত, নিজেরও স্বার্থসিদ্ধ হয় না। সে আমার আদর্শকে অতিক্রম করবে—তবেই তাকে নিকামভাবে—সে যা তাই হিসেবে পাব। আদর্শের কাঠামোতে মূর্তি গড়া একপ্রকারের কাম। সাবিত্রীর সম্পর্ক নওর্থক, রমণীর সদর্থক। আমার জীবন শুদ্ধ হোক, শুদ্ধ হোক।

সে আমার আদর্শকে অতিক্রম করবে, উচু হয়ে নয়, সে যা তাই হয়ে। আদর্শের মাপকাঠিতে সাবিত্রী কতটা নীচু তারই প্রমাণ খুঁজে এসেছি, পেয়ে এসেছি। মাপকাঠি ছিল বলেই না স্বযোগ পেতাম! সাবিত্রীকে বড় করতে গিয়েছিলাম ভালবেসে নয়, মাপকাঠি দিয়ে। মাপকাঠি দিয়ে মাপাই যায়, দীঘল করা যায় না। সাবিত্রীকে সার্থক করতে পারিনি—আমার আপশোষ রাখবার জায়গা নেই।

বেদান্ত মানতে ইচ্ছে হয় না। সাধুজীর উপদেশ, বই পড়া, সব ব্যর্থ হল। আমার প্রশ্নের উত্তর পাচ্ছি না।

ব্রহ্মই আছেন, আর কেউ ও কিছু নেই। আমার আত্মা কোথায় গেল? বৈদান্তিক সাধু বলেন, 'সোহংজ্ঞানী হও,

তবেই তোমার আত্মার সার্থকতা।’ কিন্তু অশ্রুর আত্মা কোথায় যাবে? তাকেও ঐ উপদেশ? এই মোহহংজ্ঞানটি কি? অহং-জ্ঞান লোপ পাওয়ান, এবং...তারপর অব্যক্ত। চিত্রকর গাছের ওপর আলো পড়েছে আঁকবেন—তাকে করতে হবে নানা-প্রকৃতির সবুজের সমাবেশ—এই হল তাঁর সমস্তা। এখন আলোকতত্ত্বের অধ্যাপক এসে তাঁকে বলেন, ‘সব সবুজই এক শ্রেণীর, সব রংই এক জাতির কম্পন, কারণ সবুজ-লাল, আলো উত্তাপ সবই কম্পন।’ হয়ত খুব খাটি কথা—কিন্তু এই জ্ঞানার্জনের ফলে চিত্রকরের ছবি কি স্বতঃই অঙ্কিত হয়ে যায়? ফিকে সবুজ কি আপনা থেকে সোনালী-সবুজের কোলে এসে শুয়ে পড়ে? মানুষের সঙ্গে মানুষের সম্বন্ধস্থাপন যার সমস্তা—বেদান্ত চর্চাই যার উদ্দেশ্য নয়, যে জীবনকে সমৃদ্ধ করে তুলতে চায়, তার পক্ষে মোহহংজ্ঞানী হওয়া একেবারে অসম্ভব। সম্বন্ধ ছেদ করে সম্বন্ধস্থাপন করা অসম্ভব। সম্বন্ধকে মায়া কি সংস্কার বলে সম্বন্ধ স্থাপন করা যায় না। কোন আর্টিষ্টই বেদান্ত-গ্রহণ করতে পারেনা। আটের প্রাণ হল সম্বন্ধস্থাপন। বেদান্তের দ্বারা আমার সাহায্য হবে না।

তার চেয়ে সাংখ্য সন্তোষজনক। বেদান্তকে সাহসের চূড়ান্ত মনে করতাম; কিন্তু মায়া বলে উড়িয়ে দেওয়া কি একপ্রকার কাপুরুষতা নয়? বেদান্তের ভিত্তি অস্বীকারে, তার পদ্ধতি নেতিবিচারে, অস্বীকারে সাহস কম, নেতিবিচারে বুদ্ধির স্বজনী শক্তির প্রয়োগ কম। স্বীকারে, ইতি-বিচারে, সাহসের প্রয়োগ

অন্তঃশীল।

বেশী। স্বীকার করলেই বহুপুরুষ মানতে হয়। সাবিত্রীকে মানিনি—তার পক্ষে আমি ছিলাম বৈদান্তিক—আমার মোহহংস্জ্ঞান ছিল স্বার্থপরতার নামাস্তর, ছিলাম আমি Egotist—। কবি লিখেছেন ‘বৈরাগ্য-সাধন যে মুক্তি সে মুক্তি আমার নয়।’ আমি ভাবি—নেতিবিচারে, অস্বীকারে যে মুক্তি সে মুক্তি আমার নয়। বৈরাগ্যসাধনের প্রয়োজন আছে, চিন্তাশুদ্ধিতে। এই আমার ধর্ম।

তা হলে রমলাই কি প্রকৃতি? সাবিত্রী আর নেই, অতএব তার সঙ্গে আর সম্বন্ধ কি? সে এখন স্মৃতি—আমার স্মৃতি—নিজের সঙ্গে প্রেম করতে রাজি নই।

এবার যাকে ভালবাসব তার বিশেষ অস্তিত্ব আমি গ্রাহ্য করব। প্রথমেই গ্রাহ্য করব, তার কাছে কিছু দাবী না করে। দাবী করলেই নিজের করে নেওয়া হল। দাবী না করে ভালবাসব। আমার ভালবাসার ছোঁরেই সে নিজে থেকে পূর্ণ হবে। দত্তই পৃথক করে ভালবাসব ততই সে আরো ভাল হয়ে যাবে, তার নাগাল পাব না, সে আমার আদর্শকে অতিক্রম করবে, নচেৎ,—আদর্শবাদ যান্ত্রিকতার মনোভোলান ছড়া মাত্র। সেক্ষপীয়ার আঁকলেন হ্যামলেটের চরিত্র। কোন্ মস্তবলে প্রথম দৃষ্টেই সে জীবন্ত হয়ে উঠল, তারপর, তার ওপর সেক্ষপীয়ারের কোন হাত রইল না, হ্যামলেট-ডলে গেল তার স্রষ্টার নাগালের বাইরে। কোন্ অনন্ত মুহূর্তে পুরুষস্বীর মিলনে দিব্য সৃষ্টি হল,

স্ত্রী মা হয়ে তাকে প্রাণ দিলে, প্রসূত হয়ে প্রাণী ভিন্ন হল, কিন্তু তখনও সে প্রসূতির আশ্রিত। শিশু বড় হয়ে ভিন্ন মানুষ হল, ব্যক্তিত্ব অর্জন করলে। তখন কি এই যুবকের সমগ্র সত্তাকে সেই মুহূর্তের ক্ষণিকমিলনের মধ্যে আবদ্ধ করা যায়? সে যে তখন পিতামাতার চেয়েও বৃহৎ ন হাইড্রোজেনের দুই পরমাণু অক্সিজেনের একটির সঙ্গে মিশে জলবিন্দু, সেই জলবিন্দুর সমষ্টিতে মেঘ, তার ওপর আলোক-পাতে রামধনু, মেঘ থেকে বারিপাত, বারিপাতে ধরিত্রী শস্তা-শ্রামলা। কোথায় পড়ে রইল পরমাণুর মিলন? এমনি করে ভালবেসে আমার প্রেমাম্পদকে নতুনতর করে তুলব। আমার প্রেম তার পরিণতির স্তর হবে, আমার সংস্পর্কতা তার উন্নতির সোপান হবে? এ ভালবাসায় আমার আদর্শ ক্ষুণ্ণ হল না, মমত্ববোধ লোপ পেল না, সমৃদ্ধতরই হল। স্তম্ভ নয়, চলিষ্ণু ভালবাসা, যেমন জীবন। এই হল আমার পুরুষসিদ্ধি।

রমলা দেবী বার বার ডায়েরী পাতা কয়টি পড়লেন। তাঁর সর্দর্শরীর অবনত হল। এ কি লিখছেন! এতে খে লজ্জা দেওয়া হয়। সাবিত্রীর প্রতি খগেন বাবু কোন অত্যাচার করেছেন রমলা দেবী মুখ ফুটে কাউকে কখন বলেন নি ত! হয়ত, বাবুহারে প্রকাশ পেয়েছে? কে গুরু! কে শিক্ষা দিয়েছে? তুমিই গুরু, তোমার জগুই জীবনের মোড় ফিরেছে। আমার

অন্তঃশীলা

বিশেষ অস্তিত্ব কিছুই নেই, সবটাই আমার ছায়া ; আমি তোমারই সৃষ্টি, তোমারই অধীন, অতিরিক্ত নই, তুমিই নতুনতর করেছ, আমাকে ভেঙ্গে গড়েছ। তুমিই আপন করেছ, কিন্তু, ছেড়ে দিওনা। অধীনে এনেছ, স্বাধীন কোরো না। চাই না—চাই না, চাই না। একলা থাকতে বড় ভয় করছে, গা শিউরে উঠছে। শিশু যেমন মা এর কোঁল ছাড়া থাকতে হলে হাত পা গুটিয়ে মুড়ি দিয়ে চোখ বুজে শোয়, রমলা দেবীও তেমনি বিছানার চাদর তুলে নিজেকে আবৃত করলেন, হাঁফ ধরল, গা হাত পা ঠক্ ঠক্ করে কাপতে লাগল, গলা শুথিয়ে গেল। চাদরের মধ্যে শুয়ে ডায়েরীর পাতাগুলি বুকের মধ্যে চেপে ধরলেন। বড় ভয় করছে, আশ্রয় চাই, আশ্রয় নেই, প্রশস্তবুকের মধ্যে নীড় বাঁধা হল না, সেই সেদিন স্নানের ঘর থেকে বেরোবার সময় বুকটা চওড়া দেখাচ্ছিল, গেঞ্জী না দিলেই হোত। গা'টা কেমন করে গুঁথে ভাবতে গেলে, কিন্তু ভয় যায় কমে, সর্ব্বাঙ্গ যায় শিথীল হয়ে, হাঁফ লাগে, তৃষ্ণা বাড়ে। রমলা দেবী চাদর থেকে মুখ বার করলেন, ঢক্ ঢক্ করে এক গেলাস জল খেলেন—কপালে বিন্দু বিন্দু ঘাম, পুঁছতে ইচ্ছে হল না, হাত বাড়িয়ে শিয়রের জানালা দিলেন খুলে, হাওয়া, শীতল হাওয়া এল ঘরের মধ্যে। শীতল মধুর আহ্বান এই জানালার। ডায়েরী পাতা মুটোর মধ্যে নিয়ে ধারে এসে বসলেন। রাস্তায় লোকচলাচল থামেনি, তবে ভিড় নেই, মাঝে মাঝে মোটর হর্ণের ভীষণ কর্কশ শব্দ নীরব

অমুভূতিকে বিদীর্ণ করে চলে যাচ্ছে...হুকার যাচ্ছে সরে সরে, পিছনের নিস্তব্ধতা দ্রুতভাবে সেই ফাঁক ভরে দিচ্ছে, জাহাজ চলার পর জলের ত্রিকোণ অবসর পূরণের মত...দূরে, অন্ধকারের মধ্যে একটা নারকেল গাছ...না ছায়া? তীক্ষ্ণদৃষ্টিতে দেখতে হয়, খানিক দূরে ছাতের ওপর একজন লোক পাঁয়চারি করছে, ঐ বাড়ীতে অসুখ হয়েছে একটি মেয়ের, আজ রাতেই শেষ হয়ে যাবে...সুখ পেল না...আরো দূরে তেতলা বাড়িটার তিন চারটে ঘরে আলো জ্বলছে, মেসু বাড়ির, ছেলেরা পড়ছে, ...ঠাণ্ডা হাওয়া দিয়েছে, কপালে হাওয়া লেগে সোয়াস্তি হল। রমলা দেবী জানালা থেকে নেমে মাটিতে বসে ডায়েরীর নতুন পাতা পড়তে লাগলেন।

বই পড়তে ভাল লাগছে না। পাতা উল্টে যাচ্ছি কি ভীষণ নেশা মানুষের! আমি বই পড়ি কেন? একলা থাকতে পারিনা বলে? রমলা পাটিতে যায়, অস্ত্রের সেবাশুশ্রূষা করে, বাড়িতে যুবকের দলকে নিমন্ত্রণ করে একলা থাকতে পারে না বলে। আমিও লোকের সঙ্গে মিশতে পারি না, তাই লোকের লেখা পড়ি। একই কথা। লেখা ও মুখের ভাষা একই বস্তু, লেখা কেবল দ্বিতীয়বারের ছাঁকা ভাষা মাত্র। এই যে ডায়েরী লিখছি, এও নিজের মনের সঙ্গে আলাপ, একপ্রকারের। রমলা বলেছিল, 'একবার দেখিয়ে

অন্তঃশীলা

দিন না কি করে একলা থাকতে হয়'। চিঠি আমি আর লিখব না।

• সামাজিক হাঁসির অন্তরালে কান্না রয়েছে। রমলা বাক্স গোছাতে বসে কাঁদছিল—কার জন্তু? সাবিত্রীর জন্তু, না নিজের জন্তু? নিজের জন্তু এবং সাবিত্রীর জন্তু। মানুষ কাজ করে একটা কারণে কি?...কিন্তু পাথরের মূর্তি কাঁদে, যখন শ্মশানের হাওয়া খোলা ধূ ধূ করা মাঠের মধ্যে ছ ছ করে বইতে থাকে। কিং ভীষণ শূন্যতা ওর বুকে!

আমার এক বোন একবার তার জীবনের একটি অভিজ্ঞতা বলেছিল। তার স্বামী মহাপণ্ডিত, পড়বার সময় তাঁর স্বামীর মুখে দিব্যভাবের আবির্ভাব হোত, সেই ভাবটি লক্ষ্য করবার জন্তু সে পর্দার আড়ালে ঘণ্টার পর ঘণ্টা অপেক্ষা করত, লক্ষ্য করে সে গৃহকর্মে চলে যেত। সাবিত্রী কখনও অমন অপেক্ষা করেনি, রমলা কখনও করেছে না কি? আমি কিন্তু ভাবি—আজ যদি আমাকে গোপনে লক্ষ্য করবার কোন লোক থাকত, তা হলে হয়ত আমারও মুখে কোন অজানা লোকের আলোক সম্পাত হত। বিশ্বরশ্মির দ্বারা বিকীর্ণ শক্তির আপেক্ষিক ক্ষতিপূরণ হয় শুনেছি। কার কাল চোখের চাহনি আমার খরচের বিপক্ষে জমার হিসাব বাড়াবে? অমন ভিখারি মন নিয়ে কতদিন চালাব? কার গোপন চাহনির অপেক্ষায় নিজে থেকে নিঃশেষ করব? এই চিরন্তন প্রতীক্ষার শেষ কোথায়?

রমলা কাঁদে টের পেয়েছি। তার অনেক দুঃখ। কিন্তু আমি যে একলা ঘরে কেঁদে বেড়াতে পারি সে কি জানে? বোধ হয় জানে। এ-সম্ভাবনাই কি তার মনে উদয় হয়ে তার হৃদয়কে স্নেহসিক্ত করে? জানি না।

যে শূন্যতার বুকের মাঝে বাসা বাঁধতে চেষ্টা করি সেটা কেবল অট্টোহঁসে আমাকে বিদ্রূপ করে। আশ্রয়বিহীন পাখীর মতন ঝড়ের মুখে ভেসে ভেসে বেড়িয়ে আনি ক্লান্ত হয়েছি। আজ আমার সকল অঙ্গ বিকল, মন কাজ করছে না, বুদ্ধি নিস্ত্রভ, চোখ নিস্তেজ, জড়ের মত শিথীল হয়ে পড়ে থাকতে ইচ্ছে করছে। রমলার কাছে আমার এই অবস্থা কচিছেলের নষ্টামির মতন মনে হবে। হোক গে! স্বীকারই করছি—নিজেকে নিষ্ক্রিয় করে কারুর স্নেহের পাত্র, কারুর চাহনির বস্তু, কারুর মধুর ব্যগ্রতার বিষয়ে পরিণত করতে ইচ্ছে হচ্ছে—সাবিত্রী যেমন নিজীব নিশ্চন্দ হয়ে ফুলশয্যার রাত্রে গৃহীত হবার জন্ত অপেক্ষা করেছিল।

দুঃখ আসে বনের মাঝে সন্ধ্যার মতন, ধীরে, গোপন সঞ্চারে—আমার প্রিয়ার মত তার নম্রগতি; দুঃখ নামে করুণার মতন, আমার প্রিয়ার মত বিষাদমাখা স্মিতহাস্তময়ী মুখটি নিয়ে, দুঃখ আচ্ছন্ন করে আমার প্রিয়ার চোখে অশ্রু-কণার মতন। যমুনার কাল জলে ডুবে যাবার যে আনন্দ গোপিকাকে আবিষ্ট করে, আজ আমার মন সেই আনন্দে ভরে উঠেছে। দুঃখ রূপান্তরিত হল। তীব্র অম্লভূতি নেই,

অন্তঃশীল।

আছে প্রবৃত্তিশূন্যতা। এতে শান্তি আছে, কি নেই, তার কোন
অমুভব নেই, আছে কেবল বিস্তারিত সাধারণ অমুভূতি,
যেটি ব্যক্তিসম্পর্করহিত বলেই অনির্দিষ্ট, কিন্তু অনির্দিষ্ট হলেও
সত্য। কোন সূত্রের চারধারে এই সাধারণ অমুভূতি দানা
বাঁধল? না...জানতে চাই না, ভয় করে, বিশেষের চেয়ে
সাধারণ সুখময়, শান্তিদায়ক। দানা বাঁধলেই কামনা তীব্র
হবে, আমার চিন্তা কেন্দ্রীভূত হবে, আমার গঠন বিঘ্নস্ত
হবে, আমি কুণ্ঠিত, সঙ্কুচিত হব। তখন তাকে সেই
তীব্রতার মধ্যে এনে, সেই বিঘ্নাসের মধ্যে এনে, বিপর্যাস্ত
করব, তার সম্পূর্ণতা ও বিভিন্নতাকে ক্ষুন্ন করব। এ আমি
চাই না, কিছুতেই চাই না। সাবিত্রীর শাস্তি কেউ যেন
না ভোগ করে। চিরকাল ভাসমান অবস্থায় যদি নাই
থাকতে পারি, তবে যেন ডুবে যাই অতলতলে:..।

আজ আমার জন্মদিন। এতদিনের হিসাবনিকাশ করা উচিত।
কিন্তু ঔচিত্যজ্ঞান আমার নেই—আমার কাছে এতগুলো
বৎসরের কোন মূল্য নেই। কালের ভাগ করা আমার ভাল
লাগে না। কালবিভাগ সুবিধার জন্য। সুবিধাকে সুবিধা বিবেচনা
করলেই তার প্রভাব কেটে যায়। জীবনটা চাকরী নয় যে
পাঁচটা বাজবার জন্ত, শনিবারের জন্য প্রাণ উৎসুক হয়ে উঠবে।
ভার্গিস্ চাকরী করতে হয় নি। মৃত্যু সম্বন্ধে এত বেশী

চিস্তিত নই যে মিনিটে ঘাট্ মিনিট বেগে জীবন ছুটছে ভেবে প্রত্যেক মুহূর্তকে আঁকড়ে কামড়ে ধরে থাকব। এই ত' সাবিত্রী মরে গেল, সত্য কথা বলতে কি—আমার জীবনের কী ভীষণ পরিবর্তন হল? কিছুই না—সূর্য্য রোজই উঠছে, রোজই অস্ত যাচ্ছে, কাশী চলে এলাম, এই মাত্র, এখানে মাসীমার পরিবর্তন লক্ষ্য করলাম, এইমাত্র, সাবিত্রী বেঁচে থাকলেও মাসীমা বৃদ্ধা হতেন। সাবিত্রীর মৃত্যুতে পৃথিবীর ব্যাস বেঁকে যায় নি। আমার ইচ্ছাশক্তিও এত প্রবল নয় যে জীবনের প্রত্যেক পল বিপলের মধ্যে একটা না একটা কষ্টব্য পুরে দিয়ে সময়কে ভারি ও তার গতিকে রুদ্ধ করব। যাত্রাপথে লগেজ বগুয়া বোকা মি। শরীর ও মন বড়ই অবসন্ন ঠেকছে।

আমার জীবনের ক্ষণগুলি রঙ্গমঞ্চের নর্ত্তকারী মত লঘুপদে নাচে, ফ্যাকাসে তাঁদের রং, পাউডার মাখা তাদের মুখ, রাত্রি জাগরণে, অত্যাচারে, চিত্তশূণ্যতায় তাদের চোখের কোণে কালিমা পড়েছে, কৃত্রিম তাদের আভা, তাদের চরিত্র নেই বল্লেই হয়, নৃত্যশিক্ষকের আদেশ অনুসারে ছক্ তৈরী করাই তাদের চরম সার্থকতা। এই আকস্মিকের ছক্ তৈরী করার নামই জীবন, আমার জীবন। তার মধ্যে রূপের ঐক্য নেই, মালার সাততা নেই, সুরের অবিচ্ছিন্নতা নেই। ঘটনাবলীর মধ্যে ফাঁকটাই আমার আজ চোখে পড়েছে। বইএর প্রত্যেক পাতার সেলাইএর গর্তটাই আমার কাছে আজ প্রধান।

আমার এই মনোভাব আধুনিক বিজ্ঞান সম্মত বলে আশ্বস্ত

অন্তঃশীল।

হতে পারছি কৈ? আমার মনে দুটি বিপ্লবাত ভাব একসঙ্গে কাজ করে, একটির গতি বিচ্ছিন্নতার দিকে অন্যের গতি সম্পূর্ণতা ও ঐক্যের দিকে ঝোঁকে। কিছুতেই তাদের মেলাতে পারছি না। বুদ্ধি দিয়ে হয়ত থানিকটা পারি—যদি এই polarisationকেই নিয়ম বলে গ্রহণ করি। কিন্তু সে গ্রহণ করা দায়ে পড়ে; আমাদের অজ্ঞানতা ও অক্ষমতাকে প্রাকৃতিক নিয়ম বলা বুদ্ধির জুয়াচুরী ও কাপুরুষতা। যদি বলি বাঙময় জগতের ধর্ম এক, আর প্রাণময় জগতের ধর্ম ভিন্ন, তা হলে কেবল বাক্যই বলা হল, স্বন্দ ঘুচল না। বৈজ্ঞানিক পদ্ধতির বৈশিষ্ট্য যদি পৃথকীকরণ হয়, তা হলে বিরোধের অবসান তার সাহায্যে সাধিত হবার ভরসা নেই। কিন্তু বিরোধের পাল্লায় আমার সকল শান্তি ঘুচে গিয়েছে।

* * *

আমার বিরোধটা কি? সাবিত্রী আমাকে সঙ্কুচিত করে আনছিল, সে চাইত যে আমি কেবল স্বামী হয়েই থাকি, স্বামিস্থেই যেন আমি নিঃশেষিত হই। তা ছাড়া, সমাজও তাকে সাহায্য করছিল। সাবিত্রী ও সমাজ আমাকে গিয়ে সামাজিক স্বামী করে তুলছিল। দুই চাপের মাঝখানে আমি কমঠবৃত্তি অবলম্বন করলাম, আত্মরক্ষায় সচেতন হলাম। আমার অর্থকষ্ট ছিল না বলে সমাজকে অন্ততঃ অবহেলা করতে পেরেছি, বিশেষ কোন শারীরিক কষ্ট-ভোগ করতে হয় নি। সাবিত্রীর তাগিদ ও চাহিদা থেকে উদ্ধার পেতাম বইএর

পাতায়। কর্মপ্রবৃত্তি অবরুদ্ধ হলে মানুষ বুদ্ধিজীবী হয়। কিন্তু এধারে যে মানুষ ভুলতে চায় নিজেকে—নিজের সম্বন্ধে সর্বক্ষণ সচেতন থাকা হামলেটিয়ানা, স্বস্থতার চিহ্ন সেটা মোটেই নয়। লরেন্স ঠিকই বলেছেন। ঐ জাখ, আবার লরেন্স! কিন্তু তা ছাড়া উপায় কি! একধারে সংসার, অন্যধারে সমাজ, দু'এর মধ্যে কি? অশ্রম। সাবিত্রী ও রমলার মধ্যে, সম্মানগ্রহণ?

বিরোধঅবসানের আশায় যদি মানুষ আশ্রমবাসী হয় তা হলে সেও ভুল করে। আজ সকালে আমার এক অভিজ্ঞতা লাভ হল। নাথুজীর ভক্তদের মধ্যে ছোটো দল, কেউ বলেন তিনি স্বয়ং ভগবান, কেউ বলেন অবতার। পাদোদক নিয়েই কেবল দলাদলি নেই দেখলাম। তা' ছাড়া, নাথুজী এবং ভক্তরা আমার কাছে একটু বেশী মাত্রার চাঁদা প্রত্যাশা করেন। নাথুজী বলেন, বই পড়ে কি হবে? সাহেবেরা কিছুই জানে না; অথচ নিজে কিছুই পড়েন নি। আমাকে বড় স্থগাতি করেন, আমার সেবাধর্মের প্রয়োজন নেই, আমি তার অনেক ওপরে, যে-বস্তু ইতিপূর্বে কেউ লক্ষ্য করেনি তিনি তাই আমাতে দেখেছেন, কপালে রাজটীকা, চোখে জ্যোতি। নতুন ভক্তলোক দেখলেই বলেন যে আমি মস্ত জমীদার ও বিদ্বান। ভারী খারাপ লাগে, টান পড়ে আমার গোটা কয়েক শেকড়ে। বিরোধ এখানেও। এ হল না—আর একটা আশ্রম দেখলে মন্দ হয় না। তাও পছন্দ না হয় বেরিয়ে পড়ব।

অন্তঃশীলা

এই সেদিন মনে হল শান্তির সন্ধান পেয়েছি—ভালবাসায়। কিন্তু সাহসভরে শান্তি গ্রহণ করতে পারলাম না। সাহসের অভাবই হল আমার প্রধান বিপত্তি, ভয়ই আমার প্রধান রিপু। সেই জন্তু মনে হয় আমার চরিত্রে কোথায় যেন পিউরিট্যানিজমের আমেজ রয়েছে। কোন কাজকে নিকাম ভাবে দেখতে পারি না, সব কাজকে আত্মোন্নতির ধাপ হিসাবে দেখি। আত্মে জীদের gratuitous act-এর অর্থ হৃদয়ঙ্গম করা আমার পক্ষে শক্ত—কিন্তু এটাও তাঁর নিজের গোঁড়ামির প্রতিক্রিয়া। ভয় করি সমাজকে—সেটা যদি-বা পিতৃপুরুষের রূপায় কাটিয়ে উঠলাম, অমনি অনাগতের ভয় এসে জুড়ে বসল। এর নামই নিজেকে ভয়, সাবিত্রী একাই ভীতু ছিল না, তাকেই বা দোষ দিই কেন? অনাগতের ভয়কে জয় করা যায় না—এই জন্তুই বোধ হয় রমলা ভাবে যে আমি একলা থাকতে পারব না। এক এক সময় তার কথায়, আচরণে মাতৃহের ভাব যে ফুটে ওঠে সেটা বোধ হয় আমার ভীকৃ স্বভাব বুঝেই।

জীবনের ভয় বড় ভয়, মৃত্যুর চেয়েও ভয়ঙ্কর। প্রেমে যে বিরোধের অবসান সে অবসান আমার নয়।

একটা দিন-রাত শেষ হয়েছে। কালকের সঙ্গে আজকের কি তফাৎ? কিছুই নয়। নায়ক-নায়িকার মনে দুঃখ এসেছে, অমনি সূর্য্য চন্দ্র তারকা পাণ্ডুর হয়ে গেল। —সব কবিতা!

মাথা খুঁড়ে মর, প্রকৃতির দুর্নিবারতা প্রতিহত হবে না। পদার্থ-বিজ্ঞানের নতুন নতুন বই পড়লাম, বৈজ্ঞানিকের বিশ্ব নিয়তির দ্বারা পরিচালিত। জন কয়েক অনিশ্চিত-বিশ্ব নিয়ে মাতামাতি করছিলেন, ম্যাক্স প্র্যাক্ গায়ে জল ঢেলে দিলেন, আমার প্রাণটা অন্ততঃ ঠাণ্ডা হল। জীববিজ্ঞানের নতুন বই পড়লাম—কোন recessive traitই দূর করা যায় না দেখলাম। যাবে না কেন, ত্রিশ চল্লিশ হাজার বছর পরে যাবে। কি আশ্চর্য্য ! সন্ন্যাসীরাও ঐ সব বই ঘাঁটেন, কিন্তু অদ্ভুত তাঁদের মনের গঠন, সব তথ্যই যেন তাঁদের 'সিদ্ধান্ত সমর্থন' করছে। অথচ একটাও করছে না। করুক আর নাই করুক, এটা ঠিক যে পুরুষকার নিয়তিকে কিছুতেই খণ্ডন করতে পারছে না। অখণ্ডনীয়তাকেই যদি গোড়া থেকে নিয়তি বলা হয়, তা হলেই 'নিয়তি কেন বাধাতে' বলা চলে। কিন্তু প্রকৃতি আর নিয়তি ঠিক এক বস্তু কি ? সাংখ্য এ দুটোর মধ্যে পার্থক্য স্বীকার করেছে কি ? বুঝতে পারলাম না। আমার দ্বারা সাংখ্যের সাধনা বোধ হয় অসম্ভব। বর্তমান সভ্যতার অকৃতজ্ঞ সন্তান হব কি করে ? কিন্তু দুঃখই বা হচ্ছে কেন ? ভেবেছিলাম সাংখ্যই বৈজ্ঞানিকের প্রকৃত দর্শন। সাধুজীকে বললাম, আমার দ্বারা ওকাজ হবে না। তাঁর ভারি আকশোষ !

প্রকৃতির অনিবার্যতা মেসেও শাস্তি পাওয়া যায় না। জ্ঞানের দ্বারা নিয়তিকে জয় করা যায় অনেকে বলেন—কিন্তু

অন্তঃশীলা

এ জয়ের পর মানুষ কি বেঁচে থাকে? এ যে আসুকুলামে পাইরাসের জয়! আমার অশান্তি বেড়েই চলেছে! শান্তি কোথায় মোর তরে হয়! কিন্তু বীণা বাজাবার জ্ঞাও অশান্তির আঘাতকে বরণ করতে চাই না। বীণা যে শোনে তাঁর হয়ত তৃপ্তি আসে, কিন্তু এখানে আমিই যে বীণা। ভীকু বীণা খেলের মধ্যে লুকিয়ে থাকে জড়ের মতন। তাও রাখতে পারি না।

সাধনার মাত্র তিনটি উপায় আছে—ধর্ম, বিজ্ঞান, আর্ট।^{*} প্রাণবাদীরা বলেন জীবনটাই সাধনা। অর্থাৎ তাঁদের মতে—প্রেম। কিন্তু প্রেমের পরিণতি জীবনের পুৰিণতিতে, অর্থাৎ মৃত্যুতে। বাকি থাকে, ধ্যান, আত্মস্থ হওয়া, স্বপ্নাণ মিষ্টিকদের মতে contemplation, meditation নয়। আমি তাকেই ধর্ম বলি। দর্শনালোচনা কথার মার প্যাচ।

ধর্ম সাধনা হল না, বিজ্ঞানে সোয়াস্তি নেই, প্রেম.....সেই বিবাহিত জীবন ত? আর না।

অনেকে পরামর্শ দিচ্ছেন জীবনটাকেই আর্ট করে তুলতে। ড্যানানংসিওর মতন হব নাকি!

শুনেছি এ কাজটি নাকি ভারি শক্ত, তাজমহল রচনা করার চেয়েও কঠিন, তবে অসম্ভব নয়! সব বাজে কথা!

আর্টের উপাদান জড়, রং তুলি অক্ষর স্বর পাথর কাগজ

কলম, এবং মন, যেটি সাধারণ গুণ। জীবনের উপাদান ঘটনা, তাকে মন নিজবশে আনবে কি করে? ঘটনার নিজের অস্তিত্ব আছে, ইতিহাস আছে। কৈ আমি •কি রমলার মনে স্থখ আনতে পারি, তার সে-রাত্রির ইতিহাস পুঁছে দিতে পারি? ঘটনা স্থির নয়, ধরতে গেলেই গত। ভবিষ্যতের ওপরও হাত নেই। আর বর্তমান! পিচ্ছিল, specious, নেই বলেই চলে। এ উপাদান নিয়ে আর্ট হয় না। ঘটনাকে নির্বাচন করা চলে না, গায়ে পড়ে সে তার নিজের অস্তিত্ব প্রকাশ করবেই করবে, কাশীর ঘাটে স্বাস্থ্যাস্থেঘীর মতন। জীবনকে আর্ট করে তুলব ভেবে মৃত্যুকে বাদ দেওয়া যায় কি? রমলার ছেলে কেন মরে গেল? আবার, মৃত্যুকে সুন্দর করে তুলব ভেবে জীবনকে তাচ্ছিল্য করা যায় কি? সাবিত্রীর স্মৃতি পূজা করে আমার জীবনকে অবাস্তব স্বপ্নে পরিণত করতে পারি না। সব ঘটনাই জীবনের ওপর দাগ কেটে যায়, সেই দাগগুলিই organic memory, স্বাভাবিক প্রবৃত্তি। তাদের বাচ-বিচার নেই। স্মরণশক্তি যার প্রবল, স্মৃতি যার জীবন্ত, মস্তিষ্ক যার শ্রীক্ষেত্র, তার কি হবে? রমলা বলেছিল, মেয়েদের স্মরণশক্তি নেই। ভুল বলেছিল, না থাকলে সে স্বামীর ঘর করতে পারত, কিন্তু পারল না, স্মরণশক্তি আছে বৈকি? আমার আছে? নেই, নচেৎ সাবিত্রীর মৃত্যুর পর অল্প দশজনে যেরূপ ব্যবহার করে সেরূপ করিনি

অন্তঃশীলা

ত'! হয়ত, অল্প দশজনের চেয়ে বেশী পরিমাণে আছে, তাই কাতর হই নি।

•আমার জীবনের ঘটনারূপী উপাদান গোরাদের মতন শ্রেণীবদ্ধ হয়ে সজ্জিত নয়, ভারি এলোমেলো, এ ওর ঘাড়ে পড়ছে। এমন কি এক সমতলেও দাঁড়িয়ে নেই, নড়ে বেড়াচ্ছে এ প্লেন থেকে ও প্লেনে, অনেক সময় দুই ক্ষেত্রেই রয়েছে, কখনও ব্যবহারের প্লেন, কখনও চিন্তার, কখনও বা—কার? আত্মার? জানি না। নাম দিতে ভয় হয়। এই জীবন! তাকে কি 'করে, কার আদেশে সাজাব? এ কি অধ্যাপকের লেকচার নোট যে পর পর জল করে • বুঝিয়ে বলাই তার চরম সার্থকতা!

এমন মানুষ আছেন যাদের স্বভাবই হল একরোখা। তাঁদের স্বভাবে মাত্র একটা প্রবৃত্তি সজোরে ফুটে ওঠে। এই জোরের জ্ঞাত তাঁদের অনেক অভিজ্ঞতা বাদ পড়ে। যেগুলি প্রধান প্রবৃত্তির অনুকূল সেগুলি তার দাসত্ব করে, তারই ছকুমে শ্রেণীবদ্ধ হয়ে তারই ছকুমে নির্মাণিত হয়। এই রকম একরোখা ঝুঁকি মানুষ অনেকে আছেন—বিশেষজ্ঞ, অধ্যাপক, ভট্টাচার্য্য মহাশয়রা। আমার সাধুজী ঐ ধরনের, পৃথিবীর দাবতীয় ঘটনাকে সাংখ্যাতত্ত্বের খপ্পরে তাঁর ফেলা চাই। অবশ্য এই সব ধর্ম-গোঁড়া, বিশেষজ্ঞ, দাবাখেলোয়াড় প্রভৃতি জীবের প্রয়োজন আছে এ পৃথিবীতে। সবই তাঁদের সিস্টেম, এবং সিস্টেম না হলে

জ্ঞানবুদ্ধি হয় না। কিন্তু জ্ঞানবুদ্ধির সঙ্গে সঙ্গে জীবনের আশঙ্কাও বেড়ে চলেছে যে! ঐ প্রকার অদ্ভুত জীবের জীবনকে আর্ট বলা চলে কি? এই পিউরিট্যানের দল আবার জীবন ছাড়া অগ্র আটের ভীষণ শত্রু।

যে মানুষ ঠুলিপরা বলদের মতন একই কেন্দ্রের চারপাশে জাবর কার্টতে কাটতে, ঘুমুতে ঘুমুতে ঘুরতে পারে, তাকে আমি মানুষ বলি না। জন্তুর গন্তব্য এক, অতএব গতিও সেই গন্তব্যের দ্বারা নিয়ন্ত্রিত। আমার গন্তব্যের কোন ঠিকানা নেই,—মানুষের গন্তব্য একাধিক, একটি টানছে এখানে, অন্যটি টানছে ওখানে—বিপরীত দিকে—মধ্যে মধ্যে দিক-নির্ণয়ই হয় না। এই শত শত টানের মধ্যে গোটাকয়েক অন্যের চেয়ে প্রবল, কেবল এই মাত্র চোখে পড়ে। যে ঘোড়া হাঁকায়, বলদ চালায় সে ইচ্ছা ক'রে তার নিজের উদ্দেশ্য সাধনের জন্য অগ্র আকর্ষণ থেকে তার চালিত জীবকে রক্ষা করে। একরোখা লোকের প্রবলতম প্রবৃত্তি এইভাবে চালকের কাজ করে, তার সঙ্গে ঘোড়া ও বলদের পাখকা কম। আমার গুরু আমাকে বলদে পরিণত করতে চাইছেন, চোখে ঠুলি পরিয়েছেন, নিশ্চয়ই নিজের স্বার্থ আছে—শিয়োর দল বাড়ান। তাঁর সাংখ্যাতত্ত্বের সাহায্যে অনেক তৈল সংগ্রহ হবে।

তাঁরই বা দোষ কি? আমিই বা কি করেছিলাম! আমিও সাবিত্রীর চোখে আমার আদর্শের ঠুলি পরিয়েছিলাম—

অন্তঃশীল।

স্বার্থেরই জগৎ। তবে, জানতাম না, জেনেশুনে করিনি।
আমার অগ্রায় হয়েছিল।

রামপ্রসাদ বলেছেন—আমরা সকলেই বলদ আর
জগন্মাতা কলু বিশেষ। তুলনা একালের কবিতায় উঠতে
পারে না—এইটাই তার একমাত্র দোষ নয়। তুলনাটি
সত্য, একরোখা পিউরিট্যানের পক্ষে। কিন্তু জগতে অণু
ধরণের মানুষ আছে—তাদের সংখ্যাই বেশী। সাধারণ
মানুষের জীবনের প্রতি আগ্রহ একদেশদর্শী নয়, সর্বভৌমুখী।
গ্যাসেট বিশেষজ্ঞদের অসভা বলেছেন—তঁর মতে এঁরাই
সভ্যতার অন্তরায়। আজকালকার যুগে সাধারণ ব্যক্তির
হলেন বৈজ্ঞানিক, তাঁরা নিখতিবাদী—তাদেরও গোটাকয়েক
অবাস্তব খেয়াল থাকে, ছয়টি রিপূর মধ্যে একটা না একটা ত'
থাকেই, তা ছাড়া হয় ভূতে না হয় ভগবানে বিশ্বাস রয়েছে।
যে স্টেশন দূর বড় তার সাইডিং তত বেশী। তাঁরা কী ভাবে
সব শক্তিকে, সব আকর্ষণকে, সব আগ্রহকে সংযত করে আট'
করে তুলবেন? তাঁদেরও একটা উদ্দেশ্য বলবতী থাকেই থাকে,
কিন্তু অগুণ্ণতার সঙ্গে সেটির সমান সম্বন্ধ নেই বলেই হয়।
নচেৎ মহা মহারথী বিশেষজ্ঞরা নিজেদের বহির্ভূত বিষয় সম্বন্ধে
মন্তব্য প্রকাশ করতে গেলেই একেবারে ছেলেমানুষী করে ফেলেন
কেন? তাঁদের জীবনও অত ছন্নছাড়া হয় কেন? অথচ

তাদের বলাও চাই, জীবন ধারণ করাও চাই! আর্টে সামঞ্জস্যেরই প্রয়োজন, আগ্রহাতিশয্যের নয়।

আর্টে কি হয়? নভেলে একটা মূলসূত্র, এবং তারই চারপাশে অনেক ছেঁড়াসুতো থাকে। কিন্তু প্রধান অংশের চারপাশে থেকেই তাদের সার্থকতা। আধুনিক নাটকেও তাই—অবশ্য আগেকার নাটকে ছেঁড়াসুতোর স্থান ছিল না। কারণ জীবন তখন অত বিচিত্র হয়ে ওঠে নি। আমাদের সঙ্গীতেও তাই। কাল সন্ধ্যায়, সানাইএ' চমৎকার পুরবী বাজছিল, কিন্তু মেটি পুরিয়া-ধানেশী মিশে যাচ্ছিল। রমলা থাকলে বুঝিয়ে দিতাম যে সবই হী'র ঘরে, পুরবী অঙ্গের—অর্থাৎ সকলেরই মধো আছে কোমল রি, তীব্র মধ্যম, কোমল ধৈবত, আর বাকি স্বর শুদ্ধ—তবু পকড়ের জগু, আরোহী অব-রোহী'র জগু রূপের পার্থক্য ঘটেছে। কীর্তন কাওয়াল, হাশ্মনি-প্রধান সুরপদ্ধতিতেও তাই। মূল থীমের চার পাশে ছোট ছোট phrase ঘোরে ফেরে। আগে প্রধান অ-প্রধানের মধোকার সম্বন্ধ ছিল ব্রাহ্মণ শূত্রের, রাজা প্রজার মত স্থির ও পূর্ব হতেই নিয়ন্ত্রিত। তারই নাম Unity of action। কিন্তু এ যুগের জীবন বিচিত্র, সমৃদ্ধ, তাই Unityর আজ কোন খাতিব নেই। Counter pointএর মত প্রধান অ-প্রধান জুড়ে যেতে পারে, এখনকার আর্টে সুতো জড়িয়ে গেলে সর্বনাশ হয় না, সমালোচকও বিচলিত হন না। সবটা মিলে একটা অথও কিছু উপভোগ্য হলেই হল, যেমন Joyceএর Ulyssesএ হয়েছে। ব্রাদার্স ক্যারামজকে কেউ

অন্তঃশীলা

থারাপ নভেল বলতে পারে? জীবনে জনসাধারণের উপভবের তাৎপর্য্য এই। অপ্রধানের প্রয়োজন আছে।

‘অথও প্রকাণ্ড না হলেও চলে, তবে সুন্দর হওয়া চাই। তাই কি? সৌন্দর্য্যসৃষ্টিই আর্টের পরম উদ্দেশ্য কে বলে? যদি তাই হয়, তা হলে এই নতুন জীবনের খটনাবৈচিত্র্যকে অবলম্বন করে সুন্দরের নতুন অর্থও ধারণা করতে হবে।

রুশিয়ান ফিল্ম রাজ্যে নতুন পদ্ধতি গৃহীত হয়েছে। প্রথমে নিতান্ত সাধারণ ব্যক্তির অনেকগুলি একই মনোভাব-ব্যাঞ্জক ছবি তোলা হয়, তারপর ডিরেক্টার বাহাদুর তার মধ্যে থেকে সব চেয়ে উপযুক্ত ছবিটি বেছে নেন। এইটুকু ছাড়া বাকি সব কাজই জনগণের। সিনেমাতে পর পর ছবি সাজান থাকে, কিন্তু তার পিছনে থাকে এই montage-আর্টিষ্টের মন সম্বন্ধ স্থাপন না করে থাকতেই পারে না। রমলা ঠিক বুঝেছে—সম্বন্ধ চাই। নচেৎ জীবনটা জীবনই হবে না। আমি কিন্তু সম্পূর্ণ হতে চাই, কার্কানের চার হাতই জোড়া চাই আমার।

অ-প্রধান সম্বন্ধে অচেতন কিংবা নিরাগ্রহ হওয়া চলে কি? চিত্রেও অপ্রয়োজনীয় ও অবাস্তবের প্রকাশ সম্ভব, সেই জগৎ হয়ত বড় ছবি কিংবা ফ্রেসকোই বর্তমান সভ্যতার উপযুক্ত। অজ্ঞতার গুহাগাত্রে নেই কি? বানর, সাপ, পাখী, নাচগান, মানুষ, দেবতা গন্ধর্ব্ব, কিন্নর, সব চলেছে, কিছুটা বাদ পড়ে নি—অথচ একে-ছিলেন আশ্রমবাসী অবিবাহিত ভিক্ষু সম্প্রদায়। কেবল ভগবান

বুদ্ধের জীবন কাহিনী চিত্রিত করলেই পারতেন ত ! তা করেন নি—কারণ তখন জীবন ছিল।

টিনটরেটোর ক্রুসিফিক্সনে নেই কি ! অথচ সেটি জ্যামিতির কোন চিত্রের মতনই শুধু কঠিন প্রাণহীন আড়ষ্ট নয়। কম্পোজিশন রয়েছে—কিন্তু চিত্রকর চোখে আঙ্গুল দিয়ে দেখাচ্ছেন না। যীশু ক্রুশে ঝুলছেন। তবুও জীবন ধামে নি ! নিম্নাংশে বিস্তর লোকের ভিড়, তাদের কাছে ঘটনাটির তাৎপর্য গুরু নয়, নিতান্তই সাধারণ, এমন কি তাদের মধ্যে অনেকে কল্‌বোর খাতিরেই এসেছে, তারা কাজই করে যাচ্ছে, কাজও সব ছোট ছোট, মানুষ লটকাবার ছোট খাট কাজ। অত বড় ছাবতে কত না লোক, কিন্তু যীশুর জন্ত তাদের মুখে কিংবা ভঙ্গীতে কোন দরদের চিহ্ন নেই। সাধারণ মানুষ যেমন হয় চিত্রকর তাদের স্তম্ভিত এঁকেছেন—তাদের মুখের ভাবও সাধারণ। এই সত্যকার জীবনের প্রতীক। অ-প্রধান প্রধানের সম্বন্ধ নেই—অপ্রধান অপ্রধান হয়েই প্রয়োজনীয়।

ক্রুসিফিক্সন নিয়ে অনেকেই গল্প লিখেছেন। দুই গল্প এখন স্মরণ হচ্ছে। একটীর নাম দাঁত কনকনানি—লেখক বোধ হয় ট্রাইওবার্গ, কি অ্যান্ড্রিভ, দ্বিতীয়টি জুভিয়ার লার্টসাহেব—লেখক আনাতোল ফ্রান্স-আমার প্রিয়। প্রথমটিতে লেখক দেখিয়েছেন যে দাঁত কনকনানির কাছে যীশুর মৃত্যুও তুচ্ছ। দ্বিতীয় গল্পটি পৃথিবীর মধ্যে একটি শ্রেষ্ঠ গল্প—তার শেষাংশে অনেকে সিনিসিজ্‌মের গন্ধ পেয়েছেন। পন্টিয়াস তাঁর বন্ধু ল্যামিয়াস সঙ্গে জুভিয়ার পুরানো

কথা কইছেন, মেরা ম্যাডালনের কামোত্তেজক মূর্তি বন্ধুর স্মৃতিপটে ভেসে উঠছে, তিনি পণ্ডিত্যকে কথার ছলে ঞ্জিমা করলেন, ‘অম্মা, জীসাম্ বলে একটা লোক ছিল, তার দলে ঐ মেয়েটি ভিড়েছিল...সে লোকটা কোথায়?’ পণ্ডিত্য ক্রম কৌচকালেন, স্বরণ করবার জন্য হাতটা কপালে ঠেকালেন, অনেক চেষ্টার পর ধীরে ধীরে বললেন, ‘জীসাম, জীসাম,—ন্যাজারেনের জীসাম—কই, মনে পড়ছে না ত?’ এইখানেই গল্পের শেষ। বর্তমান সভ্যতার আদি ও শ্রেষ্ঠ ঘটনার তাম্রপত্র এতই ছোট একটি স্মৃতি-লোকের স্মৃতির তুলনায়। *শেষাংশের অর্থ একটি গূঢ় অর্থ রয়েছে। যে ঘটনাটি বর্তমান সভ্যতার তুলনায় অত মূল্যবান সেটি রোমান অর্থাৎ খৃষ্টপূর্ব সভ্যতার কাছে কতই তুচ্ছ। আনাতোল ফ্রান্স এক টিলে দুই পার্থী মারলেন।

গল্প দুটির টেকনিক হল এই—মূল্যবিচারের আপেক্ষিকতা-প্রমাণের জন্য অপ্রধানের চোখ দিয়ে দেখিয়ে প্রধানের প্রাধান্য কমিয়ে দেওয়া। এই পদ্ধতির ফলে কিন্তু রসিক ব্যক্তির কাছে প্রাধান্য টুকুই ধরা পড়ে, কারণ আনাতোল ফ্রান্সের সমগ্র গল্পটি পড়তে পড়তে রোমান সভ্যতার বিরাট ঐশ্বর্য ও বৈদগ্ধ্য মন অভিভূত হয়ে পড়ে, এবং শেষে খৃষ্টের প্রতি লেখকের শ্রদ্ধা বোঝা যায়, পাঠকেরও শ্রদ্ধা বাড়ে। একজন ব্যক্তি যে-শক্তির জোরে অত বড় সভ্যতাকে গ্রাস করতে সক্ষম হয়েছিল ভাবতে ভাবতে তার প্রতি শ্রদ্ধা মন প্রাণ অবনত হয়। মূল্যনির্ধারণের এও একটি চমৎকার পদ্ধতি—আর্টিষ্টের কাছে। আধারের দিক

থেকে তাৎপর্য্য বুঝতে হয়। লিখনভঙ্গীর সাহায্যে ক্ষুদ্র আধার কিংবা উপহাস বৃহৎ তত্ত্ব বহন করতে পারে। অবশ্য আধারটির এবং উপহাসটির double reflection দেবার ক্ষমতা দেখান চাই। ছোট বড়র এই সম্বন্ধ, প্রয়োজন অপ্রয়োজনের এই সমাবেশ স্থাপিত ও সাধিত হতে পারে তখনই যখন লেখক ঘটনা পারস্পর্য্যের বাইরে দাঁড়াতে পারেন। সাধারণ মানুষের কাছে বর্তমান বড়ই পিচ্ছিল, দোটারানার মধ্যে পড়লে স্থিরবুদ্ধি রাখা বড়ই মুশ্কিল। আর্টিষ্টের নিরাগ্রহ অবস্থা সাধনালব্ধ। সাধারণ মানুষের কাছে নিরাগ্রহতা, negative capability, ঐংস্থক্য-বিহীনতা ইচ্ছাকৃত জড়তারই নামান্তর। অতএব আর্টিষ্টের কাছ থেকে সাহায্য চাওয়ার অর্থও যা ধর্ম্মের কাছ থেকে সাহায্য ভিক্ষার অর্থও তাই! ধর্ম্মের নিক্ষেপ সাধনা আর্টিষ্টের নিরাগ্রহ উপহাস।

সম্বন্ধ, অর্থাৎ বড় ছোট'র প্রয়োজনীয় অপ্রয়োজনীয়ের অগ্নীয়-তার স্বরূপ না নির্ণয় করতে পারলে সাধনার কোন অর্থই থাকে না। আমি সেই অর্থ আবিষ্কার করতে ব্যস্ত। এক এক সময় সন্দেহ হচ্ছে আর্টিষ্টই অর্থের সন্ধান পাব। মনঃস্থির করতে পারছি না। টিন্টারেটোর ছবিটা আজ ভাল করে দেখলাম—কাল কি লিখেছি আবার পড়লাম। একটা নতুন কথা মনে উঠেছে।

বেশ বুঝতে পারছি যে টিন্টারেটোর অগ্র একটি উদ্দেশ্য ছিল—দর্শকবৃন্দের দৃষ্টির সামনে ছবিখানি রেখেই তিন নিশ্চিত

অন্তঃশীল।

হতে পারেন নি। ছবিতে আপামরসাধারণের ওপর এক স্বর্গীয় আলো পড়েছে, গতি দেখে মনে হয় যেন দৃশ্যের মধ্য দিয়ে এক স্বর্গীয় মলয় বইছে, হাওয়া আসছে ওপর থেকে। সমগ্র দৃশ্যটা যেন আলো ও হাওয়ায় ভাসছে। ছবির নিম্নাংশই পার্থিব দৈনন্দিন ঘটনার পটভূমি। এই মুক্ত হাওয়া ও আলোর যথাযথ প্রয়োগ ব্যতীত অগ্র হিসেবে ছবিটা দেখলে দম বন্ধ হয়ে আসে। আনাতোল ফ্রান্সের গল্পেও ঐ রকম খোলা হাওয়া ও আলোর সন্ধান পেয়েছি। এই স্বর্গীয় আলো-হাওয়াই নিম্নাংশের ছোট খাট অসম্বন্ধ ঘটনাবশেকে জীবন্ত করেছে। এইখানেই আর্টিষ্টের নিরপেক্ষতা। খৃষ্টান মিষ্টীক্ একেই গ্রেস্ বলেন। টিনটরেটোর ছবিটার, আনাতোল ফ্রান্সের গল্পের আলোকসম্পাতে, হাওয়ার খেলায় যেমন ছোট-বড় প্রয়োজনীয় অপ্রয়োজনীয়, বিশেষ ও যুক্ত ঘটনা একত্র সমাবিষ্ট হয়েছে, তেননি হয়ত ভগবানের অতুল্য সম্পায় কোন ব্যক্তি অথবা ভক্তের জীবনের ঘটনাবলী সুসজ্জিত সুসম্বন্ধ ও অর্থপূর্ণ হতে পারে। তখন বনফুল হয়ে ওঠে মালা।

টিনটরেটো ছিলেন ধার্মিক ও খৃষ্টান, আনাতোল ফ্রান্স ল্যাটিন সভ্যতা এবং ক্যাথলিক ঐতিহ্যের উত্তরাধিকারী। আমার শিক্ষাদীক্ষাভিন্ন। ওপর থেকে রূপাবৃষ্টি চাতকেই প্রত্যাশা করে। তার চেয়ে যে গুণ পনটিয়াস পাইলেটের চরিত্রে ফুটে উঠছে তাইতেই আমি মুগ্ধ। খৃষ্ট জন্মাবার সময় গ্রীক দর্শন ও পূর্বকালের প্রভাবে রোমান সভ্যতার কাঠিন্য, মোলায়েম

ও মৃদু হয়ে আসছিল। আগেকার রুম্মতা নতুন সভাতার পালিশে উজ্জ্বল হয়ে উঠল মাত্র। ভেতরে ঝঞ্জুতা রইল, বাইরে এল ভদ্রতা, চার পাশে আলো, বাতাস, ওপরে মুক্ত আকাশ, আপনাপনই সম্পূর্ণ। এই উজ্জ্বল কঠিন আবরণ ভেদ করবার ক্ষমতা কোন ধর্মের ছিল না। রোমান সভাতার নিজের মধ্যে দুর্বলতা না এলে খুঁটান ধর্মের প্রসার অত্র দিকে হোত। এই সন্ধিক্ষণে গ্রীক, রোমান ও পূর্বাব্দলের সভাতার সংযোগে যে সংস্কৃতির সৃষ্টি হল তারই চরম বিকাশ ঐ পন্টিয়াসে। আমার ঐ রকম চরিত্র বড় ভাল লাগে, মনে হয় আনাতোল ফ্রান্সের লেখাই পড়ছি। এই হল সত্যাকারের grace। স্মৃতি, শাশ্বততা, মাধুর্য, আলোর প্রতি উন্মত্ততা, আকাশে বাতাসে ধন্য হবার ব্যাকুলতা, ভবিষ্যতের ক্রমপন্থায়ে মুক্তির আকাঙ্ক্ষা—এই সমাবেশের সৃষ্টি মনে যে আলো বিকিরণ করে তার দীপ্তি তাঁর নয়। রমলা কি এই আলো আমার মুখে দেখেছে? আমি তাকে জলন্ত আগুনের শিখা দেখাতে চাই না। আমি তাপ চাই না, আলো চাই, বিরোধ চাই না, সমন্বয় চাই, সেই আলোতে প্রতিফলিত হতে চাই—তবেই আমার আর্টের সাধনা সফল হবে, আমার জীবনে স্মারক সামঞ্জস্য ফুটে উঠবে। আমার সাংখ্য বেদান্ত পড়া মিথ্যা। আমি নিত্যন্তই এ যুগের মানুষ। আমার ভেতর দিয়ে সমগ্র সভাতার সমন্বয় হোক—আমি সমগ্র ইতিহাসের সৃষ্টি। আর্টের কাছে আমি সত্যই ঋণী।

* * * *

এই মাত্র এক মজার ব্যাপার ঘটল। খেয়ে দেয়ে শুয়েছি, হাতে

অন্তঃশীলা

শ্রুত রয়েছে, চোখের সামনে রমলা এসে হাজির, চোখের কোনে
জল, অনুভব করতে পারলাম অশ্রুর তাপ, চোঁচিয়ে ওলাম, ‘পুড়ে
যাবে যে! জালা করেছে না?’ কলের পুতুলে যেমন ঘাড় নাড়ে সে
তেমনি ঘাড় নাড়তে লাগল, আর থামেই না, ভয় হতে লাগল, মুখ
ফুটে বলতে গেলাম, থাম, থামেই না, বড় কষ্ট হচ্ছিল, হাত ছোড়
করতে গেলাম, হাত উঠল না... প্রায় দশ মিনিট কাল এই চলল,
সন্দেহ হল হয়ত রমলা মারা গিয়েছে এবং তার আত্মা আমার
সঙ্গে দেখা করতে এসেছে... কিন্তু সন্দেহের উত্তরে সঙ্গে সঙ্গে মনে
উঠল—তার আত্মা আমার সঙ্গেই বা দেখা করতে আসবে কেন?
আমি তার কে? তার পর হঠাৎ দেখি রমলা কালো হয়ে গিয়েছে,
কষ্টিপাথরের মতন কালো—হাতটা তার ভেঙ্গে গেল, তার পর
গেল একটা পা, দেহ তার হেলে গেল, ঝুঁকে পড়ল খাটের ওপর,
সামলে নিলে অন্য পা দিয়ে, বেশ দেখতে পেলাম। চোখ তুলে
দেখলাম অবিশ্রান্ত অশ্রুধারা, ভারী ঝংখ হল. মূর্তিটা বাতে ছমড়ি
থেয়ে মাটিতে পড়ে না ভেঙ্গে চুরমার হয়ে যায় সেজন্য বিজ্ঞানা থেকে
উঠে সাহায্য করতে গেলাম, পারলাম না, মূর্তিটা পড়ে গেল সশব্দে,
ভাঙেনি-আঃ, দেখতে পেলাম ট্রাকের ধারে পড়ে রয়েছে, নিজের
মনে হল ঝংসপ দেখছি, ইচ্ছাশক্তির জোরে চোঁচিয়ে উঠলাম—
শব্দ কানে এল গোঙানির মতন... মুকুন্দ বাবু-বাবু বলে ডাকতে
লাগল, বল্লে, ঘুমন্ত স্বপ্ন দেখছিলাম। আমি কিন্তু নিশ্চয় জানি
ঘুমোইনি—কেননা চোখ আমার খোলাই ছিল। ব্যাপার
এই, পেশের টোঁবিলের ওপর হাত পড়েছিল, বাতিদান থেকে

বাতি গলে হাতে পড়েছে, হাত সরাতে গিয়ে ছোট টেবিলটা উল্টে পড়েছে। যখন মুকুন্দের ডাকে বড়মড়িয়ে উঠে পড়ছি তখনও হাতের ওপর মোম শক্ত হয় নি। অথচ মনে হয়েছিল যেন রমলা কতক্ষণ দাঁড়িয়ে রয়েছে। সত্যকারের কয়েক সেকেন্ড স্বপ্নের পনের মিনিট।

ভাবতাম, বর্তমান নেই, ভাবতাম সূর্য্য ওঠে আর নামে, এইটাই সত্য, ভাবতাম সময় চলে একদমে, এক কদমে, তার ব্যতিক্রম নেই। তা নয় বোধ হয়।

মহাকালকেই নিয়তি বলে এসেছি, তার হাত থেকে পরিভ্রাণের চেষ্টা বিফলই হয়েছে। আজ, এখন মনে হচ্ছে, কালের মধ্যে নিয়ম নেই, কারণ কাল কি বস্তু আমরা জানি না, জানি কেবল পারস্পর্য্য, দিনের পর রাত রাতের পর দিন, বীজ হতে গাছ, গাছ থেকে ফুল ফল, ফুলফল শুকিয়ে বীজ, সভ্যতার উত্থান পতন, ঋতুর পরিবর্তন—মাত্র এই টুকুই আমরা দেখে এসেছি, ধারাবাহিকতাতেই আমরা অভ্যস্ত, অতএব তাকেই ছুর্নিবার ভেবেছি।

এ যেন একটা সমতল ক্ষেত্রের গতি। কিন্তু এই সমতাকে ভাঙ্গা যায়, মানুষ প্রায়ই ভাঙছে অসম করছে, যেমন স্বপ্নে হল। জাগ্রত অবস্থাতেও মানুষে ভাঙছে নানা উপায়ে। প্রথম উপায় স্মৃতি। স্মৃতিই নিয়তির প্রধান শত্রু। রমলা বলে, স্মৃতি তার নেই। তার নেই হ্রস্বত, সেই জগৎ বোধ হয় তার ধারণা যে নিয়তি তাকে হিড়্ হিড়্ করে টেনে নিয়ে যায়।

অন্তঃশীলা

না না, স্মৃতি তার আছে...সেই কাল-রাত্রির স্মৃতি! জ্বরেই সে কালশ্রোতের বিপক্ষে লড়ছে, সেই জগুই তার দেহশ্রী অটুট রেখেছে, বধস তার রুদ্ধ।

৫ কিন্তু স্মৃতি নানা রকমের—এক হোলো জড় করা, পাশের বাঁড়ির পাগলা ছেলেটা যেমন রাস্তা থেকে ছেঁড় কাগজ কাপড় কুড়িয়ে বাক্সে তুলে রাখত, সাবিত্রী যেমন সর্দাদাই তার ছেলেবেলার ঘটনার উল্লেখ করত! আর এক রকমের স্মৃতি, যেমন ফ্রেন্সের, এই প্রকার স্মৃতি নির্বাচন করতে করতে একটা অর্থপূর্ণ সমগ্রতা সৃজন করে; নির্বাচনের মূলে থাকে অর্থ-সঙ্গতি—ধারাবাহিকতার সঙ্গে এর কোন সংশ্রব নেই। শ্রোতের সঙ্গে তুলনা হয় না, হয় গানের সঙ্গে, টানা-পোড়েনের সঙ্গে—সেই ছেলে বয়সে মা এসে ঘুমোবার আগে চুমু খাবে কি খাবে না তার আশঙ্কার বর্ণনা—তার পর ছুঁতিন ছুঁজার পাতা পরে, ফুটপাথের ওপর এক পা দিয়ে অগ্নি পা রাস্তায় রেখে সেই আশঙ্কার স্মৃতি ফুটিয়ে তোলা। কালতিপাতের অনিবার্যতা থেকে রক্ষা পাবার অগ্নি উপায় আছে—যেমন গোটের—ছোট্ট খাটু দৈনন্দিন কর্তব্য দিয়ে প্রত্যেক মুহূর্তকে ভরিয়ে দেওয়া। একেই অনেকে শ্রেষ্ঠজ্ঞান বলেছেন। কিন্তু কস্মীর পক্ষেই ভরিয়ে দেওয়া সাজে। অনিবার্য কি এত সহজেই পরিহার্য!

ফ্রেন্সের মতন বাইরের জীবন থেকে নিজেকে সরিয়ে রেখেছি—তার মতন আমারও শরীর খারাপ, অন্ততঃ রমলার তাই ধারণা। স্বভাবেও মেলে—আত্মরে পানায়।

বার্গসনের Time and free will এর এক স্থানে লেখা আছে যে মিষ্টিক অবস্থায় সময়ের হাত থেকে নিষ্কৃতি পাওয়া যায়। কিন্তু মিষ্টিসিদ্ধির সাধনায় নিজেকে ভেঙ্গে গড়তে হয়, তা আমি পারব না।

কালের পারম্পর্য্য ভেঙ্গে নিয়তির হাত থেকে পরিত্রাণ পাবার অন্য উপায় খুঁজে পেলাম স্বপ্নের অভিজ্ঞতা থেকে। বৃক্লাম সময়ের হার এক নয়, কদম এক নয়, কখনও সময় চলে দ্রুত পদক্ষেপে, কখনও ধীরে, কখনও তার গতি রুদ্ধ। গতির হার বাড়ায় কমায় ভাবগুচ্ছ, আগ্রহ ওৎসুক্য, যাকে ভালবাসি তার জন্য যখন প্রতীক্ষা করি তখন মনে হয় সময় যেন আর কাটতে চায় না, যখন সে এসে হাজির হয় তখন মনে হয় সময় কোথা দিয়ে চলে গেল। সময় ধুনে চলবে না ঠায়ে চলবে নির্ভর করে আমার আগ্রহের ওপর। এখন যদি আমার অন্তরের মনোমত ভাবের তোড়া বাধা যায়, তা হলে নিয়তির হাত থেকে নিষ্কৃতি পেতে পারি।

ভাবগুচ্ছ সময়ের নতুন সংখ্যা, নতুন unit তৈরী করে। নতুন চিন খুলে নতুন তামাক পাইপে ভরে টান দিচ্ছি—বোঝা গোল হয়ে আসছে, এই মুহূর্তটাই আমার কাছে অনন্ত—বাইরের সময়, ঘড়ির সময় এখন দম বন্ধ হয়ে পড়ে আছে—যেন মড়া; ভূমিকম্পের সময় সব দেওয়াল-ঘাড়ি যেমন আপনা থেকে বন্ধ হয়ে যায়। লরেন্স ঠিক বুঝেছিলেন। এই জগতই বোধ হয় ব্রহ্মানন্দের সঙ্গে দৈহিক মিলনের তুলনা করা হয়েছে—তান্ত্রিকদের মতও অনেকটা ঐ ধরণের।

অন্তঃশীলা

কিন্তু যে যাই বলুক—দৈহিক স্থখ নীচুস্তরের। দেহকে ঘৃণা করি না, কিন্তু ঐ প্রকারের ক্ষণিক স্থখের দ্বারা মহাকালের গভী অতিক্রম করা সম্ভব নয়। একধারে দেহ, অন্যধারে ব্রহ্মজ্ঞান। তুরীয় অবস্থা, মধো হয় কর্তব্য, না হয় আর্ট ও বিজ্ঞান। কর্তব্যাবুদ্ধি মনের বৈশ্বর্য, বিজ্ঞান সম্পূর্ণ নয়, স্রবিশিষ্ট পদ্ধতি মাত্র, অন্তর্ভবের অনুকল্প মাত্র। কর্তব্যে আমার কিসের প্রয়োজন? আমি সামাজিক নই। কার ওপর কর্তব্য করব? আমার সমাজ নেই। নিজের ওপর কর্তব্যকে কর্তব্য বলে না। তা ছাড়া, সমাজও যদি থাকে, তবু স্মার্ট না হলে পরের ওপর কর্তব্য কিংবা দেশের উপকার করব কি করে? আগে গোটা মানুষ হই, তার পর সব হবে।

রমল! বলে একলা থাকতে কষ্ট হয়। কেন হবে? সৃষ্টি করলে কষ্ট হয় না। অবশ্য বৈদ্যবৃত্তিকের মতন নিবালপ হওয়া যায় না। সম্বন্ধ স্থাপন করা চাই-ই চাই। ভুল লিখলাম, সম্বন্ধস্থাপন নয়, সম্বন্ধসৃষ্টি, নতুনক্ষেত্রে। তাতে পুরানো মানুষ বাদ পড়ে, কিন্তু নতুন মানুষ তৈরী হয়। আর্টেও বস্তু-সত্তাকে প্রথমে মেরে ফেলতে হয় তার পর নতুন সত্তা গড়ে তুলতে হয়। নিজের জীবনের ঘটনা থেকে যে নভেল লেখে সে বড় ছোর একটা নভেল লিখতে পারে—কিন্তু সে আটাই হতে পারে না।

বিজ্ঞানের সীমা নিয়ে এতদিন ভুল ভেবে এসেছি। বিজ্ঞানেও যে নেতিবিচার, অর্থাৎ isolation আছে সেটার উদ্দেশ্য নতুন

সৃষ্টি ভাবলেই চলে । এ-ক্ষেত্রে নতুনের সঙ্গে পুরাতনের সম্বন্ধটিও
সাদৃশ্য মূলক । তবে মানুষের সঙ্গে মানুষের নয়, legend এর
সঙ্গে legend এর । স্বপ্ন সবই । সম্বন্ধই সত্তা । আর সেই
ভাঙ্গা গড়ার নামই জীবন ।

আজ বড় ঘুম পেয়েছে ।

* * *

এই কি জীবন ? জীবনে.....জানি না, জানি না কি
করতে হয় । বুদ্ধির মুখে শতক উন্মূলের ছমই পড়ুক । বুদ্ধিস্ক
উপবাসক্রিষ্ট হৃদয়ের প্রতিশোধের চাপ আমার কৃত্রিম শুদ্ধবুদ্ধি
সহ করিতে না পেরে ভেঙ্গে চৌচির হয়ে গেল । জগতের
সামনে বুদ্ধির এই অভিনয়, মিথ্যাভাষণ, মিথ্যা-আচরণ আর
সহ করতে পারি না । মেকীবুদ্ধির ফেরী করতে প্রাণ আর
চাইছে না । আজ, এই গভীর রাতে, নিজের কাছে আমার
সত্য মৃতি প্রকট হচ্ছে । স্থির দেখতে পাচ্ছি না...দূর আকাশে
বিদ্যুতের মতন চমকে উঠল...চোখ বড় জানা করছে ।

যার সংস্পর্শে আমার এই অল্পভূতি হল তাকে ধন্যবাদ ।
শুধু ধন্যবাদ নয়, আরো কিছু তাকে দিতে চাই—তার সামনে
আমার এই মৃতি ধরতে চাই—তোমার সৃষ্টি স্বচক্ষে ছাপ, মা
যেমন নবজাত শিশুকে মগীরবে শিশুর পিতার সামনে ধরে ।
তোমার সৃষ্টির দ্বারা তোমার পূজা হোক—আমার লজ্জা অন্তহিত
হোক, আমার অভিমান অপসৃত হোক—আনন্দ আসুক ।

সে কি অন্তরালে আমার সত্যমৃতি উদ্ভাসিত হয়ে ওঠবার

অন্তঃশীল।

জগৎ প্রতীক্ষা করে না ? সে কি আমার অন্তরের 'মথ্যাব' সঙ্গে যুঝছি দেখেছে ? আমার অন্তরের শূণ্য-পিঞ্জরে 'দানার' নিষ্ফল ঝাড়টা শুনে তার চোখ কি ছলছলিয়ে ওঠে না ?

তবে কি তার চেয়ে তার সৃষ্টিই মহৎ ? সে চলে রজকুমারীর মত, তার দৃষ্টিতে ফুল কোটে, তার চরণ ক্ষেপে পূলা সার্থক হয়ে ওঠে, তার স্নেহ কটাক্ষে হৃদয়কোরক উন্মুক্ত হয়—কিন্তু সবই কি তার অজ্ঞাতে, অনিচ্ছায় ? কি অকৃতজ্ঞ ! তার চিন্তা তার ক্রপায় আজ পুষ্টিত হয়ে উঠল তাকেই ভোলা ? সবই তোমার সৃষ্টি, তবে কেন এত অমনোযোগ ! নিষ্ঠুর বলি ?

সম্বন্ধ সৃষ্টিই যদি জীবন হয় তা হলে আমার ব্যক্তিষাভিত্ত্য রইল না ত ! সমবেত জীবনকে অগ্রাহ্য করে এসেছি, অগ্রাহ্য কেন, ঘৃণাই করেছি । একত্র সৃষ্টি করার আনন্দেই যে জীবন পুষ্ট হয় বুঝি নি । সম্বন্ধেই আনন্দ । নার্সিসাসের মত নিজের মুখই দেখে এসেছি ; কক্ষের সোনার কাটিতে অন্তর জেগে ওঠে, শুষ্ক চিন্তাপ্রায়াস জেগে ওঠে না । আনন্দ আনন্দ—কিন্তু

Know thyself ! I ? And what's that for my pay ?

Why, if I know myself I'd run away”

যতটা বাইরের জগৎকে জেনে মাতৃদয় কর্মে প্রবৃত্ত হয় ঠিক ততটাই উদ্ব্যতিত হয় তার নিজস্ব, ততটাই সৃষ্ট হয় তার নতুনত্ব । আজ আশ্রমে সেবা করে এই বুঝলাম ।

নাআনমবসাদয়েৎ—এই হল রাশিয়ার মূলমন্ত্র । গ্লাডকভ্‌এর সিমেন্ট বড় ভাল লাগল ।

নিজের ওপর বিশ্বাস আনবার জগ্ন কৰ্ম চাই, দৈনন্দিন কৰ্ম । ভেবেছিলাম কালই গ্রামে যাবো ফাউণ্টের মতন চাষ করতে নয়, মহামারী লেগেছে সেবা করতে । রমলা সেবা করে, ভালই করে । আশ্রমকত্তা বারণ করলেন, আমার কোন শিক্ষা নেই । দিন কয়েকের জগ্ন কাশী ত্যাগ করতে হবে । নিষ্কর্মা, সম্বন্ধচ্যুত, চিন্তাময় জীবন ভাল লাগছে না । এখানে থাকতে পারছি না । কোথাও ঘুরে আসি ।

*

*

*

অনেক রাত হয়ে গিয়েছে, ট্যাক্সীর হুকারও শোনা যাচ্ছে না । রমলা দেবীর মনটা স্থির ও শান্ত হয়ে এল । আশ্রমকত্তা ভালই করেছেন তাঁকে গ্রামে যেতে না দিয়ে । একেবারেই শিশু । কেবল চিন্তাই করে এসেছে, কখনও বাঁচে নি, এমন অশরীরি আইডিয়া । দেহ ওর নেই । কিন্তু আইডিয়া নিয়ে কি করব ? আমি ওকে সেবা করতে চাই, ওকে চাই, সেবা খেতেই যে জানে সে কি কখনও সেবা করতে পারে—দার যা কাজ— ! কোলকাতায় ওঁকে আনতেই হবে—তার পর নিজের বাড়ীতে বসে যা ইচ্ছা হয় করুক—কিছুই পারে না—একটা প্রোফেসারিই না হয় করুক..... বিকেলে বিজনের সঙ্গে টেনিস খেলুক । আর আমাকে যদি এতই ভয়, আমি কোন বিরক্ত করব না—দেখব মুখের আলো—কৃতজ্ঞ কেন ? আমি কিছুই

অন্তঃশীলা

উপকার করিনি...করিনি...ঐ রকম উড়ে বেড়ান স্বভাবই ওদের...
অথচ আমাকে না হলে চলবে না...আমি থাকব দূরে দূরে।
দূরে দূরে থাকতে কষ্ট হবে, ওরই হবে, কাছে আসতে চাইবে...
তখন...তখনকার কথা তখন...

রমলা দেবী আলো নিভিয়ে দিলেন। বেশ ঠাণ্ডা হাওয়া
দিচ্ছে...কোন শব্দ নেই...তবু মাথা জ্বালা করছে।

ভোর বেলাতেই রমলা দেবীর ঘুম ভেঙে গেল। সহর
ইতিমধ্যেই বেশ জাগ্রত, রিকশাওয়ালা ঠং ঠং করে ঘণ্টা বাজিয়ে
চলেছে, মাছের ভার নিয়ে কুলী যাচ্ছে, তার পিছনে পিছনে
মেছুরি ছুটছে, বাসগুলো জোরে চলেছে, দূরে ধেঁশনে এঞ্জিনের
বাঁশী বাজান, সহরের শব্দ জট পাকিয়ে গেল বলে রাতে ভাল
ঘুম হয়নি, শরীর উত্তপ্ত, স্নানের ঘরে গিয়ে রমলা দেবী কানের
পাশে ও মাথায় জল দিলেন। কাণ ও মাথা দিয়ে তাপ বেরুতে
লাগল। হেয়ার লোশন মাথায় দিলেন, চোখ জ্বালা করছিল,
গোলাপজল দিতে ইচ্ছে হল না। বিছানা ঝেড়ে তার ওপর
ছিটের চাদর ঢাকা দিলেন। হাতখড়িতে তখনও ছ'টা বাজেনি
মনে হল ঘড়ি বন্ধ হয়ে গিয়েছে, কাণের কাছে ধরে দেখলেন
যে চলছে, দম দিলেন, কুবু কুবু শব্দ বেশ শুনতে লাগে। ঘড়িটা
চমৎকার, সপ্তাহে এক মিনিটের ব্যতিক্রম হয় না, আজকাল
পর্যায় হয় না, সময়ের তাঁর আর কিসের প্রয়োজন? ভদ্রতা
রক্ষার তাঁর আর কোন দরকার নেই, সময় কাটছে কি না
দেখবার জগুই ঘড়ি, সময় আপনি কাটে। সৃজন কখন আসবে

কে জানে? তার কথার দাম আছে। বিজ্ঞকে কড়া কথা শোনান ঠিক হয়েছে। ছেলে ভাল, দেখলে সুখ হয়, কথা কয় অনর্গল, তার ধার নেই—তার আছে। স্বজনের চরিত্রে গাঙ্গিষ্ঠ্য এসেছে, বিজ্ঞের এখনও অসেনি, কখনও আসবে না, টেনিস খেলেই বেশ কাটাবে—তার পর? তার পর বিয়ে 'থা' করে সংসারী হবে—একলা থাকা তার হবে না। স্বজন একলা থাকতে পারবে, তার দানা বেঁধেছে। কেনই বা মানুষ একলা থাকবে—একপায়ে সারসের মতন চঞ্চল নিদ্রা যাওয়া মানুষের স্বভাব নয়—কেন? পায়ের তলায় পাল বিল, না পচা পুকুর? সারসগুলো ভারি মজার দেখতে—মাছের লোভে ধার্মিক সাজে...না, সে গুলো বক। খগেন বাবুর চরিত্রে লোভ নেই, কপটতা নেই...বিজ্ঞ বলছিল আছে আত্মসম্বিতা ও অহঙ্কার। বেশ, তাই ভাল। পুরুষ মানুষে মিন্ মিনে হলে ঘেন্না ধরে। বিজ্ঞ ছেলে মানুষ, বোঝে না—খগেন বাবু অন্তর্মুখী, বাইরের সব ব্যাপারকে মাথার মধ্যে এনে যাচাই করতে চান, খটনা হয়ে যায় আইডিয়া, আইডিয়ার রীতি অনুসারে বাইরের জীবনটাকে সাজাতে চান—বাধে বিরোধ। অহঙ্কারী ব্যক্তি নিজকে ভালবাসে, উনি নিজের ভাবনা ভাবতে ভালবাসেন। বিজ্ঞ তাঁকে ভুল বুঝেছে, স্বজন ঠিক চিনেছে। একবার যে দেখেছে সে শ্রদ্ধা না করে থাকতে পারে না। স্বজনকে বড় ভালবাসতে ইচ্ছে হয়, বিজ্ঞের মত ছেলে মানুষ নয় যে। স্বজন খুব শ্রদ্ধাবান...মেয়েরা বেশ হয় শ্রদ্ধার

অন্তঃশীলা

উপরন্ত কিছু নিতে চায়। ওঁর কৃতজ্ঞতা কে চায়? আগে হয়ত কৃতজ্ঞতা প্রকাশ মন্দ লাগত না। আগে রেংগীর সেবা করে আত্মতৃপ্তি আসত—কই বিজনের অস্থখে সে ভাব এল না ত! সব যেন ওলট পালট হয়ে গিয়েছে...। অস্থখ হয় নি ত? ভগবান করুন, যেন সেবার কোন প্রয়োজনই না হয়, সন্মাসী ঠিক বুঝেছেন—সেবার জ্ঞাত অনেক কষ্ট সহ্য করতে হয়—ও কিছু জানে না। কিন্তু সেবা করতে মন্দ লাগবে না, ও বাড়িতে থাকা হাঙ্গামা, মুকুন্দ মেরে ফেলবে—এখানে স্বজনের মেডিক্যাল কলেজের বন্ধুরা আসবে, সাহায্য করবে—রাত জাগতে তাদের কষ্ট হবে না।

স্বজন সাতটার পূর্বেই এসে হাজির হল। ড্রিং-রুমে চা খেতে খেতে রমলা দেবী প্রশ্ন করলেন,

‘বিজনের শরীর কেমন?’

‘শরীর ভাল, মন খারাপ’

‘বড় বাড়াবাড়ি করেছিল কাল’

‘এই সেদিন অস্থখ থেকে উঠেছে’

‘না, অস্থখে কি মন বিকৃত হয়? এখনও মন তৈরী হয় নি’

‘না হোক, প্রাণের প্রাচুর্য আছে’

‘তার সঙ্গে শ্রদ্ধা থাকলে মন্দ হত না’

‘এখনও ছেলে মানুষ, বয়স হয়নি, যার যা নেই তার জ্ঞাত আক্ষেপ করে তাকে দোন দেওয়া যায় না’

‘ঠিক বলেছ’

‘আপনি ত বিজনকে খুব ভালবাসেন জানি—অত সেবা করলেন!’

‘তাকে খুব বল—অনেককেই সেবা করতাম’

‘ওর বেলা একটু পাখ্য ছিল। আপনি যেন ঘরের হাত থেকে লড়াই করে ওকে ছিনিয়ে আনলেন। আপনার সেবার মধ্যে একটা কোথায় ভীষণ জোর ও দাবী ছিল। সেবা করতে আর ভাল লাগে না কেন?’

‘দাবী করতে, জোর ফলাতে ইচ্ছা হয় না। তখন স্বজন, আমার ‘মধ্যে’ বলে কোন বস্তু নেই’

‘আছে, জানেন না’

‘জান্তি পার না?’

‘সত্যি বলছি, আছে’

‘বল’

‘ভাল করে বলতে পারি না—খগেন বাবু থাকলে বলে দিতেন’

‘তুমি তাঁকে চেনো?’

‘খনিষ্ঠ পরিচয় নেই। কাশী যাবার দিন সকালে বই-এর দোকান থেকে আমাদের ওখানে গিয়েছিলেন। আত্ম-সন্ধানী, এমুগে ঐ টাইপ বিরল, তাই তাঁর প্রয়োজন বেশী।’

‘কিন্তু সন্ধানের পর পৌছান চাই ত’

‘না হয় নাই গন্তব্যস্থলে উপস্থিত হলেন, না হয়, নাই কিছু পেলেন—সন্ধানটাই বড়, তাঁর কাছে’

অন্তঃশীল।

‘সকলের কাছে নয়’

‘তিনি সকল নন। এখন তিনি কাশীতে না?’

‘কাশীতেই কি থাকবেন? এখার ওখার যেতেও পারেন’

‘কবে আসবেন?’

‘জানি না’

‘তোমাকে লেখেন নি’

‘কই ওসব কথা কিছুই লেখেন নি। কেমন আছেন?’

‘কি করে জানব! ভালই নিশ্চয়...কেন?’ স্বজন খানিকক্ষণ একদৃষ্টে রমলা দেবীর চেখের পানে চেয়ে রইল, রমলা দেবী ধীরে ধীরে চোখ নামিয়ে নিলেন। আর এক পেছালা চা দিয়ে তিনি উঠে গেলেন।

যখন রমলা দেবী আবার ঘরে এলেন তখন তাঁর হাতে কাগজের তাড়া। সেই তাড়াটি যেন চোখে পড়েনি স্বজনকে এমন ব্যবহার করতে হল। রমলা দেবী জিজ্ঞাসা করলেন,

‘স্বজন, পাইপ খাওনা? বেশ দেখায়...গন্ধটা ভাল লাগে’

‘মনের দুঃখে পাইপ খাব’

‘স্বজন, পড়বে?’

‘এখন, এখানে?’

‘বুঝিয়ে দাও—বুঝতে পারছি না যে’ রমলা দেবী ডায়েরীর খানকয়েক পাতা তুলে রাখলেন।

স্বজন পড়তে লাগল—পাতার পর পাতা, পর পর নয়, এলোমেলো, অগোছাল, রমলা দেবী পিছনে দাঁড়িয়ে সঙ্গে

পড়তে লাগলেন। পড়া শেষ হবার পর স্বজন মুখ তুলে চাইলে। রমলা দেবী বলেন, ‘আরো কয়েক পাতা আছে’

‘থাক্’

‘বুঝিয়ে দাও’

‘আমি কি বলব রমাদি’ !

‘বল না ভাই, তুমি তাঁকে বোঝ, আমি যে বুঝতে পারছি না’

‘ধর্ম হল না, বিজ্ঞানে সঙ্কটে হতে পারলেন না, আর্টে তাঁর মুক্তি হবে—এই বিশ্বাস করেন’

‘সম্বন্ধ নিয়ে কি লিখেছেন ?’

‘একা থাকা যায় না, সম্বন্ধ সৃষ্টি করতে চান’

‘সৃষ্টি মানে কি ?’

‘স্থাপন হল স্থিতির, সৃষ্টি পরিণতির। নতুন হলে সৃষ্টি হয়’

‘আর্ট মানে ছবি দেখা, গান শোনা ?’

‘ঠিক, তা নয়, যে আলো আর্টের মধ্য দিয়ে প্রতিভাত হয় উনি সেই আলো চাইছেন’

‘কার আলো ? আর্টিষ্টের মনের ?’

‘আর্টিষ্ট যখন রচনা করে তখনকার আলো নয়, তখন শুনেছি আলোর চেয়ে ধোঁয়া ও আগুনের তাপই বেশী থাকে। ভেতরকার যে আলোয় পূর্ণ রচনা দীপ্ত হয়ে ওঠে উনি সেই আলোর কান্ডাল। বাজে জিনিষ পুড়ে যাবার পর যেমন কয়লা জলজল করে, সাদা রং ধরে, incandescent হয়, উনি

অন্তঃশীলা

বোধ হয় নিজে তাই হতে চান। আর্টিষ্ট, জীবনের আর্টিষ্ট, অভিজ্ঞতাগুলি উপাদান, উপকরণ। আপনার কি মনে হয় ?

‘আমি কি করে জানব ? আমার শিক্ষা নেই দীক্ষা নেই।’

‘দীক্ষা হয়েছে’

‘দীক্ষা হয়েছে ?’

‘হ্যাঁ...উনি বোধ হয় আধ্যাত্মিক কিছু চান’

‘কিন্তু এত কষ্ট কিসের ?’

‘এষে Burning of the bush ! কষ্ট হবে না !’

‘আমি সহ্য করতে পারি না, কারুর কষ্ট’

‘লিখুন না, চলে আসতে’

‘ঠিকানা জানি না’

‘তঁার মাসীমা হয়ত জানেন’

‘কাশীতে হয়ত নেই।’

‘ঠিকানা বার করা শক্ত নয়। কাশীতে গিয়ে খোঁজ করলেই হয়, যাবো ?’

‘না, গিয়ে কাজ নেই—তোমার কষ্ট হবে’

‘কষ্ট হবে না। আমারও তাঁকে দেখতে ইচ্ছে করছে। ভদ্রলোকের বই পড়া সার্থক। তাঁকে আমাদের সকলেরই প্রয়োজন। দেখা হলে ধরে আনব’

‘তিনি আসবেন না’

‘আপনার জন্যেও না ?’ স্নেহজন গম্ভীরভাবে প্রশ্ন করল বটে, কিন্তু তক্ষণাৎ অপ্রস্তুতে পড়ে কথার মোড় ঘোরাতে গেল—

‘আপনি সাবিত্রীর অত বন্ধু ছিলেন, বন্ধুত্বের খাতিরও আছে ত ?’

‘খাতির আবার কিসের ? তাঁর এককালে ধারণা ছিল যে আমিই সাবিত্রীকে নষ্ট করেছি। কিন্তু সত্যি বলছি, আমার দোষ ছিল না, আমি কখনও কুপরামর্শ দিই নি, আমি তাঁকে ভালবাসতেই শিখিয়েছিলাম—কি বলতে কি বলেছি, সে কি বুঝতে কি বুঝেছে, আমি চেয়েছিলাম সে যেন স্বামীকে ভালবাসে, নিজে সুখী হয়। তা সে পারল না। এর বেশী আমি ভাই কিছুই চাই নি। তোমার কাছে বলছি—স্বামী জীবন সম্বন্ধে আমার ঘৃণা ধরে গিয়েছিল, সেই ঘৃণার বশে আমি হয়ত অগ্ৰায় করে ফেলেছি—কিন্তু আমার হৃদয় বে কঁটায় ভর্তি, আমি কি করব বল ? সাবিত্রীকে সুখী হতে বলার মধ্যে আমার প্রতিশোধ প্রবৃত্তি হয়ত মিশে গিয়েছিল। উনি দেখলেন আমার সেই প্রবৃত্তিটা, কিন্তু আমার অন্তরে কি ছিল আমিই জানি।’

‘জানিয়ে দিতে নেই কি ?’

‘আমার বুঝি আত্মমর্যাদা নেই ! কেন বোঝাব ? সে বুঝতে পারে না, যার অত বুদ্ধি।

‘বুদ্ধি এ বিষয়ে হয়ত নেই’

‘হয়ত কেন, নিশ্চয়ই নেই। আমি জানি। শিশু, একেবারে শিশু, সোডার বোতল খুলতে জানে না, শব্দে ভয় হয়। অসুখ করলে কি হবে ভাই ? ঐ ত’ মুকুন্দ !’

অন্তঃশীলা

‘আত্মমর্যাদা জ্ঞানটা একটু কমিয়ে ফেলো তাঁর উপকার হয়’

‘এখন আর নেই’

‘তবে আমার সঙ্গে কাশী চলুন না কেন?’

‘কাশী! কার জন্ত? কেন?’

‘এই ধরুন নিজের স্বাস্থ্যের জন্ত। বিজনের অসুখ এখন
সেরেছে—এবার আপনি না পড়েন ভয় করে’

‘আমার দেহের ওপর কোন মায়া নেই। কোথায় উঠব, কার
সঙ্গে যাব! একলা গিয়ে যেখানে-সেখানে থাকা যায় না’

‘কেন? আমারও শরীরটা ভাল নয়, বিজনের বন্দোবস্ত
করছি, আমার এক আত্মীয় আছেন—সেখানে উঠলে তাঁদের কষ্ট
হবে না’

‘হয়ত, সেখানে নেই’

‘বেশত, অনিশ্চিতের পিছনে ছুটেতে ভালই লাগবে! সবই কি
নিশ্চিত, হাতের আমলকী?’

‘কি জন্তে যাব? আমাকে কোন প্রয়োজন নেই। আমি
কেবল কৃতজ্ঞতা প্রকাশের পাত্র। সে পাত্রের দূরে থাকাই ভাল,
অন্ততঃ তাতে ক্ষতি হয় না’

‘প্রয়োজন আছে। আপনাকে ভিন্ন...’

কথা বন্ধ হয়ে গেল খানিকক্ষণের জন্ত।

র—তুমি খেয়ে যাও

সু—না, কাশী যাবার যোগাড় করিগে—বিজন একলা থাকবে।

একটা তার করে দিই?

র—উনি বোধ হয় এক সন্ন্যাসীর সঙ্গে দেশভ্রমণে বেরিয়েছেন।

সু—বেশী দিন তিনি বাইরে থাকতে পারবেন না।

র—তুমি তাঁকে জান না।

সু—নিশ্চয়ই জানি না, কিন্তু কেমন খেন মনে লাগছে যে অল্পদিনের মধ্যে কাশী ফিরে আসবেন, যদি কোথাও গিয়েও থাকেন। কাশী দেখাটাও অন্ততঃ হবে, মন্দ কি ?

র—ধর দেখা হল, তার পর ?

সু—পরের কথা পরে।

র—বিরোধ কাটবে ?

সু—অন্তরের বিরোধ কাটবে—কিন্তু...

র—কিন্তু কি ?

সু—বাইরের বিরোধ কাটবে কি ? সমাজ...

র—তা হলে যেতে বলছ কেন ?

সু—জেনে শুনে যাওয়াই ভাল, তবে তাঁর পক্ষে তাঁর অন্তরের বিরোধ সমন্বিত হলেই যথেষ্ট হল না কি ? আপনার যথাসাধ্য ততটুকু করা চাই।

র—তুমি এত শিথলে কোথেকে—এই বয়সে ?

সু—দিদি বলে ডাকি বলেই কি নাবালক ? এধারে বয়সের গাছ পাথর নেই যে !

র—আচ্ছা, এবার থেকে আমিই না হয় দাদা বলে ডাকব।

সু—মানহানি হবে না। তা হলে দাদার কথা শুনুন।

র—শুনুন বলতে নেই ছোট বোনকে, ‘শোন’ বলতে হয়।

অন্তঃশীলা

স্ব—আমার কথা শুনুন ।

র—‘শোন’

স্ব—শুনুন, কাশী চলুন ।

র—যাব না

স্ব—কেন ?

র—যে কারণে তুমি ‘তুমি’ বলছ না—আপন করতে জানা চাই ।

স্ব—ঐ কারণটার কথাই উল্লেখ করছিলাম । ঐটাই বাইরের বিরোধ । আপন করার মানে বুঝি তুমি বলা ? তাকে পরিপূর্ণ করেই আপনার সার্থকতা—এই হল আপন করা । কৃতজ্ঞ পর্য্যন্ত হতে দেবার অবকাশ দেন না সে পায় ।

র—নিষ্ঠুর ! আচ্ছা, স্ব, কাউকে আপন করা যায় ঐভাবে ?

স্ব—চেষ্টা করেই দেখুন না । একমাত্র সাধন! কি বুদ্ধিরই ? ভাবের সাধনা নেই বুঝি ? তিনি বুদ্ধির দিক থেকে সাধনা করুন, আপনি করুন অগ্র দিক দিয়ে । মিলবেন একই জায়গায় ।

র—তুমি আপন করেছ ?

স্ব—কেন রমাদি, তুমি বিজন কি আমার আপন নও ?

রমলা দেবীর চোখে জল এল, ‘আচ্ছা তাই যাব, কিন্তু যদি আপন না হয় ?’

স্ব—আপন সম্প্রতি হবে না—না হয়েও আপন হবে—তিনি হবেন তখন তোমার সৃষ্টি ।

র—তুমিই তাঁর কথা বুঝেছ, আমি বুঝিনি । বিছাটী নই ।

স্ব—বিয়ের কথা কোথায় পেলেন ? যেই seriously দেখবে সেই বুঝবে, প্রত্যেকেই বোধগম্য—অবশ্য যদি ইচ্ছে না হয়, তা হলে অল্প কথা।

র—যদি আপন না করে ?

স্ব—তবু আপন হবে।

র—পারব ?

স্ব—নিশ্চয়ই পারবেন, তবে বড় কষ্ট। কিন্তু আপনি বলতে হবে, পারবেন ত ?

রমলা দেবী আনতমুখে বসে রইলেন...‘কাশী যাব না’

‘এইটুকুই তাঁর প্রাণ শ্রদ্ধা—তিনি এত কষ্ট করেছেন নিজেকে বাঁধতে, আর আপনি পারবেন না ?’

‘শ্রদ্ধা আছে, কিন্তু শ্রদ্ধাই দিতে চাই না’

‘সবই না হয় দেবেন—চলুন’

রমলা দেবী হঠাৎ দাঁড়িয়ে উঠলেন—‘কি বলছ, স্ত্রজন !’

‘তা হলে, আপনি—চিরকালই আপনি।’

‘আমি যাব না’

‘আমার অনুরোধ, তাঁর জ্ঞান’

‘আমি মেয়েমানুষ নই ?’

‘বুঝিয়ে দেবেন চলুন—মেয়েদের ভালবাসা কি ধরনের ? তাদের আপন করার পদ্ধতি অল্প রকমেরই—তাদের মানে, তাদের মধ্যে ভালদের’

‘অর্থাৎ তাদের মধ্যে অস্বাভাবিকদের’

অন্তঃশীলা

‘ভদ্রতা মানেই তাই ! স্বভাব মানে বুঝি যেটা অধোমুখী ?
দীর্ঘমুখী স্বভাব বুঝি স্বভাব নয়। দুইই প্রকৃতিতে আছে’

‘খদি না পারি ? ভরসা দিচ্ছ ত ?’

‘আমি ভরসা দেবার কে—রমাদি ? সাবধান করে দিতে
পারি ? বিকেলে পাঁচটার সময় আসছি—তৈরী থাকবেন।’
রমলা দেবী চুপ করে বসে রইলেন।

* * * *

হাওড়া ষ্টেশনে যখন তাঁরা পৌঁছলেন তখন গাড়ি ছাড়বার
বিলম্ব আছে। ‘ইন্টার ক্লাসের দু’খানা সিংগল কিনো’

‘পারবেন না, ভিড়ে কষ্ট হবে’ ‘কষ্ট হবে না, তোমার গাড়িতে
যাব’ ‘মেয়েদের গাড়িতে ভিড় কম’ ‘মেয়েদের গাড়ি বড় নোংরা,
তোমার সঙ্গে গল্প করতে করতে যাব।’ স্বজন যখন টিকিট
কিনতে গেল তখন রমলা দেবী হইলারের ষ্টল থেকে একটা স্ট্র্যাণ্ড
ও লেডীজ্ জার্নাল এবং এক শিশি জেনাস্‌পিরিন কিনলেন।
পাশেই একটি রেলওয়ের ফিরিঙ্গী কর্মচারী বায়স্কোপের পত্রিকা
দেখছিল। রমলা দেবী একটু সরে দাঁড়ালেন, লোকটি আবার
কাছে এল—তিনি কাগজ কিনে সরে এলেন, লোকটি ঘাড় বঁকিয়ে
দেখতে লাগল। স্বজন টিকিট কিনে ফিরে আসতেই রমলা দেবী
প্ল্যাটফর্মের মধ্যে যেতে চাইলেন—কিন্তু গেট তখনও খোলা
হয়নি। প্ল্যাটফর্মের আলো জ্বলে উঠল। একজন প্রৌঢ়
ভদ্রলোক একটি অল্পবয়সী মেয়ে নিয়ে হাঁফাতে হাঁফাতে এলেন,
মেয়েটির কোলে শিশু, ‘কখন ‘গেট খুলবে বলতে পারেন?’

‘ঠিক জানি না’ শিশুটা কেঁদে উঠল—গেট খুলে গেল।
 প্ল্যাটফর্মের মধ্যে ধীরে ধীরে পিছু হটে গাড়ি প্রবেশ করছে,
 ‘রমাদি, মেয়েদের গাড়িতে উঠুন না’ ‘তোমাদের গাড়ি খালি’
 ‘এখনই ভরে যাবে’ ‘ভিড় হলে চলে আসব’ ভদ্রলোক
 স্ত্রীলোকটিকে ইন্টার ক্লাসের মেয়ে-গাড়ীতে তুলে দিলেন।
 ওঠবার সময় বালতী থেকে দুধের ঘটিটা সশব্দে পড়ে
 গেল ‘অকস্মিক ধাড়ি, এখন দুধ পাবে কোথায়? গেলাবে
 কি?’ ক্রমে ট্রেন গেল ভরে—সুজন আবার রমলা দেবীকে
 মেয়ে গাড়িতে যাবার অনুরোধ করলে। ‘তুমি দেখে এস,
 ওখানে ভিড় আছে কিনা’ সুজন নেমে গেল। রমলা দেবীর
 পাশে একটি ৭৮ বছরের ছেলে এসে বসল—তার পিতা ষ্টেশনে
 পায়চারি করছেন—ছেলেটি হঠাৎ পকেট থেকে ছুরি বার করে
 দাঁত দিয়ে খুললে, তার পর এধার ওধার দেখে জুতোর তলায়
 শান দিলে, খানিক পরে আবার চারধার দেখে বিছানা বাধা
 দড়ির ওপর ধার পরীক্ষা করতে লাগল—রমলা দেবীর সঙ্গে
 চোখোচোখি হতেই পরীক্ষার ফল জানা হল না। গাড়িটার
 সামনে সেই ফিরিঙ্গী যুবক বেড়াচ্ছিল, অগ্নিসীটের এক ভদ্রলোক
 তাঁর দিকে একদৃষ্টে চেয়েছিলেন। সুজন ফিরে এসে বলে,
 ‘গাড়িতে কোন ভিড় নেই, যান্ না, মহিলাটি বড় বাতিবাস্ত হয়ে
 পড়েছেন—বাচ্ছা ভীষণ চেষ্টাচ্ছে, ভদ্রলোকটি ভীষণ বকছেন...’
 সামনের সীটের ভদ্রলোকটি বলে উঠলেন—‘যান না, যান না,
 মেয়েদের গাড়িতেই ভাল—বেশ ক্রী হবেন, হাত পা মেলে বসতে

অন্তঃশীলা

পাবেন, এখানে অসুবিধে হবে আপনাদের।’ রমলা দেবী এণ্ডির হাদরটা জড়িয়ে নিলেন। গাড়ী ছাড়বার প্রথম ঘণ্টা পড়ল। রমলা দেবী স্ত্রজনকে বল্লেন, ‘এইবার যাও, সারারাত বসে থাকতে হবে। খাবার কখন খাবে?’ ‘বর্দ্ধমানে। এরি মধ্যে খোকাকে আপন করেছেন?’ ‘খুকী বড় নখপি মেয়ে’ স্ত্রজন চলে গেল—আবার ম্যাগাজিন দুটো ও কুঁজো নিয়ে ছুটে এল। ‘ও নিয়ে কি করব?’ ‘লেডীজ্ জার্নালটা রাখুন’ ‘তুমিই দেখ, কাজ রয়েছে, এখানে। ব্যাণ্ডেলে কেলনারের দোকান থেকে পোয়াটাক্ তাজা দুধ’ এন।’ মহিলাটি বলে উঠলেন—‘ওরা মোছলমান—হিন্দুদের দোকানে...না দরকার নেই’ ‘আচ্ছা, খানিকটা গরম জল ও একটা হরলিক্ দিয়ে যেও, টিফিন্কারিয়ার থেকে পেয়ালাপিরিচ আর চামচেটা দিও—কারিয়ারটাই দিয়ে যেও, এখন নয়, যাও, গাড়ি ছাড়ল’ গার্ড সাহেবের বাঁশী বাজার সঙ্গে সঙ্গে হাতের সবুজ নিশান উড়ল। হঠাৎ ধাক্কা দিয়ে গাড়ি ছাড়ল, খুকী ঘুমিয়েছে।

ব্যাণ্ডেলে স্ত্রজন গরম জল, হরলিকের নতুন কোটা ও খাবারের বাক্স এনে দিয়ে নিজের কামবায় চলে গেল। মহিলাটি হরলিক খুকীকে থাওয়ালেন না, বিকেলে দুধ খাইয়ে এনেছেন, এবং সারাক্ষণই থাক্ছে—বর্দ্ধমানেই নেমে যাবেন। বর্দ্ধমানে গাড়ি খালি হল—মহিলাটি হরলিকের কোটা নিলেন না, ‘দরকার নেই, বিলেতী ওষুধ থাওয়ালে খুকীর অসুখ করবে, উনি রাগ করবেন।’ স্ত্রজন প্রাটকর্ষে দাঁড়িয়ে খাবার থেয়ে নিলে। কুঁজো থেকে জল

ঢালার সময় বাঁশী বাজল। রমলা দেবী নামতে দিলেন না—
‘কেউ কিছু বলবে না, গাড়িতে আমি একলা, তা ছাড়া নিয়মও
আছে, কেউ এলে নেমে যেও।’ অগত্যা স্বজনকে বসতে হোলো।
রমলা দেবী জিজ্ঞাসা করলেন, ‘আচ্ছা স্বজন, আপনি ছাড়া তুমি
বলতে নেই কেন?’

স্ব—একটু দূরে দূরে থাকতে হয়, দূরে দূরে রাখতে হয়,
নচেৎ চোখে পড়ে না। দূরে রাখাই আর্টিষ্টের সাধনা।

র—তাতে যে প্রাণে ধরে না

স্ব—তা হলে ‘তুমি’ বলবেন

র—তুমি আমাকে ‘তুমি’ বল

স্বজন অনেকক্ষণ জিজ্ঞাস্ব নয়নে বসে রইল। রমলা দেবী
বাইরে চোখ ফেরালেন। অগণিত তারা, ঐ দূরে কাল ছোট্ট
পাহাড় দেখা যাচ্ছে, আরো দূরে মাঠের বুক চিরে আগুন বেরুচ্ছে,
কয়লার খনি। রমলা দেবীর হাতটা স্বজনের গায়ে ঠেকল,
‘বলনা স্ব’

‘কেন?’ ‘বড় ইচ্ছে করছে কেউ আমাকে আপন ভাবুক’
‘কেউ?’ ‘ধর তুমি’ ‘আমি কেন?’ ‘তুমি ওঁর শিষ্য, বিজন
বলেছে, তাইত’ তুমি অত সহজে আমাকে চিনেছ’ ‘ও’

‘ও’ কেন?’ প্রশ্নের উত্তর এল না...রমলা দেবী চোখ ফিরিয়ে
নিলেন। ‘তুমি বললে কি হয় জানেন?’ ‘কি?’ ‘এই যে নিজেই
বল্লেন!’ ‘কি বল্লাম?’ ‘আপন হয়ে যায়। আমি ত’ আপনার
খুবই আপন, আপনার কত নেই পেয়েছি’ ‘তা নয়—কি জানি।’

অন্তঃশীলা

গাড়ির বেগ বেশ মন্দা হয়েছে। স্বজন দাঁড়িয়ে উঠে বিল
‘এইবার নামতে হবে, গোলমাল করবে নাহলে’ ‘বোসো না’
‘কোন ভয় নেই, ঠিক পাশের গাড়িতেই আছি, ডাকলেই পাবেন,
নিশ্চিন্ত হয়ে ঘুমোন’ ‘তুমিও ঘুমিও—জায়গা পেলো’। গাড়ি
খামবারপূর্বেই স্বজন নেমে পড়ল। ছোট্ট স্টেশন, নীচ প্ল্যাটফর্মে
স্বজন দাঁড়িয়ে রয়েছে দেখে রমলা দেবী বল্লেন ‘উঠেই পড় না
স্বজন’ ‘না রমলাদি, ডাকবেন না, অমন ক’রে, আমার ঘুম
পেয়েছে’ ‘আমার ঘুম পাইনি—ভাল লাগছে না’ ‘ঘুমতে চেষ্টা
করুন’ ছাড়বার বাশী না বেজেই গাড়ি চলতে আরম্ভ করল।
গাড়ি যখন প্ল্যাটফর্ম ছাড়ছে তখন স্বজন জানলা দিয়ে মুখ বাড়িয়ে
রমলা দেবীর মুখ দেখতে পেলো, বাইরে চেয়ে আছেন। নিজের
মুখে হাত আড়াল করে একটু আশ্রয় বল্লেন—‘রমলাদি, ‘তুমি’
বোলো না, ‘আপনি’ বোলো, প্রাণ না ভরলেও।’ ‘ঘুম না এলে
এই চিঠিটা পড়ো।’ রমলা দেবী হাত বাড়িয়ে খামটা নিলেন।
হাতে করে বসে থাকবার পর খাম খুলে চিঠিটা পড়তে
লাগলেন।

স্বজন বাবু,

কেবল প্রতিজ্ঞা পালন করেছি ভাবলে আমার ওপর অগ্নায়
করা হবে। আপনার সঙ্গে আমার পরিচয় স্বল্প, তবু যেন মনে
হয় কয়েক ছত্র লিখলে শান্তি পাব। আপনার সঙ্গে মাত্র কয়েক
ঘণ্টা কথা কয়েছি, কিন্তু তাই আমার পক্ষে যথেষ্ট। সেদিন
আপনাকে আমার বক্তব্য বোঝাতে পারি নি। আপনারও প্রশ্ন

করা হল না, আমারও উত্তর দেওয়া হল না। যা মনে আসছে লেখে যাচ্ছি, এরই মধ্যে হয়ত উত্তর পাবেন। কিন্তু উত্তরের অপেক্ষা প্রশ্নের আধিক্যই আমাকে বাতিবাস্ত করে তুলেছে, যদিও জিজ্ঞাসার সাক্ষেতিক চিহ্ন দিয়ে চিন্তাশ্রোতকে বন্ধ করব না। মৈত্রী আমার কাছে এতদিন ছিল কথার কথা, প্রমাণ দিচ্ছি। রমলা 'দেবীকে বন্ধু হতে বলেছিলাম—তিনি রাগ করেই উঠে চলে যান। এতদিন যিনি সম্বন্ধহীন, নিরালম্ব হয়ে দিন কাটিয়েছেন তাঁকে আমি কি না দিতে গেলাম মনঃকল্লিত গুণবাচক শব্দ! শব্দ নিয়ে তিনি কি করবেন! তাই বুদ্ধিমতীর মতন প্রত্যাখ্যান করলেন। তিনি বুঝলেন যে আমার মৈত্রী অর্থহীন। লজ্জিত হয়ে থাকি। তখন বুঝি নি। এখন বুঝেছি। মন আমার কচি লাউডগার মতন ছোট ছোট তন্তু দিয়ে ওপরে উঠতে চায়। লতাতন্তু কাটলে লতাই যাদু মরে। আমার লতা বাচ্ছিল মরে, আপনাদেব ধরে আমার কচি পাতা বেরিয়েছিল, আমি হয়েছিলাম সজীব—কিন্তু এখানে আপনারা নেই, কাকে আশ্রয় করে বাঁচব?

অর্থাৎ আমি এখন মৈত্রীর অর্থ গ্রহণ করতে সক্ষম হয়েছি। নিরালম্ব হয়ে থাকা যায় না—আমি পারলাম না। কিন্তু আপনার ব্যাখ্যা ঠিক নয়। আপনি বলেছিলেন, মৈত্রী মানে ঘটকালী করা, catalysis। হতে পারে, কিন্তু আমার কাছে সত্য নয়। অত্নের সঙ্গে সম্বন্ধস্থাপনকার্যে নিজেকে নিঃশেষিত করতে পারি না। আমি কিবল সম্বন্ধের যোগ-সমষ্টি নই।

অন্তঃশীলা

ক্যাটালিসিসের পরবর্ত্তন গুণগতি। আমার মিলনে মিলন-
কর্ত্ত। আছে, সেটি আমি নিজে। নিজকে মিলনের জগ্ন
উপযুক্ত করা চাই। দ্বিতীয় ও তৃতীয় ব্যক্তির মধ্যে মিলন
যটিয়ে আপনি তৃপ্তি পেতে পারেন, কিন্তু সম্পূর্ণ হতে পারেন কি ?
মিলন করতে গেলেই দেখবেন নিজেই মিলিত হচ্ছেন. কিন্তু
সেটা নিজের অনিচ্ছাসত্ত্বে। দৃষ্টান্ত দিচ্ছি—কাব্য ভ্রগং থেকে।
সমালোচকেরা বলেন শ্রেষ্ঠ কবিতার চিহ্ন তার স্বতঃস্ফূর্ত্তি, অর্থাৎ
পাঠক নিজের ইচ্ছা, শক্তি না খাটিয়ে সেই কবিতা থেকে রসানুভব
করতে যদি পারেন তবেই সেটা ভাল কবিতা হবে। কিন্তু
লেখকের কথা ভাবুন—তঁার লেখবার সময় কি নিজের শক্তি
খরচ হয় না ? লোকে ভাবে—‘কবির মনে ভাব এল, ভাবার
সঙ্গে মিলন হল চিন্তার, অমনি কবিতা লেখা হয়ে গেল। যে
কবিতা লেখে সেই কবি—সঙ্গে সঙ্গে পাঠকের মনও এই রসচক্রের
মধ্যে বাসা বাধলে—গড়ে উঠল মধুচক্র। যেন একটি সম্পূর্ণ
বৃত্ত বিনা আয়ামে রচিত হল।’ তা হয় না, হয় না, অতি সহজে
মিলন হয় না। জনসাধারণের কাছে মৈত্রীর অর্থ বৃত্তের মধ্যকার
আন্তরিক সম্বন্ধটুকু। কিন্তু তাঁরা কি দেখেন যে আন্তরিক
সম্বন্ধস্থাপনে কত কষ্ট পেতে হয়—একটা লাইন মেলাতে কত
রাত জাগতে হয় ! জীবনটা কি বটতলার নভেল ? মিলের
জগ্ন, মিলনের জগ্নও সাধনার প্রয়োজন।

ঘটক ঠাকুরের পরিবারবর্গ আছে শুনেছি। আপনার
পরিবারবর্গ বিজন, রমলা দেবী—আপনি মামার ভাগ্নে, বিজনের

পিসতুতোভাই, স্নেহের ভিখারী, তাই রমলা দেবীর বন্ধু। কিন্তু এই সম্বন্ধস্থাপনে কি আপনার কোন কিছু ত্যাগ করতে হয়নি, সবই কি সহজে সম্পন্ন হয়েছিল? কার্কিনের তিন হাত বাঁধা, চতুর্থটি না বাঁধা পড়া পর্যন্ত আপনি অসম্পূর্ণ। সম্পূর্ণতার সন্ধানের নামই মৈত্রীসাধনা। কবির ভাষায় creative unity—যেটি মনুষ্যত্বের একমাত্র তাৎপর্য।

তা হলে, বাঁধা না পড়ে কি উপায় নেই? স্বাধীনতার অর্থ কি? অর্থ ঠিক কি জানি না, কেন না স্বাধীন হই নি। তবে স্বাধীনতার প্রয়োজন কি বলতে পারি। আমাদের উদ্দেশ্য, প্রবৃত্তি ও ভাবগুলি নানা কারণে কর্মে পরিণত হতে পারে না, অথচ পরিণত না হওয়া পর্যন্ত শান্তি নেই। তর্কবুদ্ধির শান্তি, সঙ্গতি নিতান্ত ক্ষণস্থায়ী। কর্মে পরিণত হবার স্বেচ্ছা চাই, নচেৎ অশান্তি। 'এই হল স্বাধীনতার প্রয়োজন।

এই প্রকার বাধাবিপত্তি বিঘ্ন প্রপঞ্চের অতিরিক্ত একপ্রকার স্বাধীনতা আছে। যেদিন কোন ব্যক্তির অনুভূতি জন্মাবে যে এই বিচিত্র বিবর্তনের মধ্যে একটি সনাতন স্বাস্থ্য সত্তা আছে, এবং সেই সত্তায় তদগত হলেই তার জীবনের সার্থকতা, সেই মুহূর্তে সে হবে স্বাধীন, স্বরাট। সঙ্গে সঙ্গে শান্তি, কারণ তখন আর বিরোধ রইল না। এই অনুভূতিতে বাইরের বাধা রইল না, যে-সব বাধা উদ্দেশ্যকে পরিণত হতে না দিয়ে অশান্তি সৃষ্টি করছিল। এই প্রকার অনুভূতি স্বপ্রমাণিত। অন্তরের বাধাও এখানে লোপ পেল, সত্যোপলব্ধির তর্কগদগদ মিটল, বুদ্ধির বাধাও ঘুচল।

অন্তঃশীল।

শাশ্বত সত্য আছে কি নেই প্রশ্ন উঠছে না। না থাকলেও
অল্পভূতি সম্ভব—কারণ মানুষের Universalএর দিকের প্রগতিটি
ও এক প্রকার প্রবৃত্তি। নভেলিষ্টরা সেটা ধরেন না।...আমি
সব রকম অল্পভূতির অস্তিত্ব ও প্রয়োজন মানি না। মাত্র ঐ
টুকু অল্পভূতির প্রয়োজন স্বীকার করি—না করে উপায় নেই—
অন্তএব তার অস্তিত্ব আছে। এ ছাড়া ঐ ধরণ অবস্থার অস্তিত্ব
প্রমাণ হয় কিসে? জ্যোতির্বিদ ঐ উপায় প্রথমে অবলম্বন
করার পর যন্ত্র দিয়ে নতুন তারা আবিষ্কার করেছেন।

কিন্তু আমার সমস্যা, মাত্র স্বীকার করা নয়, অর্জন করা,
অস্থায়ীকে স্থায়ী করা, পরকে আপন করা, বাহিরকে অন্তরে
আনা, প্রয়োজনকে অস্তিত্বে পরিণত করা। কিন্তু আমার যে
বাধা অনেক! মৈত্রী-সাধনের ফলে বাধা ঘুচবে? ধরুন আবার
যদি কোলকাতায় ফিরি, কিংবা আপনারা যদি এখানে আসেন,
তা হলে আপনাদের সঙ্গে মিলিত হয়ে আমার অল্পভূতি দৃঢ়
হবে? আমার শান্তি আসবে? আমি অসম্পূর্ণ, তাই
অশান্ত।

আজ বিশেষ করে আমার প্রশ্নের উত্তর জানতে ইচ্ছা হচ্ছে।
শান্তি আর সম্পূর্ণতা কি এক বস্তু? আপনিই উত্তর দিন না?
আচ্ছা, রমলা দেবীকে জিজ্ঞাসা করবেন—তঁার কাছে আমার
উত্তর বন্ধক আছে। বন্ধকটা ছাড়িয়ে নেবেন।

আপনাদের সঙ্গে যুক্ত হবার স্বপক্ষে একটা যুক্তি আছে।
মৈত্রী-স্থাপনে ব্যক্তিত্ব ক্ষুণ্ণ হয় না, এটা জনতায় আত্মবিসর্জন

য়—সেই জ্ঞান বৈচিত্র্যও বজায় থাকে। ভিড় আমি সহ্য করতে পারি না। কিন্তু বন্ধুত্ব কি চাইলেই পাওয়া যায়? পূর্বে লিখেছি—পাওয়া যায় না। তবে তখনকার চাওয়া আর এখনকার চাওয়া এক নয়।

তখন পাইনি বলে আমি কাশী চলে আসি। এখনও আমি অসম্পূর্ণ, তবে অল্প ধরণের—কারণ আমার অনেক পরিবর্তন হয়েছে। তাই—আজ আপনাদের এখানে আসতে লিখছি। যদি সুবিধা হয় অবশ্য।

শাস্ত্র অতিশয় কনুকে ঠাণ্ডা, কণ্ঠিপাথরের মূর্তির মতন মনে হয়। পীগ্‌ম্যালিয়নের গল্প মনে আছে? এই মূর্তিকে কে প্রাণবন্ত করবে? আমার ধ্যানে যে জীবনদান সম্ভব সে জীবন ক্ষণস্থায়ী। পাথরের অন্তর থেকেও কম্পন আসা চাই, রোঁদ্যার ভাঙ্করের মতন।

দেখুন, প্রকৃতি পুরুষের সৃষ্টি নয়। দুইই অনাদি ও অনন্ত। ততএব তাদের সম্বন্ধেও তাই—অনাদি ও অনন্ত। তবু প্রকৃতি দেবীর প্রথম কম্পনের কথা কল্পনা করতে ভাল লাগে—গভীর রাত্রে নিশ্চিন্ত বনানীর মধ্যে বনদেবতার একটি নিঃশ্বাসে পাতাশিহরণের মতন। জাগরণ নয়, শিহরণ। জাগরণ পুরুষে সহ্য করিতে পারে না, আমি পারব না। জাগ্রত অবস্থা বড়ই স্পষ্ট, বড়ই খোলাখুলি—ইন্দ্রীয় তখন অতিশয় ক্রিয়াশীল।

আমি চাই সুষুপ্তি—তামসিক তন্দ্রা নয়, রাজসিক জাগরণও নয়। সেখানে সব আছে—নির্ঘাসের অবস্থায়। ঠিক নির্ঘাসও

অন্তঃশীলা

নয়, কুঁড়ির ভিতর কাঁদিছে গন্ধ—অন্ধ হয়ে নয়, বাইরের চোখ
বুজে, তৃতীয় নেত্র খুলে। কি মজা! লোকে ভাবচে ঘুমুচ্ছে!

শিবঠাকুরকে আমার বড় ভাল লাগে। রাবি বাবুরও লাগে।
বিদ্ঘাথরূপে নয়, রুদ্ররূপে নয়, হরপার্বত্যরূপে। নন্দলাল বাবুর
ছবিটা আমার বড় প্রিয়, great, great, great!

ঐ ছবিটা কি মৈত্রী সাধনের প্রতিমূর্তি নয়? কিন্তু নন্দী
ভূকী ওখানে নেই। আছে? অন্তরালে?

ইতি

খগেন্দ্রনাথ

পু:—রমলা দেবী কেমন আছেন? তাঁর জগ্ন মন ব্যস্ত
হয়। তাঁর কাছে রোজ যাবেন। উত্তর জেনে লিখে পাঠাবেন।

ইন্টার ক্লাসের ক্ষীণ আলোতে রমলা দেবী চিঠিটা পড়লেন—
ক্রমেই আলো ক্ষীণ হয়ে এল, হাত স্থির থাকছে না, চিঠির লাইন-
গুলো নড়ছে—লেখার ওপর পর্দা পড়ে আসছে...চক্চকে পর্দা
অব্রের মত—গাড়িটা বড়ই দুর্লভ, হাতটা নড়িয়ে দিচ্ছে—স্বপ্ন
তাই অত বোঝে...এক্সিনটা বড় হুস্ হুস্ শব্দ করছে...বোধ হয়
গাড়িটা ওপরে উঠছে—চড়াই বুঝি।

শেষ

